

Le Miroir des Nobles de Hesbaye

Jacques de Hemricourt

CH'EST LY NOVEAZ TRAITIIES ENCOMENCHIES PAR MANIERE DE CORONYKES PAR MOY, JAQUE DE HEMRICOURT, MANANT EN LA CITEIT DE LIEGE, FREIRE CHEVALIER A PRESENT DELLE ORDENNE DEL HOSPITALES SAINT JOHAN DE JHERUSALEM, L'AN DELLE NATIVITEIT NOSTRE SAINGNOR JHESU-CRIST MIL TROIS CENS ET CINQUANTE TROIS, ET PAR MOY MEISMES CONTINUEIS ET FINALMENT CONCLUS A TRES GRIEF PAINE, LABURE ET TRAVAILHE, L'AN MIL TROIS CENS NONANTE ET OWIT, LEQUEILE TRAITIET JE VOELH ESTRE APPELEIT LE MROIR DES NOBLES DE HASBAING..

En nom, delle sainte et indivisible Triniteit. Amen.

1. Veriteis est que ly plus noble et ly plus neccessaire choise qui soit à creatures humaines, ultre ses V sens corporeis, ch'est memoire. Et cascuns seit que nos ne poions avoir memoire des choses trespasée, se ce n'est par le recort des anchiens, qui les ont veüwes ou apprises à leurs a predecesseurs, ou se ce n'est par pointeur ou par escripture, qui est ly plus beauz et profitables experimens qui onkes fuist troveys; car gens perissent, mais s'ilh ont alcon bien mis en escript à leur temps, ilh puet porter profit et solas à cheauz azqueis teile escripture parvenrat après leur decés. Et par tant qu'il al à present pou de gens en l'evesqueit de Liege qui sachent cleirement recorder les anchiens stokages dont ly linaiges et les nations delle chevalrie de dit paiis, maiement de Hesbainge, sont estraites, et le mouteplieiment d'eaz par conjunction de mariage, et ainsy coment et par queile ocquison les morteile faites comenchont entre eaz, qui tos estoient d'on sanc, et les chevetaines cuziens prochans; et grans damages sieroit, se li nons de si grant nobleche, si grande proeche et rycheche qu'il at eüt en Hasbaing perissoit, ja soice qu'il y aiet à present petit remanant, dont ly pays est affloivis durement d'oneur, de forche, de sens, de parement et de rycheche, car, puis le temps de III ans ou environ dont chis traitiies fait mention, ilh at, le plus do temps, eüt continuelement en dit paiis V ou VI chevaliers demorans, qui parsiwoient les armes et l'oneur do monde et astoient tous ryches, eaz et leurs hoirs, dont à present assavoir l'an de grasce milhe CCC nonante owit, que chis traitiies fut parfaits et consumeis, ilh n'en y at nint LX, en queis ilh y at plusieurs qui n'ont cure de leurs corps traveilhier en armes, et des autres qui n'en ont nint bien le poissanche, si qu'en ce paiis plus qu'en nulle autre toute honneur de chevalrie et de gens d'armes est annichillée et declinée, et li forche des frankes vilhes ensachie et augmentée; et nequident grans damaiges sieroit, se li nons des bons qui trespasés sont, perissoit, et poroit encors possiblement avenir que ly nobleche teilement declinée soy poroit releveir et renforchier, et adont, et meïsme de present, prenderoient chilh qui de teille nobleche sont yssus grande plaisance et grant respirement de savoir de queile nation ilh sont estrais, et s'enforceroient plus de bien affaire: et c'est ly movemens qui m'at fait entreprendre de compileir chest ystoire et traitiet à grant travailhe, paine et sollicitude. Je, ly compileirs et ordineurs de cest ovre, que, puy le temps que parfaite cognissance vient en moy, ay mis m'entente par plaisante affection d'enquere auz anchiens la verité de ce que dit est, et moy suy en aulcuns pas radrechies auz coronikes delle grande engliese de Liege, et ay eut l'avantage d'alconnes anchienes escriptures, rolles et cedulles, qui astoient en mains de mes predecesseurs et sont après leurs decés en mes mains parvenuez, auzqueilez je adjoste grant foid, par tant que my dis predecesseurs, peire et oncles, ont tousjours par caze de leurs offices hanteit, compangniet et servit les saingnors, auzqueis ilh pooient avoir apris partie de ce qui toche à ceste mateire: ay tout ce qui gisoit en plusieurs partiez, remis et adjoing ensemble en on traitiet et volume,

avoek ce que je meïsmen en ay apris à vailhans et anchiens chevaliers et escuwers do pais de Liege, que miez que nus autres savoient recorder les nations des Hesbegnon, assavoir à monsangnor Waltier, dierain sangnor de Momalle de ce nom, à monsangnor Johan le Vies, voweit de Liers, à Bietran, son freire, à Ernut d'Oborne, à Johan de Chantremele, à Henry del Solier, à Hombier Corbiaul de Holegnoul, a Johan, son freire, et à plusieurs aultres; et ainsi je meïsmen en ay asseis veüt de mon temps. En laqueile oevre faisant, je ay oüt tres grande poine et labur, car je le comenchay l'an M CCC et LIII, que je astoye en l'eaige de XX ans, et furent XLV ans acomplis anchois qu'il fuist onkes à creature nulle publiies ne mostreis, par tant que je le voloie par loisier teilement corriger, anchois la publications, qu'il n'y awiest nulle visce, et aussy je astoie de mes offices tant et teilement empechiez que je n'y pooie vakeir continuelement, anchois passoit aulcune foys I an, II ou plus, que je n'y faisoie nulle labur. Et encors, se ne fuist ce que, alle entrée de mes anchiens jours, je moy mis al repouz et que, par solas et recreation, je rentrepris et rembrachaie ce que fait en avoie le temps devant, jamais par moy ne par autre n'awist ceste oevre esteit concluteit. Sy fay protestation que, à ceste ocquison, je ne veulhe mie encorir la malivolence et indignation de cheaz et chelles qui sont des linages deseurdis, qui chi ens ne seront point nommeis, car che n'est nint par envie, par ignoranche, ne por leur atargement, mais par tant que nus sens natureis ne suffieroit de savoir par nom et par sornom toutes les personnes et tous les hoirs marles et femelles determinéement qui, puy le terme de IIIc ans, sont estraites des linaiges deseurdis. Et avenrat en che meïsmen traitiet sovent foys que, d'une personne qui arat eüt VIII ou X enfans, je ne parleray que de III ou de IIII, car je n'aray point esteit des autres infourmeis; et, pour che, ne serat point chis traitiies vicieuz, car mies vaut que je en y mette moins par veriteit que plus par bourdes et par losenges, dont je avisse repredement. Et chis meïsmes traitiies porat bien venir en mains d'aulcune personne de cognissanche ou de plusieurs qui en soront plus avant: si le poront adjosteir, sains corrompre la mateire principaz, por ceste oevre abelir et engrandire.

2. Vous deveis savoir devaintrainement, por tant qu'il toche à ceste mateire, à cause delle diversiteis des blazons dont chi après sierat fait mention, que, ja soiche que d'antiquiteit aiet eüt grant nombre de bons chevaliers plains de grant proeche en la marche de Hesbainge, nequident ilh n'at nint IIe ou XII ans que ly plus des nobles de ce pais, assavoir chevaliers et escwiers, present arestéement leurs certaines ensengnes d'armes et blazons teiles qu'il et leurs hoirs ont de cely terme en avant porteit et portent de present; anchois predoient anchienement teiles ensengnes, jolieteis et envoizures qui miez leur plaisoient; et, quant ilh avoient à on fait d'armes, fuist alle werre ou al tournoy, porteitalcon blazon en parement, ilh portoiient autre foys d'on atre tout contraire. Et par tant qu'il n'avoient nint bien cognissanche li uns cuziens del atre, tantoist qu'il s'elongoient en quar ou en ve degreit de proismetit, si que services et linages falloient tantoist, ilh avisont, ly plus riches et ly plus poissans d'eaz, qu'ilh prenderoient fermement ensengnes et blazons, qui perpetuiement demoroient à leurs successeurs, et aroient certain cry alqueil chilh qui teile ensengne porteroient, aroient resort en tos fais d'armes, en la maniere qu'il en astoit useit en plusieurs autres pays. Ors avoit à chely lemps on proidomme lorennier, demorant à Viseit sour Mouse, qui fausoit selles et lorens et poindoit blazons de toutez maniers, qui astoit mult acointés des nobles de ce pais por son service; alqueile ly alcuns, qui voloient avoir ces permanables ensengnes, soy traient, et present et encargont celles qui miez leur plaisoient, et l'entreprennent de si estrangne guyse que chil qui astoient frers germains predoient leur blazons tous contraires et de diverses ensengnes et couleurs, ne say queile movement qu'il avoient, fours che que je croye qu'il ne voloient nient que nus d'iauz awist sor l'autre sangnorie, ains voloient cascuns d'eaz estre chief de sa branche, et ce vos appairat chi après, en capitle qui ferat mention de monsangnor Houwe de Lexhy; dont li comptes soy tairat à present et comencherat le fondement de sa mateire.

3. Ilh avient jadis, al temps que Henry li quars de ce nom estoit empereur des Romains et Obiers estoit evesque de Liege, après le mort del evesque Henry dit le paisible, assavoir l'an del nativiteit

Nostre Saingnor MC et dois ans, que uns chevaliers nommés Ottes demoroit en Hesbaing et astoit sires delle terre de Warfezée. Proidons et bon chevaliers estoit, riches asseis et parsiwans tous fais d'armes, et portoit une escut de geules à fleurs de lis d'argent. Chi chevaliers out dois fils Li ainsneis fut nommés Rause et ly autre Libier Soriaul. Rause ful bon chevaliers et Libier fut clers. Avient que messires Outtes morut et, après chu, ly dit messires Rause, se fis, morut ainsy sens hoirs, si que Libier soy partit del stude et fut sires de Warfizéez. Ilh prist l'ordes de chevalerie et acquist grans hiretaiges, et asloit de grans sans et de haut honeur. Adont avoit à Awir une chevaliers nommeis Michiet, qui astoit sires de Hermalles d'Awir, de Chamont et d'Engy, qui avoit une fis à chevalier nommeis Huwez, qui astoit haultement marieit al sereur le conte de Hosemont et portoit unne escut veriet contreveriet d'argent et d'asures. Chi messires Huwez avoit de celle damme une filhe nommée Agnès et, asseis toust après sa nativiteit, messires Michiet trespasat. Et adont ly dit messires Howe fist faer sour le riwe d'Awier trois molins, et, pour cely cas, fut il appeleit le Riche Moulmier d'Awier, et perdit le nom de Huwez.

4. Quant damoyselle Agnès fut en age de marieir, ly dis messires Libiers de Warfezéez, qui astoit ses voysins prochains, le requist en Mariage. Donée ly fut, et misent ensemble tres grans hyretaiges. Après ce, trespasat ly dis messires Houwes d'Awir, sy que toutes ses terres succedont al dit monssaingnor Libiert de Warfezéez, à caze de sa dicte femme. Chis conjoins soy amont loiialment et furent teilement fortuneis qu'il acquisent ensemble les wilhes et saingnoriez de Genefe, de Lymont, de Lexhi, d'Awans, de Warous, de Lonchins, et plusseurs atres vilhes, et bin XII^o boniers de terres en terroirs des vilhes deseurdites; et orent une filhe tant soiloment, nommée Alys. Quant ly dis conjoins orent esteit une parlie de tempz en mariage, la dicte dammie Agnès deviat, dont ses dis maris out sy grant destresse de cuer qu'il en fut pres mors de duelh. Et quant ilh fut rapaisenteis par les proiers de ses amis, maiement de sa belle filhe, qui tenrement le confortat, et qu'il amoit utire mesure, ilh vovat que jamais armes ne porteroit, anchois sieroit priestres et prieroit tout son vivant pour l'arme de sa ja dicte femme. Il soy fist ordineir et celebroit en sa chapelle de Warfezéez, dedens sa fortrece, et dedens ses atres fortreces, quant ilh y estoit, asseis sovent messe et l'office divien, et disoit ses hoires canonias et priioit, et priat continuelement et devotement tot sou vivant pour l'arme de sa ja dicte femme; ne, por ce, n'avoit ilh nint amainrit l'estat de son hosteit, anchois y avoit si grant repaire com à cely qui astoit chief et souverains de son lynage, et assy teile charge de chiens et d'oysez, que ch'estoit merveilhes de ce qu'il despendoit et donoit pour Dieu. Ilh faisoit sa ditct filhe par ses maistresses nourir en grant estat. aprendre et ensengnier tos embatemens que nobles damoyselles doivent savoir: de overeir d'or et de soie, de lire ses hoires, remans de bataillhes. joweir az eskas et az tables; et en toutes autres bones vertus estoit elle endoctrinée et ensengnie, teilement que on ne pouwist aysiement trover sa pareilhe, et, avoekts ce elle estoit belle et gratieuse en tous estas. Sy l'amoit ly peire tenremenl et avoit. entour lée, grant recreation de ses doleure.

5. A cely temps estoit uns nobles chevaliers nommeis messires Rases alle Barbe, freires al conte de Domartien en Gouielle, qui portoit en son escut on confanon à trois pendans et, al desoir, trois annelés mais je ne say queiles les coleurs estoient, par tant que je n'en suy nint bien informeis; nequident je ay veut en chire l'euprinte del seal monssaingnor Oton jadis saingnor de Warfezéez, dont ilh fui taiions, lyqueis seaz pent a une chatre que ly covens delle Vaz Nostre Damme at delle saingnorie de Momelette, qui parvint à la dite abie de part seure Alis sa sereur, jadis abbeisse do dit liu; en queile seal ilh at on confanon si que dit est. laqueile chatre termine en la daute de l'an mil dois cens et quarante dois.

6. Chis chevaliers cheyt ne say pour queil forfait en l'indignation de roy Phelippe de Franche qui out à femme damme Ysabeal, filhe le conte Badewien de Haynau, et fut chis chevaliers banis et dekachiez do royaume sy soy partit à tres grant avoir et warnis de grant nombres de joweaz, de chevaz et de mayniiez, et vint sojourner à Huy. Là ilh tenoit grant hosteit et avoit brakenirs,

fakenirs, chiens et oyseaz à planteit; si aloit sovent en riviere et en gybiere pour ly solassier. Si avieit une fois qu'il estoit do matin aleys en gybiere en la terre de Warfezééz et, environ l'eure, de dyneir, ilh oyt soneir la clokette delle levation en la capelle do chasteal de Warfezééz; sy chevachat celle part por veior le Sacrament et, luy deskendut, ilh entrat en la capelle, en laqueile ly capelains do dit saingnor de Warfezééz celebroit la messe, et ly sires astoit mult reverenment en sa fourme en grant devotion. Quant ly levation fut faite, ilh regardat decoiste ly, sy perchuyt le chevalier estrangne et l'envoiiat tantost prier à dyneir deleis ly, et chilh l'otroiiat; si que, après messe, ly sires de Warfezééz le prist par le main et le reciiuyt mult honorablement, en ly demandant de son estat, et, tout parlant, ilh le conduisit en la salle de sa fortece Sy comandat à drechier les tables et que ly belle Alis, qui astoit tout ses desduys, fuist aminée pour le chevalier estrange à fiestiier. La damoyselle vient tantost al commandement son peire, et, com bien ensengnie, elle s'adrecht vers le chevalier et gratieusement le fist binvengnant, et s'acointat de ly meürement et sagement, com bin endoctrinée. Ly bons sires de Warfezééz les asseit ensemble, et fiestiat grossement fe ses provisions et de grant liieche de cuer l'estrangne chevalier et sa mainie, tant qu'il en fut toz marvelous. Et affien que vous sachiez veritablement pourquoy on dist que chilh de Warfezééz, dont chis proidons fut ly premiers stokages, issirent d'on prestre et d'on moulmier, che fut pour ly meïsmes, par tant qu'il avoit pluseurs molins et qu'il estoit devenus prestres par la raison devant escripte; si le nomoit on le Riche Prestre et le Riche Moulmier. Et assi voelhie savoir que ly plusseurs de ceas de Warfezééz, tant ly marles com les femelles, ont une de leurs orelhes trawée, teilement que on bouteroit ens aysiement une awilhe sains grevanche; et che vient delle costie do dit monssaingnor Rasse alle Barbe, qui semblament avoit l'oreilhe trawée, ensi que par les anchiens de l'unk à l'autre at esteit recorderit.

7. Quant ilh furent leveis do dyneir et ilh furent esbanoiiés à pluseurs embatemens, ly dis messires Rasses remierchiat le saingnor de Warfezééz et sa filhe delle honeur et bonne compaignie qu'il ly avoient faite, si prist congiet et soy partit d'eaz mut cortoisement; et, al departir, ly sires ly priiat mut à certes qu'il le visentaist toutes fois que ses chemiens l'aporteroit celle part, car on ne ly pooit faer miez à plaisier que de ly visenteir et faire bonne conpaingnie; et ilh, qui ja estoit sopris del amour la dicte damoyselle Aely, ly otroiiat bonnement, et tant y repaiirat que, quant ilh furent infourmeis ly uns del atre, que mariages soy fist entre le dit monssaingnor Rasse alle Barbe de Domartien en Goielle et la dicte damoyselle Alys. Et asseis tost après ce, li dis messires Rasses fist faire asseis pres de Warfezééz une tour et bon demoraage environ, et le fist appelleir, en ramembrance de ses predecesseurs et de son lynage, Domartien.

8. Avient cel an meïsmes qu'il orent on fil nommeit Libier Sural, après son gransaingnor de Warfezééz, et, environ dois ans après, ilh orent on atre fil nomeit Houwe, après son gransaingnor monssaingnor Houwe d'Awir. Chis chevaliers messires Rasses fut mult preus et parsiwoit les armes à grans despens, car mult riches estoit, tant que sy enfans amendarent forment de forche et de beateit, si qu'il pooient biu armes porter. Adont prisent conseilhe ensemble ly syres de Warfezééz et messires Rasses, sires de Domartien, ses genres, qu'il feroient les dois freires deseurnomeis prendre l'ordenne de chevalerie et qu'il leur assenneroient terre pour mineir leur estat, et feroient entre eaz leurs parchons, si qu'il sieroient wardeis de dyscort. Sy assennont à monssaingnor Libiert, l'ainsneit, toutes les terres qui venoient anchienement de ses gransaingnors de part sa meire, assavoir Warfezééz, Domartien, Harduémont et toutes les vilhes delle terre de Warfezééz, la voverie de Momalle, la vilhe de Momelelte, de Puchous, de Novilhe, de Frelouz, toute la terre de Hermalles, d'Awir, de Hautepenne, d'Engixh, et ce qu'il y appendoit; et messires Houwes, ly jowenes, out en son assennement toz les acquestes, assavoir Lexhi, Lymont, Geneffe, Warous, la voverie d'Awans et pluseurs atres bins: voir, une partie en apparelhiet pour leur estat à maintenir, et le surplus après le decès de leur dit peire et gransaingnor. Et cargont al ainsneit de porter le blazon de leur peire, assavoir le confanon dont je ne say les couleurs, mais je croy que ce faist d'or à on confanon à trois

pendans de goyles, ensy que li coutes de Bolonge les port à present; et puet bien estre choze possible que ly conte de Bolongne et ly contes de Domartien estoient adont freires ou d'on prochain lynage. Et semblament ilh cargont à monssaingnor Houwe, qui estoit plus jovenes, qu'il portaist les armes do dit saingnor d'Awir, son taion, assavoir vairriet d'argent et d'azure. Et vorent qu'il criassent andois Domartien, et ilh le fisent volentiers, pour le reverenche do noble sanc dont ly dis messires Rasses estoit estrais.

9. Messires Libiers Soreaz deseurdis out trois fis, assavoir monssaingnor Otton, monssaingnor Renart et dans Everar. Chis dans Everars fut abbés de Saint Loren et avoit tres grande devotion à saint Thomas deC antorbie, qui asseis nouvellement avoit esteit martiriziez et, après ce, canoniziez par le pape Alixandre, assavoir l'an mil C. LXXI; sy fist à Saint Loren faire et consacrer on alteit en l'onneur de ly, et soy fist ly dis abbés pardevant cely alteit ensevelir. Et ly dis messires Renars, ses freires, morit sains hoir, si que toute la dicte saingnorie do jadis monssaingnor Libier Sural demorat à monssaingnor Otton.

10. Messires Ottes deseurnomeis fut marieis et out IIII fis. Ly ainsneis fut nomeis messires Rasses, sires de Warfezeez et de Domartien; ly secons, messires Thomas, qui fut sires de Hermalles; ly tirs, messires Ernus, sires de Harduémont, de Hauteppenue et d'Awir souveraine; et ly quatreymes out à non messires Ystasses, qui fut sires de Noefchasteal, en la terre de Dollehen et de Haneffe; et orent chs IIII freires une sereure mariée à Walhen.

11. Vous deveis savoer que chis messires Rasses et tous sy hoirs, en deskendant de ceste branche de droit lingne, qui ont esteit saingnors de Warfeséez, ont longement vyskeit et ont esteit durement anchiens anchois leur trepas, juxes adont que ly saingnorie de Warfezeez parvint à monssaingnor Thiry, dierainement sangnor de Seraing et de Warfezeez, qui morit jovenes. Et par tant que ly devaintrains ont tant viskeit, chil qui de ceste branche sont yssus, assavoir do dit monssaingnor Rason en deskendant, sont durement proymes et en hautes cleis de proismeteit demoreis à tous chez qui sont yssus des autres branches de Warfezeez, car ly sires de Warfezeez, ly sires de Momale, messires Wilhelmes de Pepenges, messires Rasses, saingnor de Warous, Libiers. Wilhelmes, et leurs autres freires et sereurs, qui furent enfans do saingnor de Warfezeez qui out vint enfans. dont chi après sierat faite mention, qui estoient en plaine vie quant je commençay ce present traitiit, sont demoreis en quar greit de proismeteit à tous chez qui des atres branches, assavoir des atres freires de Hermalles, de Harduémont, de Noefchasteal et de leurs hoirs, sont parvenus; desqueis ly plus grant partie de tos chevaliers, escuwiers et gens de linage delle evesqueit de Liege sont estrais, si qu'il vos porat chi après apparoir, qui sont avaleis et deskendus à chez de droit stokage devant escrips, ly alcons en VIIe, VIIIe ou IXe degreit, et ly alcons plus avant, et sont sovent fois remarieis les uns auz atres, dont jamais ne sieroit memore, se retroveit n'estoit en ce present traitiit. Ors retournons à nostre mateire.

12. Messires Rasses, promerains sires de Warfezeez de ce nom, outdois fis et chinqz filhes, assavoir monssaingnor Otton, monssaingnor Ernut, soure Alis, abbeisse delle Vaz Nostre Damme, et une autre qui fut damme de Bretonbur, en la terre de Warfezeez, se fut mariée à on vailliant banneresse do lynage de Lemborg et de Hazedale nommeit monssaingnor Heyneman de Schonehov, atrement d'Ays, qui portoit les armes de Lemborg, assavoir d'argent à on lyon de gueles, et en la poytrine do lyon trois tortelés d'argent; et les atres furent mariéz ensi que chi après sierat declareit.

13. Chis messires Rasses, sires de Warfezeez. fut ly promirs qui encargat à porteur de geules à fleurs de Iys d'argent, ensi que ses ayves, ly promerains Ottes de Warfezeez, les avoit portéz; et ay oût dire les anchiens que ce fut par tant qu'il estoit elongiez de son linage et de ses amis de France, desqueis ilh n'avoit nul service; sy mist jus le blazon al confanon, si que dit est.

14. Messires Ottes, ses ainsneis fis, fut sires de Warfezééz et out dois fis, assavoir monssaingnor Rasson, qui est ensevelis en capitle des Freires Meneurs à Liege et qui trepassat l'an mil cc. xx, et monssaingnor Watier de Momale, qui fut en sornon appeleis ly bons Waufflars de Momale, qui à .son temps fut ly uns des trois plus preuz dez Hesbengnons; et ly autre dois preuz estoient messires Wilhelmes Malclers, ly bons sires de Hemericourt, et ly sires de Haneffe, andois banereces. Chis trois furent conpaingnons d'armes ensemble. Et ly bons bastars de Wezemale, nommeis messires Frankes, fut leurs conpains, et fut assi bannerés. Azqueis quatre conpaingnons ilh avint pluseurs hautes honeurs en pluseurs fais d'armes, entre lesqueiles ilh y out dois notables qui sont bin à recorder: car, quant ly roys Charle de Sezilhe out prins bataille encontre ly roy Pire d'Aragonne de C chevaliers encontre, lyqueis nombre fut amainris de L encontre L, et ilh out par tos paiis mandeis les plus preuz, chis quatre conpaingnons y furent et demoront en l'elextion des L, et furent armeis le journée pour deffendre l'oneur de roy de Sezilhe, ja soice que ly roy d'Aragonne defalist delle journée, et ce fut l'an mil IIc IIIx et dois et ly seconde notable honneur fut VI ans après, assavoir alle bataille à Woron, quant ly dus Johans de Braybant desconfit l'archevesque de Colongne, le conte de Guelres et le conte de Luxemborg, car adont retinve ly dus de Braybant ces quatre chevaliers pour son corps et son honneur à wardeir. Ors retournons à nostre mateire. Chis bon sires de Momale avoit petit patrimoine et n'avoit nul hoir, si qu'en ses anchiens jours ilh vout spanir ses pechies; sy soy rendit az Freires Meneurs à Tinlemont. Là ilh trespasat en grant devotion. Et do dit monssaingnor Rausses. sangnors de Warfesééz, secon de ce nom, et delle damme de Herypont en Haynau, qui fut sa femme, yssirent dois enfans, assavoir le damme de Daveles et messires Rasses, ly tirs de ce nom, qui out à femme une genty damme, filh do saingnor de Virve, de laqueile ilh out diies enfans, assavoir monssaingnor Rasson alle Petite Boke, qui fut sires de Warfezééz et de Herypont et qui morit sains hoir, monsaingnor Waltier de Momale, monssaingnor Wilhelme de Pepenge, Robier de Tilhirs, Johans de Warfezééz, dis ly Rosseuz, Gerars et sires Ottes, canones de Soingniez en Haynau, damme Ysabeal, femme monssaingnor Johan, saingnor de Langdris, le viez, damme Maha, nonne delle Vauz Nostre Damme, et damoyselle Maroie, qui fut femme à Renar, saingnor d'Abééz, escuwiers. Chis messires Rasses fut veves delle damme de Virve; si soy remariat alle filhe monssaingnor Wilhelme, saingnor de Warous, qui n'avoit plus d'enfans, et estoit engenrée en une genty damme, filh do saingnor de Wassebert, qui avoit esteit femme à saingnor de Hers; de laqueile ilh out assi X enfans, assavoir monssaingnor Rasson, saingnor de Warous, Wilhelme de Warous, Libier de Moge, Waltier de Moge, le femme Johans, saingnor de Lamines, une autre qui fut femme Alixandre del Tour de Wandres, une atre nommée damoyselle Oede, qui fut femme Johans de Mes, le hallier de Liege, damme Marie, nonne delle Vauz Nostre Damme, une atre nonain alle Pais Dieu, et une autre nonain à Saint Viteur deleis Huy. Chis sires de Warfezééz, qui out ces XX enfans de dois femmes, viskat environ cent ans, et pluseurs de ses enfans en viskont IIIxx et plus, et alcoins moins; tos lesqueis enfans je ay veut de mon temps, et en viskoient encors pluseurs et ly plus grant partie, quant chis traitiieis fut commenchiez, et encors al present en y at alcons.

15. Genalogie delle damme de Daveles, qui fut sereur al bon saingnor de Warfezééz qui out les xx enfans deseurdis, et fut filhe de monssaingnor Rasson, saingnor de Warfezééz, secon de ce nom. - Chest dame fut mariée à monssaingnor Warnier, saingnor de Daveles, en la conteit de Namur, qui estoit bannerés et fis de monssaingnor Thibaut d'Yelezééz saingnor de Lonchamp, de secon mariage engenreis en damme Juwette. Sereure le bon et le preu saingnor de Hemericourt nommeit monssaingnor Wilhelme Maclerc.

16. Chis sires de Daveles enkargat les armes et le cry de Hemericourt, pour l'oneur do dit saingnor de Hemericourt, son oncle, qui morit sains hoir marle, assavoir de geules à une bende d'argent, et mist jus les armes de Yelezééz, que ses peires et si freires do promerain mariage portoient assavoir

d'argent à on comble endonteit de geules. Mais, à present, ly sires de Daveles, nommeit messires Warnirs, at de sa nobleche laissiet le cry de Hemericourt, ja soice qu'il detengne le blazon, et crie Daveles, qui n'at ne cry ne armes, si qu'il at az armes et à toute le linage fait grant tort. De cesty saingnor de Daveles et delle filhe le saingnor de Warfezééz. issirent messires Warniers, sires de Daveles, et messires Thibaus d'Yelezééz. Ly dis messires Warnirs fut marieis trois fois. Promirement, ilh so, mariat à une genti damme del ducheit de Bar et en out on fil nommeit monssaingnor Godefroid, saingnor de Daveles, qui soy mariat alle sereur Sandrar de Hemmetines, tres vailhans et tres rade escuwier; s'en est yssus messires Warnirs, qui regne à present. Secondement, soy mariat li dis sires de Daveles à une noble damme de Franche, dont ilh yssit ly meire monssaingnor Clarembal d'Atrive, qui out la filhe natureile do duk Johan de Braybant derainement devieit, et une vailhante damme, qui fut femme à monssaingnor Riffilar, le bastar de Flandres; mais messires Clarembaz et ceste damme ne furent nint d'on peire. Tircement, soy remariat ly sires de Daveles à une genti damme, sereure à Lowy de Vyane et à monssaingnor Johans de Vyane, canone de Liege, lequeile Lowy ly contes Wilhelmes de Namur à present regnans fist jadis ochire. Et de ce derain mariage yssirent messires Guys de Daveles, sires de Lingy, damme Blanche, femme à monssaingnor Waltier de Jouplou, et ly femme do bon et do noble monssaingnor Wilhelme, castelain de Montegnys et saingnor de Bilrevelt, qui tant mavaisement et abominablement fut murdris en son hosteil à Liege, que cascuns seit. Et quant ly viez sires de Daveles fut trespasseis, madamme de Vyane, sa femme, reprist à maryt le bon saingnor de Sombreffe, dont ilh out plusieurs enfans, et puy morit. Et li sires de Sombreffe soy remariat alle damoyse de Wyvelkove, en Wastefale, qui estoit canonesse de Nyvelles, dont ilh out plusieurs enfans.

17. Ly dis messires Thibauz out une filhe nommée Agnès, qui fut mariée à Johan de Molembais, saingnor de Linsmeal, en Braybant, dont ilh yssit uns bons chevaliers, messires Ernus de Molembais, sires de Linsmeal, qui fist le casteal de Linsmeal et acquist grans hiretages à son temps; lyqueis soy mariat alle sereur monssaingnor Waltier de Mapont, chevalier, et en out on fil chevalier et dois filhes, qui sont en grant estat d'oneur et de rychesse. Ly fis est nommeis messires Johans et est sires de Linsmeal, et at nouvellement pris à femme une des filhes monsaingnor Rasson delle Riviere, saingnor de Nedrelintes. Ly une des sereurs est mariée à Rasse de Rochefort, saingnor de Herimeis, en Haynau, et en at des hoirs. Et ly tirche at monssaingnor Thiry, saingnor de Momale, en Hasbaing; s'en at des jovenes enfans. Et n'ay encore atre information de chez qui do dit monssaingnor Thibaut yssirent.

18. Puis que nous avons parlé de monsieur Tibault d'Ielesèéz, il nous faulte retourner à monsieur Godefroid de Daveles, chevalier, filz à monsieur Warnier de Daveles, de son premier mariage. Le dit mesire Godefroid de Daveles, fil aigné do dit monsieur Warnier, engenrat en la sereur Sandrar de Hemmetines monssaingnor Warnier, saingnor de Daveles, viskant à present, lyqueis prist à femme la sereur monssaingnor Rasson delle Rivire, saingnor de Nedrelintes, dont ilh at une fillhe tant soilement, mariée à on bin gentilhe homme, messire Henri, saingnor de Roley, fil jadis monssaingnor Gyerlake de Bolan, qui morit en serviche le duk Wincelar a de Braybant, alle bataille à Bossewilre. Et quant la promeraine femme do dit monssaingnor Warnier fut trespassee, ilh reprist en mariage la femme do jadis monssaingnor Ghierlake de Bolan, qui astoit filh monssaingnor Ghierlake de Moujardien, castelain de Waremme, et meire al dit Henry de Roley, laqueile morit sains hoir. Et tircement, ilh est remarieis tot nouvellement, assavoir l'an mil IIIe nonante quatre, à damme Johenne, sereure à monssaingnor Stochair de Forvie, qui devantrinement avoit esteit femme à monssaingnor Godefroid de Vilhe, dit de Blehen, chevalier, gran bailhier delle conteil de Namur.

19. Item, delle filhe do viez saingnor de Daveles do secon mariage, issit ly sires d'Atrive, qui morit dierainement, et fut nommeis Clarembaz, lequeil je veys tant beaz et gratieux en tous fais d'armes et de tous atres embatemens qu'ilh n'avoit son parelhe; et tenoit la terre d'on banerés, mais ilh estoit de

sy fol gouvernement que, anchois son trepas, ilh despendit le sien. Si fut piteusement murdris entre Lowang; et Bruxelles, et ses peires avoit assi esteit murdris en son hosteit à Liege. Chis derain messires Clarembaz out des enfans, fis et filles, delle sereure naturée madamme de Braybant, qui demoront povres; si n'en cognoy que dois, assavoir Clarembal, qui est biaux et jovenes escuwiers, manans à present deleis son ante, madamme la ducesse, et sa sereure, qui fut mariée à Robiert, fil Hellien de Lautines, dont ly hoirs sont à present .

20. Messires Guys, sires de Lingny, prist à femme la damme de Sombrefe, assavoir cely de Wyvelkoven, qui avoit esteit seconde femme do bon saingnor de Sombrefe, qui fuit forment riches et mult preuz, laqueile werison ly hoirs ont mal wardée. Chest damme astoit mult gentilh femme, et fut filhe à saingnor de Wyvelkoven et sereure à monssaingnor Floren de Wyvelkoven, promirement evesque de Mostiers, en Wastefale, et maintenant evesque d'Oultreit. De ceste damme yssit messires Warniers, qui est à present sires de Lingny, qui est asseis nouvellement marieis alle filhe monssaingnor Renart de Berghes, chevalier, et n'en at nul hoire.

21. Item, madamme Blanche, sereure do dit monssaingnor Godefroid, qui fut femme à monssaingnor Waltier de Jouplou, at une filhe tant soilement, nommée damme Conygon qui fut promirement femme à monssaingnor Johan de Skendremale, chevalier, esquevin de Liege et castelain de Mointegnies, doqueil ilh est uns beaz fis nomrneis Wilhelmes, qui est encors mult jovenes, mais ilh prist l'ordene de chevalerie quant Johan de Beawire, esleus de Liege et contes de Louz à present, passat Mouze, et ly universiteit de Liege avoek ly, et ardirent planteit de wilhes en la dukeit de Guelres et prisent Exhre sor le Roure, assavoir l'an mil IIIe nonante et sept, en septembre; et soy mariat ly dis messires Wilhelmes de Skendremale asseis tost après alle filhe do saingnor de Jache et de Hyrghes. Et secondement est madamme Conigon, sa meire, remariée à monssaingnor Adam, saingnor d'Ouppey et de Harsta; se en est une tres belle filhe, qui est encors giovane d'eage.

22. Item, delle atre sereure, qui fut femme do bon et de wailhant monssaingnor Wilhelme, castelain de Montengnis, sont dois fis, messires Johan de Bilrevelt et messires Godefrois; lyqueis messires Johan n'at roie de terre que ly castelains tenist, et ch'est par miracle de venjanche de Dieu, par tant qu'il soy consentit alle murdre de son jadis peire. Chis messires Johan, en temps qu'il estoit encors riches, prist à femme la sereure do saingnor de Diest, et maintenant, en ses veveis, est ilh remarieis à une des filles monssaingnor Johan Brant, freire natureit à madamme de Braybant, et n'ay nint encureit de demander s'ilh at hoirs, car par son pechiet n'at ilh nint deservit de estre mis en memoire des bons. Item, messires Godefrois, ses freires, est marieis à Tinelemont et est sires de Grace, en la conteit de Louz, et at on fil et dois filles, dont ly une est nonne en Orient, en la dit conteit de Louz, et ly atre fut mariée à messire Jaque de Gotham l'an mil IIIe nonante sept. Cest damme, meire à ces enfans, qui fut mult belle damme, soy remariat après l'obbit do bon castelain, son, marit, al saingnor de Marbais, en la conteit de Namur; s'en est uns fis, nommeis messires Ystasses de Marbais, chevaliers.

23. Nous avons declareit ordinéement la generation parvenue del damme de Daveles, qui fut sereure à bon saingnor de Warfezéez qui out les xx enfans. Ors retournerons al declaration de ceaz des xx enfans deseurdis qui furent seculiers.

24. Ly ainsneis des xx enfans deseurdis, che fut messires Rasses alle Petite Boke, qui viskat pres de IIIxx et x ans et morut sains hoirs. Et par tant, à ly falit ly droit lingne de Warfezée, car ce fut ly dierains sires de Warfezéez portans les droites armes entires, par tant que ly saingnorie rentrat, après son decès, encoiste alle femelle par mariage, si que ly nons delle saingnorie et les armes sont perdues, si qu'il apparat chi après.

25. Veriteis est que, quant les mortel werres de ce pais orent tant dureit entre cheaz d'Awans et de Warous et leurs ahierdans, qui tos estoient issus d'on ventre, si qu'il vous apparat chy après, que les parties furent folées et durement affloivis, ilh fut, pour troveir voie de pais, traitiet et fais uns mariage de monssaingnor Ystasse, fil do bon monssaingnor Thiry de Haneffe, saingnor de Serainge le Casteal, qui estoit bannerés et riches de VIm roiaz par an, et delle filhe monssaingnor Waltier de Momale, freire germain do dit monssaingnor Rasses alle Petite Boke, Iyqueis messires Waltirs ne pooit à sa dicte filhe, qui si hautement et sy richement avoit troveit son .astallement, rins doneir qui granment vasist, car c'estoit uns povres chevaliers al repart de monssaingnor de Serainge; et assi ilh avoit de son promerain mariage une filhe mariée à monssaingnor Ernut de Corwaremme, qui devoit avoir tout son hiretaige; et ceste dierenne filhe estoit d'on veve et d'onne weve, assavoir de ly et delle vielhe damme de Gudighoven, qui avoit esteit filhe saingnor Jakeme Chabo de Noevis, esquevin, et citain de Liege, car ilh estoient andois veves quant ilh soy present par mariage, si que ly filhe n'avoit point de proprieteit d'yretaige; et nequident, on ne pooit troveir melheur ne plus segur chemien de la dicte pais à faire que par cesty mariage, par tant que ly sires le Serainge estoit adont ly plus forte capitaine delle coistie d'Awans et ly sires de Momales et si freires estoient ly plus poissans des ahierdans de Warous. Pourquoi ly sires de Warfezééz deseurnomeis, freires al dit monssaingnor Waltier, dotans les peris et considerans qu'il n'avoit nulle hoir, donnat à sa dicte cusine en mariage, à avoir après son decès, sa dicte terre de Warfezééz et de Herypont, et, parmy ce, soy fist ly mariage et ly pais des linages l'an de grasce mil trois cens et trente chink, en temps d'esteit. Chis messires Ystasse, fis do dit saingnor de Seraing, fut uns biaz chevaliers, fors et appiers; mais ilh et sa femme morirent durement jovenes, anchois qu'il parvenissent à terre, car ly viez sires de Seraing, ses peires, et ly sires de Warfezééz et ly sires de Momale, dont ilh atendoient les successions, les sorviskont andois; mais ilh demorat d'eaz trois si beaz enfans marles que on ne powist troveir leur parelhes, assavoir: Thiry, qui puis fut sires de Seraing, et de Warfezééz, et assi de Wailhain de part madamme sa femme; Waltiers et Ystasses, qui furent andois chevaliers et morirent mult jovenes sains hoirs, donl che fut piteis et damages, si que toutes leurs terres retournont al dit monssaingnor Thiry le jovenes. Chis messires Thiry prist à femme le filhe do noble corrageuz saingnor d'Agimont et de Walhain, dont ly sires de Rochfort avoit l'ainsnée sereure, et de cest damme sont dois filhes, assavoer: damme Johanne, femme de noble homme monssaingnor Gerart d'Enghien, castelain de Mons en Haynau et saingnor de Havereche et de Byeme, qui, de part madamme sa femme, est à present sires de Seraing et de Warfezééz, et madamme Marie, femme à monssaingnor Enghelbiert delle Marche, saingnor de Lovirva, qui, de part madamme sa dicte femme, est saingnor de Walhain. Ly dis sires de Havereche at on fil chevalier, nommeit messire Gerar, et assy une filhe; mais chis enfans ne sont encors marieis. Et ly dis messires Engelbiert n'at nus enfans. Ensi appert que, par caze de ce que messires Rasses alle Petite Boke, sires de Warfezééz, morit sains hoir et que ly terre parvient alle femelle, que ly nons et ly terre sont amortis, tant comme az armes, et parvenus en mains et poissance de gens d'atre pais. Et ja soice que noz aiiens devantrinement parleit de plus giovane filhe le saingnor de Momale, par tant que ly mateire le requeroit a caze delle terre de Warfezééz, nos ne metterons nint pour che en oblit la promeraine et ainsnée filhe do dit promerain mariage le dit saingnor de Momale, car c'est, à temps presens, une des plus fortes branches qui soit en dit lynage de Warfezééz. Ly ja dis messires Waltier, nommeis sires de Momale et secon fis do bon saingnor de Warfezééz qui out les xx enfans, si que dit est, portoit de geules à flours de lis d'argent, à on labeal à v pendans d'azure. Ilh soy mariat en linages de Hermalles, assavoir alle filhe monssaingnor Lambiert de Chantemierle, chevalier, qui fut peire à monssaingnor Rasson, monssaingnor Ystasse et Johan de Chantemierle. Do dit sainanor de Momale et de ceste damme de Chantemierle fut une filhe tant soilement, qui fut mariée à monssaingnor Ernut de Corwaremme, saingnor de Nyle, chevalier, qui estoit fis delle sereur la vielhe damme de Ghudeghoven, laqueil damme de Ghudeghoven fut, après ce, femme al dit saingnor de Momale, si qu'il soy contint chi devant. Chis messires Ernus de Corwaremme portoit les armes de Bierlouz: d'erminez à dois faxhes de geules. Ilh out, delle filhe do dit saingnor de Momale, I fil et une filhe laqueile fut mariée à

monssaingnor Franke de Kersbeyke, manant à Tinelemont, et morit sains hoir. Et ly fis fut nommeis messires Ernus de Corwaremme, com ses peires et son taiion. Ilh fut sires de Nyle et acquist al abbeit et covent de Sen Loren deleis Liege la hauteure et justiche de Momale, dont sy devantrains avoient esteit awoweis tant seulement, quanteal qu'il fussent nommeis saingnors pour leur noblece; si que ce fut ly premiers sires de Momale de tous ceaz do lynages de Warfezééz. Et cest acquest, je, qui estoie de son conseil et à ses dras, ly consilhay et enortay à faire, et travelhay à ce que fait fut, et en fis toutes lettres à ce necessaires, car ilh m'amoit el creiit tres grandement, com chis qui estoit douz, cortois, humblez et debonaires, et warnis de bonnes viertus. Chis promerains sires de Momales soy mariat à une tres vailhant damme et de grant gouvernement, qui avoit esteit filhe de monssaingnor Thiry d'Argenteal, saingnor d'Ennetines, en Condros, freire al bon monssaingnor Renart, saingnor d'Argenteal, qui weriat à chiaz de Liege, de laqueile damme ilh out chink fis et trois filhes, qui sorviskont peire et meire, car ilh morirent juvenes, assavoir: monssaingnor Waltier, archydiakene de Haynau, et monssaingnor Wilhelme, andois canones de Saint Lambiert et de pluseurs autres englieses, monssaingnor Ernut de Corwaremme, saingnor de Nyle, monssaingnor Thiry, saingnor de Momale, et monssaingnor Renart, saingnor d'Ennetines, chevaliers. Et, des trois filhes, fut ly une mariée à monssaingnor Burea de Boneffe, se morit sains hoir; ly seconde, à monssaingnor Wilhelme de Hamale, saingnor d'Oudeur; et ly tyrche, à Johans. saingnor de Brus et de Plainnevaz, fil de monssaingnor Rasson de Berlouz, avoweit de Sclachins, chevalier.

26. Item, deveis savoir que ly dis monssaingnor Ernus de Corwaremme, ainsneis fis do promerain saingnor de Momale, soy mariat alle fille de monssaingnor Gerart, saingnor de Berlouz, chevaliers; mais ilh morit asseis juvenes, dont ce fut grant damage pour tot son linage, car ilh tenoit grant estat de chins et d'oysez, ilh servoit volentiers ses amis et estoit richement monteis, et estoit amiables et cortois, et tenoit le melheur et plus costable hosteit des Heysbegnons. Doqueil sont demoreis des bez enfans, qui sont juvenes d'eage, et desqueis leurs linages porat estre durement amendeis.

27. Item, li dis messires Thiris, sires de Momale, soy mariat al filh d'on bon chevalier nommeit monssainagnor Ernut de Molembais, saingnor de Linsemeal; s'en at dez bez juvenes enfans. Et ly dis messires Renars, ses freires, sires d'Ennetines, soy mariat à damoyseile Johanne, filhe de secon mariage monssaingnor Giele Surllet, jadis chevalier, qui nouvellement est trepassée sains hoirs. Item, delle damme d'Oudeur, leur sereure, est demoreis uns fil, bez enfes et gratieus qui est al temps presens ly plus riches enfes à marieir qui soit en nostre paiis. Et l'atre sereure at do dit Johans de Brus des bez enfans, qui sont encors juvenes d'eage. Desqueis hoir marles et femelles, à present demoreis juvenes des dis enfans de Momale, porat encor estre tos releveis el ensachiez ly anchins lynage de Warfezééz devant nommeis.

28. Et par tant que je ay chi devant parleit des dois sereures, filhes saingnor Jakemme Chabot, dont ly une fut damme de Ghudeghoven et ly atre damme de Corwaremme, je vous feray savoir queis fut ly dis sires Jakes Chabos, ja soice que point ne fuist do dit linage de Warfezééz, mais por acontir les proismeteit qui sont entre pluseurs persones vailhantes, qui n'ont point de cognissance ly uns delle atre. Chis sires Jakes Chabos fut durement riches et poissans en la citeit, et astoit esquevins et grandement creüs et binaimeis. Ilh portoit d'or à trois chabos de gueules. Ilh prist à femme damme Renewis, filhe monssaingnor Gerar d'Oyxhen, freire à saingnor d'Oxhen; s'en out on fil tant seulement, nommeit monssainanor Gerar d'Oxhen, qui fut canones à Saint Lambiert à mon temps. Puy morit ly damme d'Oxhen, et sires Jakes soy remariat à Ysabeal, filhe a Gerar de Herkes, escwir, engrenée en damme Babache, filhe saingnor Everar del Lou, esquevin et vinier de Liege. De laqueile Ysabeal ly dis sires Jaques out dois filhes bonnes et belles, nomméez les damoyseilles de Noevis: ce furent les dois sereurs devant escriptes, dont ly une fut damme de Ghudeghoven et, après ce, damme de Momale, et ly atre fut damme de Nyle, si que dit est. Chest damme de Ghudeghoven fut promirement mariée à Lowy de Herkes, escuwier, se morit ly dis Lowys sains hoir;

secondement, al viez saingnor de Ghudeghoven, s'en yssit messires Henrys de Ghudeghoven, chevaliers, qui clochoit, et assi ly bonne damme de Hautepenne. Chis messires Henry fut tuweis al commencement des wers qui furent entre l'evesque Englebier del Marche et son pais de Liege. Chis messires Henry ly jowenes prist à femme le filhe d'on wailhant et d'on sage escuwers nommeit Ernut d'Oborne, doqueile je suy bin acointés; s'en yssirent messires Henrys, sires de Ghudeghoven, chevaliers, esquevins de Liege maintenant vivans, et Ernus, ses freires, sires de Meirs et de Boley, dont ysont ly hoirs, desqueis en ce meïsmes tratiet sierat fait mention. La filhe do viez saingnor de Ghudeghoven fut mariée à monssaingnor Waltier de Harduémont, saingnor de Hautepenne, qui fut hardis et de grant corage; doqueil et de ses hoirs sierat chi après fait mention, en capitle parlant de chez de Harduemont. Encors soy mariat la vielhe damme de Ghudeghoven, tirce fois, al dit monssainanor Waltier de Momale, dont ly femme monssainanor Ystausse de Seraing yssit, ensi que chi devant vous puet plus cleirement apparoir.

29. Item, ly atre filhe saingnor Jakeme Chabot fut mariée à Ernut de Cowareme, saingnor de Nyle, escuwer, qui estoit cuzins germain à Waltier de Corwaremme, manant à Nandren, lyqueis Waltiers avoit fame d'avoir esteit ly plus fors et ly miedres escuwers de nostre pais; et, en veriteit, je le veys et le hantayalconnes fois, et avoit bien l'age de IIIxx et x ans, mais de tieste, de visage et de tos membres, ilh avoit bin le semblan d'avoir esteit wailhant homme en sa jovente. De dit Ernut de Corwaremme et delle damoyse de Noevis yssirent messires Ernus de Cowareme, qui out la filhe do promerain mariage monssaingnor Waltier de Momale, et une damme nommée Katerine, qui fut mariée al bon monssaingnor Renart d'Argenteal, qui weriat a chiaz de Liege. Et par tant que des hoirs do dit monssaingnor Ernut est chi devant fait mention, nos en ferons silence et parlerons de chez d'Argenteal. Chis bons et wailhans sires d'Argenteal out trois fis et dois filles, assavoir monssaingnor Renart, qui morit sains marieir, monssaingnor Johan, saingnor d'Awelhonriue, monssaingnor Gerart, saingnor d'Argenteal, le damme de Renneberchen, femme monssaingnor Warnier, saingnor de Renneberghen, et le damme de Temples, femme à monssaingnor Waltier delle Sasse le jovene.

30. Messires Johan d'Argenteal, sires d'Awelhonriu, soy mariat al filh monssaingnor Henry, saingnor de Groules l'anneit; s'en sont dois filles, dont damme Maha, ly ainsnée, fut mariée à monssaingnor Johan, saingnor d'Orgo et de Barce, chevalier; s'en est uns jowenes fis, qui nouvellement at pris l'ordenne de chevalerie, et est nommeit messires Johan d'Orgo, Et quant la dicte damme Maha fut veve, elle soy remariat à monssaingnor Rasson, saingnor de Lamynes; s'en est une jovene filhete. Et ly atre filhe do dit monssaingnor Johan d'Argenteal est mariée à monssaingnor Conrar de Schoenevorst, saingnor d'Elsot; s'en sont ly hoirs, dont ly une des filles do dit monssaingnor Conrar est mariée al jovene monssaingnor Wilhelme de Horion, chevalier, et ly atres ne sont encors astaleis.

31. Item, messires Gerars, sires d'Argenteal, fut hardis et entreprendans ultre mesure et sains pawour. Je savoy bin ses maniers, car ilh m'amoit de grande amours. Ilh soy mariat haultement à une tres noble damme, ainsnée filhe de noble et poissant homme, monssaingnor Thiry, saingnor de Huffalize, de Rochy et delle Flamengerie; et en sont dois enfans, assavoir: messires Johans, sires d'Argenteal, qui at pris à femme la filhe monssaingnor Wilhelme de Horion le viez, et monssaingnor Renars, qui est sires de Huffalize et qui s'est marieis alle filhe do saingnor de Brandeborch et de Houbines.

32. Item, delle damme de Renneberch est uns fis, nommeit messires Crestians de Renneberch, et une filhe, mariée à monssaingnor Henry, saingnor de Groules et delle Heyde. Chis messires Crestians est marieis alle filhe do dit saingnor de Groules, son seroge, qu'il avoit eut de sa promerain femme; s'en sont ly hoirs.

33. Item, del dammes de Temples et do dit monssaingnor Waltier delle Sasse sont dois filhes, dont une fut mariée à monssaingnor Daniel de Palant, chevalier, doqueil est une filhe mariée à monssaingnor Adan de Berghes. Et li meire, après l'obit monssaingnor Daneal, soy remariat à monssaingnor Robiert de Rinswale, saingnor de Grevenbrouk, chevalier, dont yssont plusieurs enfans. Et ly autre sereur est mariée à monssaingnor Adan de Kerkehem, chevalier; s'en est une filhe, mariée à monssaingnor Wilhelme, saingnor de Hamale et de Monfor, chevalier.

34. Ors retournons à nostre principaul mateire de Warfezééz, ch'est auz freires et sereurs germains do dit monssaingnor Waltier de Momale, do promerain mariage le saingnor de Warfezééz qui out les xx enfans. Ly secons fis do dit saingnor de Warfezééz, après le dit monssaingnor Waltier, fut nommeis messires Wilhelmes de Pepenges et fut marieis al filhe Fastreit de Bierlouz, engénrée en damme Agnès, qui fut sereurs à monssaingnor Pire de Blehen, laqueile damme Agnès reprist à marit, après le decés do ja ditte Fastreit, monssaingnor Gerar de Blehen; s'en fut tant soilement messires Godefrois de Blehen, sires d'Abééz. Do dit monssaingnor Wilhelme de Pepenges et de sa femme furent pluseurs enfans, assavoir Rasses, Johans, Wilhelme et Fastreit, lyqueys Johans et Wilhelme sont mors sains hoir; et y at quatre sereurs, dont ly une fut mariée à monssaingnor Gilhe delle Tour de Hanut; s'en est Johan delle Tour, qui at à femme le filhe Wilhelme d'Atyen de Montengnéz, esquevin de Liege; et ly autre sereure fut mariée à Ameyle de Mohiens, dont ilh sont pluseurs enfans; et ly tirce, nommée Johanne, est canonesse de Mostiers sor Sambre; et ly quarte fut canonesse là meïsmes, se soy mariat ultre le greit de ses amis à Johan Hoxien de Blarey. Et Rasses, ly ainsneis, est marieis à Saintron; s'en sont ly hoirs.

35. Item, Robiers de Tilhiers, tirs fis do saingnour de Warfezééz do promir mariage, fut marieis en Haynau asseis pres de Nyvelles; et en sont pluseurs enfans, dont Robiers, maintenant vivans, est issus delle ainsneit, et at à femme la filhe monssaingnor Gierlax de Bolan, saingnor de Roley, et y at une atre freire, nommeit dan Gerar, qui est moynes de Saint Loren; mais je ne say l'estat des atres.

36. Item, Johans de Warfezééz, dis ly Rossez, soy mariat à une sage et walhante damoyselle nommée Juwette, filhe Colay de Gemeppe sor Mouze, autrement de Bomale, et n'avoit ly dis Colay plus d'enfans. Desqueis Johan et damoyselle Juwette yssit messires Rasses de Gemeppe et sa sereure, damoyselle Aely, [emme Houwet de Bassines, viskant à present. Chis messires Rasses fut et morut marissaz delle evesqueit de Liege, et soy governat largement et de grant stoffe, en servant ses saingnors et en parsiwans tous fais d'armes; et estoit douz, cortoiz et tousjours en lieche, si qu'il n'avoit de sa terre son pareilhe en ce paiis. Ilh fut marieis dois fois: la promerain fois, alle filhe monssaingnor Johan Moreal de Horion, de laqueile ilh est une filhe nommée Jouwete, mariée à monssaingnor Henry, saingnor de Ghudeghoven et de Hozemont, dont mention est faite en l'ystore de monssaingnor Waltier de Momale, on petit chi devant. Et do dit monssaingnor Henry et damme Jouwette sont dois fis, Henrys et Rassekins. Secondement, fut ly dis messires Rasses marieis à damme Katerine de Fanchon, filhe monssaingnor Johan Obiert, de Huy, dont ilh est une filhe tant soylement, nommée Jouwette assi, qui at à mary Ernut, freire à monssaingnor Henry de Ghudeghoven deseur escript, si que ly dois freires ont dois sereurs; et at ly dis Ernus des enfans, s'en at une filhe nouvellement mariée à on des enfans Johan d'Yergnéz.

37. Item, do dit Houwet de Bassines et delle sereure monssaingnor Rasses de Gemeppe n'est ilh nulle hoir. Et est assavoir que ly ja dis Johan de Warfezééz morit al bataille de Domartien, et Gerars, ses freires, assi, qui n'avoit nulle hoir, et assi morut sires Ottes, ly canones.

38. Item, de damme Ysabeal, ainsnée filhe do saingnor de Warfezééz de premier mariage, issit tres helle et puissante generation, laqueile at esteit de mon temps en tres grant prosperiteit, et

maintenant ch'est tout consumit et sont les armes perdwes. Elle fut mariée à monssaingnor Johan de Langdris, qui morit alle bataille à Domartien, qui portoit de geules à on lyon d'or, bilheteit d'or. Et ses peires, ly viez messires Johans, qui out à femme la filhe d'on borgois de Liege nommeit saingnor Gerart des Canges, fut ly promiers de ceuz de Langdris qui encargat ces armes, car ilh portoient en devant les armes de Courtreche: quarteleit d'or et de geules; mais ilh servit le saingnor si bien de Castealvilain, en Franche, qu'il ly donnat ses armes et grans binfais avoeks, et le retint à compangon. Et, puis cely temps, ont chilh de Langdris porteit les armes de Castealvilain et ont crieit Langdris, qui adont n'avoit ne cry ne armes. Do dit monssaingnor Johan de Langdris et delle filhe le saingnor de Warfezeez issirent messires Johans, messires Gerars et messires Thibauz, chevaliers; lyqueis messires Johan et messires Thibauz furent esquevin de Liege; et en yssirent assy Rasses, canones de Saint Lambiert, et Libiers, canones de Sains Denis, qui furent leurs freires. Chis chink freires furent tres belles personnes et orent une sereur mariée à monssaingnor Johan, saingnor de Wannerode et de Binkehem, qui estoit do noble sanc de Dyeste, et estoit freire al saingnor de Lintres, qui morit sains hoir; doqueil saingnor de Lintres ly dis sires de Wannerode perdit le succession parmy lettres de Bruxelles qu'il donnat sor le sien à on de chez delle Rivire, azqueis li saingnorie de Lintres est demorée juxes à present, et en sont chil de Wannerode deshyreteit, qui portent d'argent à dois faixhes de sable et crient Dyest. Do dit saingnor de Wannerode yssirent messirs Gerars, sires de Wannerode, et messires Abiers de Wannerode, canones de Saint Lambiert, qui fut ly plus beaz clers de ce paais, et croy qu'il awist des sereurs. Do dit monssaingnor Gerar yssit messires Johans, dierainnement sires de Wannerode, qui out à femme la filhe monssaingnor Johan Brant, jadis freire natureit de madamme de Braybant, dont ly hoirs sont à present, et est ly ainsneis nommeis monssaingnor Gerar. Car ly dis messires Johan de Wannerode est trespasseis; et madamme sa femme soy remariat a monssaingnor Johan Maxhereit, saingnor de Rode, qui en devant avoit eut à femme la filhe monssaingnor Lambier, saingnor d'Ouppey et de Harsta; et astoient la dicte damme et messires Maxhereit si proismes de dois costeis, assavoir de Haneffe et de ceaz de Scoenhoven, qu'il ne soy pouwissent avoir par mariage sains especial dispensation, ensi qu'il vous porat chi après apparoir, en traitiet de monssaingnor Hayneman de Schoenhoven et assi de ceaz de Haneffe. Ors revenrons à chink fis do saingnor de Langdris, engereis en la filhe do saingnor de Warfezèez.

39. Ly ainsneis, nommeis messires Johans, fut marissaz delle evesqueit de Liege et fut marieis à damme Johanne, sereur monssaingnor Johan Polarde, chevalier, esquevin de Liege. Si morit sains hoir, en temps qu'il estoit prevost de Builhon et asseis ainsneis d'eage.

40. Messires Gerars de Langdris soy mariat à Saint Tron nient solonc son estat, et ont une filhe tant soilement, mariée a monssaingnor Johan, saingnor de Duras, dont ly hoirs sont à présent.

41. Messires Thibauz, ly tirs freires, esquevins de Liege, prist à femme la filhe Everar de Cheval, dont ilh yssirent messires Thibauz ly juvenes, qui morit sains hoir, et dois filhes, assavoir damme Ysabeal, qui fut femme à monssaingnor Henri de Rocourt, el ly autre nommée damoyselle Maroy, qui fut mariée à Henrion de Bourseut, cuzien do dit monssaingrior Henry. De la dicte damme de Rocourt est uns fis tant seulement, nommeis Ernus de Rocourt, sires de Rocourt et de Petit Leez, lyqueis at des enfans delle filhe Lowy Braybechon de Mirmorte. Et de la dicte damoyselle Maroye sont assy des enfans, qui ont petite patrimone selonc leur estat. Secondement, soy mariat ly dis messirs Thibauz alle filhe Rassekin de Haccourt, qui estoit veve de Johan Maton, et en yssit ly juvenes messires Johan de Langdris, qui morit sains hoir et qui out à femme la filhe do saingnor de Bierlouz. Et ensy appeirt cleirement qu'en petite espasse de temps, ly nons et ly blazons et les grandes richeches de Langdris sont teilement amortiez qu'il n'en est hoirs nus demoreis legitimes, qui porte les armes ne le sornon de Langdris; car ly dis Ernus porte, de part son peire, d'argent à fleur de lys de geules. à on quartier de Langdris. Et assy ly prope terre de Langdris est partie; dont ly une parchon parvenrat en mains estraingnes al defours do dit lynages, dont c'est piteis et damages.

42. Nos avons declareit la generation delle damme de Langdris, qui fut filhe ainsnée de promerain mariage le dit saingnor de Warfezéez. Ors dirons de damoyselle Maroy, sa sereur germaine do dit premier mariage; car ly atre sereur, damme Maha, fut nonain alle Vaz Nostre Damme. Chest damoyselle Maroy fut mariée al bon Renart, saingnor d'Abééz, filh monssaingnor Lambier d'Abééz, chesalier; et en furent VI enfans, trois fis et trois filles, assavoer Lambier, Waltier et Rassekin, lyqueis Rassekin morit jovenes sains hoir; et les sereurs furent nommée damoyselle Aeli, damoyselle Gertrud et damoyselle Maroie.

43. Lambiers, sires d'Abééz, prist à femme damoyselle Maroie, sereur Houwet de Bassines, cely Houwet qui out le sereur de bon monssaingnor Rasses de Gemeppe, et fut cest damoiselle d'Abééz tant belle et plaisante que c'estoit merwelhes. Chis Houwés et damoyselle Maroie furent enfans Houwechons de Bassines, engenreis en damoyselle Ozilhe, filhe Henriet de Rollouz, qui fut uns parfaies escuwiers et de grant service. Quant Lambier d'Abééz et sa dicte femme furent assembleis par mariage, ilh orent une filhe tant soilement, nommeit Maroie, qui fut belle et bonne et gratieux, que messires Godefroid, fis monssaingnor Gerat de Blehen, prist en mariage. Desqueis sont à present VI mult beaz enfans, trois filles et trois fis, assavoir: Gerars, qui est ainsneis, tres beaz et tres fors escuwiers, mais Diés l'at blechiet del ouwe, s'en est durement atargiez; ly secons avoit nom en batesme Houwés, mais, sor son chemien, quant il alat visenteir le Saint Sepoulcre en Jherusalem, ilh soy fist baptizier en flu Jordan et soy fist nommeir Godefroid, après son bon peire, et prist l'ordenne de chevalerie là meïsmes; ly tirs fis, appeleis Johans, et est sires d'Abééz; et des filles, est ly ainsnées nommée Angnès, ly seconde Marie, et ly tirce Johanne.

44. Messires Godefroid est marieis alle filhe Rasse de Rozut, mais ilh n'en at encors nulle enfant. Gerars n'est point marieis, et Johans soy mariat l'an mil IIIe et nonante owit à Francheise, filhe de Gilhe de Hemericourt, escuwier.

45. Item, la dicte Angnès est mariée à on escuwier de Tinlemont, nommeit Henry de Berghes, et en at des enfans. Ly seconde, nommée Marie, est mariée à Liege al dit Gilhe de Hemericourt, qui en devant avoit eüt à femme damoyselle Angnès de Lavoir, meire de la dicte Francheise; doqueil Gilhe la dicte damoyselle Marie de Blehen at dois filles, Ydelette et Marie, qui sont jovenes d'eage. Et ly tirce filhe monssaingnor Godefroid de Blehen, nommée Johanne, est mariée à Waltier de Wynnes, fil jadis Pietre de Herbais, escuwir; s'en est une giovane filhette.

46. Quant Lambiers d'Abééz fut mors, damoyselle Maroie, sa femme, soy remariat à Lowy de Worous, dont ilh est uns fis appeleis Houwés, qui at planteit d'enfans delle filhe Kachar de Lymon, qui out petit patrimoine.

47. Item, li dis Waltier, secons fis do dit Renart d'Abééz et freires do dit Lambiers, est trespasseis sains hoir legitime et sains marieir.

48. Damoyselle Aely, filhe Renart d'Abééz, delle damoyselle de Warfezééz, fut mariée à Wilhelme, saingnor de Grametines, escuwier; doqueil elle out on beal fil, nommeit Wilhelme. Elle fut veve et soy remariat à uns bin neit escuwier, nommeit Ystasses de Preit, aultreinent dit de Rahirs, qui assi astoit veves delle filhe monssaingnor Henry, saingnor de Emevilhe, qu'il avoit eut à femme et dont ilh avoit une belle filhe, nommée damoyselle Aely. Se fisent chis dois veves on mariages assi de leurs dois enfans, pour mettre leurs terres ensemble; mais ilh, chis dois enfans, morirent sains hoir. Et Ystasses et damoyselle Aely d'Abééz, nommée ly damoyselle de Grametines, orent en leur derain mariage une filhe appellée damoyselle Maroie, qui fut ly plus belle de visaige qui fuist en ce païs, mais elle clochoit de dois costeis; se fut mariée à Johan delle Coir, saingnor de Ramelhouz, fil jadis

monssaingnor Weri delle Coir, chevalier, delqueis ilh est uns fis nomeis Johans, qui est asseis deliez de ses membres et juvenes d'eage.

49. Damoyselle Gertrud d'Abééz, filhe Renart d'Abééz, fut mariée à Johan de Marbais, esquevins et borgois de Huy, dont ilh at trois filhes, assavoir damoyselle Ysabeal. femme Thomas Roiier le Lombar, saingnor de Noewilhe, deleis Huy, dont sont ly hoirs, assavoir Pires et damoyselle Gertrud; et ly seconde filhe est appellé Maha, nonne delle Wauz Nostre Damme, et ly tirce est nommée damoyselle Maroie, femme Ernut de Gennetines, dit de Forvie, qui at pluseurs enfans.

50. Damoyselle Maroie, ly tirche filhe Renart d'Abééz, fut mariée à Johannien de Mons, deleis Grametines, en Condros; dont ilh est uns fis nommeis Goffiens et dois filhes, dont ly une est mariée à Bertran Frankar de Momelette, et ly atre en Condros; s'en sont pluseurs enfans. Et chis Goffins est marieis alle filhe monssaingnor Wilhelme d'Eure, chevalier, et en at dois filhes, dont ly une est mariée à Robier, fil Wery Malcoir de Rocourt, et ly atre à Gerar de Romont, en Condros.

51. Vos esteis, par la declaration devant escripte, bin informeis des diies enfans le saingnor de Warfezééz, do promier mariage, maiement des seculers. Chi après vous serat descripte ly generation de ses atres enfans seculers de secon mariage.

52. Ly ainsneis des enfans le dit sangour de Warfezééz, do secon mariage, assavoir delle filhe monssaingnor Wilhelme, saingnor de Warous, fut nomeis messires Rasses et portoit de geules à fleurs de lis d'argent, à on quartier de Warous de part sa meire, assavoir de geules à on lyon d'or, et fut sires de Warous et avoweis d'Amaingne, car ilh out à femme la filhe do voweit d'Amaing, dont messires Bastiens Boyleawe, jadis sirez de Grace, out la parelh sereur; et, de ceste damme, out ly sires de Warous pluseurs enfans, assavoir monssaingnor Rasse, qui est à present sires de Warous et Hautepenne, Ernut, avoweit d'Amaing, et Wilhelme, qui est mors sains hoirs.

53. Item, en fut pluseurs filhes, dont ly une fut mariée à Renier, saingnor de Denééz; s'en sont dois filhes: ly ainsnée est mariée à messire Robier de Soy, chevalier, et ly atre à Johan de Chantemierle. Ly seconde filhe monssaingnor Rasse, saingnor de Warous, fut mariée à Ottar de Marzines de Warnant, dont y sont ly hoirs. Et ly tirche est mariée à Pirar de Surice, borgois de Namur; s'en est une filhe nommée Ysabeal, mariée promirement à Jakemart de Forvie, escuwier, et secondement à monssaingnor Johan de Seraing, saingnor de Houten et d'Onche, chevalier, mais elle n'at encor nul hoir. Item, est ly quarte sereur mariée à Johan de Leuze, et ly atre est nonne al Vaz Nostre Damme Et, des atre, je n'ay nul le connaissance. Chis messires Rasses, ly juvenes sire de Warous maintenant vivant, at à femme la filhe ainsnée do bon monssaingnor Waltier, saingnor de Hautepenne, mais ilh n'en at nulle hoir. Item, Ernus, avoweis d'Amaing, freires al dit saingnor de Warous et az sereurs deseurnommées, at esteit marieis dois fois, mais ilh n'at encor nul hoir, ja soice qu'il en puist encor avoir.

54. Ly secons fis do saingnor de Warfezééz, do secon mariage, fut nommeis Wilhelmes de Warous, qui prist à femme la filhe do sage et suffisant escuwier Badewin de Holongne, jadis esquevin de Liege, qui avoit une des onze filhes de Wellerous. De cest damoyselle out ly dis Wilhelme de Warous pluseurs enfans, assavoir Rasse, Wilhelme, Johan, Ottelet, et quatre sereurs, dont ly une fut mariée à Waltier le Bron de Flemale, ly atre à Johan d'Oha de Rocourt; ly tirce fut mariée en la terre de Mouhault, mais je ne say en queil lieu, et ly atre est nonne al Vaz Nostre Damme.

55. Ly dis Rasses, ainsneis fis do dit Wilhelme, est sires de Warous, et est de grant sens et de grant richeche. Ilh fut promirement marieis à damoyselle Maroie, filhe monssaingnor Jakemme Chahot, chevalier, maiieur et esquevin de Liege, et en out uns fil de tres bonne condition, qui morit en la fleur

de son eage, sains hoir, Si que toute sa terre retornat à son dit peire. Et quant ly dis Rasses fut veves de sa dicte femme, ilh soy remariat à damoysele Angnès, fille Wery de Lavoir, citain de Liege, dont ilh est uns fis nomeis Wilhelmes, qui, al Saint Sepulcre, at nouvellement pris l'ordenne de chevalerie et est marieis, après ce, al filhe monssaingnor Engelbiert de Hacourt, saingnor de Hermalles, et ont des jovenes enfans.

56. Wilhelmes, ly secons fis Wilhelme de Warous, est marieis alle filhe Johans de Ramey, et est siens ly casteaz de Ramey de part sa femme, dont ilh at pluseurs enfans, assavoir trois fis et pluseurs filhes. Ly ainsneis est nommeis Wilhelmes et est marieis alle filhe Johan le Proidomme de Gemeppe; et ly atre est nommeis Johan, qui est marieis alle filhe Henry Polarde de Saint-Johanstrée, qui, en devant, avoit esteit femme à Henry Houweneal; et ly tirs, nommeis Rasses, est moyne de Saint Loren. Et, de leurs sereurs, Je ne say ly nons; et assi lesalconnes d'elles n'ont nint, de leur astallement, uzeit de conseilhe de leur peire ne de leurs amis; sy n'en feray nulle compte.

57. Johans, ly tirs fis Wilhelmes de Warous, secon fil do dit saingnor de Warfezéez, prist à femme la filhe Oulry delle Fontaine, de Saint Servais, dont ilh at pluseurs enfans, dont ly uns, nommeit Wilhelmes, est rendu en l'ordenne Saint Johan, desoz le maistre de Chantrainnes; ly atre fis est nommeit Johans, et ly une des filhes est mariée à Johan de Kopongne, fil delle sereur Thonon Colletar, de Gemeppe sor Mouze; et, des atres enfans, je n'ay nulle acointanche.

58. Ottelés, ly quars fis Wilhelme de Warous, fut marieis à damoysele Johanne, filhe ly jovene monssaingnor Johan Boyleawe de Mons, chevalier; mais ilh morit sains hoir, et sa femme soy remariat à Gilhe, fil de moy, Jakemme de Hemericourt, compositeur de ce tratieiz, et morut anchois do dit Gilhe, sains hoir qui à eage parvenist.

59. Item, delle filhe Wilhelme de Warous l'anneit, qui fut mariée à Waltier le Bron de Flemalle, est une filhe, mariée à Johan, fil jadis Piron de Ramey, et demoire à Lonchins; s'en sont ly hoirs.

60. Et delle atre filhe do dit Wilhelme de Warous, mariée à Johans d'Oha, est une filhe nommée Johanne, à present mariée à Thonart, filh jadis Thonar, garchon de Lonchiens, engereit en la sereure monssaingnor Joban le Polen d'Aleure; et en sont ly hoirs.

61. Ly tirs fis le saingnor de Warfezéez, do secon mariage, fut nommeis Lybiers de Moges, dis de Sefawe, qui soy maria alle filhe Gilhechon delle Noewilhe, qui out à femme la sereur Johan Martéal de Mirmorte, saingnor delle Noewilhe, en Condros. Et, de ceste femme, out ly dis Lybiers trois fis et une filhe, assavoir Rasse, Lowy et Wilhelme. Chis Wilhelmes est mors sains hoirs. Rasse at à femme la filhe Baduwrin Paniot de Sains Servais, le jovene; s'en at on fil, et en avoit une filhe, qui fut mariée et morit sains hoir.

62. Ly dis Lowys soy mariat en Condros alle filhe Wilhelmes d'Abéez, dit de Vileir en Condros; s'en at dois fis et une filhe. Et sa sereur est mariée à Badewien de Hermalles; s'en est une filhe, mariée à Johan, fil Johan de Denwilhe, qui fut et morit prevost de Builhon.

63. Ly quars fis do saingnor de Warfezéez, de secon mariage, fut nommeis Waltier de Moges et fut marieis dois fois ou trois, et out gran nombre d'enfans de ses femmes, dont pluseurs en sont moirs sains hoir. Ly ainsneis de ses fis fut nommeis Rassekins et ly atre Johans; et fut Rassekins marieis à Dynant, et en sont ly hoirs; et assi ly une de ses filhes fut mariée à Clossekin de Benne, qui estoit fis delle damoysele de Burache, femme do dit Waltier, sy que ly peire et ly filhe orent la meire et le fil; lyqueis Clossekin en at pluseurs enfans, marles et femelles, dont lyalconns sont marieis et ont pluseurs enfans. Et cognoy une des filhes do dit Waltier, do dierain mariage, qui est bonne et

honeiste damoyselle, mariée à Liege, à maistre Henry de Colongne, l'orfevre, qui en at planteit d'enfans, et une atre, qui at on pottier d'estain manant sor le Pon d'Ilhe, dont ysont ly hoirs. Et ly dis Johan de Moges at assi des enfans.

64. Ors retournons az filhes dou secon mariage le jadis saingnor de Warfezééz. Ly ainsnée des filhes le saingnor de Warfezééz do secon mariage fut astalée à Johan, saingnor de Lamynes, escwier, dont ilh sont quatre fis et trois filhes, assavoir messires Rasses, sires de Lamynes et d'Oley, Thomas, Wilhelmes et Johan de Foseit; et, des trois sereurs, ly une fut mariée à monssaingnor Anthoine le Blavier, chevalier, ly atre à Godefroid de Brevoules, et ly atre à Johan de Jodongne de Lantremeng.

65. Ly dis messires Rasses de Lamines fut marieis trois fois: premiers, alle filhe Johan le Ryan de Latines; secondement, alle sereur monssaingnor Wilhelme de Horrion, et de ces dois femme ne sont nulle hoir; et tirchement, à damme Maheal, filhe jadis monssainnor Johan d'Argenteal, et jadis femme monssainnor Johan, saingnor d'Orgo et de Barche, chevalier, de laqueile est une filhelte asseis jovene d'age.

66. Item, do dit Thomas sont plusieurs enfans, dont ly ainsneis est nommeis Johan Thomas; s'est marieis alle filhe Henry de Blehen, escwier; et at ly dis Johan Thomas une sereur, qui, promirement, fut mariée à Henry Haweal de Bovegnistier, s'en at une filhette, et, secondement, est mariée à monssaingnor Johan le Clokier, chevalier, esquevin de Liege et de Huy, et at donneit sa filhette à monssaingnor Wilhelme, fil do dit monssaingnor Johan. Encors at ly dis Johan Thomas une atre sereur, qui tot nouvellement est abesse delle Pais Dieu; item, une atre, mariée al jovene castelain de Stirs, et en sont ly hoirs. Et de Wilhelme de Lamines sont plusieurs enfans. Et Johan de Foseit morit sains hoir. Item, de cely sereur qui fut mariée à monssaingnor Anthone le Blavier, chevalier, qui fut une tres belle damme, issit une filhe tant soilement, mariée à Waltier de Froidcourt, dont mention sierat chi après, en la genalogie cheaz de Hozemont. Et des atres dois sereurs, mariées à Godefroid de Brevoules et à Johan de Jodongne, sont plusieurs enfans.

67. Ly atre filhe do saingnor de Warfexééz, do derain mariage, fut mariée à Alixandre delle Tour de Wandres, et orent plusieurs enfans, qui ont mal wardeit leur patrimoine, sy ne puelent servir leur amis; dont ly uns est nommeis Rassekins, ly atre Alixandre, el ly atres Wilhelmes; et, do sorplus, je n'ay nulle cognissanche.

68. Item, ly atre filhe seculiers do saingnor de Warfezééz, do dierain mariage, fut nommée damoyselle Oede, et fut mariée à Johan de Mes, le hallier, dont ilh sont trois sereurs. Ly ainsnée soy mariat sottement à on jovene homme de Viez Waleve, qui al dit Johan servoit à cely temps; s'en sont ly hoires powres et petitement astaleis. Ly seconde fut mariée à Badewien, fil monssaingnor Badewien de Sains Servais, chevalier, esquevin de Liege, et en sont trois fis et une filhe, assavoir Badewins, Johans, Alixandre et Aelis. Ly dis Badewins at une straingne femme, delle mairie de Bois le Duke, que messires Johan de Biernamont avoit tenu en songnetaige, et l'espozat al dierain à caze de plusieurs enfans qu'il avoit de ly. Et ly dis Johan, freires al dit Badewien, est marieis alle filhe Giles Malhar de Liege. Ly dis Alixandre n'est point marieis, et la dicte Alys est mariée à Watelet. fil jadis Gerart de Chier de Seliens. Et damoyselle Katerine, tirce filhe de jadis Johan de Mes, soy mariat assi sains conseilhe d'amis à Thomas de Payves, fil jadis Lambier de Payves, qui le sien forfist et vendit soitement, al damage de ses hoirs; s'en sont chink enfans, assavoir Lambier, Thomas, Katerine, Marie et Oudelette; laqueil Marie est mariée à Somme en Famenne, à Pirelot, fil Thomas de War, et en at des enfans.

69. Ors aveis oût veritablement recorder toute la generation do sainnor de Warfezééz et de ses xx enfans, qu'il out de dois mariages, et tos chiauz qui sont de ceste droite lingnie al jour d'uy vivans,

assavoir l'an mil IIIc nonante oweit, si avant qu'il sont de ma cognissance; lyqueis sires de Warfezéez, nommeis Rasses, tirs de ce nom, avoit esteit fis monssaingnor Rasson, secon de ce nom, engenreit de monssaingnor Otton, saingnor de Warfezéez. Sy retournerons à monssaingnor Ernut, freirc do dit monssaingnor Otton, et à ses sereurs. Et deveis savoir que messires Rasses, promerain de ce nom, sires de Warfezéez et peires de monssaingnor Otton, de monssaingnor Ernut et des v sereurs, portat, et portont sy hoires marles en deskendant, de geules à fleurs de lys d'argent, et cascons sa differenche ensy que bon ly sembloit, car ly dis messires Rasses promerains fut chis qui mist jus les armes de son peire et prist les fleurs de lys; et assi tos sy trois oncles, dont chi après sierait faite mention, assavoir ly sires de Hermalles, ly sires de Harduémont et ly sires de Haneffe, present les fleur de lys, mais che fut d'atres coleurs, si qu'il vous porat chi après apparoir.

70. Messires Ernus de Warfezéez deseurnommeit soy mariat à Huy, à une veve, sereur d'on riche borgois de Liege nommeit saingnor Lambuche d'Ilhe, et elle avoit devantrainement esteit femme Ponchar l'Uzerier de Huy. Ly dis messires Ernus et sa dicte femme orent un fil et une filhe. De ceste filhe, je ne say nint bien qu'il en avient. Mais ly fis fut nommeis messires Rasses de Seraing, chevaliers. Chis messires Rasses out trois filhes. Ly promeraine fut mariée à monssaingnor Gilhbar de Greis, en Braibant, dont Chilh de Greis sont yssus et ly sires de Lintres, de part sa meire. Ly seconde filh monssaingnor Rasse de Seraing fut mariée à Lens, en Braibant; s'en sont yssus chilh de Jardengnéez, et assy en yssit en deskendant Clarembaz de Lens et pluseurs atres. Et ly tirce filhe fut mariée à Wilhelme d'Oborne le viez, qui fut peres de Johan d'Oborne; doqueile Johan Wilhelmes d'Oborne ly jovenes et Ernus d'Oborne issirent, desqueis chi après sierat faite mention, en la genalogie do viez monssaingnor Wilhelme de Warous.

71. Avient que ly femme monssaingnor Ernut de Warfezéez, assavoir ly sereur saingnor a Lambuche d'Ilhe, trespasat, et ly dis messires Ernus, ses maris, soy remariat alle sereur monssaingnor Wilhelme d'Atrive, de laqueil damme ilh out on fil, qui fut peires de monssaingnor Ernut de Hussinbur, chevalier, qui portoit de geules à fleur de lis d'argent, à on labeal à trois pendanx d'azure. Chis messires Ernus de Houssinbur soy mariat alle filhe de monssaingnor Libier Butoir, saingnor de Cleremont et d'Awans, et en out dois filhes; dont ly une fut mariée al bon et al preu monssaingnor Lambiert d'Ouppey, qui les fais d'armes parsiwoit par tos paiis, qui fut peirs do bon et do wailhant monssaingnor Lambier d'Ouppey qui fut marissaz delle evesqueit de Liege et qui acquist la terre de Harsta, dont plus expresse mention sierat chi après faite, en la genalogie do saingnor de Harduémont, doqueil ilh est yssus de part son bon peire. Et ly atre filhe monssaingnor Ernut de Hussinbur fut mariée en la conteit de Namur, à monssaingnor Thiry de Rywencheaz, dont ly hoirs sont à present

72. Puisque declareit avons la genalogie des dois fis monssaingnor Rasson, saingnor de Warfezéez et de Domartien, promerain de ce non, ilh est choze bin covenable que vous sachiez la genalogie delle damme de Bretonbur, leur sereure, qui fut mariée à ce noble bannerés: monssaingnor Hayneman d'Ays, dit Schoeneov. Veriteis est que ly dis messires Heynemans out trois fis delle filhe do dit monssaingnor Rasson, assavoir, sont messires Henrys de Fexhe, messires Rasses Maxhereis et messires Ernus de Bretonbur.

73. Ors oreis asseis merwilheuse choize, dont je n'ay poüt savoir la ciertaine veriteit. Ilh est escript chi devant, et ch'est vray, que chis noble barons, messires Heynemans, portoit les armes de Lemborch, et assy ilh crioit Lymborch, et n'y avoit atre differenche que ce que ly lyons n'avoit nint kowe forchue; et assi ilh brisoit de trois tortelés d'argent en la poytrine do lyon, por le coistie de Hazedale. Mais si dis enfans laissent jus cely blazon et present les tortelés tant soilement: assavoir que messires Henrys, ly ainsneis, prist de geules à tortelés d'argent, messires Rasses prist d'argent à tortelés de geules, et messires Ernus portat ce meismes, saf tant qu'il les brisat d'on labeal à trois pendans d'azure; et laissent semblament le cry de Lemborg et criont tous Domartien. Chi affiert

grande admiration, quant chis enfans laissent le noble cry et blazon de leur bon peire et present blazon de plus petite coysté, et y misent le cry de part leur meire. Je en parlay plusieurs fois à monssaingnor Henry de Fexhe, doqueil ly dis messires Henris fut gransires, car je estoie à ses dras et à ses binfais; mais ilh ne m'en savoit atre choze repondre que ce qu'il avoit oût dire son bon peire: que, quant ly dus Wallerans de Lemborch, dierrains de ce nom, fut mors sains hoirs marles et ly debas montat por la terre à avoir entre les princes et barons qui avoient ses filhes, dont ilh out onze bin et noblement marièez, et assi entre chez qui estoient issus de ses oncles et de ses freires, qui portoiient les armes, et le demandoiient do costeit delle espée, ly bataille à Waron en sourdit entre eaz, de laqueile ly dus de Braybant, qui avoit une des filhes, out la victore et conquist la terre alle espée, et ly contes Blondeaz de Luxemborch, peires al empereur Henry, et dois de ses freires et plusieurs atres y furent mors, et ly archevesque de Colongne et ly contes de Guelres et plusieurs atre barons y furent pris, ensi que les coronikes des Braibenchons le divissent plus expressement; tuit chil qui portoiient les armes de Lemborg les laissent par despit, excepteit le conte del Mons et le saingnor de Falcomont, par tant que ly dus de Braybant les encargat quarteleez encontre les armes de Lowaing, car adont prist ilh les armes quartelées de sable al lyon d'or et d'argent al lyon de geules: et c'estoit ly response que ly dis messires Henrys ly juvenes m'en faisoit. Ors revenrons à nostre mateire.

74. Messires Henrys de Fexhe, ly ainsneis fis de monssaingnor Heneman deseurnomeit, out dois fis. Ly ainsneis fut nommeit monssaingnor Lambier, et ly atres Rasses, qui morit sains hoir. Messires Lambier soy mariat à une genty damme, filhe do voweit de Treit, qui astoit do lynage de Harne, et d'Ytre; s'en out trois fis et dois filhes, assavoir: monssaingnor Henry ly Jovene, dont je ay mainlenant parleit, qui fut sirez d'Aaz et de Herméez, de Houten, de Chevetongne et de plusieurs vilhes, et fut esquevins de Liege; ly secuns fut nommeis messires Ogirs; ly tirs fut nomeis Piettes de Brouk; et, des dois filhes, ly une fut nommée damoyselle Aelis, se fut beghine de Saint Cristofre, belle, bonne et religieuze damoyselle, plaine d'oneur, de grande honesteit et cariteit; et ly atre sereure fut mariée à on bon chevalier, bin gentilhomme, cuzien al saingnor de Horne; se demoroit à Ghore, en la Canpine.

75. Messires Henrys de Fexhe ly jovene, qui fut asseis anchiens anchois qu'il morist, prist à femme le filhe monssaingnor Johan Botir d'Aaz. qui n'avoit que dois filhes; se fut ly atre mariée à on bon escuwier, Olivier d'Ohay, saingnor de Cenfontaines, fil do bon Waleran de Joupprelle, dont mention sierat faite chi après, en la genealogie monssaingnor Libier Crepon d'Otéez. De ceste damme out ly dis messires Henrys plusieurs enfans, assavoir Lambiert, Botir, Henry, Rasses dit Maxhereit, Rigaut, Alys, Ysabeal et Marie. Et de tous ces enfans est tres pau de semence demorée, dont c'est piteit et domaiges pour l'amour de leurs bons predecesseurs, si qu'il apparat chi après. Ly dis Lambier morit sains hoir; et fut pitieusement decoleis à Dynant, por le sien à demandeir, car chil de Liege ly avoient abatue sa fortece d'Aaz por petite ocquison, dont ilh devient annemis al paiis; se fut pris en la prevosteit de Revongne et livereis à chiaz de Dynant; et, par la forte porkace delle citeit et delle bonne wilhe de Huy, ilh le covint soffrir martir. Et, en veriteit, plusieurs personnes ont dit que ly pechiet et ly damage et despit qu'il avoit fait à son bon peire sovent fois, l'ecombroit durement, car ilh avoit à son bon peire fais plusieurs despis et domaige sains caze. Ly atres freires après, nommeis Botirs, qui fut biaux et bons et cortois: chis morut sains hoir en Lombardie. Et ly dis Maxhereis morit ausy sains hoir alle bataille à Bossewilre, en la ducheit de Juley: là ly dus Wincelaus de Luxemborch et de Braybant fut desconfis. Henrys, ly quars freires, ne fut onkes do corages des atres, ne siervans ses amis al regar des atres; anchois fut ilh ryoutteus et litigieus. Ilh soy mariat trois fois: promiers, alle filhe monssaingnor Thibaul de Lardier, chevalier, qui morit sains hoir; secondement, à damoyselle Bealtris, filhe Alixandre de Jardiens de Seraing, qui assi morit sains hoir; et tircement, alle filhe Johan de Rone, maiieur de Marche en Famene, qui en devant avoit esteit femme à monssaingnor Fastreit de Nanines, chevalier, doqueil Henry et de cest damme est uns fis

asseis juvenes et de petite stature, et nintmons ilh est chevaliers et nommeis messires Bottiers. Rigaz, ly quars freires, est canones de Saint Lambiert, beaz clers, asseis sages et gratieuz, et de grant patrimoine; mais ilh n'at nint volenteit de marieir, el l'al ly dis Bottirs, ses cuzins, durement persecuteil. Ly promerain filhe do jadis monssaingnor Henry, nommée Alis, fut belle et gratieuz; se fut mariée à monssaingnor Jakemme de Fraypont, saingnor de Wodemont, chevalier, et morit sains hoir. Marie, ly atre filhe, fut tres belle et tres gratieuze filhette, et fut nonain delle Vaz Benoitte. Et ly atre damoyselle, Ysabial, fut canonesse de Mostiers sor Sambre, puy soy mariat à Gerart de Herdines, escuwier, et morit sains hoir. Ensy poiés perchivoir que cest noble branche de bon monssaingnor Henry de Fexhe, qui estoit tres riches hons et uns drois Alixandre de corage, est presque toute amortie et en perilh que jamais ne soit relevée, puyque ly dis Rigaz est disposeis à demoreir clers.

76. Messires Ogirs, secons fis monssaingnor Lambier de Fexhe, fut marieis à une des filhes monssaingnor Wilhelme d'Odoir, chevalier, qui portoit les armes de Tongres: vairiet d'argent et d'azure, à une faixhe d'or, et en ont dois fis et dois filhes, assavoir Lambier, Ogir, et damoyselle Ysabeal, et une filhe canonesse de Mabuege. Lambier fut canones de Saint Servais de Treit, et floives de sens. Ogirs fut beaz et gratieuz escuwiers, et sont, de ly, demorées dois filhes, dont ly une est nonain et ly atre est mariée à monssaingnor Wilhelme de Bois, de Meliens, chevalier, qui est uns riches hons, sages et gralieuz. Et la dicte damoyselle Ysabeal, qui at esteit tres belle et tres bonne damoyselle, fut mariée à Olivier de Meilen, escuwier, dont ilh sont plusieurs beaz enfans; et denomément Olivirs, ses ainsneis fis, est de noveal marieis alle filhe monssaingnor Johan le Cloquir, bailhir de Tuwing, esquevin de Liege et de Huy. Et y at trois filhes, sereurs do dit Olivier; dont ly une fut mariée à Sandre de Rosemelt, et en at trois enfans, et de noveal elle est remariée à Johan de Wayme; ly atre sereur fut mariée à on esquevins d'Ays, nommeit Renar Wilde et, après, à Gylis de Houkelebay et, tircement, à on chevalier delle dukeyt de Guelres, nommeit messire Gerart de Matelar; et ly tirce sereur fut mariée à Ays et, après ce, elle est remariée à monssaingnor Johan de Soveroy, en la terre de Dollehen, qui est chevalier de grant corage et mult ameis et honorels des saingnors.

77. Item, de Pietre de Brouk, le tir fil monssaingnor Lambier de Fexhe, et del le sereur monssaingnor Renart d'Argenteal, qui fut sa femme, est ilh petis remanans. Ilh out dois fil et une filhe, assavoir monssaingnor Lambier Franbax, chevalier, et Raynelkien de Brouk, qui andois sont mors sains hoirs, ensi qu'il m'at esteit acointiet, et orent une sereur mariée à Ays, mais je ne say nint qu'elle aiet enfans.

78. Item, delle damme de Ghore, filhe monssaingnor Lambier de Fexhe, issirent messires Daneaz de Ghore, chevaliers, Lambiers de Ghore, et une damme, qui fut mariée à monssaingnor Thiry d'Argenteal, saingnor d'Entines, qui fut freires al bon monssaingnor Renart d'Argenteal qui weriat à ceaz de Liege. De cely monssaingnor Daneal sont dois fis et dois filhes. Ly année filhe, nommée Marie, belle damme et gratieuze, fut mariée à monssaingnor Mahieu de Lanois, saingnor de Hamme; et, de cesti mariage, est unc filhe, nommée Ysabeal, qui est mariée à Gerart de Berghes, freire do saingnor de Berghes sor le Zome; et ly atre filhe monssaingnor Daneal fut canonesse de Mostirs. Des dois fis, est ly ainsneis nommeis messires Ernus, et ly atres Johans, et ne say s'ilh sont marieis. Item, Lambier de Ghore, freires à monssaingnor Daneal, fut longtemps seniessaz d'Eyke et out plusieurs enfans natureis, marles et femelles, de plusieurs femmes et, alle fien, ilh espozat sa songnante, dont ilh avoit ses dierains enfans, pour eaz legitimeir.

79. Delle damme d'Ennetines, femme monssaingnor Thiry d'Argenteal et sereur à monssaingnor Daneal et à Lambier deseurnommeis, issirent messires Renars, sires d'Ennetines, chevaliers, qui morit sains hoir, et une bonne et wailhant damme et de noble corage, qui fut mariée à monssaingnor

Ernut de Corwaremme, saingnor de Momale et de Nyle, azqueis toute ly terre do jadis monssaingnor Renart d'Ennetines eskeyt; doqueil saingnor de Momale et de ceste damme ly hoirs, qui à present sont en grant estat et prosperiteit, sont denomeis chi desoir, en la genalogie do saingnor de Warfezééz qui out les vint enfans. Chis messires Ernus fut ly premiers sires de Momale qui onkes fuist en lynage de Warfezééz; car je, qui estoie à ses dras et binfais et de conseilhe, l'enortay à ce, et ly conselhay et ayday qui l'acquist al abbeit et covent delle engliese Saint Loren deleis Liege: car, ja fuist choze qu'il et si predecesseurs de Warfezééz fuissent nommeis saingnor de Momale, nintmains ilh n'en estoient fours que woweis, et ly treffons et ly haulte justice appartenoit az dis religieuz.

80. Nos avons declareit les hoirs issus de monssaingnor Lambier de Fexhe, ainsneit fil de monssaingnor Heyneman de Schoneov. Ors vus dirons de monssaingnor Rasse Maxhereit, secon fil do dit monssaingnor Hayneman.

81. Messires Rasses Maxhereis, fis do dit monssaingnor Heyneman, out dois fis, assavoir monssaingnor Rasse d'Oulpixhe et monssaingnor Johan de Schoneov. Messirés d'Oulpixhe soy mariat alle sereur monssaingnor Gerar de Jardien, dont ilh out VI fis tres vailhans et tres preus, et de haut corage et de grande entrepresure, assavoir messire Johans Maxhereis, messire Gerars Maxhereis, messires Rasses Maxhereis, messire Renars Maxhereis, ly bons abbeis de Saintron, par cuy toz ly atres freires furent enleveis et ensachiez, et sires Johan Hage, qui fut canonnes d'Ays.

82. Messirs Johan, ly ainsneis, soy mariat en Famenne, alle filhe Thibauz delle Vauz, qui estoit de ce propre lynage de Warfezééz; s'en fut uns fis et une filhe. Ly fis fut nommeis messires Johan delle Vaz, qui morit maires et esquevins de Liege a al temps delle evesque Johan d'Arkel, doqueil ilh fut maistre d'osteit. Chis dois enfans, messires Johans delle Vaz et sa sereur, furent marieis à dois des enfans Houwet de Champ, qui fut freire germain al bon monssainnor Thiry de Haneffe, saingnor de Seraing le Casteal; car Johan de Champ, fis do dit Houwet, out la sereur do dit monssaingnor Johan, et ly dis messires Johan out la sereure do dit Johan de Champ. Et quant ly meire do dit monssaingnor Johan delle Vaz fut veve, elle soy remariat à on de cheaz de Welien en Famenne, dont Thibauz delle Vaz et ses freires et sereurs sont issus si que do secon mariage, et en sont ly hoirs à present.

83. Messires Johans delle Vaz at eut de la dit femme on fil, nommeit messire Rasses delle Vaz, et une filhe, nommée damoyselle Helewy, qui fut mariée à Thiry de Bierlouz, escuwier, esquevin de Liege; sen sont pluseurs enfans de petit regiiment; et assi leur dicte meire ne s'est point gouverné par le conseal de ses amis. Et messires Rasses delle Vaz, fis al dit monssaingnor Johan, est marieis et at planteit d'enfans et petit patrimoine.

84. Le sereur do dit monssaingnor Johan delle Vaz, qui fut marice à Johan d'Ochamp, out do dit Johan une filhe qui fut mariée à monssaingnor Johan Brant, chevalier, freire natureit de madamme Johanne, duchoize de Braibant regnant à present; doqueile monssaingnor Johan et de madamme sa femme sont à present ly hoirs, assavoir: Johan d'Aysa, Thiris, ses freires, et ly damme de Wanrode, qui fut femme à monssaingnor Johans, saingnor de Wanrode, jadis chevalier, qui en at des beaz enfans; et une atre, mariée al fil monssaingnor Gerart de Linsemeal et, à present, tot nouvellement remariée à monssaingnor Johan de Montegni, qui fut fis à bon castelain de Montgni; et li atre sereur est nonne à Mielen. Et quant ly sires de Wanrode fut trespasseis, madamme sa femme soy remariat à monssaingnor Johan Maxhereit, saingnor de Rode, en la terre de Falcommont, qui en devant avoit eut à femme damme Marie, filhe monssaingnor Lambier, saingnor d'Ouppey, jadis chevalier, derainement devieit; lyqueis monssaingnor Maxhereit et madamme sa femme sont trop prochains proïsmes de cest meïsmes coisté de monssaingnor Heyneman de Schoneov pour conjondre par

mariage, ensi qu'il vous apparat en ce meismes capitle, quant nos parlerons de monssaingnor Rasse Maxhereit.

85. Et tant que de monssaingnor l'abeit de Saintron, qui fut ly plus wailhans clers qui à son temps portaist coronne, et de plus haulte honeur et de melheur estat selonc sa pussance; ne assy de monssaingnor Gerart, son freire, qui fut canonne de Saint Lambiert et de Nostre Dame d'Ays et on tres wailhans homme d'armes; ne assi de saingnor Johan Haghe, qui fut canonnes d'Ays, leur atre freire, nu faisons nulle grande mention, par tant qu'il ne feurent point marieis, ne d'eaz n'est demoreis nus hoirs.

86. Messires Rasses Maxhereis, ly chinquymes fis monssaingnor Rasse d'Oulpixhe, soy mariat à Asteneur sor Ourte et prist à feme l'unne des dois filhes monssaingnor Thomas d'Asteneur, jadis chevalier, dont ly atre out à mary Renchon d'Oreilhe, fil monssaingnor Johan d'Oreilhe, saingnor de Wellerous, chevalier; et de ces dois filhes avoit esteit meire ly filhe d'on ryche borgoys cangeur de Liege, nomeit saingnor Gilhe Rigo, lyqueis sirs Gilhes avoit dois fis, nommeis ly uns messires Gilhes de Meirs, chevaliers, et ly atre Johan de Meirs; lyqueis Johan out à femme la sereure do dit Renchon d'Oreilhe, ensi que chi après, en son liu, sierat plus cleirement recordeit.

87. Chis messires Rasses Maxhereis out de celle damme une filhe qui fut mariée à on bon chevalier, wailhant et hardy, monssaingnor Wynant de Rode, qui estoit fis delle sereure le bon et le wailhant monssaingnor Renart d'Argenteal qui weriat chez de Liege. Do dit monssaingnor Wynant et delle filhe monssaingnor Rasse Maxhereit furent dois beaz chevalier, rades et appers: messires Johan Maxhereit, sires de Rodes, dont chi devant est fait mention, et messires Godefrois, ses freires, qui, après ce, est mors sains hoir sor le voiage d'oultre meire.

88. Ly dis messires Johans Maxhereis soy mariat à damme Marie, filhe monssaingnor Lambier, saingnor d'Ouppey, de Harsta et de Chamont, marissal delle evesqueit de Liege; doqueil mariage sont I fil et dois filhes. Ly fis est nommeis messires Wynans, sires de Rode, et est asseis nouvellement marieis alle filhe d'on chevalier d'Anwiers. Ly une de ses sereurs est mariée à monssaingnor Herman Houne, et je ne say se ly atre est astalée par mariage. Et quant messires Maxhereis fut veves de sa dicte promerain damme, ilhe reprint à femme sa cuzine, le damme de Wanrode chi devant nommée, et croy qu'il en aiet des enfans. Et atres hoirs ne sont demoreis do dit monssaingnor Rasses Maxhereit.

89. Item, messires Renars Maxhereis, ly plus jovenes des enfans monssaingnor Rasse d'Oulpixhe, fut sires de Schoenevorst et de Monjoie; et fut ly miez fortuneis chevaliers qui, puy c ans, fuist entre Mouze et le Rins; car ilh n'avoit nul patrimoine de peire et de meire, dont ilh pouwist on cheval nourrir; se fut aleveis deleis son freire, l'abeit de Saintron, et puy fut canones de Sains Servais de Treit et, après ce, esquevin de Liege et marissaz alle evesque Englebier delle Marche. Et tos ces estas et tos les atres chi après declareis, je ly ay veüt avoir de mon temps. Et tosjours ilh parsiwoit les armes, com chis qui estoit tres beaz et tres poissans chevaliers de corps, ja fuist coze qu'il fuist ly menres de tos les freires, car sachiez que ce furent toz poissans saingnors de corps et de tailhe, et de tres noble corage. En temps qu'il, ly dis messires Renars, fut canonnes, ilh fut durement acointés et priveis do beal et do bon duk de Juley qui soy mariat alle filhe le conte de Haynau. Sy le servit en promerains werres de Franche, quant ly noble roys Eduwars d'Engleterre, seroge do devant nommeit duk de Juley, fut en Cambresis et devant Tournay, al encontre do roy Phelippe de Franche; lyqueis dus de Juley estoit à soulz et az wages do noble roy Eduwart devant nommeit, si que, quant ly sieges de Tournay fut departis, ly roys d'Engleterre ne pout ses sodoiiers paiier en appareilhiet; si en radjournal plusseurs pour envoiier quiere leur paiement en Engleterre. Avient, après ce, que ly dus de Juley y envoiiait monssaingnor Gerart alle Barbe, qui estoit ly plus preuz des Tixhons, et, avoekes ly, le dit monssaingnor Renart, qui point n'estoit chevaliers. Mais, quant ilh vinrent en

Engleterre, ilh fallirent à paiement et furent radjourneis. Et, après ce, ly dis messires Renars y fut tous seuz renvoies par le duk de Juley et emportat bonne quictanches. Ly roys soy excusat par faulte d'argent et dest al dit monssaingnor Renart que, s'ilh soy voloit cargier, en acquitanche de son paiement, de dras ou de laynes, ilh les accitast: ilh en fineroit et les diligeroit. Adont, ly dis messires Renars, qui sages et subtis estoit, parchiwans que, por les werres deseurdictes, on n'ozoit nulles denrées myneir d'Engleterre en Flandres, si que les laynes estoient durement chires a Bruges, respondit que, ja fuist choze qu'il n'en foist nint recargiez, ilh s'y acorderoit, en cas où ly roys ly voroit livreir saf conduyt. Fait fut; et en acatat por tote la somme deüwe al duk; et impetrat grace al roy do passeir segurement sains touny et sains wynage, et, avoekes ce, ly fist ly roys grans binfais. Messires Renars mynat ses laynes à Bruges: là ilh en avoit grant faute. Si les vendit bin le tir denir plus qu'elle ne ly awissent costeit, et tant qu'il wangnat bin VI M royaz à ceste voiture, ultre la plainne somme afferante al duk de Juley. El prist partie de son argent, et bone fin do surplus, et soy partit. Quant ilh vint al duk, ilh dest qu'il n'avoit point d'argent raporteit, mais ilh avoit des laynes, car atre paiement ne poioit ilh avoir; lesqueilez estoient slapulées à Bruges, et n'en trovoit marchan qui l'en vowist sor mult long doneir ce à quoy elles estoient extimées. Quant ly dus, qui avoit besong d'argent, entendit ces chozes, ilh recargat al dit monssaingnor Renart qu'il ralaist à Bruges et tot vendist à argent seche, queile perde qu'il y awist, car ilh ly covenoit avoir argent. Sor ce, ly dis messires Renars retraiit à Bruges al jour de ses finances qu'il attendoit son paiement et por aportat le remanant de son argent, et teilement marchandat al duk qu'il out bin do sien, ultre toz despens, dois mil royaz. Che furent VIII M royaz que cest voiture ly fist de profit, lyqueile somme fut ly promirs cheteis et ly promerains commenchemens de tot son estat, qui, après ce, moutepliat inextimablement, ensy que vous oreis chi après. Et toutes ces chouses je say par le boke do propre warlet do dit monssaingnor Gerart al Barbe.

90. Avient tantost après que ly dis messirs Renars soy acointat de tos les princes decha Mouze et dela, et fut de leur conseilhe, et prestoit sor leur offices et sor leur fortreces, si qu'il avoit tout entre mains. Et quant ly archevesque de Colongne, nommeis messires Wallerans, freires al duk de Juley chi devant nommeit, fut trespasseis de ce morteile siecle, ilh porkachat, parmy ses finances, que messires Wilhelmes de Ghennepe, adont canones de Saint Lambiert et delle doume de Colongne, fut archevesques, l'an mil trois cens et chinquante, doqueile service ilh fut grossement remuneris. Ilh avoit assi porkachiet en devant, assavoir l'an mil trois cens et quarante chink, que messires Englebiert delle Marche, prevost de Liege, avoit esteit evesques de Liege, lyqueis evesques ly fist grant binfais et ly donnat l'eskevinage de Liege, dont on faisoit grant compte à cely temps, mais, asseis toist après, messires Renars le rendit à monssaingnor Ernut de Charneur. Chis meïsmes messires Renars fut marixhaz al evesque Englebier deseurnomeit, et fut ses aydans en weres de Votemme et de Tourines, al encontre do paiis de Liege, et y prist l'ordenne de chevalerie et y levat banire tot sor on jour. Et quant ly sires d'Elslo fut mors, qui avoit à femme une tres noble damme, filhe do saingnor de Wilhedenberghes, qui astoit cuzine germaine al dit evesque et al conte delle Marche, ly dis messires Renars le prist à femme; s'en yssirent ly enfans qui s'ensiwent: assavoir messires Renars, sires de Schoenvorst et de Zixhen, messires Johans, sires de Monjoie, messires Conrars, sires d'Elslo, et messires Englebiers, et trois nobles dammes, assavoir ly contesse de Salmes, en Ardenne, femme al conte Henry, ly damme de Croyneberch, femme à monssaingnor Pire de Croyneberg, et ly damme de Contrecour, femme al saingnor de Contrecour, en Braibant; desqueis enfans sont plusieurs juvenes hoirs à present. Or deveis savoir que fortune fut si grandement amie al dit monssaingnor Renart qu'il estoit sires et maistres de conseilhe de tos les prinches d'entre Mouze et le Rins, et assi do duk de Braybant et delle evesque de Liege; et ses sens estoit si grans que, queil debat qu'il awissent ly uns al atre, ilh detenoit bin leur amour, et n'y avoit nulle d'eaz qui l'ozast corochier. Ilh acquist, l'an mil trois cens et chinquante quatre, à monssaingnor Henry de Flandres, la terre et la saingnorie de Falcomont, que nus n'ozoit acquiere, por dotance des debas; et, quant ilh weyt qu'il nel tenoit nint en pais, ilh en yssit sagement et le descangat al duk de Juley por

la terre de Castre, et s'en partit sains damage; et acquist al duk, de ses denirs, la fortreche et terre de Moujoie, en l'Eiffe. Et, après ce, ilh, ly dis messires Renars, qui dotoit qu'il ne pouwist la dicte terre de Calstre tenir en pais, par tant qu'il gisoit trop parfont en la dukey de Juley, voir en cas où ly dus ne poroil goyr delle terre de Falcommont, ilh subtiliat tant qu'il refist une atre et plus proffitabile discange al duke deseurnommeit, car ilh out Zixhen, deleis Dyeste, et toute la terre à ce appendante, qui astoit al duk de Juley, por la dicte terre de Kalstre; et out grant poyne, gran travailh et gran costengne anchois qu'il pouwist acquiere le greit do duke Wincelien de Braibant, doqueile la dicte terre de Zixhen movoit en fief, qu'il laisast passeir ceste discange, car on ne ly conseilhoit point de caingier l'omage d'on duke de Juley pour avoir à homme on saingnor de Schoenvorst; et nintmains ilh le concedat, dont ilh fist folie, car, puis cely diskange, at ly pays de Juley porteit plusieurs inextimables damages al paiis de Braibant. Et quant ly dus de Juley fut en la terre de Falcomont, ilh nel pout tenir en pais, anchois en weriat costablement à monssaingnor Waleran de Borne, et, al dierains, le perdirent ly uns et ly atres, et revint en mains do duk Wincelien de Braibant. Chis meïsmes messires Renars fist sains nombre de grandes entreprises plusieurs et merweilheuzes, qu'il achivat à son honeur. Finalment, après l'obit delle damme d'Elslo, ilh, qui ja estoit viez d'eage, soy remariat à une jovene damme veve, qui estoit filhe do bon et do wailhant saingnor de Hamale, laqueile vit encors et est recluze à Colongne. Chest damme (Isabelle de Hamal) avoit esteit femme en devant à monssaingnor Englebiert delle Marche, saingnor de Lovirvaz et oncle delle evesque Englebiert, dont ilh est messires Englebiers, à present sires de Lovirvaz, et une sereur belle et bonne, mariée à on bon chevalier, nommeit messire Gerart de Bastongne, castelan de Drubuyt. Et quant ly enfans do dit monssaingnor Renart perchurent que leurs peires estoit teilement remarieis, ilh le comenchont à parsiere et à traveilhier, si que messires Johan, ses fis, ly prist sa fortrece de Monjoie, et ly atres alont pilhier sor ly, et ly encoulpoïent qu'il estoit rourdis; et assi li sires de Ghennepe et de Breiderode le commenchat à parsiere et à weriier fortement. Et fortune, qui astoit lassée de ly lant à aydier, soy refroidat teilement que ly dis messires Renars ne savoit de queil costeit tourner, si qu'il s'avisat secretement qu'il yroit fours do paiis; se fist ses finances paisiblement, et prist dois garchons tant soïement, en queis ilh avoit especial fiance, et passat meire et alat al Ospital à Rode spanir ses pechiez; et là ilh sorjournal tant que Diiez le recoilhî; se fut là reverenment ensevelit.

91. Je vos ay parfaitement declareit tos les hoirs de monssaingnor Rasse d'Oulpixhe. Or vos diray de monssaingnor Johan de Schoeneov, son freire. De cesty messire Johan, ay jou asseis petite cognissance, mais je ay oût a dire qu'il en fut une filhe, mariée à unc chevalier qui demoroit al Brouk, deleys Ays, qui astoit do linage de Ghimengnis: d'argent à une crois dentée d'azure. S'en yssit Symon de Brouk, qui fut marieis alle filhe monssaingnor Ernut de Charneur, chevalier, esquevin de Liege, dont ilh est à present une jovene damme, qui est mariée nouvellement al senissal de Juley. Or revenrons à monssaingnor Ernut de Bretonbur, tir fil de monssaingnor Heyneman de Schoeneov.

92. Chis messires Ernus fut marieis à Teuvines, en la terre de Lemborch, mais je ne say nomeir d'oir en hoir, par lingnie, cheaz qui en sont yssus. Nequident, je say bien par ciertain que Crassemoule, qui fut justitiez à Treit por le mort Thilemain de Rossemelt, adont rechivoir delle evesqueit de Liege, en issit; et assi fist Mathelons de Teuvines, ses freires, dont ly hoirs sont à present, et plusieurs atres. Et az hoirs de Teuvines appartient encors ly terre de Bretoubur, estante en la terre de Warfezééz.

93. Chi après vos dirons delle atre filhe monssaingnor Rasson, saingnor de Warfezééz, promerain de ce nom, qui fut sereur à monssaingnor Otton, saingnor de Warfezééz, à monssaingnor Ernut, alle abbaisse delle Vaz Nostre Damme, et alle damme de Bretonbur.

94. Ceste tirce filhe monssaingnor Rasson fut mariée à monssaingnor Jakemme delle Vaz en Famenne, qui portoit les armes de Welien: d'azure à dois lupares d'argent. Ilh out plusieurs enfans,

dont ly anneis fut nommeis Johan et fut peires de Thibaut delle Vauz, dont mention est faite en la genaloaie monssaingnor Rasse d'Oulpixhe.

95. Ly quarte filhe do dit monssaingnor Rasson fut mariée à monssaingnor Gerart, saingnor d'Oxhen, qui portoit de geules à dois lupars d'argent. Ilh out dois fis et dois filhes; ly promiers fut nommeis messires Waltier, sires d'Oxhen, et ly atres messires Johans. De cesty monssaingnor Johan, je ne say les hoirs de certain; nintmains, je croy que chilh de Xhoche en Condros en soient yssus. Et do dit monssaingnor Waltier issit ly damme de Haneffe, femme à monssaingnor Johan, saingnor de Haneffe et d'Oxhen, qui morut alle batailhe à Nyerbonne, dont plus expresse mention sierat chi après faite, en la genalogie de monssaingnor Ystasse, fil monssaingnor Otton, qui fut fis do secon monssaingnor Libier Sureal.

96. Item, des dois filhes monssaingnor Gerart, saingnor d'Oxhen, ly une fut mariée à saingnor Jakemon Chabot, esquevin et borgois de Liege, et en fut uns fis tant soilement, nomeis messires Gerar d'Oxhen, qui fut canones de Saint Lambiert. Se morut le damoyselle, et sires Jakeme soy remariat alle filhe Gerar de Herkes, engenrée en dame Babache, filhe saingnor Everar de Lou, esquevin et vinier de Liege; s'en issirent les dois sereurs nommées les damoyselles de Noevis, dont ly une fut mariée al viez saingnor de Ghudeghoven et, après, à monssaingnor Waltier de Momale, et ly atre, à Ernute de Corwaremme, ensi qu'il appert plus clerement chi desoir, en la genalogie de dit monssaingnor Waltier de Momalle.

97. Et ly atre filhe monssaingnor Gerart d'Oxhen fut mariée à saingnor Gilhar delle Cange, citain de Liege, qui portoit burleit d'argent et d'azure, à on quartier des armes de Nyvelles sor Mouze, qui sont vairiez d'argent et de geules. De ceste damoyselle d'Oxhen out sires Gilhars une filhe tant soilement, qui fut mariée à monssaingnor Johan de Lardier, chevalier esquevin de Liege, qui portoit d'oir à on satoir de geules, à une fleur de lis d'argent; doqueil monssaingnor Johan furent pluseurs beaz enfans, qui, al jour d'uy, sont presque toz aninchilleis: si vous dirons coment, ja soice que ce soit fours de nostre mateire, car ilh n'at nint chy son liu.

98. Chis messirs Johans de Lardier fut fis monssaingnor Johan Surlet, qui fut ly promirs fils de borgois qui awist onkes à Liege esteit chevaliers. Ilh out delle damme d'Oxhen, filhe Gilhar delle Cange, trois fis et dois filhes, assavoir monssaingnor Johan Surlet, saingnor de Chokirs, monssaingnor Thibaut de Lardir, chevaliers, Waltier, canones de Sains Denis, une filhe mariée à monssaingnor Wery de Lymont, chevalier, et une atre mariée à Wilhelme delle Tour de Fexhe, escuwier. Et weys de mon temps le dit monssaingnor Johans de Lardier en si grant estat et tant ameit de common peuple, en la citeit de Liege, qu'il fausoit do peuple tot sa volenteit, et tout gouvernoit à son plaisier. Et, en veriteit, ilh n'avoit sy petit garchon en son hosteit qui ne fuist, à cely temps, plus dopteis que ne soit al jour ly plus grans chevaliers delle citeit. Et teilement l'avoit fortune enleveit que ly gens disoient, quant ilh l'encontroient al matin: « Je ay veüt en jueng cuer le beal monssaingnor Johan de Lardier: ilh ne moy puet humais nul mal avenir. » Et, que plus est, se on portast le Sacrament à clokette sonant en une ruwe à Liege et ly dis monssaingnor Johan de Lardire venist d'atre costeit, ilh awist pluseurs persones qui anchois l'awissent saluueit que le Sacrament. Ilh mariat ses enfans à son voloir si suffisanment, selonc la terre qu'il leur donnat, que c'estoit merveilhes, si qu'il apparat chi après. Et nequident, je veïs teylement fortune retourner al encontre de ly qu'il fut abanis et dechachiez fours de Liege, on petit anchois le trespas delle evesque Adulph delle Marche, assavoir l'an mil IIIe et XLIII, et pou après, assavoir l'an XLVI, après ce que ly evesque Englebier delle Marche fut rechuis à evesque et ilh entreprist la werre contre la citeit et le paiis, ly dis messires Johan de Lardire soy partit avoekes ses conesquevins fours delle citeit en serviche do saingnor, si que ly commons peuples fut piies contens de ly que des atres; et, par tant, l'année après, tantost que ly pais fut faite entre le saingnor et le citeit et son paiis, et ly dis messires

Johan et si conesquevins furent retrais à Liege, ilh n'y avoit personne do common peuple qui honeur ne reverence ly portast. Sy veyt l'estat delle citeit teilement contretourneir et luy teilement ravaleit; et assi ses fis, messires Johan Surlés, estoit nouvellement trespasseis, si que, toutes ces adversiteis melééz ensemble, il encargat teile doelhe qu'il morut asseis tost après. Encors vous raconteray on gran despit que ly commons peuples, cuy ilh avoit tant servit en l'office delle maistrerie, ly fist en temps des weres deseurdictes. Il avoit une povre baiselelte à Liege, demorante à Saint Loren, qui estoit folle de son cors, qui estoit nommée Pakette, qui tant avoit enameit ly dit monssaingnor Johan qu'elle ne soy poloit passeir que, cascon jour delle an, sains falilr, elle ne fuist al matien al devant delle porte delle maison le dit monssaingnor Johan, en Soverainpont, affien qu'elle pouwist veoir issir fours de sa maison le dit chevalier; et, quant elle le veioit, elle l'aoroit et ly baisoyt sa main ou ses dras. Cest baiselelte, qui astoit asseis belle, parloit sovent de ly en bien. En temps des werres deseurdictes, et por ceste caze tant soilement, elle fut noiie en Mouze et acuzée que c'estoit une despie.

99. Chis messires Johan de Lardier mariat son ainsneit fil, monssaingnor Johan Surllet, alle ainsnée filhe Johan, saingnor et castelain de Hozemont et de Chokiers. Messires Thibaz, ses atres fis, fut marieis à damoyse Aely, filhe Henry de Rahirs, qui n'avoit plus d'enfans et estoit uns riches escuwers et de bonne nation. Ly ainsnée filhe do dit monssaingnor Johan de Lardier fut mariée à monssaingnor Wery, qui fut do fil monssaingnor Robiert de Lymont, qui fut bannerés chevaliers. Et ly quarte filhe, nommée damoyse Ysabeal Prisonette, fut mariée al bon Wilhelme delle Tour de Fexhe, qui estoit uns des meilleurs et des miez apparenteis escuwers de toute Hesbaing.

100. Messires Johan Surlés, ainsneis fis monssaingnor Johan de Lardier, out de la dicte damme on fil et dois filhes. Ly fis est nomeis messires Adans de Chokirs, qui at à femme damme Agnès, filhe jadis Radout le Blavier, esquevin de Liege, et misent grans hirtages ensemble, qu'il ont petitement governeit, si que leurs hoirs en sont trop ravaleis: c'est damages. Ly dis messires Adans at dois fis, Johans et Radout. Ly dis Johan fut marieis à damoyse Maroie, filhe Stassin Chabot, esquevin de Liege; s'en est uns biaz fis, nommeis Adans, qui est à present sires de Chokirs; et, quant Johan, ses peires, fut veves, ilh, qui avoit esteit de petit regiment, soy retrahit à Saint Engliese et est à present canonnes de Nostre Damme de Namur. Et ly dis Radout, ses freires, est varlés secretaire az esquevins de Liege; ilh est marieis à damoyse Maroy, filhe Johan de Casteal de Gemeppe, et en at des beas jovenes enfans.

101. Item, ly promerain filhe messire Johans Surlés et sereure a dit messirs Adans fut nommée Maroie, et fut mariée à Badewien, fis jadis Badewien Panneo de Sains Servais, esquevins de Liege, qui tres mal sagement soy governat; s'en est une filhe, mariée à Rasse de Sewafe, fil jadis Libier de Moge, dont mention est fait chi devant, en la genealogie do saingnor de Warfezééz az XX enfans; et do dit Rasses et de la dicte damoyse Maroie sont ly hoirs à present.

102. Ly atre filhe messire Johans Surlés fut mariée à Badewien de Hermalle desos Cleremont, filhe delle sereur Badewien Pannio ly viez, et en sont ly hoirs.

103. Ors dirons de monssaingnor Thibau, freire do jadis messire Johan Surlés. Chis out plusieurs enfans de sa dicte femme, qui tous sont mors sains hoirs, excepteit dois, assavoir monssaingnor Fastreit Bareit de Lardier et une damme mariée à monssaingnor Johan de Marile en Braybant.

104. Messirs Bareis fut marieis à damme Yde, filhe Wery de Lavoir, qui en devant avoit eüt à marit monssaingnor Thibau de Langdris le giovane, qui mors estoit sains hoirs. De ceste damme at ly dis messires Bareis uns fil nommeit messire Johans Surlés, marieit aseis toist après le decès de son bon peire alle filhe do saingnor de Loncamp, et en sont de jovenes enfans.

105. Delle sereur messire Bareit, mariée à messire Johans de Marils, est uns fis, nommeit Colar de Marils, et une filhe, mariée à Werar de Briamont, filz jadis Wery Gaylhar de Chaiiesnéez. Et ly dis Colars at la filhe messire Ernus de Hemptines, chevalier, dont y sont ly hoirs de juvenes eage.

106. Delle filhe monssaingnor Johans de Lardier mariée à Lymont, at esteit pluseurs enfans, assavoir Robier, Symons, Johans, Waltir etalconnes filhes, dont ly pluseurs sont mors sains hoirs. Ly dis Robiers fut marieis, mais je ne say s'ilh en est nulle hoir. Et ly dis Waltiers fut marieis à une des filhes Colar Renar de Lexhi, s'en sont ly hoirs; et secondement est ilh remarieis à damoyselle Katherine, filhe jadis Andrier de Brahier, de Liege, qui devantrainement avoit esteit femme à Radout de Hacourt, escuwier. Et ly une des sereurs fut mariée à Waltier de Vileir, de Tongres, dont ilh est une filhe, mariée à Wilhelme d'Atyen de Montegnéez, esquevin de Liege, qui en at IX ou X enfans, fis et filhes; s'en est une des filhes mariée à Piron le Robeur, qui pluseurs fois at esteit maistres delle citeit de Liege; et ly atre est mariée à Johan delle Tour de Hanut, escuwier; et ly tirce, à Colar, fil Johan le Proydomme de Gemeppe. Et ly ainsneis fis do dit Wilhelme, nommeis Waltier, est marieis alle filhe Lambier de Freires, le mierchier.

107. Delle atre filhe monssaingnor Johan de Lardier, nomée damoyselle Ysabeal Prisonette, par tant qu'elle fut engénrée en temps que ses peires gisoit en prison, issirent Johan de Fexhe et une filhe, mariée en la conteit de Louz.

108. Ly dis Johan de Fexhe soy mariat à damoyselle Ysabeal, filhe jadis monssaingnor Jakemme Chabot, esquevin de Liege, et en sont dois filhes, dont ly une est mariée à Warnier delle Soxhe, de Fexhe le Fraiteuze, et ly atre à Werot le Bailhiier de Chaynéez, qui est morte sains hoir.

109. Et ly sereure do dit Johan de Fexhe soy mariat à Wilhelme de Edelbame, en la conteit de Louz, et s'en departit, si que je ne say qu'il en est avenut, car elle n'at nint bin uzeit do conseilhe de ses amis.

110. Ors revenrons à nostre mateire. Ly Ve filhe monssaingnor Rasson, saingnor de Warfezéez, promerain de ce nom, fut mariée à on chevalier de Wotrenges sor Geire; s'en furent dois fis, assavoir messires Lowys et Fastreis, qui orent des hoirs, desqueis je n'ay nulle veritable intormation.

111. Vous aveis oüt clerement recorder d'oir en hoir tos cheaz et chelles qui sont estrais de monssaingnor Rasson, saingnor de Warfezéez et de Domartien, promerain de ce nom. Chi après vos dirons de ses trois freires, assavoir monssaingnor Thomas, monssaingnor Ernus et monssaingnor Ystasse; et promiers, de monssaingnor Thomas, qui fut ly ainsneis d'eaz trois.

112. Messires Thomas fut sires de Hermalles desoir Cleiremont et prist les fleur de lys d'argent et l'escut de sable. Et, ja soice que ly freires cangassent les couleurs de leurs armes, por tant que cascons voloit porter blazon entier, nequident, ilh detinrent, et encors font tousjours, le cry de Domartien. Chis chevaliers out dois fis, assavoir monssaingnor Henry, saingnor de Hermalles, promerain de ce nom, et monssaingnor Renier, saingnor del Noevielhe, qui cangat les armes de son peire et prist d'azure à fleurs de lys d'or.

113. Messirs Henris, sirs de Hermalles, promerain de ce nom, out quatre fis, messire Lowis, Lambiers, Thomas et Fastreis, et une filhe, mariée à Huy, à saingnor Johan de Fakon.

114. Messires Lowis, sires de Hermalles, soy mariat à Vilhe en Hesbaing; et de cesty mariage issit ly vailhans et ly riches messires Henris de Hermalles, qui morut alle bataille à Domartien, et dois

filhes, dont ly une fut mariée à Johan de Chaintrainnes, deleis Warnan, et ly atre à monssaingnor Johan le Polen, mais elle morit sains hoirs, et messires Johan soy remariat alle filhe do saingnor d'Awans.

115. Ly bons messires Henris, sires de Hermalles, secon de ce nom, prist à femme la filhe monssaingnor Ystasse Persan, saingnor de Haneffe, qui astoit de ce meïsmes linage, si qu'il apparat chi après; laqueile damme estoit sereur germaine à monssaingnor Johan, saingnor de Haneffe, et alle femme monssaingnor Johan Botier d'Aaz, et à damoyselle Aely, le beghine. De ceste damme out ly sires de Hermalles une filhe tant soilement, nommée Alys, qui fut hautement mariée à on noble baron et frank gentilh, monssaingnor Ernut, avoweit de Hasbaing et saingnor de Lumaing, qui estoit do gentilh sanc de Lemborch, de Dyest et d'Oudenarde, et portoit de de geules à on lyon d'argent à cove forchuwe, et crioit Lemborch.

116. De ceste damme furent V filhes. Ly promeraine et ly ainsnée fut mariée al noble monssaingnor Lowy d'Agimont, saingnor de Wark, deleis Maysires, qui estoit fis do freire le conte Ernut de Louz, do secon mariage. S'en fut une filhe tant soilement, qui est mariée à on noble baron et de gentilh estration, monssaingnor Everart del Marche, fil do conte delle Marche et freire germain delle evesque Englebier delle Marche, jadis evesque de Liege. De ceste damme et do dit monssaingnor Everart, qui est avoweis de Hainsbaing, sires d'Arenberghes, de Noefchasteal et de Lumaing, sont plusieurs enfans, fis et filhes, qui à present sont en grant estat et dont noble generation soy puet engenreir.

117. Ly seconde filhe fut damme de Hermalles et fut mariée al saingnor de Waveres, en Braibant, dont ilh yssirent messires Wilhelmes, qui morit sains hoir, et dois filhes. Ly ainsnée at à mary monssaingnor Wilhelme l'Ardenois le jovene, saingnor de Spontien et de Waveres. Et ly atre at monssaingnor Englebier de Hacourt, saingnor de Hermalles et de Haversen. qui at on jovene fil et une filhe mariée à monssaingnor Wilhelme, fil Rasse de Warous, escuwier. Et ly dis sires de Spontiens at plusieurs enfans, et assi at ly dis messires Wilhelmes de Warous.

118. Ly tirce filhe de Hermalles fut mariée à monssaingnor Wilhelme, saingnor de Gayves, fil d'on bin gentilh homme nomeit Everar de Bolan, saingnor de Rychelette; s'en sont dois filhes, dont ly une est femme à monssaingnor Bureal de Bonneiffe, saingnor de Gayves, et ly atre est mariée à Henry de Daverduche, escuwier; et ont ces dois sereurs des beaz enfans. Et quant messires Wilhelmes fut veves, ilh espouzat sa chambriere, dont ilh avoit plusieurs enfans, qui furent legitimes.

119. Item, ly quarte filhe de Hermalles, nommée Alys, fut mariée à monssaingnor Lambier, saingnor d'Ouppey, de Chaymont en Braybant et de Harsta, qui fut uns vaillhans hons en armes, hardis et entreprendans, et uns grans acquereires d'eritayges; et orent V enfans, dois fis et trois filhes, assavor monssaingnor Adan, saingnor d'Ouppey et de Harsta, monssaingnor Johan, saingnor de Chamont, Marie, Felicitas et Alys, qui hautement ont esteit astalééz.

120. Messires Adans est marieis à damme Conygon de Jouplou, dont mention est fait en capitle do saingnor de Daveles; et ceste damme avoit, en devant, esleit femme à monssaingnor Johan de Skendremale, castelain de Montegnys, chevalier, esquevin de Liege. De ceste damme at messires Adans une filhette tant soilement.

121. Ly dis messires Johan d'Ouppey at pris à femme nouvellement le sereur do saingnor de Glymes, dont ilh at des hoirs.

122. Madame Marie, leur sereur, fut femme à monssaingnor Johan Maxheret, saingnor de Roide, dont mention est faite en la genalogie monssaingnor Heyneman de Schoneov; et en sont ly hoirs.

123. Madame Felicitas fut promierement mariée à on bannerés, gentilhomme et tres riche, nommeit monssaingnor Johan, saingnor de Falais, et n'en fut nulle hoir. Secondement, fut elle mariée à on atre bannerés de doble banier, monssaingnor Johan, saingnor de Rochefort et d'Agymont; et en est uns fis, nommeis Johans, saingnor des terres deseurdictees, qui est de noveal marieis alle filhe monssaingnor Houwe, saingnor d'Atey, senissal delle ducheit de Luxemborch; s'en at des jovenes enfans. Et tircement, est madamme Felicitas remariée à monssaingnor Thiry d'Oiie, saingnor de Hellerode, et en at des hoirs.

124. Madame Aalis, tirce filhe al dit monssaingnor Lambier, est mariée à on bin noble chevalier, bien ydone d'avoir esteit bannerés, car bin en est estrais, se fortune nelle awisse enconbreit, assavoir monssaingnor Gilhe, saingnor de Jache, de Hyrges et Byoul, dont y sont dez beaz enfans; et de noveal est ly une de ses filhe mariée à monssaingnor Wilhelme de Skendremale, castelain de Montengnys, fil de madamme Couygon devant escripte.

125. Ly chinquemme filhe de Hermalles fut mariée al saingnor de Bealren; si morit sains hoir.

126. Nos avons ordinément reciteit cheaz et chelles qui sont estrais do bon et do ryche monssaingnor Henry de Hermalles, qui morut alle bataille de Domartien; si vous dirons de sa sereur, mariée à Johan de Chaintraines, deleis Warnan.

127. De ceste damoyselle fut une filhe mariée al saingnor de Thines, en Condros, et de Faaz, en la conteit de Namur; s'en furent quatre filhes de cesty mariage, dont messires Ernus d'Agymont, freires à monssaingnor Lowy, dont mension est faite chi devant, out l'année, et fut sires de Thynez et de Faaz.

128. Do dit monssaingnor Ernus et delle damme de Thyne furent messires Johan et messires Lowys d'Agimont, chevaliers, desqueis ilh n'est demoreis nus hoirs, et une filhe nomée Margritte, promierement mariée al fil monssaingnor Sarazien de Chasteleir, secondement à monssaingnor Rasson, saingnor de Chailes, et de ces dois maris n'est nulle hoir, et tiecement mariée à monssaingnor Wilhelme Prost de Meliens, chevalier, esquevin de Liege, doqueil ilh sont uns fis et trois filhes, assavoir messires Wilhelme, Margritte, Johenne et Marie; et cest damme at tout le patrimoine qui fut à ses dois freires deseurnommeis. Ly dis messires Wilhelmes de Thyne at nouvellement pris l'ordenne de chevalerie; et sont, à une fois, fais dois mariages, assavor de ly et de damoyselle Johenne sa sereur, à Mychiel et à Johenne sa sereure, andois enfans do saingnor de Bealren. Et Margritte, ly ainsnée filhe do dit monssaingnor Wilhelme Prost, est mariée asseis tost après al fil ainsneit de monssaingnor Badewien, saingnor de Fontaines et delle Marche, en Haynau; et Marie, ly plus giovane, n'est point astalée —. Ors est avenut nouvellement, assavoir lan XIIIIC, que madamme Margritte, damme de Fontaines, ainsnée filhe de jadis monssaingnor Wilhelme, est trespassee; s'en est demorée une filhette. Et messires Wilhelmes, ses freires, et damoyselle Johanne, sa sereur, sont, en ceste meïsmes saison, undois veves, et n'ont nulle hoir, dont c'est grant damages por eaz et pour leur linage, car ilh awissent tres grandement esteit ahiriteis.

129. Item, ly seconde filhe do saingnor de Thyne, issue delle sereur do saingnor de Hermalles, fut mariée à monssaingnor Wilhelme Hyernut, saingnor de Houten et de Waiinéez, dont ilh furent trois fis, assavoir messires Johans Galiot, messires Wilhelmes Hyernus et messires Thiris de Coreal, chevalier, Ly dis messires Johans est mors sains hoir. Et ly dis messires Wilhelmes ly jovenes est marieis à Liege, alle filhe Ernut de Rychelle, et en at des beaz enfans. Et ly dis messires Thiris n'at nulle hoir.

130. Ly tirce filhe do dit saingnor de Thines fut mariée à monssaingnor Pinkar de Frexhien, saingnor de Tongrenalles, dont ilh est une filhe tant solement, qui promirement fut mariée à monssaingnor Waltier de Seraing, fil do bon monssaingnor Ystasse de Seraing, dont mention est faite en lagenalogie do saingnor de Momale; et, de cesty marit, la dicte damme n'at nulle hoir. Mais elle soy remariat secondement à monssaingnor Wilhelme de Gavre, dit de Herymeis, saingnor de Stenkerke; desqueis ilh est une des plus belles compaingniez d'enfans marles et femelles qui soit en tout Haynau, car je croy qu'il en soit XIX enfans, tant fil comme filhe, doull ilh en est à present XIII enfans viskans, assavoir: Marie de Gavre, qui eut ly saingnor de Bierlo, de quoy ilh sont dois fils, Johans el messires Guilhamme, qui sont mors sains hoirs, et dois filhes: ly ainsnée at Libiert, fil messire Gerart Moriau de Halet, ly seconde at Rasse de Brus et est damme de Bierlo, et ont grant nombre d'enfans; — messires Guilhamme de Gavre, ainsneis fis des deseurdis XIII enfans, at le filhe do saingnor de Vremelles et d'Anequin en Artois, appelée Bietris, et ont une jovene filhe, nomée, après le meire, Bietris; — ly secons chevalier at nom messire Pinkart, saingnor de Frezien, d'Oignien et de Musain, qui at le filhe messire Johan de Gres, nommée Florence, et at uns fis appelleit Pinkart et trois filhes: ly ainsnée appelleie Florence, le seconde Anthone, ly tirce Yolen; — ly tirce des XIII enfans deseurdis at nom Yolen de Gavre, qui out messire Gille de Reumont, chevalier, saingnor de Sept Fontaines, et n'ont nulle hoir; — Margerit de Gavre, damoyselle d'enclostre de Mabeuge; — Katherine de Gavre, nonain de Gilengien; — Johan de Gavre, escuwier, qui at le filhe messire Guilhamme, saingnor del Hietefelle, chevalier, et en at II juvenes fis, l'un Johans et l'autre Soyhier; — maistre Ernoul de Gavre, canonne de Saint Lambier, prevost de Saint Barholomé, tresorier de Songnies, en Haynau, canonne de Saint Martin en Liege et de pluseurs autres; — Rasse de Gavre, canonne de Saint Lambier, prevost de Saint Crois en Liege, canonnes et tresorier de l'engliese de Songnies; — Clarisse de Gavre, damoyselle d'enclostre de Mons en Haynau; — Gertrud de Gavre, qui out messire Mychiel de Casteler, chevalier, et morut en la bataille de Franche, à Anblegien, et at uns fils appelleit Johan de Casteleer, et est mult jovene; — Johanne de Gavre, qui at messire Gerart d'Escausines, chevalier, qui ont IX ou X filhes femelles; — Sibile de Gavre, qui out messire Robiert, fil à monsaingnor de Spontin, saingnor de Wavre, et ont unc fil, Guilhamme, qui doit estre saingnor de Spontien et de Wavre, et trois juvenes filhes. Et est assavoir que ly deseurdis messires Guilhammes et damme Johanne de Bierlo, peire et meire des deseurdis XIX enfans, avoient esteit tous deuz pardevant veves, et [messires Guilhammes] avoit eüt damme Ysabeal d'Engien, ante au saingnor d'Engien et damme de Basely et Hasely, et damme Johanne avoit eut messire Waltier deseurdit.

131. Ly quarte filhe do saingnor de Thines fut mariée à monssaingnor Johan Chadron de Hamalle, qui toute sa terre perdit az deis et morut povres. Si demorat de ly une filhe, mariée à Wilhelme de Denwilhe escuwier; se morit sains hoir.

132. Et ly meire de toutes ces filhes soy remariat, après le decès do saingnor de Thynes, à monssaingnor Johan Chadron de Noevilhes, en la terre de Florines; Sy ne say s'ilh en est nulle hoir.

133. Chy define ly generation de monssaingnor Lowy, fil monssaingnor Thomas, saingnor de Hermalles; sy vos parlerons de monssainanor Lambier de Chantemierle, freire de jadis monssaingnor Lowy. Chis messires Lambier prist à femme une des filhes Badewin de Casteal de Seliens, qu'il avoit delle filhe monssaingnor Breton le jovene de Warous, dont chi après sierat faite mention.

134. Do dit monssaingnor Lambier et delle damoyselle de Seliens issirent messires Rasses, messires Ystasses, chevaliers, et Johans de Chantemierle, et orent dois sereurs, dont ly une fut mariée à monssaingnor Waltier de Momale, si qu'il appert chi desoir, en la generation des XX enfans le saingnor de Warfezééz, et ly atre fut meire de monssaingnor Bastien Boyleawe de Graz, chevalier.

135. Ly dis messires Ystasses de Chantemierle out une filhe tant soilement, mariée à monssaingnor Houbien Bareit, chevalier, esquevin de Liege, dont ilh fut uns moweaz, qui morit sains hoir.

136. Messires Rasses de Chantemierle soy mariat alle sereur monssaingnor Jakemme de Revins., chevalier, manant à Huy; s'en furent pluseurs enfans, assavoir messires Henris de Halendas, chevaliers, et dois filhes, dont ly une fut mariée à Hankar de Waynéez, manant à Havelegouls, et ly atre à Johan delle Heys, en Condro. Do dit monssaingnor Henry et delle sereur monssaingnor Lowy Martéal, saingnor delle Noevielhe, qu'il prist à femme, est une filhe, tres bonne damme, mariée à monssaingnor Alart de Senzeilhe, saingnor de Soumangne, dont y sont ly hoirs.

137. Et tant que de dit Hankar et delle sereur monssaingnor Henry de Halendas, n'est ilh hoir demoreis que rins vailhe. Mais de Johans delle Heys est issus Johans delle Heys, maintenant vivans, et une sereur, mariée à Johan de Royseur, escuwier, dont y sont ly hoirs.

138. Johans de Chantemierle, tirs fis do dit monssaingnor Lambier de Chantemierle, soy mariat alle filhe monssaingnor Barnage de Fontaines; s'en fut uns fis, nommeis Lambier, et une filhe, mariée à Coliien Paiien de Warezéez, dont y sont ly hoirs. Avint que Johan fut veves; sy reprist à femme damoyselle Katerine de Vynalmon, qui avoit esteit femme Renechon Gochelet, de Liege; et Lambier, fis do dit Johan, out la filhe de la dicte damoyselle Katerine, sy que ly peires et ly fis orent le meire et la filhe.

139. Do dit Lambier, fil Johan de Chantemierle, est Johan de Fontaines, manans alle Noevevilhe, qui est marieis alle filhe Renier de Denéez; et at ly dis Johan une sereur mariée à Faz, en la conteit de Namur, qui at des hoirs.

140. Delle filhe monssaingnor Lambier de Chantemierle le viez, qui fut mariée alle saingnor de Momale, aveis oût la generation; et delle atre, qui fut mariée à Graz, issit messires Bastiens Boyleawe, sires de Graz.

141. Do dit monssaingnor Bastien et delle filhe le voweit d'Amaing, sa femme, dont messires Rasses, sires de Warous, ainsneis fis do saingnor de Warfezéez tant que dou secon mariage, out la pareilhe sereur, sont yssus messires Johans, sires de Graz, qui, delle filhe monssaingnor Johan de Bernalmont, chevalier, at pluseurs enfans, et ausy Wilhelmes et damoyselle Angnès.

142. Chis Wilhelmes est marieis alle filhe Badewien de Holongne; et damoyselle Angnès est mariée à Renart de Casteal de Gemepe, et en sont ly hoirs.

143. Et tant que des atres dois freires do dit monssaingnor Lambier de Chantemierle le viez, assavoir de Thomas et de Fastreit, je croy qu'il morirent sains hoirs, car je n'en ay rins appris et n'en trueve rins en escript.

144. Vos aveis oût toute la genalogie de monssaingnor Henry, le viez saingnor de Hermalles, fil monssaingnor Thomas, qui promerain encargat à porteur de sable à fleur de lys d'argent. Chi après vos dirons de monssaingnor Renier, saingnor delle Noevevilhe, son freire, qui promerain encargat à porteur d'azure à fleur de lys d'or.

145. Messires Reniers, sires delle Noevevilhe, out trois fis, assavoir messire Johan, Henris, et Lowys de Flosteur, qui morit sains hoir. Ly devant nommeit messires Johan out on fil nomeit Lowy. Do dit Lowy, qui prist à femme le filhe monssaingnor Oury de Boubays, issit Johan Martéaz de Mirmorte et une damoyselle, mariée à Gilchon delle Noevevilhe. Ly dit Johan prist à

femme la filhe Gerart de Biersés, manant Defours Casteal, qui en devant avoit esteit femme à Gobiert de Dynant, qui fut freires al petit Badewin de Saint Servais qui fist faire la fortreche de Nandren. De dit Martéal et de cest damoyselle furent messires Lowys Martéaz, sires delle Noeuevilhe, tres fors chevaliers, et damme Katerine, femme monssaingnor Henry de Halendas. Do dit monssaingnor Lowy issirent messires Johan et messires Henris Martéaz, chevaliers; et fut leur meire le filhe Henry Greyve, de Waremmé deleis Tongres; et orent une sereur mariée à monssaingnor Johan le Polen d'Aleur, chevalier. Sy fut veves ly dis messires Lowy, et soy remariat alle damme de Mabretenges, filhe monssaingnor Adan de Mabretenges, chevalier; doqueile secon mariage sont issus Thiris Martéaz, sires de Mabretenges, et une filhe, mariée à Lambiert do Bois de Meliens, manant à Kanne, Et affin que vous aies cognissance des enfans Gobier de Dynant, engenreis en la damoyselle qui, après ce, fut femme à Martéal de Miremorte, par tant qu'il furent do lynage de Biersés, je le vos diray. Ilh en fut V, assavoir Johan de Dynant, qui morit sains hoir, et IIII filles, assavoir le damme de Wierde, et damoyselle Katerine, qui fut femme Gerar de Colongne et qui, après, soy remariat à Stassin Drughin; et ly tirce fut nommée damoyselle Adilhe, femme Henry delle Falize, et ly quarte fut femme monssaingnor Wery Frongnetéal, chevalier.

146. Ly dis messires Johans Martéaz, qui estoit ly plus beaz enfes et ly miez venans qui fuist en ce paiis, fut tuweis jvenes par Henry, fil do saingnor de Rochefort. Et ly dis messires Henris Martéalz, ses freires, fut sires delle Noeuevilhe et soy mariat alle filhe Thyri le Bron de Flemale, dont ly hoirs et peire et meire regnent à present.

147. Item, de leure sereur, mariée à monssaingnor Johan le Polen, sont pluseurs enfans, dont Johan ly Pollereaz, ly ainsneis, est marieis alle filhe Wilhelme de Bealrewart, de Fexhe; s'en at des enfans. Et de noveal. après le decès de sa dicte femme, ilh est remarieis alle sereur monssaingnor Tristan de Fraipont, qui avoit esteit femme à Bertran de Hanut, escuwier.

148. Item, ly dis Thiris, leurs freires de secon mariage, est marieis alle filhe Clouze delle Chivre, borgois de Liege. Et sa sereur est mariée à Kanne, à Lambier, freire messire Wilhelme do Bois de Meliens, chevalier; s'en sont pluseurs enfans, qui grandement puelent leur linage regenerer.

149. Item, delle femme Gilchon delle Noeuevilhe, qui fut sereur al viez Martéal de Mirmorte, issit une filhe, mariée à Libier de Moges, dit de Sefawe, qui fut fis dou secon mariage do saingnor de Warfezéz qui out les XX enfans. Do dit Libier et de la dicte damoyselle furent pluseurs enfans, assavoir Rasses, qui at le filhe Badewien Panyot le jovene, et en at des hoirs, et Lowys, et Wilhelmes, et une filhe mariée à Badewien de Hermalles. Ly dis Lowys at des enfans delle filhe Wilhelme d'Abééz. Wilhelme, ses freires, morit sains hoir, et Badewien de Hermalles at une filhe mariée à Johan, fil jadis Johan de Denvilhe, escuwier.

150. Item . delle sereur monssaingnor Lowy, qui fut femme à monssaingnor Henry de Halendas, est une filhe tant soilement, mariée à monssaingnor Alart de Senseilhe, dont y sont pluseurs enfans.

151. Et Henry, freires à monssaingnor Johan de Noeuevilhe, out on fil, nomeit Lowys de Sefawe, qui fut peires de Johan de Sefawe, qui fut canones de Saint Poul, et de Lowy de Sefawe assi, dont mention sierat chi après faite, en capitle de ceaz de Hozemont, parlant des hoirs monssaingnor Makaire delle Heys de Flemale.

152. Vos aveis oüt la genalogie monssaingnor Thomas, saingnor de Hermalles, secon fil monssaingnor Otton, saingnor de Warfezéz, secon de ce nom et fil monssaingnor Libiert Sural; sy parlerons chi après de monssaingnor Ernut, saingnor de Harduémont, freire do dit saingnor de

Hermalles et tir fil de dit monssaingnor Otton, qui encargat à porteur d'argent à fleur de lys de geules; mais tos crioiient Domartien.

153. Chis messires Ernus out dois fis, assavoir monssaingnor Adan, saingnor d'Ardeng et d'Ouppey, et monssaingnor Lambier Badout, saingnor de Harduémont. Ly dis messires Lambiers, qui fut ly plus jovenes, portat les armes son peire à on labeal à trois pendans d'azure, et soy mariat à Huy et out IIII fis, assavoir monssaingnor Lambiert, monssaingnor Ernut, monssaingnor Godefroit de Tilhyce et monssaingnor Gilhe. Messires Lambiers morut sains hoir. Et ly dis messires Ernus, ses freires, fut sires de Harduémont et soy mariat à damme Ysabeal, sereur al bon monssaingnor Wilhelme Macler, saingnor de Hemericourt, et out trois fis et dois filhes, assavoir monssaingnor Johan, monssaingnor Ernut et monssaingnor Lambier; et, des dois filhes, ly une fut mariée à Barche et ly atre à Castelineal. Do dit monssaingnor Johan issit messires Godefrois, sires de Harduémont, de Holongne et de Kerme, lyqueis fut, de personage, ly plus petis chevaliers delle evesqueit de Liege; mais ce fut uns corageus chevaliers et une grande et forte capitaine, souverains de toute son linage, et fut bannerés. Et out ly dis messires Johan plusieurs filhes, qui furent sereurs al dit monssaingnor Godefroit, lyqueis messires Godefrois fut peires de monssaingnor Johan, saingnor de Harduémont, de Holongne et de Kerme, nouvellement trespasseit sains hoir, qui petitement soy governat, dont c'est grans damages pour tot son linage, car ilh estoit cortois, humles et debonairs chevaliers.

154. Ly dis messires Ernus, secons fis do jadis monssaingnor Ernut de Harduémont, morit sains hoir.

155. Et ly tirs fis, assavoir messires Lambiers, fut sires delle fortece de Hautepenne; et prist la filhe Watier de Bilrevelt; sy n'en fut nus hoirs. Et puis soy remariat alle filhe Johan, le viez voueit de Horion, qui fist la fortece do Pais Saint Martien; s'en out dois fis, assavoir monssaingnor Waltier, saingnor de Hautepenne, bon chevalier et hardy, et monssaingnor Ernut, saingnor de Villereal et de Boilhe, et une filhe, mariée à monssaingnor Jakemme, saingnor de Chailes.

156. Ly dis messires Watier prist à femme la filhe monssaingnor Henry le viez saingnor de Ghudegoven, engénée en la filhe saingnor Jakemon Chabot, qui, après ce, fut femme à monssaingnor Watier de Momale, dont mention est faite en la genalogie do viez saingnor de Warfezéz. Et, de ceste damme, out ly dis messires Waltirs de Hautepenne trois filhes, dont ly ainsnée est à present femme de monssaingnor Rasson, saingnor de Warous et de Hautepenne, et n'ont nulle hoir. Ly atre filhe fut mariée à Johan de Fleron, fil monssaingnor Thiri de Fleron; et ly tirce at Stochar de Forvie, escuwir.

157. Do dit Johan et de la dicte damoyselle de Hautepenne sont dois fis, Thiris et Watier, lyqueis Watier n'est point marieis; et ly dis Thiris soy mariat alle filhe Wilhelme de Gaviers, le lombars, manant à Meffe, et at jovente asseis pour avoir planteit d'oirs. Et quant ly dis Johans de Fleron fut trespasseis, elle, sa femme, soy remariat à Godefroit, fil Colar le Puissant, cangeur de Liege, dont y sont plusieurs enfans, qui n'ont nint terre selonc leur nation.

158. Ly tirce et plus giovane filhe do saingnor de Hautepenne fut promirement mariée à on anchien et wailhant escuwier, nommeit Stochar de Forvie, dont ilh fut messires Stochars de Forvie, qui avoit le plus beal commenchement de venir à haute honeur, selonc sa terre, que nus jovenes chevaliers qui fuist en nostre paiis, car partout ilh parsiwoit les armes, dedens le paiis et dehors, mais ilh est nouvellement, en la fleur de son eage, trespasseis sains hoirs, dont c'est piteis et damages; et a une sereur de cely mariage, nommée Johanne, qui fut femme à monssaingnor Godefroit de Vilhe, grant bailhir delle conteit de Namur, chevalier. Et maintenant elle est remariée à monssaingnor Warnier, saingnor de Daveles, et ont des hoirs. Quant ly jadis Stochars fut mors, sa dicte femme, qui est une damme de haute vie, honieste et religieuze, et de grant sains et gouvernanche, soy remariat à

monssaingnor Ernut de Warnant, chevalier, esquevin de Liege et de Huy, doqueil chevalier elle at une filhe, mariée nouvellement à on bon chevalier de Haynau, nommeit monssaingnor Johan de Floon.

159. Ors revenons à monssaingnor Ernut, saingnor de Villereal, freire do dit monssaingnor Waltier de Hautepenne. Chis messires Ernus fut marieis alle filhe Percheval de Wyhongne, dont y sont trois fis, assavoir Lambier, Ernut et messires Watier. Ly dois promerains ne sont nint marieis, quanteal qu'il soient avant d'eage et beaz escuwiers. Mais ly dis messires Waltirs est marieis alle filhe Johan delle Chier, escuwier, saingnor de Barveal, qui n'avoit plus d'enfans.

160 Item, ly filhe monssaingnor Lambiert de Hautepenne, et sereur à monssaingnor Waltier de Hautepenne et à monssaingnor Ernut de Villereal deseurnomeit, fut mariée à on tres beal et tres bin tailhiet chevalier et de grande eloquence, monssaingnor Jakemme, saingnor de Chailes; s'en issirent messires Rasses, sires de Chailes, qui morit sains hoir, et Jakemars de Chailes, qui soy mariat alle filhe monssaingnor Lowy, saingnor de Harzéez, chevalier, dont ilh est gran nombre d'enfans, qui n'ont nint teile patrimoine qu'il afferist à leur estat.

161. Item, deveis savoir que ly promire filhe de monssainanor Ernut, saingnor de Harduémont, sereur à monssaingnor Johan et à monssaingnor Lambier, fut mariée al voweit de Huy, saingnor de Barche, qui estoit do lynage de Beafort et portoit d'or à une bende germelle de geules; s'en issit messires Waltier, ly voweis, qui morit sains hoir, une damme mariée à monssaingnor Symon de Cleiremont, qui morit sains hoir, et une atre qui fut damme de Barche et de Ramelo, qui promierement fut mariée à Gerart de Ramelo, le freire Henriet de Rolouz, et secondement à monssaingnor Gilhe de Strez, si qu'il vous porat chi après apparoir, en capitle parlant de ceaz de Geneffe.

162. Item, delle seconde filhe monssaingnor Ernut, saingnor de Harduémont, qui fut mariée à Castelinea, n'avons encors rins mis en escript, par faute de veritable information.

163. Ors retournerons à monssaingnor Godefroit de Tilhice, car messires Gilhe, ly atres freires, morut sains hoir en Aragone. Et tuit chilh de ceste coistie de Harduemont portent d'argent à fleur de lys de geules et crient Domartien. Ly dis messires Godefrois brisat ses armes d'on quartier de geules et prist à femme la sereur do viez monssaingnor Bertran de Liers; desqueis issit messires Ernus de Thilhice, qui fut peires de monssaingnor Henry de Rocourt, et de Bertran de Tilhice, et de Ernus de Tilhice.

164. Ly dis messires Henri de Rocourt soy remariat en ses viez jours à damme Ysabeal, filhe monssaingnor Thibaut de Langdris, dont mention est faite en la genealogie des enfans le saingnor de Warfezéez, toichante les hoirs de Langdris; et en est issus Ernus de Rocourt, qui at plusieurs enfans delle filhe Lowy Braibecheon de Mirmorte.

165. Ly dis Biertrans de Tilhice soy mariat alle filhe monssaingnor Wilhelme d'Awans, dit Biersés, et n'en est nulle hoir; et Ernut morut assy sains hoirs.

166. Chi devant vous at esté racordeit la generation de monssaingnor Lambier, saingnor de Harduémont, mainsneit fil de monssaingnor Ernut, freire de monssaingnor Thomas, saingnor de Hermalles. Ors recorderons chi après la generation de monssaingnor Adan, saingnor d'Ardenges et d'Ouppey, ainsneit fil do dit monssaingnor Ernut et ainsneit freire do dit monssaingnor Lambiert.

167. Ly dis messires Adans out trois fis. Ly ainsneis fut nomeis monssaingnor Lambier et fut sires d'Ouppey; sy portat les armes entiers, assavoir d'argent à fleurs de lys de geules; dont ilh issit ly

secons messires Lambier, qui prist à femme le damme de Paiienporte, qui fut sereur de remariage à saingnor Gilchon Polarde, peire de monssaingnor Johan Polarde, chevalier, esquevin de Liege. De cesty seconde monssaingnor Lambiert et delle damme de Paiienporte issit ly bons, ly preuz et ly fors messires Lambier, ly tirs sires d'Ouppey de ce nom, qui par tous paiis alat sor ses propres deniers avanchier son cors et acquiere l'onneur del monde.

168. Ly tirs messires Lambier soy mariat alle filhe monssaingnor Ernut de Hussimbur, lyqueis monssaingnor Ernus estoit issus del unk des anchiens freires de Warfezéez, assavoir de monssaingnor Ernut, freire de monssaingnor Otton, saingnor de Warfezéez. Chis monsaingnor Ernus de Hussinbur portoit de geules à fleurs de lys d'argent, à on labeal à trois pendans d'azure, et avoit à femme la filhe de monssaingnor Libier Butoir, saingnor de Cleiremont et d'Awans. Doqueile monssaingnor Lambier, tier de ce nom, et delle damme de Hussinbur issit ly quars monssaingnor Lambier, qui fut hardis, entreprendans et de grant corage, marissaz delle evesqueit de Liege, prevost de Builhon et esquevin de Liege, qui acquist tres grans hiretages; doqueile et de sa generation est mention chi devant faite. à caze de madamme sa femme, en la genealogie do saingnor de Hermalles.

169. Item, ly secons fis monssaingnor Adan, sires d'Ardenges, fut nomeit messires Godefroit et demorat sires d'Ardenges; doqueile sont yssus tul cilhe d'Ardenge, de Duras et de Kerkehemme qui sont à present, et messires Girart, sires de Bierlo, et si hoirs. Et out assy ly dis messires Godefrois on fil, nommeit monssaingnor Henry d'Ardenge, canonne de Sains Johan à Liege.

170. Et ly tirs fis monssaingnor Adan, saingnor d'Ardenges, fut abbés de Saintron, tres vailhans prelas, et de haute honeur et regiment.

171. Nos vos avons ordinéement declareit tot ce que nos savons delle genealogie des trois fis monssaingnor Otton, fil monssaingnor Libier Sural, saingnor de Domartien, assavoit de monssaingnor Rasson, saingnor de Warfezéez, monssaingnor Thomas, saingnor de Hermalles, et de monsaingnor Ernut, saingnor de Harduémont; sy vos metterons chi après en escript la generation do quar freire, nomeit monssaingnor Ystasse, qui, de part sa femme, fut sires de Noefcasteal, en la terre de Dolhehen et de Haneffe.

172. Veriteis est que ly saingnorie de Noefcasteal est uns anchiens saingnorage et de grant stokage, ja soice qu'ilh nel semble nint à present; car ilb fut jadis on temps que ly sires de Noefcasteal prist à femme la filhe do conté de Hoghestroite, en la Haute Almaingne, qui de son droit hiretage estoit sires de Dolhehen et de toute che qui y apent; avoek laqueile filhe il prist à mariage le terre de Haneffe, en Hainsbange, qui soloit estre des allouz de Mohaute, mais elle parvint alle conte de Hoghestroite de part sa femme, qui fut sereur alle conte Albier de Mohaut, qui assy astoit contes [de] Dasborghe, en la haute Allemangne, et lyqueis contes Albiens donnat, après ce, sa terre de Mohaute alle engliese de Liege, al temps delle evesque Houwe de Pirepont, ensi que les coronikes de Saint Lambiers continent. Chis sires de Noefcasteal trespasat, et ly bonne damme, sa femme, demorat veves, qui navoit que une filhe tant soilement. Cheste damme estoit tant bonne, tant sage et sy wailhant damme que on le nommoit en sornom le Franke Damme. Elle, por les peris de sa jovene filhette à eskiweir, vint demoreir, en ses veveys, à Haneffe. La, elle tenoit tres gran estat et faisoit si grande almoines que de sa bonteit et honeiste vie parloit tous ly paiis. Et ce fut al temps que monssaingnor Otton, sires de Warfezéez. qui avoit les quatre beaz fis deseurnommeis, vivoit en grandes honeur, richeches et estat, et n'avoit encor nulle de ses enfans astalleis. Chest damme ly demoroit tot pres et oit chescon jour la bonne famme et renomée des enfans deseurdiz; et par especiaz, ly renomée de dit monssaingnor Ystasse, qui astoit ly plus juvenes, passoit tout, car c'estoit ly plus preuz, ly plus beaz et ly miez entachiez, et tant gratieuz que chascuns l'amoit por les bons viertus qui estoient en ly. On jour, s'avisat ly bonne damme de Haneffe et montat sor son char, de matien, et s'en alat à

Warfezééz. Ly dis monssaingnor Ottes le rechuyt en gran reverenche, ly merveilhans forment de sa venue et demandant la caze de son traveilhe, com chis qui dolans estoit qu'elle nel avoit mandeit par devers ly. Et ly wailhant damme respondit qu'elle voloit dyneir deleis ly et, après dyneir, elle ly diroit son entente. De che fut tres liesse le sires de Warfezééz; se le festiat tres grandement, selon ce qu'elle estoit venue disporveüwement. Et après dyneir, elle trahit le saingnor de Warfezééz à part, en une chambre à secreit, et ly dist: « Sires de Warfezééz, j'ay une filhe à marieir, qui tenrat gran terre et grandes possessions, et vos aveis Ystasse, vostre jovene fil, qui bien me plaist. Sy vous requiere que ly mariages en soit fais. » Adont fut ly sires de Warfezééz forment entepri, et out grande admiration delle humiliteit de la dicte damme, et ly respondit: « Ma chier damme, se je n'avoy que on seul fil tant soilement, sy ne sieroit ilh nint suffisans asseis pour vostre filhe. Mais puyqu'il vos plaist tant humiliier que de prendre à moy, sy vos plaise acordeir à Rasse, mon ainsneit fil, qui tenrat la plus gran parchon de tous mes bins et qui sierat sires de Warfezééz et de Domartien. » Mais la dicte damme, qui cognoissoit bin toutes les manires des enfans deseurdiz, respondit qu'elle ne voloit atre que le dit monssaingnor Ystasse: sa filhe sieroit riches asseis, elle ne demandoit nint à avoir gran terre, fours on homme de teile corage que sa terre pouwist deffendre et acroistre, car elle ne demeroit nint entre ses proismes. Sor ce, fut fais ly mariages.

173. Chis messires Ystasse de Domartien, sires de Noefcasteal et de Haneffe, cangat les couleurs des armes son peire, car ilh encargat à porteir de geules à fleurs de lys d'or, et crioit Domartien. Ilh out quatre fis, monssaingnor Renart, saingnor de Noefcasteal, monssaingnor Thiry, saingnor de Haneffe, monssaingnor Johan, saingnor de Duras de part sa femme, et monssaingnor Lambiert, saingnor d'Abééz de part sa femme assy.

174. Ly dis messires a Renars out on fil, nommeit messire Renier, qui demorat sires de Noefcasteal, et pluseurs filhes assy, dont gran nombre de bons chevaliers, escuwiers, de bonnes dammes et damoyselles, dela Mouze et decha, sont estrais. Et tousjours est ly drois saingnorages de Noefcasteal demoreis az hoirs; et encors en est sires, al temps presens, uns bons juvenes fis, qui nouvellement at pris l'ordenne de chevalerie, et est nommeis messires Reniers, sor l'an mil trois cens et nonante owit, qui, de part sa meire, est estrais des vailhans gens de Fraipont, qui ont esteit de gran renomée.

175. Item, ly dis messires Thiris, sires de Haneffe, brisat les armes son peire d'on quartier des armes de Mohaut, et est ensevelis az Freires Meneurs à Huy. Ilh fut bannerés et soy mariat alle filhe do saingnor d'Erkle, en la dukeit de Geulres, qui astoit uns riches bannerés. Ilh orent on fil, nomeit messire Ystasses, ly viez Persans de Haneffe, qui fut assy banneresse et fut forment riches et poissans. Adont avoit ly sires de Jayche, en Braybant, qui estoit uns nobles bannerés, II filhes, dont ly viez Persans de Haneffe deseurnommeis out une, et ly sires de Havereche, en Haynau, out l'atre. Do viez Persant et delle damme de Jache yssirent dois fis, bannerés chevaliers, et V filhes, assavoir ly secons messires Ystasse Persans, sires de Haneffe, et messires Thiris Tabareaz, sires de Seraing. Chis de Haneffe fut ly uns des trois plus preus de ce paiis, et ly atre dos furent ly bons sires de Hemericourt et ly bons Wafflars de Momale, si qu'il contient al comenchement de ce traitiet. Chis messires Thiris Tabareaz morit sains hoirs de son corps; se fist hoir de tout le sien le bon monssaingnor Thiry, saingnor de Seraing, dont ilh estoit oncles, qui fut assi bannerés, dont chi après sierat faite mention. Et, des V filhes, fut ly une mariée al viez monssaingnor Corbeal d'Awans; ly seconde, al saingnor d'Argenteal; ly tirche, al saingnor de Bealfor sor Mouze; ly quarte, al saingnor de Hamale; et ly Ve, à monssaingnor Godefroid de Hemericourt, saingnor de Herkes, deleis Tongres, qui fut freires al bon saingnor de Hemericourt nomeit messire Wilhelme Macler. Chis messires Godefrois out on fil, nomeit messire Wilhelme, qui morit sains hoir; et monssaingnor Moylerepas, delle dukeit de Juley, robat le damme, dont ilh fut gran guerre.

176. Chis bon chevaliers, nomeis ly secons messires Ystasses Persans, ainsneis fis do vielh et promerain monssaingnor Persant, soy mariat alle filhe d'on noble bannerés en l'Eiffe, le saingnor de Rulant, de laqueil ilh out unc fil et trois filhes. Ly fis fut nomeis messires Johans et fut sires de Haneffe; se morut alle batailhe do Thier de Nyerbonne, deleis Huy, en service de ceaz delle citeit de Liége, al encontre delle evesque Adulphe delle Marche et de chez de Huy. Chis secons messires Persans fut veves delle damme de Rulant; sy soy remariat alle damme de Beazen, qui astoit veve et tres noble damme, cuzine al duk de Loheraines, do linage de Remegny, dont ly bons Houwes de Florines fut et chilh de Fangnoles assi. De ceste damme out ly secons messires Persans dois fis et une filhe, assavoir Houwet d'Ochamp, qui fut ainsneis, et le bon monssaingnor Thiry, qui fut sires de Seraing, delle succession monssaingnor Thiri Tabareal, son oncle, dont chi devant est faite mention; et ly filhe fut mariée à monssaingnor Johan, saingnor de Gemeppe en Ardenne. Chis secons messires Persans cangat les armes de ses predecesseurs et emprist tot premiers à porteur d'azure à fleurs de lys d'argent; mais tousjours demoroit ly anchiens cry de Domartien.

177. Ors dirons de ses enfans, et, devaintrainement, de ceaz do promerain mariage.

178. Messires Johans, sires de Haneffe, ansneis fis do secon monssaingnor Persant, prist à femme la filhe monssaingnor Watier, saingnor d'Oxhen, en Condros, qui n'avoit plus d'enfans; et, ja fuist choze qu'il portast les armes d'Oxhen entirs, assavoir de geules à dois lupars passans d'argent, nequident si estoit ilh do linage de Warfezééz, si qu'il appert chi devant, en la genealogie delle quarte filhe monssaingnor Rasson, saingnor de Warfezééz, promerain de ce nom. De ceste damme d'Oxhen out ly dis messirs Johan on fil et dois filhes. Ly fis fut nommeis messires Watier, beaz chevaliers et cortois, qui morit sains marieir en la royalme de Grenate, sor les Sarazins. Chis messires Watier laissat sa terre de Haneffe et d'Oxhen à Wery, son cuzien, fil do saingnor de Rochefort, sor teile condition qu'il cangeroit son nom par noveal baptemme en flun Jordan et soy feroit nommeir Waltier après ly, et, en memore de ly, ilh porteroit son blazon, assavoir d'azure à fleurs de lys d'argent; lyqueis Wery fist ce que ses oncles cargiet ly avoit, et prist l'ordenne de chevalerie, sy qu'il fust sires et est encors de la dicte terre de Haneffe; doqueile chi après sierat parleit plus plainement.

179 e. Des dois filhes monssaingnor Johan, saingnor de Haneffe, fut ly ainsnée mariée al noble saingnor de Rochefort, banerés, nomeit messire Thiris, qui portoit d'or à une aygle de geules, le bek et les piiez d'azure, et crioit Walecourt, dont ses peires avoit esteit sires. Chis dois conjoins orent la plus belle conpaingnie d'enfans qui fuist en l'evesqueit de Liege, assavoir VIII fis et une filhe: messire Johans, messire Thiris et messire Waltier, chevaliers, messire Gilhes, messire Persans, andois canonnes de Liege, Gerars, Henrys et Lambiers; et leur sereur Johanne, qui tres belle et tres bonne estoit, fut mariée al saingnor de Boussut, en Haynau.

180. Messires Johans, ly ainsneis, fut sires de Rochefort et prist à femme l'année filhe do bon saingnor d'Agymont, qui fut maistres de ses voisins et ly plus redoubteis chevaliers qui fuist en quatre paiis environ; s'en out trois fis, assavoir monssaingnor Johan, saingnor de Rochefort et d'Agymont, Thiry, saingnor d'Ayshove et de Nokers, en Flandres, et Rasses, saingnor de Herymeis, en Haynau.

181. Chis secons messires Johans, sires de Rochefort et d'Agymont, prist à femme damme Felicitas, filhe do dierain monssaingnor Lambiert, saingnor d'Ouppey et de Harsta, dont mention est chi devant faite, en la genealogie do saingnor de Hermalles et assy en capitle de ceaz de Harduémont. Chis sires de Rochefort et d'Agymont morit bin juvenes; s'en demorat on fil tant soilement, en l'eage de demy an ou environ, nommeis Johan, qui est à present sires de Rochefort et d'Agymont, de gran sains et eloquence solont sa jovente. Ilh est marieis alle filhe de monssaingnor Houwe, saingnor d'Atey et senissalle delle dukeit de Luxemborch, et en at à present dois filhes; et puet encor avoir

gran planteit d'enfans, car ilh et sa femme sont de bin jovene eage. Et, ja soit ilh de jovene eage, sy est ilh sy craz et si cargiez de char que c'est gran merveille qu'il puet chevachier, car je croy qu'en tot ce paais n'at persones de si pesans ne de si gros membres que ly. Mais, d'espier et de tos desduys, est ilh plus legiers et plus envosiez que nus atres; et sa crasse doit desplaire à tout son linage, car je croy fermement que, se ce nel encombraist, que ce fuist ly souveraine capitaine de tot son linage.

182. Item, Thiris de Rochefort, secons fis de monssaingnor Johan de Rochefort, engenreis en la filhe do saingnor d'Agymont, soy mariat par amours, sains le conseilhe de ses amis; car ilh enamat damoyselle Clamence, filhe d'on suffisan borgois de Liege, nommeit Ottebon de Hemericourt, laqueile astoit tres belle et tres gratieuz filhette; si l'enmynat avouke ly et, pou après, ilh l'esposat; et en at une filhe, nommée Katherine, qui, à present, est en a l'eage de XIII ans, assavoir l'an mil trois cens nonante owit; et ceste meïsmes année, environ le Sains Martien, elle fut mariée à on tres beal chevalier de Flandres, nomeit monssaingnor Ernut, fil do saingnor de Zwevehghien.

183. Item, Rasses de Rochefort, sires de Herymeis et freires do dit Thiris, est marieis alle filhe monssaingnor Ernut de Molembays, saingnor de Linsemeal, dont mention est chi devant faite, en la genealogie do saingnor de Daveles, et ont trois filles.

184. Nos avons ordinéement descript chez qui sont issus de monssaingnor Johan, ainsneit fil de monssaingnor Thiry, saingnor de Rochefort; si dirons de monssaingnor Thiry, son freire.

185. Messires Thirys est sires de Buzien et de Felon, en Condroz. Ilh at esteit marieis dois fois. Sa promerain femme fut filhe Gilhekien de Ryanweys, castelain hyrelier de Drubuyt; et la seconde fut del ducheit de Luxemborch, mais il n'en at nul hoir.

186. Item, messires Watier, tir fis de monssaingnor Thiris, saingnor de Rochefort, fut en devant nomeis Weryt, si que nos avons dit. Ilh at à femme une bin noble damme, filhe d'on noble baron, appeleit monssaingnor Thiry, jadis saingnor de Houffalieze, de Rochy et delle Flamengerie. Ly dis messires Watier est assy bannerés et sires de Haneffe, et de Rochy et de Flamengerie. Ilh out on bon fil, nommeit Thiry, qui fut canonne et archydiake de Liege, mais ilh est tot nouvellement trespasseis, dont c'est gran damages. Et at encor ly dis messires Watier dois filles, dont ly ainsnée est mariée à on bin noble homme, monssaingnor Henry, saingnor de Perweys et d'Oxhen, s'en at plusieurs juvenes enfans; et ly atre filhe est toute nouvellement mariée, sains le greit de son dit peire al saingnor de Monjoie, en l'Eiffe, fil jadis monssaingnor Johan, qui lut fis à monssaingnor Renart Maxhereit, jadis saingnor de Schoenevorst: chis mariages fut fais l'an mil trois cens nonante noef, en moys d'awrilhe.

187. Item, ly quars freires de Rochefort fut nomeis Gilhe; se fut canones de Saint Lambiert. Et monssaingnor Ystasse Persans, ly chinquemme freires, fut canones là meisme et esleüs evesque de Liege; mais, par tant qu'en temps de scismes ilh s'ahierdit alle antipape d'Avegnon, il fut dekachies lontemps et morit en Awegnon.

188. Item, ly atre trois freires, assavoir Gerart, Henrys et Lambiert, ne furent onkes marieis, et morirent sains hoirs.

189. Et leure belle sereur fut mariée al saingnor de Borsuyt, deleis Saint Gilhain, en Haynau, et en sont dois fis et une filhe, assavoir messires Watier, sires de Borsuyt, beaz chevaliers et plain de bonne viertus, qui est nouvellement marieis; ly autre est nommeis messires Persans; et ly filhe est assy nouvellement mariée à on ancien chevalier delle dukeyt de Luxemborch, nommēt messire Thiry de Cleyrenvaz.

190. Ors vos est demostreit par escript ly generation parvenue delle damme de Rochefort, ainsnée filhe de monssaingnor Johan, saingnor de Haneffe; sy revenrons à sa sereure.

191. Ly seconde filhe monssaingnor Johan, saingnor de Haneffe, fut mariée à monssaingnor Badewien, saingnor de Geneffe et castelain de Waresme, fil do vailhant et poissant bacheleir, monssaingnor Wilhelme, le bon et le preus castelain de Waresme, qui fut, en mortel faite do paiis, ly souveraine capitaine delle coystie de chez d'Awans. Chis messires Badewiens et Wilhelmes, ses freires, qui point n'estoit marieis, morurent alle bataille do Thier de Nyerbonne, deleis Huy, en la conpaingnie do saingnor de Haneffe deseurnomeit. Do dit monssaingnor Badewien, qui portoit vaiiert d'argent et d'azure à on lyon de geules et crioit Domartien, demorat une filhe desagie tant soilement. Et sa meire soy remariat à monssaingnor Henry de Pitresen; s'en fut uns beaz fis, nommeis messires Johan de Pitresen, qui fut senissaz delle conteit de Louz et morit sains hoir.

192. Ly filhe do dit monssaingnor Badewien, saingnor de Geneffe, fut mariée promirement à on noble chevalier de Haynau, nomeit monssaingnor Johan de Sore; mais, par tant qu'elle estoit deseagie et ly dis messires Johan nel avoit nint cognue charneilement, sa grandamme, ly damme d'Oxhen, le rendit en mariage à monssaingnor Gierlax de Mondersdorp, saingnor de Monjardien, adont escuwier, qui at esteit beaz et envoisiez chevaliers.

193. Do dit monssaingnor Ghierlak et de sa dicte femme sont uns fis et une filhe. Ly fis est nomeis messires Badewiens, qui prist en mariage la damme de Veyenhoven, en la dukeit de Juley, et est à present sires de Veyenhoven, de Geneffe, de Gehain, de Monjardien, et castelains de Waresme. Ilh at on fil tant soilement, qui nouvellement at pris l'ordenne de chevalerie, et est nomeis Badewiens; se puet encors venir en grant prosperiteit.

194. Item, ly sereur de cesty monssaingnor Badewien, saingnor de Geneffe et fil do dit monssaingnor Ghierlax, fut mariée à on bin noble chevalier, monssaingnor Ghierlak de Bolan, saingnor de Roley, qui morit en serviche le duk Wynchelauz, duk de Braybant, alle bataille à Bossewilre, al encontre do duk de Guelres et do duk de Juley; s'en demorat uns fis et une filhe.

195. Après ce, soy remariat ly damme de Roley; se reprist monssaingnor Warnier, qui, à present, est sires de Daveles, et qui estoit veves delle sereur le saingnor de Lyntres. Et fut assy fais uns mariages do fil la dicte damme nomeit Henry de Roley, à present chevalier, et delle filhe do dit saingnor de Daveles, engnée en la damme de Lyntres, sy que ly peire et ly filhe orent la meire el le fil. Sy poront tres bien ly dis messires Henrys de Roley et sa femme avoir planteit de hoirs, car ilh sont juvenes. Et ly sereur do dit monssaingnor Henry de Roley est mariée en Haynau, à Robier de Tilhies.

196. Puyisque nos avons recordeit chez qui sont issus de monssaingnor Johan, saingnor de Haneffe et d'Oxhen, qui fut ainsneis fis do promerain mariage le secon monssaingnor Ystasse Persant, saingnor de Haneffe, nos dirons chi après des trois sereurs germainez do dit monssaingnor Johan.

197. Ly ainsnée des trois sereurs deseurdictees fut mariée al bon monssaingnor Henry, saingnor de Hermalles, qui morit al bataille à Domartien; doqueile, et de ses hoires, ly genealogie est chi devant plainement contenue, en capitle de chez de Hermalles.

198. Ly seconde sereur germainedo dit monssaingnor Johan, saingnor de Haneffe et d'Oxhen, fut mariée à monssaingnor Jehan Botier, saingnor d'Aaz et de Hermééz, fil monssaingnor Rigaut d'Aaz, qui est ensevelis à Vyvengnis, qui portoit d'argent à une crois d'azure, à on labeal à trois pendans de geules, et crioit Rocourt. Ilh out de ceste damme dois filhes, dont ly ainsnée fut mariée al bon

monssaingnor Henry de Fexhe, dont mention est chi devant faite, en la genealogie monssaingnor Heyneman de Schoenehoven; et ly atre fut mariée à Olivier d'Ohay, Si dou bon Waleran de Jouprelle, doqueile mention sierat faite chi après, en la genealogie de monssaingnor Libier Crepon d'Otééz.

199. Et ly tirce sereur do jadis monssaingnor Johan, saingnor de Haneffe, fut nomée damoyselle Aelys; se fut begine, et est ensevelie en cour delle engliese des Freires Meneurs, en Liege, joindant delle sepulcre son bon freire, monssaingnor Thiry, jadis saingnor de Seraing, chevaliers bannerés.

200. Ors aveis oût recorder ceaz qui sont estrais do promerain mariage le secon monssaingnor Ystasse Persant, saingnor de Haneffe; se dirons chi après de ses dois fis et de sa filhe, qui furent de secon mariage.

201. Houwés d'Ochamp, ainsneis fis do dit secon mariage, soy mariat alle sereur monssaingnor Pire Hustien, saingnor de Netines, en Condroz, qui portat les armes de Tynes; s'en out plusieurs enfans. Sy parleray de ceaz dont je ay eut cognissanche. Ilh y fut Johan d'Ochamp et assy V filhes. Ly dis Johans d'Ochamp et une de ses sereurs soy mariont à monssaingnor Johans delle Vaaz, jadis chevalier, maieur et esquevin de Liege, et à sa sereur, sy que ly une paire out l'atre en mariage; desqueis est faite cleire mention chi devant, en capille parlant de monssaingnor Heyneman d'Ays, dit de Schoenehoven, par tant que ly dis messires Johan del Vaaz yssit do dit monssaingnor Heyneman.

202. Item, ly seconde filhe Houwet d'Ochamp fut mariée à Libier de Hons, en la conteit de Namur, dont y sont ly hoirs.

203. Item, ly tirce fut mariée à Oredeal, fil Johan le Boirgne de Halois, qui tenoit la fortreche de Moufrin, en ban de Cyney; s'en fut uns fis, nommeis Johans de Moufrien, qui fut marieis à damoyselle Johanne de Noirfontaine, dont ilh est une filhe toute arsée et floive de sens. Ly dis Johans morit juvenes, et sa meire et sa femme ont esteit de petit regiment.

204. Ly quarte filhe Houwet d'Ochamp est nomée damme Jake et est nonne alle Vaz Nostre Damme, et ly Ve est nomée Luscie et est nonne à Sains Remy l'Abie; mais elles ont mal tenu l'ordinaire saint Biernar.

205. Item, messires Thiris, sires de Seraing, secons fis do secon mariage le secon monssaingnor Persan de Haneffe, et freires al dit Houwet d'Ochamp, fut, à son temps, ly miez entachiez chevaliers, ly plus sages et ly miez ameis des saingnors marchissans qui fuist en nostre paiis et qui plus sovent avoit esteit armeis por le werre et por le tournoy. Ilh brisat les armes de Haneffe d'on quartier de Rumengny, qui sont d'or à on satoir de geules, à on doble trechoir vert. Ilh fut sires de Seraing et de Herkes, deleis Tongres, delle succession monssaingnor Ilhiry Tabareal, son oncle, et acquist si grandes possessions que che fut uns riches bannerés. Ilh soy mariat al hoir de Prailes, dont ilh yssit ly beaz et ly rades messires Ystasses de Seraing, et une filhe, qui ful mariée à on bannerés de Braibant, saingnor de Rochelar, mais elle morit sains hoir. Chis messires Ystasses fut marieis en faisant pais des mortel faites do paiis, assavoir des linages d'Awans et de Warous et de leurs ahierdans, alle filhe monssaingnor Watier de Momale, secon fil do promerain mariage le saingnor de Warfezéz qui out les XX enfans. Chis sires de Seraing, avoek chez d'Awans, et ly dis sires de Momales, avoekes chez de Warous, estoient dois des plus fortes capitaines de leurs linages à cely jour; lyqueis sires de Momales n'avoit que une filhe delle vielhe damme de Ghudeghoven, filhe saingnor Jakemon Chabot, laqueile filhe ne poiot estre granment riche, car elle n'avoit nus hiretages de part sa meire, qui estoit veve quant elle soy remariat al saingnor de Momale, et assy ly dis sires de Momale n'astoit nint ahyreteis al regar do dit saingnor de Seraing, car ilh avoit esteit marieis en

devant, sy que ly premiers enfans devoient avoir la proprieteit de ses hyretaiges; nintmains, por appaisenteir les morteils gueres de nostre paiis., et en pais faisant, ly dis sires de Seraing fut conforteis de doneir son dit fil, qui devoit tenir, de part ly, plus de VI^m royaz par an, alle filhe do dit saingnor de Momale, qui pau de choze devoit avoir de peire et de meire; mais ses oncles, ly sires de Warfezééz, qui n'avoit nulle hoir, ly donnat en mariages la proprieteit de sa terre de Warfezééz et assy cely de Herypont, en Haynau, à avoir après son decès.

206. De cesty monssaingnor Ystasse et de ses hoirs est chi devant faite mention, en capitle parlant do dit saingnor de Momale, sy qu'il n'est nint neccesiteit do recapituleir.

207. Chis sires de Seraing et Houwés d'Ochamp orent une sereur germaine, qui fut mariée à monssaingnor Johan, saingnor de Gemeppe en Famenne, dont ly hoirs sont à present.

208. Ors est ilh temps de retourner bien arier, assavoir az V sereurs monssaingnor Ystasses Persant, secon de ce nom, qui furent filhes al promerain Persant, saingnor de Haneffe, qui soy mariat à une des filhes de Jaiche, en Braybant.

209. Ly ainsnée de ces sereurs fut mariée à monssaingnor Hombier Coirbeal d'Awans, secon de ce nom, a cuy temps les werres d'Awans et de Warous commenchont, et en morit premiers, car ilh fut tuweis al pongnyche à Lonchins; doqueil et de ses hoirs mention sierat chi après faite, en la genealogie de monssaingnor Hombier d'Awans, qui fut fil do veilhe monssaingnor Breton de Warous.

210. Item, ly seconde sereur fut mariée al saingnor d'Argenteal, qui portoit les armes de Houffalie, assavoir d'azure à une crois d'or, semenchiet l'escut de croisettes recroisetééz d'or, et en la gracle crois V kachalles de geules. De cesty saingnor d'Argenteal sont estrais tos ly drois hoirs d'Argenteal et de Bealmont, en l'Eiffe. Ilh en fut uns fis, nomeis messires Renars, marieis alle filhe monssaingnor Renier de Viseit, dont ly bons messires Renars, qui weriat à cheaz de Liege, issit; doqueile ly genealogie est chi devant escripte, en traitiiet parlant do saingnor de Momale, secon fil do premier mariage do saingnor de Warfezééz az XX enfans. De ceste damme d'Argenteal, qui fut filhe à viez monssaingnor Persant de Haneffe et femme al viez saingnor d'Argenteal, fut encors une filhe, mariée al saingnor de Bealmont, en l'Eiffe, dont chilh de Bealmont sont yssus, mais ilh sont à present durement fourmors.

211. Item, ly tirce sereure do secon monssaingnor Ystasse Persant fut mariée alle saingnor de Beafort sor Mouze, qui portoit d'or à une faixhe germelle de geules, qui out des hoirs; desqueis issirent ly saingnors de Beafort, qui vendirent leur terre al conte de Namur, qui orent dois sereurs, dont ly une fut mariée à monssaingnor Henry le Beal, chevalier esquevin de Liege, doqueile et de ses hoirs mention sierat chi après faite en capitle parlant de monssaingnor Rygaut de Beariu; et ly atre fut mariée à messire Jakemme de Revins, chevalier, manant à Huy. Et assy issit de viez saingnor de Beafor messires Watier, qui fut avoweis de Huy, et chilh de Ramelo.

212. Item, ly quarte sereur do jadis monssaingnor Ystasse Persant fut mariée al saingnor de Hamale; s'en sont estrais tuit chilh qui sont issus do casteal de Hamalle, dont ly gieste sieroit trop longe à raconter. Ilh portent d'argent à une faixhe coingnelée de geules et crient Hamalle.

213. Et ly chinqueyme sereure fut mariée à monssaingnor Godefroid de Hemricourt, ensi qu'il contient en traitiiet chi devant, qui morit sains hoir.

214. Ilh vos puet clerement chi devant apparoir que messires Ystasse de Domartien, sires de Noefcasteal et de Haneffe, out quatre fis, assavoir monssaingnor Renart, saingnor de Noefcasteal,

monssaingnor Thiry, saingnor de Haneffe, monssaingnor Johan, saingnor de Duras, et monssaingnor Lambier, saingnor d'Abééz, et coment nos avons reciteit ceaz et celles qui sont deskendus des dois promerains freires deseurnomeis. Ors nos covient retraire az atres dois freires; et premiers, de cely de Duras.

215. Veriteis est que chilh de Duras sont de grande antiquiteit estrais de princes, car ilh yssirent do conte Gilhebiert de Duras, qui fut sires de Gemblouz et de Jodongne, sires de Rochefort et de Walecourt, sires de Cleiremont, d'Asteneur et de pluseurs atres vilhes; lyqueile conte ly evesques Alixandres de Liege dekachat et weriat damageuzement pour les debas qu'il orent ensemble, à caze des oppressions qu'il faisoit alle engliese et al paiis de Liege, ensy que par les coronikes de Saint Lambier vos porat apparoir. Mais chis Gilhebiers fut ly dierrains qui portat nom de conte, tant que Duras. Ilh vendit Jodongne et Gemblouz et morit sains hoir, sy que si proismes depechont ses atres terres; dont ly uns demorat sires de Duras, et ly atres fut sires de Rochefort et de Walecourt, et ly atres sires de Cleiremont et s'apelat conte de Cleiremont, et y out trois contes l'un après l'atre; mais, finalement, furent encors ces terres departieez entre les hoirs, sy que ly terre de Rochefort et de Walecourt demorat à on membre, et ly terre de Cleiremont, d'Asteneur et d'alconnes atres demoront ensemble. Et puys sy departit ly sires de Cleiremont si largement de ses biens alle engliese delle Vaz Saint Lambiert que sy hoirs demoront simples chevaliers. Et ly forteche et ly terre de Duras, tant soilement demorat à on atre. Chis contes de Duras portoit de geules à une aygle d'argent et crioit Duras; et ces armes sont demorées à ceaz de Cleiremont juxes à present, mais ilh crient Walecourt. Et ly sires de Rochefort cangat les couleurs, car ilh prist d'or à une aygle de geules, le beche et les piiez d'azure, et cangat assy le cry de Duras, car ilh criat, et encors font ly hoirs, Walecourt. Ors deveis savoir que ly terre de Duras alat tant d'oyr en hoyr qu'elle demorat sains hoir marle, et en estoit damme une jovene filhette tant soilement, laqueile fut mariée al dit monssaingnor Johan de Noefcasteal, sy que, de part sa femme, ilh fut sires de Duras, et detinve les armes qu'il avoit pris: de sable à fleur de lys d'or, et assy le cry de Domartien, qui leur est demoreis juxes à present. De ly et de ses hoirs sont issus tuit chilhe de Duras qui sont à present. Et en sont ensevelis quatre des saingnors de Duras en l'abie de Myle, deleis Sain Tron. Et deveis savoir que messires Gerars delle Marche, chevaliers bannerés, fis legitimes do conte delle Marche, do secon mariage, et oncles al evesque Adoulph delle Marche, qui morit evesques de Liege l'an mil IIIc et XLIII, soy mariat alle sereur do saingnor de Duras, adont vivant, qui en devant avoit esteit mariée al saingnor de Bierlouz, doqueile promerain mariage estoit messires Gerars, sires de Bierlouz; et de cesty secon mariage furent dois sereurs mult belles, car je les veys et compangnay sovent fois. Ly une de ces sereurs fut mariée al genty voweit de Colongne, saingnor d'Alpen; s'en sont issus ly enfans d'Alpen maintenant vivans, qui de longteups ont esteit annemis alle paiis delle evesqueit de Liege et sont encors al jour d'uy ly plus fors tyrans qui soient entre Mouze et le Rins. Et ly atre sereur fut mariée à monssaingnor Biertran de Liers, saingnor d'Emale et d'Embennes sor Gayre, chevalier, et en sont al jour d'uy quatre enfans, assavoir Biertran, sires d'Emale, qui n'at nul hoir, Gerars, qui est rendus en l'ordenne delle Tyexhe Maison, en la commenderie des Joins, et dois sereurs, qui sont nonnes de Herkennerode, en la conteit de Louz.

216. Item, do dit monssaingnor Gerart, saingnor de Bierlouz, qui fut do promerain mariage delle sereur le saingnor de Duras, et durement ryches, sy que chevaliers dont estut, furent pluseurs beaz enfans, assavoir quatre fis et dois filhes, dont ly trois fis ainsneis, qui estoient ly plus beaz escuwiers de nostre paiis, morirent sains hoir, et ly quars et plus jovenes, nommeis Johan, fut chevaliers et sirez de Bierloz; se soy mariat alle filhe monssaingnor Wilhelme de Herymés, en Haynau, saingnor de Steynkerke, en Flandres, lyqueis monssaingnor Johans est trespasseis nouvellement, et de ly sont succedeis pluseurs jovenes enfans.

217. Item, ly une des sereurs do dit monssaingnor Johan, saingnor de Bierlouz, fut promirement mariée al jovene monssaingnor Johan, saingnor de Langdris, qui morit sains hoir; et ly damme soy remariat à monssaingnor Rogier de Bixte, deleis Stokehem.

218. Item, ly atre sereur do dit saingnor de Bierlouz le jovene soy mariat à monssaingnor Ernut de Corwaremme, saingnor de Nyle, chevalier, qui nouvellement est trespasseis; et sont de ly demoreis des beaz juvenes enfans.

219. Item, out ly vielhe damme de Bierlouz, filhe do vielhe saingnor de Duras et meire do jadis monssaingnor Gerart, saingnor de Bierlouz, une sereure germaine, mariée al viez monssaingnor Johans de Gheilekerk, adont manant à Treit, dont ilh yssit ly juvenes messires Johans de Gheilekerke, qui soy mariat alle filhe monssaingnor Lowy d'Uffey, chevalier, esquevin de Liege, dont y sont trois filhes, qui n'ont nint uzeit do conseilhe de leurs amis; et ly quatreyne fut mariée à Englebiert de Jupilhe, escuwier, et croye qu'il en sont demoreis uns enfes deseagiez.

220. Item, ly quars fis monssaingnor Ystasses de Domartien, saingnor de Noefcasteal et de Haneffe, fut nomeis messires Lambiers de Noefcasteal. Ilh prist teis armes et teile cry que ly sires de Duras, ses freires, portoit et y mist, de differenche, on labeal à trois pendans de geules. Ilh prist à femme la damoyselle d'Abééz, qui estoit uns hoirs de terre et à laqueile toute la terre d'Abééz, qui estoit à cely temps grande et ryche, appartenoit. De cesty mariage issit messires Renars, sires d'Abééz, etalconnes sereurs. Chis messires Renars soy mariat à une des filhes d'Oxhen; s'en issirent messires Lambiers, secon de ce nom, messires Johan Malvoisiens de Saint Viteur, chevaliers, et Malquerans d'Abééz, et assi quatre sereurs, dont chi après sierat faite mention.

221. Item, ly dis messires Lambiers ly juvenes demorat sires d'Abééz; mais, par le gran nombre d'enfans que ses peires avoit et si predecesseurs, saingnors d'Abééz, avoient eüt, ilh ne fut nint sy riches que ses devaintrains avoient esteit, car ses freires et sereurs orent pour leur astallement gran partie des hyretages de leurs jadis peire et meire. Chis messires Lambiers out on fil, et croy qu'il out des sereurs, mais je n'en suy nint bin informeis. Chis fis fut nomeis Renars et, por ses bonnes vertus, fut ilh sovent fois appeleis le bon Renars d'Abééz. Et ses dis peires trespasat l'an M CCC et XII; se fut ensevelis en l'engliese d'Abééz.

222. Chis bon Renars, sires d'Abééz, soy mariat à damoyselle Maroie de Warfezééz, filhe do promerain mariage le bon saingnor de Warfezééz qui out les XX enfans. Et, par tant que de cesty Renart et de ses hoirs est faite expresse mention chi devant, en la genealogie do dit saingnor de Warfezééz, je n'en feray nint chi nulle recapitulation.

223. Item, do dit monssaingnor Johans Malvoizien issit Renars de Saint Viteur, escuwers, qui viskat longtemps en mariage, mais ilh morit sains hoir.

224. Item, de Maqueran, tir fil do jadis monssaingnor Renart, saingnor d'Abééz, issit Renars Malquerans d'Abééz etalconnes sereurs, dont je n'ay nint cognissance. Chis Renars Malquerans soy mariat alle filhe Lowy delle Sefawe, escuwier, et en sont ly hoirs.

225. Item, ly une des quatre filhe do jadis monssaingnor Renart, saingnor d'Abééz, fut mariée à Johan, fil monssaingnor Antone de Gemeppe; s'en issirent trois fis et trois filhes, assavoir Thonons, Renars, Johan, et des trois filhes ferons nos chi apres mention.

226. Thonons deseurnomeis fut uns des beaz escuwers en toutes maniers qui fuist en nostre paiis. Ilh soy mariat à damoyselle Magriette, filhe Badewien Paniot, esquevin de Liege, et morit sains hoir.

227. Item, Renars, ses freires, alqueil ly casteaz de Gemeppe appartient, soy mariat à damoyselle Angnès, filhe jadis monssaingnor Bastien Boyleawe de Graz; s'en furent dois enfans, assavoir Johans et Antonnes, lyqueis Johan est mors sains hoir nouvellement, et ont une sereur mariée al saingnor de Modauls, et assi est mors sains hoir ly dis Antonnes.

228. Item, Johans de Casteal, ly lirs fis do jadis Johans, fil monssaingnor Antonne de Cemepe, prist et at à femme damoyselle Ysabeal, filhe jadis Alixandre de Jardien de Seraing, engénrée en la filhe monssaingnor Johan Polarde, chevalier, esquevin de Liege, de laqueile ilh at plusieurs enfans.

229. Item, est assavoir que, des trois filles do jadis Johan, fil monssaingnor Antone, ly une, nomée damoyselle Maroie, fut mariée al dit Alixandre de Jardien, après ce qu'il out esteit veves de sa promeraine femme, filhe do jadis monssaingnor Johan Polarde; s'en est uns fis chevaliers tant soilement, de ryche et de bin costable estat, nomeis messires Johan de Serainge, sires de Houten et d'Onche. Chis messires Johan soy mariat promirement à une tres belle damme et bonne damme, Ysabeal de Gochincourt, filhe Gilhbier de Gochincourt, escuwier, engénrée en la filhe monssaingnor Johan de Bernalemont, chevalier; et en sont V tres beaz juvenes enfans, assavoir Alixandre, Gilhbier, Johan, Johenne et Maroy. Item, ly dis messires Johan soy mariat secondement à damme Ysabeal, filhe Pirar de Suriche, borgois de Namur, engénrée en la sereur de monssaingnor Rasson de Warfezéez, saingnor de Warous et de Hautepenne, et n'ont encors nus hoirs. Et tircement, ilh est remarieis à damoyselle Maroie de Gounes, qui avoit esteit femme à Johans Bonvarlet, esquevin de Liege et de Huy.

230. Item, ly seconde filhe do jadis Johan, fil monssaingnor Antone, fut mariée à Momelette, et en sont plusieurs enfans.

231. Item, ly tirce fut mariée à Ameile de Parfonriu, manant à Flemale; s'en sont on fis et une filhe. Ly fis est nomeis Johan de Parfonriu et est nouvellement marieis à damoyselle Magriette, filhe de Gilhe Polarde, escuwier, saingnor d'Odoir le Remans. Et ly filhe est mariée à Rennechon le Foymen de Montengnéez; s'en sont ly hoirs. Ors retournerons alle seconde filhe do jadis monssaingnor Renart d'Abéez.

232. Cheste seconde filhe fut mariée à on escuwier de Stréez, en Condros, nomeis Loupiens; s'en issirent messires Gilhes de Stréez, sires de Barche, chevaliers, Lambiers, ses freires. etalconnes sereurs. Ly dis messires Gilhes soy mariat alle sereur monssaingnor Watier de Bealfoir, avoweit de Huy, qui estoit veve de Gerart de Ramelo, son promerain marit. Chis dois conjoins orent dois filhe, dont ly une fut mariée à Wilhelme, sangnor d'Orjo, escuwier, et ly atre, nomée Margritte, fut mariée à monssaingnor Wilhelme de Flemalle, chevalier, et morit sains hoirs.

233. De ceste damoyselle, mariée à Wilhelme d'Orgo, issit messires Johan, sire d'Orgo, chevaliers, qui morit juvenes. Ilh soy mariat à Maha d'Argenteal, filhe monssaingnor Johan d'Argenteal, saingnor d'Awelhonriu, chevalier; s'en est uns fis tant soilement, asseis juvenes d'eage, et nequident ilh est chevaliers et sires d'Orgo, et est nomeis Johan. Ilh at esteit nouvellement pris par le conte delle Marche, à caze d'une werre qui estoit entre le dit conte et le conte de Clayves, son freire, d'une part, et le duk de Mont, leur oncle, d'atre part; de laqueile prise ilh at esteit pensament ranchis.

234. Item, de Lambier de Stréez, freires do dit messire Gilhe de Stréez, sont issus Renar de Stréez et Gilhes, ses freires, oppidains de Huy. Ly dis Renar n'at nulle hoir et ses freires en at, si comme je croy, et de ceste coisté sont yssus Leupins de Stréez, Marenaveles el plusieurs atres.

235. Item, ly tirce filhe monssaingnor Renar, saingnor d'Abééz, fut mariée à Dorines, deleis Dynant; s'en yssit Wilhelme de Dorines et ses sereurs, dont y sont ly hoirs.

236. Item, ly quarte filhe fut mariée à on escuwier qui estoit do sanc de Dyest, nommeit Wilhelme d'Ongniez; s'en yssit Robier, sires d'Ongniez, qui soy mariat alle sereure Colar de Busson de Pytey, bon escuwier et cortois. Do dit Robier sont yssus messires Johans, sires d'Ongniez, chevaliers, Robiers, ses freires, et pluseurs sereurs maintenant vivans. Ly dis messires Johan, qui est sages et gratieuz chevalier, est asseis nouvellement marieis à Dynant; mais je nen say s'ilh at enfans.

237. Vos aveis chi devant oyut la declaration des quatre fis monssaingnor Ystasse de Domartien, saingnor de Noefcasteal et de Haneffe, et de leurs hoirs. Et, en parlant de monssaingnor Lambier, le plus jovenes d'eaz quatre, qui fut sires d'Abééz, en Condros, de part sa femme, je fis mention que ly dis messires Lambier avoit eutalconnes filhes, qui avoient esteit sereur à monssainanor Renart, saingnor d'Abééz, son fil; mais je ne trovay onques persones qui m'en pouwist avoier que d'unne des filhes tant soilement, par tant que c'estoit trop ancien choize; mais bin ay esteit de longtemps informeis par mon gransangnor, par mes grans oncles et par alcons atres de grant eage, que, delle une de ces filhes, issit Gerars Bocheaz delle Petite Vaz d'Abééz, qui fut engenreis de Jakemmar delle Vaz, qui estoit do linage de Marchiens desoir Barche, qui portent d'argent à on bar de geules.

238. Chis Gerars Bocheaz fut marieis alle sereur saingnor Gilhe delle Tourre de Havelangne, qui estoit do linages de Nayvaing sour Mouze, car Brousten de Havelange, ses peires, avoit eût à femme la filhe do saingnor de Nayvaing, qui portoit d'azure à on crois d'argent.

239. Ly dis Gerars Bocheaz out trois fis, assavoir maistres Jakes d'Abééz, sentenchier delle Cour de Liege, beal cler et reverente, Thomas de Warezééz, dont y sont ly hoirs, et Wilhelmes d'Abééz, qui morit sains hoir; et en fut pluseurs sereurs, dont ilh est planteit de menuez gens.

240. Ly dis maistres Jakes out dois fis et dois filhes, assavoir saingnor Piron d'Abééz, vestit de Havelange, Jakemien d'Abééz, dont ilh est une filhe tant soilement, mariée à Evelette, en Condros; et, des dois sereurs, ly une fut nomée damoyselle Yde, et ly atre damoyselle Johanne.

241. Chestc damoyselle Yde fut mariée à Gilhe de Hemicourt, secretaire des esquevins de Liege, et chis dois conjons furent peire et meire de moy, le compileur de ce traitiet, doqueile sierat chi après fait mention, en capitule parlant de monssaingnor Makare delle Heys de Flemale, dont je suy estrais de part mon dit peire. La dit damoyselle Yde se remariat, après l'obit do dit Gilhe, mon peire, à Henry de Bonnevilhe, fil Watier d'Otreppe, manant alle Vaz d'Aigre, deleis Bonnevilhe, et en est uns fis, nommeis Ansez, qui est marieis à Liege, alle filhe Johan de Hemicour, le drappire, et n'at nulle hoir.

242. Et la dit damoyselle Johanne, mon ante, .soy mariat la premier fois à Ameyle d'Ouppey; s'en est uns fis, nomeis Ameyle, qui n'at nulle hoir. Et secondement, elle soy mariat à Colar de Lowengnez, fil delle sereur monssaingnor Renier d'Awelhonriu, chevalier; s'en est une filhe, mariée à Colar delle Boverie de Tykier, borgoys de Liege, et ont enfans.

243. Chy fine ly genealogie des hoirs monssaingnor Ystasse, saingnor de Noefcasteal et de Haneffe; sy retournerons alle bonne damme de Walhehain, qui fut sereurs alle dit monssaingnor Ystasses et à ses trois freires, enfans monssaingnor Otton, saingnor de Warfezééz.

244. Cheste damme fut mariée en Braybant, al saingnor de Walhehain, qui estoit bannerés et portoit; d'or à on fal escucet de synople; s'en furent trois fis, dont ly ainsneis, nommeis messires Jake, fut sires de Walhehain; ly secon fut sires de Corbais, et ly tir fut sires de Boley.

245. Item, messires Jakes, sires de Walhehain, out on fil, nommeit monssaingnor Ernekien, qui fut sires de Walhehain et qui out trois fis, assavoir monssaingnor Ernut, saingnor de Walhehain, monssaingnor Oston et monssaingnor Wilhelme de Biertinchamp. Ly dis messires Ernus, sires de Walhehain, fut bannerés et soy mariat alle filhe do plus preuz et do plus vailhant chevalier qui fuist en nostre paiis: che fut messires Wilhelme Malclerc, saingnor de Hemericourt, qui n'avoit plus d'enfans; se croy que, pour ses bonnes viertus, Diiez ly fist le grasce que, de sa dicte filhe, issit grande lingnie et noble chevalerie, sy qu'il apparat chi après.

246. De ces dois conjons yssit une filhe tant soilement, qui fut mariée à on noble barons, monssaingnor Johan de Louz, saingnor d'Agymont, fil do freire le conte Ernut de Louz et de Chingny. Et quant ly dis messires Ernut, sires de Walhehain, fut trespasseis, madamme de Hemericourt, sa femme, soy remariat alle saingnor de Badresen, en Braybant, dont chi après sierat faite mention, car ly ystore sierat beaz à raconter.

247. Item, do dit monssaingnor Johan de Louz et delle filhe le saingnor de Walhehain et de Hemericourt yssit ly beaz, ly bons et ly corageuz sires d'Agymont, nommeis messires Johan, qui, par sa femme, assy fut sires d'Ayshove en Flandres et de Herymeis. Chis nobles sires d'Agymont soy mariat alle filhe donne noble barons de Flandres, qui astoit saingnor d'Ayshove et de Herymeis, qui n'avoit plus d'enfans, et estoit do noble sanc de Gaveres; et en out dois filhes, assavoir Ysabeal et Marie, qui furent à mon temps mariées à dois bannerés de nostre paiis de Liege, assavoir que madamme Ysabeal fut mariée à monssaingnor Johan, saingnor de Rochefort, et ceste filhe out en sa parchon les terres d'Agymont, d'Ayshoven et de Herymeis; et madamme Marie fut mariée à monssaingnor Thiry, saingnor de Seraing et de Preales, et out por sa parchon la terre de Walhehain qui, à cely temps, valoit bin XVI cens florins de Florence par an. Chis nobles sires d'Agymont, peire de ces dois sereurs, fut ly plus doteis chevaliers de ce paiis et des paiis marcissant, et de plus grans estat et despens. Ilh refist tot noeve sa belle fortrece d'Agymont, que ly paiis de Liege avoit jadis abatut, qui est si costable et teilement edifiie que on puet avoir grande admiration coment ilh le pout achieveir. Et par tant que ly genealogie de ses hoirs est chi devant escript, tant en capille parlant de chez de Rochefort et de Haneffe comme en cely parlant des hoirs do promerain mariage le saingnor de Warfezéez az XX enfans, nos, par caze de brieteit, nos en deporterons à cesty fois.

248. Vos aveis oût chi devant declareir que, quant messires Ernus, sires de Walhehaing, fut trespasseis, que madamme de Hemericourt, sa femme, soy remariat alle saingnor de Badresen, en Braybant; s'en parsiwerons nostre mateire, et dirons, en partie, ceaz qui en deskendirent.

249. De cesti secon a mariage issirent messires Henris, sires de Badresen, et messires Wilhelmes de Badresen, canonnes de Saint Lambiert, à Liege, et assy une tres belle et tres vailhant damme, qui fut tant hautement et noblement astalée par mariage que tos ses linages en fut honoreis.

250. Chis messires Henris, sires de Badresen, fut compains d'armes al noble et tres corageuz saingnor de Falcomont, de Monjoie, de Saint Vis et de Budekenbaxhe, nommeit monssaingnor Renart, si que, por la bealteit et bonteit delle sereur do dit saingnor de Badresen et de sa bonne amours et compaignie, ilh, messires Renars, prist cely damme à femme; s'en issit ly plus noble progene de proeche, de bealteit et de gentil corage qui fuist entre Mouze et le Rins.

251. Ly deseurnomeis messires Henrys soy mariat alle sereur monssaingnor Henry, saingnor de Groules, en la terre de Lemborch; s'en yssit messires Henrys, qui fut tres beaz chevaliers. Ilh vendit la terre de Badresen, et le veys demoreir en sa maison de Kykenpois, deleis Liege. Chis secons messires Henris wangnat par plait, en la Court do duk de Braybant, parmy lettres de Bruxelles, la belle terres de Berghes sor le Zome. Ilh en est dois fis et dois filhes. Ly ainsneis est nomeis messires Henris, sires de Berghes, marieis alle filhe le saingnor delle Leke; s'en at on fil nomeit monssaingnor Henry, marieit alle filhe le saingnor delle Groutehus, en Flandres; s'en fut meire ly filhe do noble saingnor d'Agymont, qui, en devant, avoit eut à marit le saingnor de Rochefort. Et ly atres freires do saingnor de Berghes est nomeis Gerars et est nouvellement marieis; et de ly et de ses sereurs, et des enfans de son freire, puet naystre grande semenche, por enforchier leur lynage, car ilh sont beaz et ryches et en grant prosperiteit.

252. Ors retournerons al bon saingnor de Falcomont. Chis nobles sires de Falcomont, messires Renars, fut ly plus preuz et ly plus corageuz des Tixhons. Ilh veriat costablement al bon duk Johan de Braibant, peire de madamme de Braibant vivante à present, qui ly wangnat la vilhe de Falcomont et l'assegat en la fortece de Monjoie; dont ilh avint al dit saingnor de Falcomont ly plus diverse fortune que onkes avenist à wailhant homme, car, por ly rafressier, ilh avoit osteit son bachinet, se passoit parmy la xhaillie de sa fortece de Monjoie, et uns quareaz, qui estoit trais al aventure al ho et à lonch, ly fichat en la tieste, dont ilh morut pitieusement. Ilh demorat de ly tres belleconpaingnie d'enfans, engenreis en la sereur monssaingnor Henry de Badresen, assavoir messires Thiris, messires Johan et V sereurs. Chis messires Thiris resemblat son bon peire, car ce fut ly plus preuz des' Tixhons. Ilh fut marissaz des grans ooz le conquerant roy Edwar d'Engleterre, quant ilh enteprist la werre encontre le roy Phelippes de Franche, quant ilh entrat en Cambresis. Ilh fut assy marissaz des grans ooz que ly roys de Boëme, contes de Luxemborch, ly evesques de Liege et tous leurs aloiies aminont en Braybant sor le duk Johan deseurnomeit, quant on fut à Heylechines, et ardit gran nombre de vilhes et portat tres gries damages al duk deseurnomeit, qui, en devant, avoit à son dit peire gasteit sa terre de Falcomont. Ilh fut ameis et doleis grandement; se morit, après ce, sains hoir, alle balaille à Votemme, deleis Liege, quant ly evesques Englebier delle Marche fut desconfis, l'an mil trois cens et XLVI. Quant messires Thiris fut trespasseis, messires Johan, ses freires, fut sires de Falcomont. Ilh estoit marieis alle damme de Berghes sor le Zome, qui astoit filhe alle damme de Quakebeke, sereur alle conte Ernud de Louz, qui, après ce, reprist à marit monssaingnor Wilhelme d'Oreilhe, saingnor de Rumines. Chis messires Johan de Falcomont morit asseis tost après son dit freire, sains hoir, assavoir l'an mil trois cens et LII. Ors retournerons az V filhes qui furent ses sereurs. Ly ainsnée fut nomée Phelippe, qui, après l'obit do dit monssainonor Johan, son freire, succedat en la terre de Falcomont et soy mariat adont, en ses ainsneis jours, assavoir l'ain mil trois cens et LII, à monssaingnor Henry de Flandres, on noble baron et tres beal chevalier, cuzin al conte Lowy de Flandres. Et, par tant que ses terres gisoient fours delle poissance et des amis le dit monssaingnor Henry, ilh et sa dicte femme, qui n'avoient nulle hoir, les vendirent, sy que ly nobles lynages de Falcomont en fut deshyreteis, car de la dicte damme Phelippe ne demorat nus hoirs; et l'aquist messires Renars Maxhereis, sires de Schoenevorst, l'an mil CCC et LIII, s'en fut avestis par devant l'empereur Charlon de Boëme en la citeit de Thou, en Loheraine, l'an mil CCC et LIII, le venredit devant le florie Paske. Lyqueis messires Renars astoit adont en tres grant prosperiteit et nequident, quant messires Walerans de Falcomont, fis de monssaingnor Johan saingnor de Borne et de Zitter, freire germain al viez monssaingnor Renars, saingnor de Falcomont et oncle de la dicte damme Phelippe, le reclamait, sy que chys qui estoit issus del hoir marle, ly dis messires Renars de Schoenevorst nel ozat tenir, anchois descangat ilh la dit terre de Falcomont al duk de Juley adont vivant por la terre de Calstre; et, après ce, fist ilh une atre discange delle terre de Calstre alle terre de Zichen, que ly dus de Juley tenoit en Braibant, et retinve la fortece de Monjoie, laqueile discange fut faite l'an mil CCC et LVI. Et l'année après, assavoir l'an mil CCC et LVII, le jour delle Nativiteit Nostre Saingnor Jhesu Criste, ly duk de Juley, qui astoit adont marchis, fut promirement fais dus de

Juley et contes de Falcomont par l'empereur devant nomeis, sorjournant adont en la citeit de Mes en son noble estat imperial, à gran nombre de princes d'Almaingne. Pour lequeil vendage grans guerre enmovit entre le duk de Juley deseurdit, qui avoit prise la possession de la dicte terre de Falcomont, et entre monssaingnor Walerain deseurnomeis, fil do jadis monssaingnor Johan, saingnor de Bourne et de Zietter; et reclamait ly dys messires Walerans vassalment son droit alle espée, et coilhit journée de bataille, pooir encontre pooir, al encontre do duk de Juley, et furent logies az champs les uns contre les atres; et combatus soy fuissent, se n'awissent esteit ly contes Thiris de Louz et ly contes de Mont, qui astoit ainsneis fis do duk de Juley, qui traitiont une pais, si que la dicte terre de Falcomont fut mize en mains do duk Wincelaus de Braybant, et onkes puy ne s'en partit.

253. Ly seconde filhe de Falcomont, assavoir ly sereur damme Phelippe, fut mariée alle conte de Spanehem; ly tirce, al saingnor de Ghenepe et de Brederode; ly quarte fut abbeisse de Maboge, et ly Ve fut canonesse altre part en Alemangne. Ceste canonesse prist en si grant desdainge la perde delle terre de Falcommont qu'elle en assotit et en perdit son sains, et alat à Falcomont, et disoit qu'elle estoit damme de Falcomont, et onk ne s'en vout partir, anchois le covint là ens nourir, et y morut. Et ensy n'est demoreit do bon monssaingnor Renart, saingnor de Falcomont, et de madamme de Badresen, sa femme, engenrée en la filh do bon saingnor de Hemericourt, que cheaz de Spanehem et cheaz de Brederode. Et ja soice que monssaingnor Johan de Falcomont, sires de Borne et de Zitter, freire do bon monssaingnor Renart, saingnor de Falcomont deseurnomeit, ne fuist nint des lynages de nostre paiis, nintmains nos en parlerons on petit.

254. Ly deseurnomeis messires Johan, sires de Borne et de Zitter, out de son promerain mariage, assavoir delle damme de Ravelsteyne, le bon et le preu monssaingnor Walleran de Borne deseurnomeit, qui à grant poyne, travailh et costenges reclamait al espée la dicte terre de Falcomont al encontre do viez duk Wilhelme de Juley, gransaingnor do dukes de Guelres et de Juley maintenant vivant. Lyqueis messires Wallerans soy mariat à une noble damme, filhe do saingnor de Feire, en Franche, et morit sains hoir; et la dicte damme soy remariat al sainanor de Gystelle, en Flandres.

255. Quant messires Johans, sires de Borne, fut veves, ilh reprist à femme le noble damme de Vorne, qui astoit veve assy do saingnor de Dalembrouk, freire al conte Thiry de Louz, et en avoit une fil, qui, après l'obit do conte de Louz, fut sires de Heynsbergh et fut marieis alle sereur le duk Wilhelme de Juley dierainement trespasseis, dont ilh est ly sires de Heinsberch maintenant vivant et ly damme de Horne, sa sereur. Des deseurnomeis saingnor de Borne et de la dicte damme de Vorne, issit en leur dierain mariage messires Renars, qui, delle succession monssaingnor Waleran, son freire, fut sires de Borne et soy mariat alle filh le conte de Clayves, et morit sains hoir. Et out messires Renars une sereur germaine, qui est contesse de Sames en Samois, et at plusieurs enfans, fis et filhes, dont ly damme delle Leke est ly une.

256. Ilh vos at bin esteit declareit cheaz qui sont yssus delle filhe le bon monssaingnor Maclerc, saingnor de Hemericourt; sy retournerons al dit saingnor de Hemericourt por recorder sa lingnie et partie de ses oevres viertueuzes, qui bin doiient estre mizes en compte, car je les ay trouwée en escript fait alle temps et do conseilhe monssaingnor Wilhelme de Badresen, jadis canonne de Liege, doqueile ly dis sires de Hemericourt fut gransires, si qu'il contient chi desoir.

257. Al temps que ly bataille fut en la wardes de Steppes, asseis pres de Houten l'Evesque, entre les Ligois et les Braibecons, qui furent desconfis, avoit dois bons chevaliers à Hemericourt, qui furent mult preuz à cely bataille. Ly ainsneis estoit nomeis messires Thomas et astoit sires de Hemericourt, et ly atres estoit nomeis messires Ameiles. Chis dois freires avoient une werre singlere à on bon chevalier de Braybant, nomeit messire Heynemant de Hoctebierges, qui avoit siies filhes. Chis messires Heynemans fut mors de ceste werre; mais, sor la journée que ly pais fut faite entre les

dois paiis deseurdis, ly comons amis ordinont assy une pais delle morteile faite des chevaliers deseuroomeis et de leurs aydans, parmy laqueile mariages fut fais des dois chevaliers de Hemericourt à dois des filles do jadis monssaingnor Heynemant. Se portoit messires Thomas les armes de Hemericourt, assavoir de geules à une bende d'argent, et ses freires portoit d'argens à une bende de geules.

258. Avint, après ce, que messires Thomas, sires de Hemericourt, out de sa dicte femme VI enfans, assavoir monssaingnor Wilhelme Frongnut, monssaingnor Gerart de Vyle en Condros, monssaingnor Thomas de Hemericourt, manant à Lantremeng, monssaingnor Robiert de Crennewy, chevaliers, et dois sereurs, dont ly une fut mariée à Geneffe et ly atre à Blehen.

259. Ly dis messires Wilhelmes Frongnus soy mariat alle filhe d'on noble chevalier bannerés, qui estoit syres d'Atryve, qui estoit des lynages d'Atrive, de Diik, de Leyvendale, de Reyvel et de Heynien en Haynau. S'en issirent quatre enfans, assavoir ly bons et ly preuz messires Wilhelmes Malclers, qui fut nomeis et sierat à tousjours ly bons sires de Hemericourt, et fut bannerés, messires Godefrois, ses freires, qui fut sires de Herkes deleis Tongres, damme Juwette et damme Ysabealz.

260. Ly dis messires Wilhelmes Malclers soy mariat à une genty damme de gran sens et gouvernement, qui estoit des Loges en Haynau et estoit do linage de Kuchy et de Bierlemont; s'en issit une filhe tant soilement, qui fut mariée à on bannerés de Braibant, nomét monssaingnor Ernut, saingnor de Wallehain, doqueile et de ses hoirs mention est chi devant faite, en ce meismes capitule.

261. Chis bons sires de Hemericourt ne chevanchat onkes, mais tant fer chevachoit qu'il n'estoit nint à remuweir; et estoit si bin stoffeis et facheneis de tos membres, et de si gran force et hardement, que ch'estoit mervelhes; ne onkes en nul fait d'armes on ne ly pout fair perde l'estrier, se ly strivier ne rompoit. Ilh mist tote s'etente et corage à parsier tos fais d'armes par tos paiis et y despendoit gran tressor; mais ilh ne savoit tant fraitier dehors que madamme sa femme nel espargnast anchois qu'il revenist al paiis, car elle astoit de gran chevanche et avoit mize toute son etente en nourechons de biestes, car en Hasbangne, en pluseurs liies, elle avoit sains nombre de beystes à layne et d'atres biestes à nourechon. Et rins n'en savoit ses mary; anchois, quant ilh voloit entreprendre on gran voage ou aleir en enstrangnes terres al tournoy, ilh enwagoit ses terres et ses joweaz et vasseal d'argent, et madamme sa femme le consentoit, affin qu'il dotast plus, atre fois, l'empronteir et qu'il ne s'aparchewist nint do gouvernement sa dicte femme; sy que ly bons sires de Hemericourt, qui ne paoit nint toudis al jour, quidoit sovent fois, ce de terre et de joweaz qu'il avoit enwagiez, avoir perdus, mais ly bonne damme raqueroit tout; se quidoit estre ly sires de Hemericourt ravaleis do sien, et ilh monteplioit en honeur et en richeche.

262. Une fois, avint que chis bon sires de Hemericourt revenoit d'on grant tournoy qui avoit esteit entre Juley et Adenhoven, et, pour la compaingnie d'alcons estrangnes chevaliers, ilh revint parmy Treit, sy qu'il revint amon la Gaire por raleir vers Hemericourt. Sy veyt sor les brouk, à Oreilh, une belle hiérde de brebis; se demandat alle biergier à cuy elle estoit, et ilh respondit qu'elle estoit à madamme de Hemericourt. Ilh en out grant admiration. ilh chevachat avant vers Momale et d'aventure ilh trovat encors une atre hierde, et semblament ilh araynat le biergier, et semblament ly fut respondut. Adont ilh alat considereir que, puyqu'il avoit d'aventure sor son chemien troveit dois hierdes qui astoient à sa femme, qu'elle en pooit plantiveusement avoir altre part en pluseurs liies; s'en fut forment mervilheus. Et par tant, quant ilh revint en son hosteit, ilh arainat madamme sa femme par ceste maniere: « Damme, je ay tot forfait le mien, ce moy semble, mais ce n'aveis nint le vostre, car vous aveis on cheteit par vos; et aveis le nom d'estre riche, et je d'estre povres et endetteis. » Ly bonne damme, qui l'amoit et dotoit, fut durement triste et enhisdée; se ly respondit: « Chiertes, douz sires, de povreteit et de dettes nos at Diiez bin wardei, loiienge à ly ! Ne povres ne

poeis estre sains moy, ne je riche sains vos. » Adont, ly sires, qui le veyt triste et afflicte, ly dest en rian, por lée respireir: « Damme, je ay maintenant troveit sor mon chemien dois belles hierdes de berbis qui sont vostres, si que ly biergier dient, mais ilh ne m'y ont de riens aparcheneit; et, par tant que je ne voelh nint perdre ma part, je le vous ay remostreit. » Quant ly bonne damme veyt et parchuyt que ly parolle tournoit à solas, elle dest à son marit d'abondance de cuer: « Chirs sires, vos n'aveis nint encors veut tot ce qu'il y at, et ne vos emmaies nint de vostre estat, car vos ne fuistes onkes sy riche que vos esteis. Je ray en ma main tos vos hyretaiges enwagiez et tous vos joveaz, et les ay rachateis de vaches et de brebis. Assy grant plaisance que vos aveis d'acquere l'oneur do monde, à laqueile je part avoek vos, ja soice que vous en aiies les plaiez et le travaille, ay je delle chevanche mondaine por stopeir vos afforains despens, sy que c'est bin raisons que voz y parteis. » Et adont primes parchuyt ly bons sires de Hemericourt coment ilh estoit gouverneis, si que, por la bonne loyaltait de madamme sa femme, ilh l'amat et creyt encors plus que fait n'awist, et, sor sa fiance, ilh parsiwyt plus, et fut asseis melheurs qu'il n'awist esteit en devant.

263. Et, affien que voz aiies connaissance delle force do dit saingnor de Hemericourt, je vos en recorderay ce que apris en ay az anciens, en la maniere qu'il l'ont out recorder leures peires, qui le dit saingnor de Hemericourt veyrent de leur temps, car à present, à savoir l'an mil trois cens et nonante owit, ilh n'at nint encors C ans aconplis qu'il trespasat. Veriteis fut que, por termineir la grief werre qui estoit jadis entre le roy Charle de Sezilhe, freire do roy de France adont vivant, d'une part, et le roy d'Aragone, d'atre part, ilh fut acordeit par les dois roys de combatre L hommes d'armes encontre L. Ly roys Charles enlisit et chusit pour combatre, en nombre des L, trois hasbengnons et I braibecon, assavoir le bon saingnor de Hemericourt deseurdit, le saingnor de Haneffe, le bon monssaingnor Waltier Wafelar de Momale et le bon bastar de Wezemale; et estoient tous bannerés, excepteit le dit monssainanor Watier. S'envoiiat ly roys de Sezielhe à chascun d'eaz on dyestrier pour sus à combatre le journée, ensy que chi devant soy contint, en capitle parlant do dit monssaingnor Waflar, et assy les coronykes de Saint Lambiert en font mention. Quant ly sires de Hemericourt out rechuyt le dyestrier, ilh vout proveir sa forche et ses maniers, pour savoir s'ilh soy poroit sus affieir. Se montat sus et soy partit des onz, et chevachat en on lieu en requoy, et alcons de ses compaignons et varlés avoekes ly; puy deskendit et fist son dyestrier cengleir à sa grace, al desoz d'on tilhoul; se remontat sus et fist ses jambres fort et ferme loier az cengles, et ahierdit une coxhe de cely Tilhoul à dois bras et, quant ilh en fut bin saisis à son greit, ilh destraindit le dyestrier des esporons, mais onque le dyestriers ne soy pout partir ne le dit saingnor deforchier ne departir do tilhoul, sy qu'il renvoiiat ce dyestrier al roy, par tant qu'il ne ly semblat nint fors ne corageuz asseis, ne bons az esporons. Et ly roys ly renvoyat on atre, doqueile ilh fist la parelhe esproeve. Et ay oût raconteir qu'il et ly cheval hardiont tant et qu'il le travelhat tant que, anchois que ly chevaz soy partist, ilh et ly chevaz estoient tos trebatus de suvoir. Finalement, ly dyestrier soy partit par ceste maniere que les cengles et ly poitraz rompirent, et ly sires de Hemericourt demorat à tot la selle pendans al arbre. Cesty dyestrier ilh detinve. Mais, quanl ilh et ses atres compaignons orent werdeit leur journée toz armeis sor la plache, là ly bataille estoit ordinée, et ly Aragonois ne comparurent point, ly rois de Sezilhe fist remandeir tos ses dyestrirs qu'il avoit envoiiet az L chevaliers champions deseurdis. Et, quant ly messagier vint al dit saingnor de Hemericourt, ilh ly respondi: « Coment, garchons, m'at ly roys donneit une corongne por defendre son honneur, et ay por ly mies mon corps en aventure de mort, qui ne suy point de son païs ne en son seriment, et m'ent rent teil guerredon qu'il le voit ravoir et son don rapeleir ! Par les oez Dieu, je ly renvoieray, mais ce sierat en teile estat que jamais proidons ne sierat sus par honneur. » Adont ilh le fist trare fours do logice; se ly copat le cowe et le crine, et le rendit al garchon. Je ay parleit de sa force; ors parleray de son hardiment.

264. Chis bon sires de Hemericourt entrat en une werre de morteile faite por son cuzien, le viez monssaingnor Gerart de Blehen, qui ful peires do viez monssaingnor Godefroid de Blehen,

gransaingnor à monssaingnor Godefroid de Blehen, saingnor d'Abééz, vivant l'an mil CCC IIIxx et VI; laqueile werre ly dis messires Gerars avoit à on vailhant escuwier, nommeit le Vilains de Jardengnééz, deleis Blehen, qui estoit en son liu fors et poissans d'amis. Chis messires Gerars portoît les armes de Harezééz; de geules à trois manches d'or, à on skouchet de Hemericourt de part sa meire, qui astoit d'argent à une bende de geules. Et ja fuist choze qu'il demoraist entre ses proismes de la dicte coistie de Harzééz, se n'estoit ilh nint d'eaz bin visdrement servis à son greit, si qu'il retraïet vers le saingnor de Hemericourt, alle queile ilh estoit cuziens germains, et ly requist as son ayde. Et ilh ly respondit que, ja fuist choze que ly fondemens delle werre ne venist nint de son costeit, ilh ly aideroit volentirs, s'ilh voloit prendre les armes de Hemericourt et metre jus le blazon del coisté dont ilh n'estoit nint servis à son plaisir. Et ilh ly otroyat, si qu'il prist d'argent à une bende de geules, de part sa meire, et brisat li bende de trois manches d'or, de part son peire. De ceste werre avint de mal asseis. Mais, entre les atres, ilh avint une fois, d'aventeur, que ly bons sires de Hemericourt revenoit d'estrangne paiis vers son hosteit, à Hemericourt. Ce vint alle connaissance do Vilain de Jardengnééz, qui soy porveyt de planteit de ses amis et s'enbouxhat en dois waz, asseis pres delle chachie, deleis Tourines. Et, quant ly sires de Hemericourt fut entre dois ways, et ly Vilains veyt qu'il ne ly poïot escapeir, ilh soy partit el brisat sus, et escriat de lonch le dit saingnor de Hemericourt, qui le recognut tantoist qu'i le veyt. Et, par tanl qu'il ne veïiot que l'un des wavs, en queil ilh avoit dois tans de gens qu'il n'awist, mais armeis estoïent ilh pour la dotanche de la dicte werre, ilh s'aparelhat de deffendre, et soy corirent sus vassalement les dois partiies. Et adont brisat sus le seconde ways, sy que ly sires de Hemericourt fut forment apresseis, car ilh n'estoit que luy quinzeme, ensy que je ay oût recorder, entre lesqueis ilh y avoit des garchons de petite deffense; et ly Vilains avoit bin XL armures de fier de son linage, mais requist et proïiet leur avoit que nullement ne tuwassent le saingnor de Hemericourt tant que passeir s'en poroïent, car ilh le voloit avoir vif. Et, par tant, leur portat ly sires de Hemericourt gran damage, et assy ilh perdit des siens pluseurs, si que, finalement, quant ly Vilains parchuyt son damage et la perde de ses amis, ilh towat le cheval do saingnor de Hemericourt et, quant ly sires de Hemericourt fut cheüs, ilh soy lassat cheïoir sor ly; et tantost que ly sires de Hemericourt fut à terre, ses gens furent disconfis. Ilh estoit pesans et armeis pensament, et ly Vilains, qui gisoit sor ly, estoit assy grans et fors, sy qu'il, parmy ses aidans, le tenoit à sa volenteit. Ilh ly ostat son heame, dont ons a usoit adont, et son espée; s'estoit demoreis à visage descoviert. Adont fist ly Vilains traire ariere ses amis et arainat le saingnor de Hemericourt par ceste maniere: « Sire de Hemericourt, sire de Hemericourt, vos aveis tamains ans parsiïet le monde, dela meire et decha meire, et asteis partis de tamains perveulheuz assauz, et al dierain esteis cheüs en las d'on sy povre escuwier que je suy. Je vos conjure, par la foid que vos deveis à Dieu et à monssaingnor Saint Goirge, que vous moy dites que vous feriez de moy, se vous moy tenies en teile point que Je vous tieng à present. » Et ilh respondit, com hardis et sains pawour: « Par le seriment dont tu m'as conjureit et par les oez Dieu, tu morois de ceste main dont tamains ont esteit mors. — Sire de Hemericourt, sires de Hemericourt, respondit ly Vylains, de ma mort ne sieroit ce nint gran damage, mais delle vostre ne sieroit jamais ly damages restoreis. Ja ne plaice à Dieu que, de si petit homme que je suy, soit mors sy vailhans hons que vos esteis. Mais je vos requiere et recarge sor loyalté de chevalerie que moy voilhiez acordeir à vos cuziens de Blehen, car tout ce que je leur ay forfayt, je l'amenderay à vostre ordinance, et moy suffierat vostre simple parolle, car je ne suy nint dignes de rechivoir le creant de sy wailhant homme que vous esteis; et de ce que je ay mespris envers vos, je vos en prie merchis. » Ilh aidat releveir le bon saingnor et s'engenoulhat devant ly, et ilh ly pardonat et ly otroïiat de faire la dicte pais, sy qu'il fist, car ilhe chevachat tantost à Blehen, al dit monssaingnor Gerart, qui rien n'en savoit, et ly contat l'aventeur, et fist de la dicte werre une bonne pais; se demoront, après ce, bons voisins chil de Blehen et de Jardegnééz, car ilh estoient asgy cuziens do dit lynages de Harezééz, si qu'il demoront, de dont en avant, en pais. De ceste cortoisie et gentillece fut puy ly Vilains deseurnomeis mult prisiez, loïiez et avanchiez, et en fut tot le sorplus de son eage honoreis de tos saingnors.

265. Item, chis bons sires de Hemricourt out on freire, nomeis messire Godefrois. Ilh fut sires de Herkes et soy mariat alle sereur do Persant de Haneffe; s'en fut uns fis mult corageuz, nommeis messires Wilhelmes de Herkes, qui tuwat tot emmy le marchiet, à Louz, Stasse de Rycle, maiieur de Louz, et s'en partit sens damage, et morit sains hoir.

266. Item, damme Juette, sereur do bon monssaingnor Macler, saingnor de Hemericourt, fut mariée à monssaingnor Thibaut d'Yelezéez, saingnor de Daveles et de Lonchamp, qui portoit d'argent à on comble endenteit de geules, et avoit en devant esteis marieis, doqueil promerain mariage ilh avoit trois enfans, assavoir monssaingnor Warnier saingnor de Lonchamp, monssaingnor Thibaut, et Johan, canonne et prevost de Saint Abain à Namur; et de cesty secon mariage, assavoir de ly, monssaingnor Thibaut, et de damme Juwetle de Hemericourt, fut une belle honorable generation, assavoir messires Warniers, sires de Daveles, qui fut bannerés, messires Wilhelmes Clychet, qui morit à on siege devant Bovingne, messires Henris de Daveles, chevaliers, messires Godefrois de Daveles, canonnes de Saint Lambiert et abbeis seculiers de Cyney, et messires Gilhes, canonnes assy de Saint Lambier et abbés seculiers de Dynant. Et orent chis chink freires dois sereurs: damme Ysabeal et damme Yde, qui furent nonnaines alle Vaz Nostre Damme.

267. Item, soy mariat ly dis messires Warnirs de Daveles, qui fut bannerés, alle sereur do saingnor de Warfezéez qui out les XX enfans; s'en trovereis chi devant la genalogie, en capitle parlant do dit saingnor de Warfezéez. Ilh mist jus les armes d'Yelezéez, que ses peires et si freires do promerain mariage portoient, et, por le reverence do bon saingnor de Hemericourt, son oncle, ilh encargat les armes de Hemericourt à on labeal à trois pendans d'azure.

268. Item. je croy que messires Wilhelmes Clychés et messires Henrys de Daveles, ses freires, morurent sains hoir, car, de leurs hoirs, je n'ay nulle information; et assy fisent ly dois canones de Saint Lambier.

269. Item, damme Ysabeaz, sereur al bon monssaingnor Macler, saingnor de Hemericourt, fut mariée à monssaingnor Ernut, saingnor de Harduémont, fil monssaingnor Lambiert Badout, saingnor de Harduémont; s'en furent pluseurs enfans marles et femelles, assavoir monssaingnor Johan, monssaingnor Ernut et monssaingnor Lambier, chevaliers, le damme de Barche et le damme de Castelineal.

270. Chis messires Johans fut sires de Harduémont et out on fil, nomet messires Godefroid, qui fut banerés, sires de Harduémont, de Holongne, de Kerme et de Fleppes, ly plus petis chevaliers de slature qui fuiste en nostre paiis, doqueil mention est chi devani faite, en capitle parlant de chez de Harduémont; et assy est ilh des atres qui sont de la dicte coistie de Harduémont, sy n'en ferons nulle recapitulation.

271. Encors out ly bons messires Wilhelmes Maclers, sires de Hemericourt, une sereur bastarde, qu'il mariat à Pangnoteal, son bon escuwier, qui tousjours l'avoit servit, et le fist chevalier; se fut nomeis messires Johans Pangnons de Fiies, dont plusseurs gens sont deskendus.

272. Puisque nos avons declareit toute la generation de monssaingnor Wilhelme Frongnut, ainsneit fil de monssaingnor Thomas, saingnor de Hemericourt et peire do bon monssaingnor Wilhelme Macler, nos retournerons à monssaingnor Gerart de Vyle, freire do dit monssaingnor Wilhelme Frongnut.

273. Messires Gerars de Vyle, freires à monssaingnor Wilhelme Frongnut et fis de monssaingnor Thomas, le viez saingnor de Hemericourt, fut sires de Vyle en Condros et portat de geules à une bende d'argent, à on labeal à trois pendans d'or. Ilh out dois fis el une filhe, assavoir monssaingnor

Henry, saingnor de Vyle, Ottelet, saingnor d'Osongne, et ly filh fut mariée al saingnor de Modavele en Condros. Do dit monssaingnor Henry sont issus dois fis, assavoir monssaingnor l'abbait de Saint Houbier en Ardenne, qui fut uns vailhans prelas, et Gerars, qui fut sires de Vyle. Do dit Gerars sont estrais chez de Vyle qui sont à present: Johan de Vyle, damoyselle Ysabeaz de Somavele, et plusieurs atres.

274. Item, do dit Ottelet, freire à monssaingnor Henry de Vyle, issirent Ansez d'Osongne et ly damoyselle de Geves, qui fut mariée à on escuwier de noble sanc, nomeit Everar de Bolan, saingnor de Rychelette, fil do saingnor de Bolan, en la terre de Lymborch; s'en issirent messires Wilhelmes de Gayves, Daneuz, qui morit sains hoir, Henrys de Gayves, et une filhe, mariee à monssaingnor Pire de Blehen. Chis bon escuwir Everars de Bolan portoit d'azure à une crois d'or, semenchiet l'escut de croiselles recroisetéez d'or. et crioit Houffalize; et ja soice que ly linages de Houffalize soit d'antiquiteit frans gentis, nintmains j'ay oût dire que ly dis Everars estoit do sanc de Juley et d'atres coisteis assy bonnes que Houffalize.

275. Messires Wilhelmes, ses fis, soy mariat à une genti damme, filhe alle gentilh voweit de Hainsbaing, engrenée en damme Aelis, filhe do bon saingnor de Hermalles, qui morit alle bataille à Domartien, doqueile vos trovereis les hoires chi devant, en capitle parlant de chez de Hermalles.

276. Item, Henrys de Gayves soy mariat alle filhe monssaingnor Jakemme, saingnor de Gounes, et est sires de Gounes et de Rychelette, et at grant nombre d'enfans, qui sont en bonne prosperiteit à present, dont ilh en y at dois marieis à Namur, unk marieit à Bomale, une bonne damme mariée à on gratieuz chevalier de Liege, nommeit monssaingnor Gilhe Surlet, une atre mariée à Paulus de Vivir, escuwier, et alcons atres dont je ne suy nint informeis.

277. Item, delle filhe Everart de Bolan, mariée à monssaingnor Pire de Blehen, sont issus messires Ansez et messires Everars, chevaliers, Henrys, leurs freires, et trois sereurs: ly une fut mariée à Johan de Bawengny, ly seconde, à Puchey, deleis Hanut; et ly tirce, à Godefroid, fil jadis Johan de Blehen, escuwier. S'en sont, de ces freires et sereurs, gran nombre de to juvenes enfans à present.

278. Item, del le sereur monssaingnor Henry de Vyle et Ottelet, deseurnomeis, gui fut mariée al saingnor de Modaveles, yssirent tous ceulx de Modalve, et Botirs de Heure et messires Olivirs d'Ohay, ses freires, et plusieurs atres.

279. Nos vous avons recordeit chez qui sont estrais de monssaingnor Wilhelme Frongnut et monssaingnor Gerart de Vyle; sy parlerons de monssaingnor Thomas de Lantremenges, leur freire.

280. Messires Thomas de Hemericourt, manans à Lantremenges, fis de monssaingnor Thomas, le viez saingnor de Hemericourt, out plusieurs enfans, entre lesqueis ilh out on fil, nomeit Thomas, qui fut canones de Saint Martien à Liege, et trois filhes, dont ly une fut mariée à Gerennevilhe et ly atre à Akoche, dont y sont ly hoirs; et ly tirce fut nomée Maroie. Ly dis messires Thomas avoit on clerc, qu'il amoit mult, car ilh gouvernoit tout son hosteit, et estoit nomeis Adans, fis d'on bon wangeur de Hemericourt, nommeit Wilhmar de Tomboir; lequeile clerc la dicte Maroie amoit, et furent si bin d'acort, ly et Adans, qu'il en alont ensemble, et le mynat et espzat ly dis Adans en la vilhe de Saintron. Messires Thomas en fut corochiez ultre mesure, sy qu'il covint ly dit Adan wardeir son corps en la dicte vilhe de Saintron dois ans et plus. Finalment, alcons amis traitiont entre dois et, par tant que messires Thomas ne poioit destourneir le mariage, ilh les reprist andois en sa maison et en son serviche, com de promiers; mais onkes à sa dicte filhe ilh ne vout donner ne partiralconne choze do sien. Chis dois conjoins orent on fis, nomeis Thomas de Hemericourt, et une filhe, qui fut mariée à Lysen en Condros. Ilh envoiiont leur fil al escolle et assy alle estude à Paris, et profitat

urement. Ilh fut bons legistes et bin fondeis, mais petit patrimoine avoit. Se vint demoreir à Liege et practizat en la Court l'official, et fut sentenchiens tot le sorplus de son eage. Ilh estoit asseis reverens. Se soy mariat à Clamenche, filhe saingnor Watier le Cornut, de Saint Lynart deleis Liege, qui estoit do lynage de Saint Martien et esquevin de Liege et avoit à femme la filhe monssaingnor Makaire delle Heys de Flemale, chevalier.

281. De Thomas de Hemericourt deseurnomeit et de la dicte Clamence issirent sept fis et dois filhes, assavoir freire Adans, moynes de Bealrepart et prieuz de Raydekem, Thomas ly vinirs, Goffins, Ottebons, Houwars, Wilhemars et Gilhechons, Maroie et Aelis; de tos lesqueis enfans vos trovereis la declaration de leurs hoirs chi après, en capitle parlant do linage de Hozemont et maiiement delle coistie de Flemalle.

282. Ors retournerons à monssaingnor Robier de Crennewy, quatreme fil de monssaingnor Thomas, le viez sires de Hemericourt; car chi devant avons declareit l'estration des atres trois freires, assavoir de monssaingnor Wilhelme Frongnut, monssaingnor Gerart de Vyle et de monssaingnor Thomas de Lantremenges. Ly dis messires Robiers portat d'argent à une bende de geules et out on fil nomeit Ernut Bozeal et une filhe. Chis fis soy mariat et out trois fis, assavoir messire Thiris, Ernus Bozeal et Robiers, et une filhe, nomée damoyselle Grygon.

283. Do dit monssaingnor Thiry issirent Rasses de Crennewy et dans Robiers, qui fut abbeis de Saintron. Chis Rasses soy mariat à une des filhes monssaingnor Johan Moreal de Horrion; s'en issirent Ernus Bozeaz et messires Wilhelmes de Horrion, et une gratieuz damme, qui fut promirement mariée al saingnor d'Ardenge et après, à monssaingnor Rasse, saingnor de Lamynes, et en la fin morit elle sains hoir. Des devant nomeis monssaingnor Wilhelme et Ernut Boseaz, son freire, trovereis « sains hoirs » chi après, en capitle des Surlés, parlant delle bonne damme de Vellerous.

284. Item, ly dis Ernut Bozeal, freire à monssaingnor Thiry de Crennewy, soy mariat en la conteit de Namur, et en sont issus ly Bozeaz et assy chilh de Nanynes, manans en la conteit de Namur, et portent les armes de Hemericourt: d'argent al bende de geules.

285. Item, de Robier, l'atre freire à monssaingnor Thiry et à Ernut Bozeal, sont issus plusieurs personnes, dont je n'ay nint bin connaissance; mais je ay oût dire que ly enfans de Lymon, manans en la conteit de Namur, Johan et Wilhelme, et plusieurs atres, en sont issus.

286. Item, damoyselle Grigon, sereur az trois freires deseurnomeis, fut mariée à Novilhe sor Mehagne et out on fil, nomeit Macoir de Novilhe, dont y sont ly hoirs.

287. Item, ly filhe monssaingnor Robiert de Crennewy, qui fut ante az trois freires deseurnomeis, fut mariée à Upenguy, en la couteit de Namur; s'en yssirent Renirs et Lybars d'Oupengny, dont y sont ly hoirs.

288. Nos avons ordinéement parsiiet chez qui sont issus des quatre fis do vielhe monssaingnor Thomas de Hemericourt; sy retournerons à ses dois filhes. Ly ainsnée fut mariée à Geneffe, mais ne say à cuy; et ly atre fut mariée à Blehen, s'en issit ly viez messires Gerars de Blehen, qui weriat à Vilain de Jardengnéez. Do dit monssainnnor Gerart issit ly promerains messires Godefrois, qui out quatre mult beaz enfans, assavoir monssaingnor Gerart de Blehen, monssaingnor Badewien de Vilhe, qui fut longtemps grans bailhirs delle conteit de Namur, Johan de Blehen, et une filhe mariée à Bierlouz.

289. Item, messires Gerars de Blehen, fis do viez monssaingnor Godefroid de Blehen, soy mariat à damme Agnes, sereur de monssaingnor Pire de Blehen, qui en devant avoit eut à marit Fastreit de Bierlouz Elle avoit une filhe do dit Fastreit, mariée à monssaingnor Wilhelme de Warfezééz, manant à Pepenges, doqueile et de ses hoirs mention est chi devant faite, en capitle parlant do viez saingnor de Warfezééz qui out les XX enfans. Item, de monssaingnor Gerart de Blehen et de madamme Angnès deseurnommée fut on fis tant solement, nommeis messires Godefroid de Blehen, qui, de part madamme sa femme, fut sires d'Abééz, doqueile et de ses hoirs mention est chi devant faite, tant en capitle parlant do dit saingnor de Warfezééz qui out les XX enfans come en cely parlant de cheaz de Noefchasteal et de Haneffe; sy nos en deporterons à tant.

290 Item, messires Badewiens de Vilhe, freires al dit monssaingnor Gerart de Blehen, soy mariat al sereur do dit monssaingnor Pire de Blehen, dont ly dis messires Gerars, ses freires, avoit la parelle sereur; et orent grant planteit de mult beaz enfans, assavoir monssaingnor Godefroid de Vilhe, qui fut assy longtemps grans bailhirs delle conteit de Namur. Anseal de Haley, Gerar de Vilhe, freire Pire, abbeït de Floeffe, et chink filhe, dont ly une est abbesse de Salzien, ly atre est mariée à monssaingnor Thibaut Semale de Bonneville, ly tirce est mariée à Wilhelme de Ferme, escuwier, ly quarte est mariée à Marneffe, et ly Ve est nonne de Saint Viteur, deleis Huy.

291. Item, ly dis messires Godefrois, fis monssaingnor Badewien, soy mariat dois fois: ly premier, alle sereur Thiry az Lowengnis de Namur et, ly seconde, à damme Johanne, sereur à monssaingnor Stochar de Forvie. Finalement, morit ly dis messires Godefrois sains hoir, si que madamme Johanne est remariée à monssaingnor Warnier, saingnor de Daveles, doqueile ilh at des jovenes enfans.

292. Item, Ansez de Haley, fis à monssaingnor Badewien de Blehen, manant à Vilhe, soy mariat . . . ; s'en est issus Badewien de Haley, qui prist à femme damoysele Angnès, filhe Goffin Warnier de Vellerouz; s'en sont ly hoirs.

293. Item, Gerars de Vilhe, tirs fis do dit monssaingnor Badewien, prist à femme une damoysele de Savoie, qui astoit especial chambrier à madamme de Savoie, qui fut femme al bon conte Wilhelme de Namur, saingnor del Elscluze, dierainement devieit, et en at pluseurs enfans, assavoir Badewin, Wilhelme, Percheval et Gerar, Marie et Katerine. Des dois promerains enfans, est ly uns costre et ly atre prevost et canones de Walcourt. Et ly jovenes Gerars est nouvellement marieis à Abresilhe, filhe jadis Lambier de Lens, cangeur de Liege, engerée en damoysele Agnès de Cowretiche; et Percheval est encor à marieir. Item, damoysele Marie, leur sereur, est mariée à Johan d'Ax, en la terre de Poylevache, escuwier, s'en sont ly hoirs. Et damoysele Katherine est mariée à on bon escuwier de Holandre, et ont des hoirs. Et deveis savoir que ly conte et contès de Namur ont tant ameit ly peire de ces enfans qu'il ont porveüt les dois canones et ont marieit les dois sereurs, sains le coistre de leur dis peire et le meire.

294. Item, de damme Angnès de Blehen, qui fut filhe à monssaingnor Badewin de Vilhe et qui est mariée à monssaingnor Thibaut Semale, manant à Bonneville, sont dois fis, assavoir messires Johan Semale ly jovenes, qui est sires de Cenfontainnes, et Badewien Tinefer.

295. Item, messires Semale ly jovenes est marieis à Marie, filhe Bottir de Houre, saingnor de Cenfontaines, qui fut fis Olivier d'Ohay; et de cesty mariage sont pluseurs enfans.

296. Item, est Tinefer, ses freires, marieis asseis nouvellement à une damoysele de Bovinge; se pront avoir planteit d'enfans.

297. Item, ly seconde filhe monssaingnor Badewien de Blehen fut mariée à Wilhelme de Ferme, escuier; s'en sont dois fis, Robiers et Badewins. Ly dis Robiers est marieis à damoyselle Johanne, filhe Ernut de Boubais, manant à Liege; s'en sont ly hoirs. Et ly dis Badewiens est nouvellement mariés à Vilhe en Hesbaing.

298. Item, ly tirce filhe do dit monssaingnor Badewien fut mariée à Marneffe; s'en sont yssus Badewins et Godefroid, qui ont des hoirs. Ors retournerons à Johan, fil do viez monssaingnor Godefroid de Blehen.

299. Chis Johans fut marieis à Houten l'Evesque; s'en sont yssus Godefroid de Blehen, Johans Happefren et dois sereurs. Ly dis Godefroid est marieis alle filhe monssaingnor Pire de Blehen; s'en at grant planteit d'enfans marles et femelles. Et Happefrens, ses freires, soy mariat à Houten promierement; se fut ly mariages anynchileit par Saint Engliese, si que de noveal ilh est remarieis à Tinelemont. Item, ly une des sereurs fut mariée à Savery d'Oumale; s'en est uns fis, nommeis Johans Savery, qui est marieis alle filhe do bon Gontir d'Oumale, qui morit en service do saingnor de Weysmalle, quant ly Braybechon assecont le Grave, lyqueis Johan Savery at des hoirs. Et ly atre sereur des dis Godefroid et Happefrens fut mariée à Badewien d'enmy le vilhe de Haley, s'en sont ly hoirs.

300. Item, est assavoir que ly filhe do viez monssaingnor Godefroid, qui fut sereur à monssaingnor Gerart, monssaingnor Badewien et Johans de Blehen deseurnomeis, fut mariée à Wilhelme de Bierlouz, et croy que che Wilhelme fut freire à Fastreit de Bierlouz, qui soy mariat à damme Agnès, sereur de monssaingnor Pire de Blehen. De cesty Wilhelme et de la dicte damoyselle fut une filhe tant soilement, mariée à monssainanor Gerart, saingnor de Bierlouz; s'en furent plusieurs beaz enfans, assavoir Gerart, qui morit alle bataille de Bossewilre, Wilhelme et Libier, qui morirent en Flandre, alle siege de Ganz, messires Johans, ly plus jovenes, qui fut sires de Bierlouz, et dois sereurs, qui sont bonne dammes et plain d'oneur. Et quant ly meire de ces enfans fut veves, elle soy remariat à on saingnor Gontir Conrar de Bierlouz, avoweit de Sclachiens, qui estoit veves.

301. Ly dis messires Johans, sires de Bierlouz, soy mariat alle filhe monssaingnor Wilhelme de Herymeis, saingnor de Steynecker, en Haynau; s'en sont demoreis quatre jovenes enfans, assavoir Johan et Wilhelme, et dois filhettes, come yl apiert en le capitle de Hermalles.

302. Item, ly ainsnée des sereurs le dit monssaingnor Johan, saingnor de Bierlouz, fut promierement mariée al giovane monssaingnor Johan, saingnor de Langdris, qui morit sains hoir, et secondement alle filhe monssaingnor Rogier de Bixte, deleis Stokehem, et est demorée veve sains hoirs.

303. Item, ly atre sereur fut mariée à monssaingnor Ernut de Corwaremme, saingnor de Nyle; s'en at dois enfans, Ernut et Gerart, qui sont encors jovenes.

304. Item, do secon mariage delle femme do jadis Wilhelme de Bierlouz, qui avoit esteit filhe do viez monssaingnor Godefroid de Blehen, et qui reprist à mary monssaingnor Gontir Conrar de Bierlouz, avoweit de Sclachiens, sont yssus Conrar de Froidebixhe et dois sereurs; doqueile Conrar n'est demoreis nus hoirs legitime, mais ilh en sont plusieurs bastars et bastarde.

305. Item, ly une des sereurs de dit Conrar fut nomée Angnès et fut mariée à Johan de Waleve, manant à Vileir, deleis Hanut; s'en sont Johan de Vileir et Conrardin, el une filhe, qui est nonne alle Vaz Nostre Damme. Ly dis Johans de Vileir est nouvellement marieis alle femme Wilhelme de Tyleur, qui fut fis Wilhelme de Montengnéz. esquevin de Tyleur. Et Conrardin, ses freires, est assy tot nouvellement marieis alle filhe Johan de Rywecheaz.

306. Chi devant vos at esteit clerement remostreis tous ly hoirs marles et femelles deskendus delle viez et promerain monssaingnor Thomas, saingnor de Hemericourt; se retournerons à monssaingnor Ameyle, son freire, qui out à femme le filhe monssainanor Heyneman de Hoctebierges, sereurs alle femme do dit monssaingnor Thomas.

307. Chis messires Ameyles out on fis et des filhes. Ly fis fut nomeis messires Gerar Kachemars de Bovengnistier, qui out gran nombre d'enfans, car toute ly rivier d'Yerne et les vilhes altour en sont pouplééz; car ilh en yssirent monssaingnor Ameile et monssaingnor Fastreit de Bovengnistier, et tous leurs freires et sereurs, dont ly une fut mariée à monssaingnor Ameyle de Warnant, et en sont yssus tos ly Kachemars de Stier, ly Hayweaz de Bovegnistier, ly Kachar et ly Branches de Lymont, et plusieurs atres; et at eût plusieurs vailhant persones, en ceste coisté de Stiers et de Bovegnistier, qui ont brisiet leurs armes par differenche d'onk ou de dois martelés, por la dit coystie de Hottebierge, dont ilh sont estrais.

308. Item, jai soice que chil de Hoctebierges ne soient nint des linages del paiis delle evesqueit de Liege, quanteal que, des VI filhes monssaingnor Heyneman de Hoctebierges, ilh en fuist dois mariééz en dit linage de Hemericourt, nintmains, par tant que je suy en partie informeis des atres quatre filhes monssaingnor Heyneman, je en feray, en ce traitiet,alconne mention.

309. Ly une de ces qualre filhes fut mariée à monssaingnor Ernut, dit le Vilain de Ginglehem, dont, ilh issirent planteit de bons chevaliers et escuwiers qui ont esteit fors en leur liu et dont y sont encors ly hoirs.

310. Item, ly atre filhe fut mariée a Halebeyke, s'en issirent messires Godefrois et messires Ernus, desqueis sont estrais chil de Halebeyke à present vivans.

311. Item, ly tirce filhe fut mariée à on chevalier d'Ays en Refays; s'en issirent messires Stochars de Forvie, ly viez, et une filhe, dont ly sires de Rochelars issit, qui fut marieis alle filhe do bon monssaingnor Thiry de Haneffe, saingnor de Serainge, bannerés; lyqueis sires de Rochelar morit sains hoir. Et encors out ly viez messires Stochar une sereur mariée alle saingnor de Lonchamp, dont cilhe de Lonchamp sont anchienement deskendus.

312. Item, do dit promerain messire Stochar issil ly secon messires Stochar, qui out VI fis, sains les filhes, dont ly quatre furent seculairs, ly chinquemmes abbeis de Heylechines, et ly VIe moynes de Gemblouz.

313. Ly ainsnés fut nomeis Stochar de Forvie, qui estoit reputeis uns des miedres escuwiers des quatre paiis, tant alle werre, tant alle tournoy. Ilh soy mariat, en ses anchiens jours, alle plus jovene des filhes monssaingnor Waltier, saingnor de Hautepenne, car elle estoit adont uns enfes. En chely damoyse, ilh engenrat une bonne paire d'enfans, assavoir monssaingnor Stochar de Forvie et Johanne. Ly dis messires Stochar morit juvenes sains hoirs. Nintmains, ilh estoit teilement fais et monstreis en tous paiis, et estoit plains de sy bonne viertus, et tant ameis et honoreis des saingnors que fame coroit qu'il sieroit et estoit ja, solont son eage, conteis avocke les melheurs, sy que sa mort fut pitieuze et desplaisante à tous proydons.

314. Item, la dicte Johanne, sa sereur, fut mariée à monssaingnor Godefroid de Vilhe, dit de Blehen, qui, par long terme, fut grans bailhier delle conteit de Namur. Mais ly dis messires Godefroid morit sains hoir, et ly damme, qui est belle et bonne et d'honeiste vie, est de noveal remariée à monssaingnor Warnier, saingnor de Daveles, dont elle at de juvenes enfans, qui sont à present.

315. Item, des atres enfans de Forvie sont issus chilh de Forvie et de Gennetynes maintenant vivans.

316. Item, ly quatreme et dieraine filhe monssaingnor Heyneman de Hoctebierges, que nos appelons le quatreme, voir de celles dont nos avons dierainnement commenchie à parler, car ilh en fut VI, mais, par tant que nos comptes avoit declareit l'estat des dois promerains, mariées en nostre paies, estiens nos retourneis az atres quatre, dont ceste fut ly dieraine, qui fut mariée à on chevalier qui estoit do linage des Clutinghen de Bruxelles, qui out gran nombre d'enfans, desqueis ly plus gran partie do dit linage des Cluthinghen est regenerée. Et en fut une des filhes de cely Cluthinghen mariée à Lovange, s'en sont issus ly Blankars de Lovange, dont ilh est gran nombre. Et tengniez por certain que, delle werre que ly bons sires de Hemericourt out al encountre de chez de Bierlouz, uns chevaliers de Hoctebierges, nomeis ly Famelheuz, vint en serviche do dit saingnor de Hemericourt et à son mandement, à tot LV armures de fier de linage de Hoctebierges, des Cluthinghe et des Blankars, en queis ilh avoit XXV chevaliers; et furent deleis le dit saingnor de Hemericourt et ses atres amis, armeis sour les broukes à Fymale, en la conteit de Louz; et chilh de Bierlouz estoient en la court de Wydoiies, asseis pres; mais, quant ilh sorent la poissance do saingnor de Hemericourt, ilh soy retraierent à Tongres et departirent leurs gens.

317. Item, affien que vos soies infourmeis queiles sont les armes de Hemericourt, je vous ensengneray toutes les couleurs: assavoir, que chilh qui sont issus do casteal de Hemericourt et chilh de Vyle et de Daveles portent de geules à une bende d'argent; chilh qui sont issus des Kachemars de Stirs et de Bovengnistir, de Crennewy et de Blehen, portent d'argent à une bende de gueles; et chilh qui sont issus delle coistie de Horrion, dont messires Johan Moreaz issit, portent d'or à une bende d'azure, et, ja soice que messires Johan Moreaz et messires Wilhelmes, ses fis, les portassent de ces couleurs, sy ne say homme en nostre païs qui les porte en ceste manier; et chilh de Lamines les portent de geules à une bende d'ermine. Et cascons y met sa differenche à son plaisir; mais tos crient Hemericourt.

318. Nos avons chi devant recordeit chez qui sont estrais do saingnor de Wallehen. de ses hoirs, de chez de Badressen et de Falcomont, et, par incident, do bon saingnor de Hemericourt, ja soice qu'il ne fuist nint do lynage de Warfezéez; sy retournerons mult arier, assavoir az dois freires monssaingnor Jakemme, saingnor de Wallehain, dont ly uns fut sires de Bonley et ly atres sires de Corbais.

319. Ly sires de Bonley, freire à monssaingnor Jakemme, saingnor de Wallehain, out trois fis, assavoir monssaingnor Gilhe le Beghe de Saint Gery, monssaingnor Odrou de Rohengnéez, et monssaingnor Jakemme de Blamont. De ces trois freires sont issus plusieurs dammes et chevaliers, que je ne saroy lomeir de hoir en atre, mais ly romans païs de Braibant en est tos peuples. Et do saingnors de Corbais, freire al saingnor de Wallehen et alle saingnor de Bonley deseurdiz, je n'ay point d'information, par tant que je ay pou hanteit le païs de Braybant, qui est ly païs de leur nation.

320. Et tant que des dois freires monssaingnor Ernut, saingnor de Wallehen, qui out la filhe do bon saingnor de Hemericourt, lyqueis freires furent nomeis messires Otes de Wallehen et messires Wilhelmes de Biertinchamp, sont issus cilh de Biertinchamp, messires Lancelos delle Vaz et plusieurs atres.

321. Et chi define ly genealogie monssaingnor Libier Sural le jovene peire de monssaingnor Otton, saingnor de Warfezéez, promerain de ce nom, et gransaingnor des quatres freires de Warfezéez, de Hermalles, de Harduémont et de Haneffe, et de leur sereur de Wallehain; et aveis oüt d'oir en hoir

chez qui en sont issus, solont l'aiprize que je en ay faite; sy parlerons chi après de monssaingnor Houwe, freire do dit monssaingnor Libier Sural: sy le ferat beal entendre, car c'este sains nombre de chez qui en sont deskendus. Sy deveis savoir que ly blazons des fleur de lys est demoreis à tos chez del coistie de Warfezéez qui sont issus do jadis monssaingnor Libier Sural, voir des hoirs marles, ja soice qu'il les portent de pluseurs coleurs. Mais, des hoirs le dit monssaingnor Houwe, freire do dit monssaingnor Libier, vos trovereis tout le contraire; car, ja fuist choze que ly dis messires Houwes awist encargiet à porteur on escut vairiet d'argent et d'azure, que on nomme maintenant les armes d'Awans, nintmains sy hoirs, voir ly plus grant partie, present atres blazons tos contraires, sy qu'il vos apparat chi après, ja soice qu'il aient tos detenut le cry de Domartin.

CHI COMENCHE LY FONDEMENT, LY CHIEF ET LY PROMIERS STOKAGES DES DOIS LINAGES D'AWANS ET WAROUZ.

322. Messires Houwes fut sornomeis de Lexhy et fut freires à monssaingnor Libier Sural, saingnor de Warfezéez, secon de ce nom, et out quatre fis, assavoir monssaingnor Otton, monssaingnor Breton le viez, qui fut sires de Warous, monssaingnor Henry de Crescengnéez et monssaingnor Badout de Vorous.

323. Messires Ottes, ainsneis fis de monssaingnor Houwe de Lexhy out quatre fis et quatre filles, assavoir: messire Ameyle de Lexhy, messire Rigaz de Bealriu, avoweis de Kemexhe, messire Ottes de Novilhe et messire Godefrois d'Awir; et les filles s'ensieront chi après.

324. Messires Ameiles, ainsneis fis de monssaingnor Otton de Lexhy, brisat son blazon, assavoir l'escut vairiet, d'on lyon rapan de geules, et out on fil, nomeit messire Ameiles ly juvenes, qui fut tailhans et d'estrangnes maniers. On jour avient, en moys d'awoust, qu'il, ly juvenes messires Ameiles, estoit demoreis seuz en sa maison; sy s'apensat qu'il yroit, environ l'eur de nonne, alle fontaine à Lexhy, por ly rafressier, car ilh faisoit ardant chaut, et ilh n'avoit persone en la vilhe, par tant qu'il estoient az chans en leur messon. Quant ilh vint alle fontaine, ilh vat troveir une femme de jovene eage, asseis cointement vestue, la plus belle qu'il awist onques veüwe; sy en fut tos enbahis. Nequident, ilh l'araynat et ly enquist de son estat. Elle le celat; mais tant dist elle qu'elle estoit genty femme et d'estrangne paiis, et aloit en peregrinage; sy astoit là arestée por ly refroidire, et avoit sa meskine envoiit en la vilhe alle provision. Messires Ameiles, plus le regardoit, plus enflamoit de son amours; se ly requeroit son amysteit, et celle s'escondissoit de parolles et faisoit semblant asseis estrangnes. Finalement, ly dis chevaliers l'atrahit en son accort et le minat en son maison, et le festiat grandement, et soy kouchont ensemble en on lit, là ilh fisent tos leurs delis. Quant ce vient al matien et ilh furent leveis, la dicte damoyselle rendit grace al dit monssaingnor Ameyle de ce qu'i l'avoit si bien fiestiet, et ly demandat s'ilh le connoissoit de riens et s'ilh savoit à dire à cuy ilh avoit faite ceste cortoisie. Ly dis messires Ameiles ly respondiit que non. « Et je le toy diray, fist elle Saches que tu as fiestiet le dyable. — Le deable ! fist messires Ameiles. Par le digne mort Nostre Saingnor, dont toy poras tu bin vanteir, quant tu venras en infer, qu'il n'out onkes al monde miez croxut deable que tu as annuyt esteit. » Chelle s'esvanuwit et, al partir, elle crevat à monssaingnor Ameile le diestre oelh, sy que tousjours, tant qu'il viskat, ilh fut, por cesty cas, nommeis messires Ameiles alle Oelh.

325. Chis messires Ameiles al Oelh out on fis et trois filles. Ly fis fut nomeis messires Ameiles ly juvenes, qui fut peires à Watier de Bilrevelt. Et les filles furent astaleez, ensy que chi après sierat declareit.

326. Ly dis Watier de Bilrevelt out une filhe, mariée à monssaingnor Lambier de Harduémont, saingnor de Hautepenne, doqueile monssaingnor Lambier ly generation est chi devant escripte, en capitle de cheaz de Harduemont.

327. Item, ly promerain filhe monssaingnor Ameile alle Oelh de Lexhy fut mariée al viez monssaingnor Biertran de Liers, fil monssaingnor Thiry Magis, de Villeir deleis Juprelle. Chis messires Thirys Magis towat par mesaventure son cuzien, le fil monssaingnor Wery le Foir, de Vileir, qui estoit ses freires germains et estoit sires de Vileir deleis Joupprelle, et messires Thirys estoit sires de Liers et de Rocourt; et portoiient les armes de Vileir: d'or à une bendes de geules, à une ourle de geules; doqueil monssaingnor Wery tot chil de Villeir sont issus. Mais, por ceste homicide, sourdit gran guerre entre eaz, dont pluseurs bons chevaliers et escuwiers furent mors à on pongnyche qui fut entre Vileir et Joupprelle; car ly dis messires Weris ne voloit prendre amende que ses freires ly offresist, si que, finalement, quant ly grans maz et homicides en furent avenus, ly dis messires Weris appelat monssaingnor Thiris, son freire, al champ de bataille; s'en fut pais faite, et s'en alat messires Thiry ultre meire, et la cangat ilh ses armes por le hayme de son freire, et prist d'argent à une crois d'azure. Et, le temps qu'il sorjournat ultre meire, vendit ly dit messires Werys sa hauteur de Vileir et de Joupprelle à capitle Saint Lambiert. Et ly dis messires Thiris revint al paiis et demorat riches, et out une filhe, qui fut mariée à monssaingnor Bolle de Fletenges, qui fut uns vailhans et uns preuz chevaliers, qui grande honeur conquist alle bataille delle warde de Steppes, là ly Braybechons furent desconfis. Ors deveis savoir que chis messires Biertrans de Liers, fis monssaingnor Thiri Magis et seroge à monssaingnor Bolle de Fletenges, prist à femme une des filhes monssaingnor Ameile de Lexhy, dont ilh issirent ly secons messires Bertrans et messires Werys. Chis secons messires Biertrans out trois fis et dois filhes, assavoir monssaingnor Biertran, monssaint, nor d'Aaz et monssaingnor Johan de Melins, chevaliers. Et ly une des filhes fut mariée en la terre de Dolhehen, à on chevalier de Warsage, dont chil de Warsage, assavoir d'Onke, et ly Papelés, et Malhefiers, et gran nombre de chevaliers et escuwirs, sont issus.

328. Et ly atre sereur fut mariée à monsaingnor Godefroid de Tilliche, doqueile mention est faite chi devant, en capitle parlant de cheaz de Harduémont.

329. Do dit monssaingnor Biertran, le secon, sont issus messires Johan, le viez voweis de Liers, qui out une des filhes le saingnor de Cleremont, et Biertrans de Liers. qui out une des filhes monssaingnor Johan d'Oreille; et en fut dois sereurs, dont ly une fut mariée à monssaingnor Thiry de Fleron et ly atre à Boynan de Preit.

330. Item, est assavoir que, do dit monssaingnor Johans, avoweit de Liers, et delle filhe le saingnor de Cleiremont, furent pluseurs enfans, assavoir Biertrans, Butoir, Johans, Rigauz et damoysele Aelis. Ly dis Biertrans et Rigauz morirent sains marieir, et ly dis Butoir, qui mal regentist son linages, soy mariat à Hacourt et at pluseurs enfans. Ly dis Johans, ses freires, prist à femme damoysele Johanne, filhe monssaingnor Gerar de Biersés, et en sont dois fis, assavoir Johan, qui est sires et avoweis de Liers, et Jaquemins, qui at à femme la filhe Wery Macoir de Rocourt; et puy fut veve la dicte damoysele Johanne et reprisl à maryt monssaingnor Gilhe Surllet, qui veves estoit delle filhe monssaingnor Henry le Beal; s'en est, de ce dierrain mariage. uns fis, nomeis Gerars Surlés, marieis à Berghes sor le Zome, et une filhe, nommée Johanne, qui, promierement, fut mariée à Thomas de Jehaing, le cangeur, et, secondement, à monssaingnor Renart de Momale, saingnor d'Ennettines, chevalier, et n'en sont demoreis nus hoirs.

331. Item, Johans, ly voweis de Liers maintenant vivans, fut marieis alle filhe monssaingnor Rasse de Hacourt, chevalier, esquevin de Liege, saingnor de Haversen; et en sont dois juvenes filhes, dont

ly une est mariée à Gilet de Sorozéez, saingnor d'Andrimont. Et Jakemin, ses freires, at assy, de sa dicte femme, des jovenes enfans.

332. Item, damoyselle Aely, leur ante, filhe de monssaingnor Johan, jadis le viez voweit de Liers, fut mariée à Wilhelme Prost, de Meliens, esquevin de Liege, tres ryche homme et de gran sens; et orent trois fis et dois filhes, assavoir: monssaingnor Wilhelme Prost, chevalier, Rigaut Prost, Johans, canonne de Saint Johan Ewangeliste en Liege, Aelidt, damme de Mokines, Ysabeal, femme à monssaingnor Johan le Cloquier, esquevin de Liege et de Huy et baillir de Tuwing.

333. Ly dis messires Wilhelmes soy mariat hautement à damme Magritte de Louz, filhe de noble homme monssaingnor Ernut d'Agymont, saingnor de Tynes et de Faaz; et en sont quatre enfans, assavoir messires Wilhelmes de Tynes, Margritte, Johanne et Marie.

334. Messires Wilhelmes de Tynes ly jovenes et damoyselle Johanne, sa sereur, sont de noveal marieis az dois enfans do bon saingnor de Bearen maintenant vivant, qui at esteit tres vaillant homme d'armes et fors et rades chevaliers; sy que ses fis, nomeis Michiez, at à femme la dicte damoyselle Johanne, et ly sereur do dit Michiel at à marit ly giovane messire Wilhelme, saingnor de Tynes deseurnomeit. — Nota que, l'an XIIIIC, ly dis Michiez et sa sereur morirent sains hoirs.

335. Item, est, après ce, mariée la dicte damoyselle Margritte de Tynes à monssaingnor Badewien, ainsneit fil de monssaingnor Badewien, saingnor de Fontaines et delle Marche. Et la dicte Marie, ly plus jovenes des enfans do dit monssaingnor Wilhelme Prost, n'est encors astalée par mariage. — Nota que la dicte damme Margritte trespasat l'an XIIIIC, et, de ly, demorat une filhette, de laqueile elle morut.

336. Item, Rigauz, freires do dit monssaingnor Wilhelme Prost, soy mariat alle filhe Martien de Printehaghe, escuwier; et en est une filhe, mariée à monssaingnor Libiert de Meadrenge, lyqueis Rigauz morit ultre meire, à une skermuche de Sarazins. Et ly damme de Mokines, sa sereur, fut dois fois mariée, mais elle est trespasée sains hoir.

337. Item, de damoyselle Ysabeaz, leur sereur, et do dit monssaingnor Johan le Cloquier, sont pluseurs enfans, dont ly uns, nomeit messires Wilhelmes, est chevaliers de noveal et est marieis nouvellement alle filhe Henry Haweal de Bovegnistir. Et ly dis messires Johan, qui estoit veves, at repris le meire, assavoir la femme do dit Hency Haweal. Et ly une des filhes monssaingnor Johan est mariée à Olivir de Melen, doqueile mention est faite en la genealogie de monssaingnor Heyneman d'Ays; et do dit monssaingnor Johan le Cloquier sierat faite mention en la genealogie do conte et castelain de Hozemont, dont ilh est estrais.

338. Item, deveis savoir que, de Biertran de Liers et delle filhe monssaingnor Johan d'Oreilhe, issit messires Biertrans de Liers, sires d'Emale, chevaliers, esquevin de Liege, et une filhe tres belle, qui alienat de son sens.

339. Chis messires Biertrans soy mariat à une mult noble damme, filh monssaingnor Gerar delle Marche, oncle alle evesque Aoust delle Marche, et fil alle conte delle Marche de remariage; lyqueis messires Gerars soy mariat en ce paiis, à une damme qui avoit esteit femme à saingnor de Bierlouz et filhe do saingnor de Duras, et en out dois filhes, dont ly dis messires Biertrans out l'ainsnée et ly gentis voweit de Colongne, sires d'Alpe, out l'atre. Do dit monssaingnor Biertran et de ces damme, sont dois fis et dois filhes, assavoir: Biertrans, sires d'Emale, qui n'at nul hoir; Gerar, qui est freires des Joyns à Treit. Et les dois sereurs sont nonains à Herkenrode. Ensi apert que ces branches est perdwe.

340. Item, delle sereur le viez voweit de Liers, qui fut mariée à monssaingnor Thiry de Fleron, issirent Johan et Alixandre, qui fut canones. Chis Johans prist à femme l'une des filhes monssaingnor Watier de Hauteperne, dont issont Thirys et Watier, lyqueis Watier n'est point marieis. Sy trovereis tot leur generation en capitle faisant mention de chez de Harduémont.

341. Item, delle atre sereure, mariée à Boynan de Preit, issit freire Biertran Boynans, qui fut freire meneurs à Liege, et dois sereurs, dont ly une fut mariée à monssaingnor Johan Germeal de Hanut, dont issont messires Godefrois, Biertran, Renchon et Johan; et ly atre sereur fut mariée à Badry de Boins, dont y furent Badrys et Boynans. Chis Boynans morit sains hoir. Et Badris morit en Turquie, à une bataille qui fut à Satalie entre Crestiens et Sarazins; sen demorat uns fis, nomeis Giles de Boins. Et quant ly viez Badrys de Boins fut mors, ly damme soy remariat à monssaingnor Male Assireit delle Monzéez, qui veves estoit, et orent une filhe, nomée Blanche qui est mariée à monssaingnor Johan Buchar de Boverie; sen sont on fis, nommeis Bertrons, et une filhe, nomée Marie; lyqués Bertrons est à present marieis, assavoir l'an XIIIIC. Il demoroit deleis madamme de Renay en Flandre et de Beafor sor Mouze qui astoit filhe d'unc noble bannerés de Haynau, saingnor d'Antogne, deleis Tournay, et avoit esteit femme alle noble monsaingnor Robier de Namur, freire do conte Wilhelme de Namur et saingnor del Escluze; se fut ly damme teilement conselhie que, malgreit son peire, freire et amis, et ultre la defense do conte de Namur maintenant vivant et de monssaingnor Johan de Namur, son freire, elle prist et despoizat ly dis Biertrons delle Boverie, et en at des hoirs; dont elle fut ranchie par le dit monsaingnor Johan de Namur, qu'en or et argent. en joveaz et en atres moibles, apparilhies à plus de XVIIm frans, ensy que fame cour. Et la dicte Marie fut mariée à Johan del Coir, esquevin de Liege, dont mention est faite en capitle qui traitiet do conte et castelain de Hozemont, chi après; et, quant ly dis Johan de Coir fut trespasseis, elle soy remariat à messire Houwart, fil Gosewien de Flemale, doqueile mariage elle soy departit de son dit mary par Saint Engliese; et est si sottement gouvernée qu'elle est remariée, de sa tieste, à Lowet, fis Lowet Poilhon, messagirs des XII des linages de ce paiis, qui est on povre garchon. Ensy sont ces dois damme ravalée ultre mesure: doqueile mention est chi après faite, en capitle parlant de monssaingnor Makart delle Heys.

342 Item, puysque declareit avons chez qui sont issus de monssaingnor Bertran de Liers, qui fut fis do devaintrain monssaingnor Bertran et del filhe monssaingnor Ameile de Lexhy, nos dirons chi après de monssaingnor Wery de Rocourt, son oncle. De cesty monssaingnor Wery sont issus Wery de Rocourt et ly Macoirs de Rocourt, damoysele Ysabeal de Gothehen, Gilhes de Rocourt, le cangeurs, et gran planteit d'atre gens laboreurs, demorans à Liers, à Rocourt et atre part. Ors retournerons à monssaingnor Rigaut d'Aaz, freire do tir monssaingnor Biertran.

343. Chis messires Rigautz prist à femme la filhe d'on chevallier nomeit monssaingnor Watier do Pas de Wonk, et orent on fil, nomeit monssaingnor Johans Botir d'Aaz, qui fut mors al pongnyche à Waremme. des mortel faites des linages do paiis.

344. Chis messires Botir soy mariat alle sereur monssaingnor Johan Persans de Haneffe, dont ly sires de Hermalles avoit l'atre sereur; et en furent dois filhes, dont ly ainsnée fut mariée al bon et à larghe monssaingnor Henry de Fexhe, dont mention est chi devant faite, en la genealogie monssaingnor Heyneman d'Ays; et ly atre fut mariée à Olivir d'Ohay, saingnor de Cenfontaines, filhe do bon Walleran de Joupprelle, dont mention sierat chi après faite, en la genealogie do saingnor d'Awans.

345. Et tant que de monssainanor Johans de Meliens, qui fut freires à monssaingnor Bertran et à monssaingnor Rigauz devant nomeis, je croy que nus hoirs legitimes n'en issit, qui fuist seculeirs;

mais je oy dire qu'il en fut on canones, nomeis Phelippes, dont Wilhelme de Harche de Vonk et Kineaz, ses freires, yssirent; et en yssit assy, do dit monssaingnor Johan, uns varlés, nomeis Wilhelme de Mers.

346. Vos aveis chi devant oyut cleirement cheaz qui sont deskendus delle promerain filhe monssaingnor Ameile de Lexhy, mariée alle viez monssaingnor Biertrans de Liers; sy dirons delle seconde, qui fut mariée a monssaingnor Owry de Bonbays, en la terre de Dolhehen; s'en furent dois fis et VIII filhes. Ly ainsneis fut nomeis ly viez Martealz do Bonbays, et ly atre fut appelleis Coiie.

347. Do viez Marteal furent quatre fis, assavoir Ouris de Kawester, Coiie de Biernaw, Ernut de Bonbais, qui demorat à Juppilhe, et Wilhelme ly Favereaz de Rychelles.

348. Ly dis Ouris morit sains hoir, et, de Coiie, issirent Xherveaz de Biernaw, Renart delle Vaz et Oury, et encor dois sereurs, dont ly une, nomée damoyselle Angnès, fut mariée à Conrar de Sorozééz, et ly atre à Conrar de Cortis; sy sont ly alcons d'eaz mors sains hoirs, et, des atres, sont ly hoirs en bonne estat.

349. Item, Ernus de Bonbais, tir fis al viez Marteaz, fut marieis à Jupilhe et out on fil, nomeit Ernut de Bonbais, et une filhe, nomée damoyselle Belinghe.

350. Ly dis Ernus le juvenes soy mariat alle filhe Henry de Sains Servays, le freire monssaingnor Alixandre de Sains Servais, chevaliers et esquevin de Liege; dont i sont trois fis et une filhe, assavoir Ernus de Bonbaiz, Renars et Wilhelmes, et ly filhe est mariée en Braybant.

351. Ly dis Ernus, ainsneis fis do juvenes Ernus, soy mariat à damoyselle Johanne, filhe Johan de Coir, dit de Sanson, le vinier; et en sont dois filhes, assavoir Johanne, qui at Robiert de Ferme, et Adilhe, nouvellement mariée à Johan Suteminen, assavoir l'an M trois cens nonante et noef. Et ly dis Wilhelmes astoit en devant marieis, et ly dis Renars non.

352. Item, la dit damoyselle Belinghe, sereur al secont Ernut, fut mariée à Badewien de Bierleur, et en est Tonar de Bierleur, qui n'at nulle hoir, et une filhe, mariée à Wilhelme de Bearewar, de Fexhe deleis Seliens, dont ilh est une filhe, mariée à Pollereal, fil monssaingnor Johan le Pollen d'Aleur; et y at encor des atres enfans pluseurs.

353. Item, ly quars fis do viez Marteaz fut nomeis Wilhelmes ly Favereaz de Rychelles, qui out sept fis et trois filhes, assavoir Wilhelme, Ourit, Colar Favereaz, Ernut Marteal, Johan, Gilhes et Renchon. Et, des trois filhes, fut ly une mariée à Henequin Kune, dont ilh est Wilhelmes Kune; ly atre fut mariée à Johan Ponchons, de Retines, dont i sont pluseurs enfans; et ly tirce, à Gosewien de Lyonsar. Et croy que, de ces enfans, soit grans remanans.

354. Nos avons declareit parfaitement la generation do viez Marteal, ainsneis fis monssaingnor Ourit de Bonbais; sy dirons de Koiie, son freire, qui out quatre fis, assavoir ly voweis de Bonbais. Marteal, qui demorat à Votemme, Koiie et Johan. Tous chis freires morirent sains hoir, excepteit le dit Marteal de Votemme, doqueile est Renchon Marteal et une filhe, qui at Johan Paris de Lymborch.

355. Ors devons retourner az VIII filhes monssaingnor Ourit de Bonbays, entre lesqueiles ilh en y out quatre dont je n'ay nulle information; mais des atre quatre vos recorderay je en ces maniere.

356. Ly ainsnée fut mariée à monssaingnor Renier de Viseit, qui fut marissaz delle evesqueit de Liege; si fut tuweis par monssaingnor Ameyle de Houlnoul et alcons siens aydans, qui sy tendamment furent resiiez de ce faite qu'il furent assegiez et ars en mostiers de Meliens. Do dit monssaingnor Renier et delle filhe monssaingnor Ourit furent uns fis et dois filhes, assavoir: Renier de Fraipont, ly damme d'Argenteal, meire al bon saingnor d'Argenteal qui weriat à chez de Liege, et ly atre fut mariée à Alixandre de Wandre.

357. Do dit Renier de Fraipont issit, do premier mariage, messires Renier de Fraipont, beaz chevalier et gratieuz; et, de secon mariage, furent ly Canonnes de Fraipont, Gerar, messires Jake, sires de Wodemont, Wilhelme, canonnes de Foront, Renchons et Ernotes, qui furent ly plus hardis et ly plus vailhans gens de leur terre qui fuissent en nulle paiis; mais il morirent sains hoir, excepteit monssaingnor Renier et le Canonnes et Gerar, lyqueis orent une sereur mariée à Foron dont y sont ly hoirs.

358. Ly dis messires Reniers prist à femme damme Ysabeal, filh monssaingnor Aiixandre de Sains Servais, chevalier, esquevin de Liege; doqueile ilh out on tres beal fis, nomeit Renechon de Fraipont, et une tres belle filhe, mariée à monssaingnor Wilhelme d'Eyneberghe, manant à Treit.

359. Ly dis Renchon out à femme, promirement, la filhe monssainnor Nycol Fraipont, et n'en demorat nulle hoir Et ly meire do dit Renechon reprist le dit monssaingnor Nycol à marit, sy que ly peires et le filhe orent le meire et le fil. Après ce, soy remariat ly dis Renechons alle filhe Franke delle Roche, escuwier; avoweit de Fleron, dont y sont pluseurs enfans, assavoir messires Tristans, sires de Fraypont, une filhe mariée à Biertran de Hanut, et pluseurs atres.

360. Item, ly Canonnes de Fraypont, wailhans escuwiers et de noble corage, prist à femme la filhe monssaingnor Godefroid de Nayvaing; s'en issirent Rissak et Grist, qui morit sains hoir. Ly dis Ryssak soy mariat alle filhe Johan Panyot, le hallier, et en est uns fis, nomeis li Canonnes de Nayvaing, qui, de noveal, at prist l'ordenne de chevalerie. Et quant la dicte damoysele out par pluseurs annéez esteit avoekes son dit marit en mariage, elle porkachat la dyvortion et separation par caze de proismetit, et fut par Sainte Engliese ly mariages aninchilleis et ly enfes jugies drois hoirs. Sy soy remariat ly dit damoysele à Johan delle Monzée, de Saint Servais, et ly dis Ryssak soy remariat alle filhe monssaingnor Libier Butoir, avoweit de Horriion, engenrée en la filhe monssaingnor Johan d'Oborne, chevalier, qui, maintenant, at repris à marit monssaingnor Robiert de Lovaingne, manant à Montegnis, de laqueile femme ly dis Ryssak at des jovenes enfans. Et sont nouvellement devenus chevaliers Ryssak et ly Canonnes, ses fis.

361. Item, Gerars, freires al bon Canonnes de Fraypont, soy mariat à damoysele Aely, filhe monssaingnor Gilhe Maton, chevalier, esquevin de Liege; et en fut une filhe, mariée à unk plaisant chevalier et gratieuz, nommeit monssaingnor Thiry de Berghes, fil monssaingnor Renart de Berghes; s'en est uns fis, nomeit messires Renars, et une filhe, ensy que je suy informeis, qui a est mariée à ung noble chevalier, en la ducheit de Geldre, appelleit messire Roelman de Arendael.

362. Nos avons ordinéement deviseit chez qui sont issus do viez Renier de Fraipont; sy dirons chi après de sa sereur, mariée al saingnor d'Argenteal adont vivant. De ces dois issirent messires Renars, nomeis ly bons et ly wailhans sires d'Argenteal, qui weriat à chez de Liege, qui abatirent sa fortreche, et messires Thirys, sires d'Ennetines, et une filhe, mariée alle saingnor de Rode, en la terre de Falcomont.

363. Chis bons messires Renars out à femme damme Katerine, filhe Ernut de Corwaremme, et. por le caze de lée, est faite expresse mention, chi devant, do dit monssaingnor Renart et de ses hoirs, en

capitle parlant do saingnor de Momale, secon fil do promier mariage delle saingnor de Warfezééz qui out les XX enfans.

364. Item, messires Thiry d'Argenteal soy mariat alle filhe do saingnor de Ghore, engénrée en la sereur do bon monssaingnor Henry de Fexhe, et en issirent messires Renars, sires d'Ennetines, et une vailhante damme, mariée à monssaingnor Ernut de Corwaremme, saingnor de Nyle, qui acquist ly saingnorie de Momalle, doqueile et de ses hoirs est faite mention en dit capille parlant do saingnor de Warfezééz. Et, delle damme de Rode, issit messires Wynans de Rode, doqueile et de ses hoirs mention est faite chi devant, en capitle parlant des hoirs monssaingnor Heyneman d'Ays; Sy m'en taray à tant.

365. Item, delle atre sereur le dit Renier de Fraipont, mariée à Wandres, issirent Alixandres de Wandres et Renechons, ses freires, qui out à femme la filhe Johan de Lavoit, de Sovereine Averoit, mais de leurs hoirs je n'ay nulle cognissance. Ensi aveis en escript cheaz qui issus sont de monssaingnor Renir de Viseit et delle promeraine filhe monssaingnor Oury de Bonbais.

366. Ly seconde filhe monssaingnor Oury de Bonbais fut mariée à Lowy, saingnor de Noevevilhe, dont ilh issit Johan Martez de Mirmorte, doqueile vos trovereis chi devant la generation, en capitle qui faite mention des hoirs de Hermalles.

367. Item, ly tirce filhe do dit monssaingnor Oury de Bonbais fut mariée à Lowy Loilhe de Joupilhe, dont Watier Panee et ly viez Drughiens issirent. Do dit Watier furent dois filhes; ly une fut mariée à monssaingnor Gilhe de Charneur, chevalier, et ly atre, nomée damme Damyon, fut mariée dois fois: la promerain, à Lowy Gilhar, fil Gilhar delle Cange, et, la seconde fois, à monssaingnor Johan le Polen d'Aleure.

368. Delle promeraine filhe et do dit monssaingnor Gilhe de Charneur furent messires Watier de Charneur, canonnes de Saint Lambiert, messires Ernus, et messires Adulph de Charneur, chevaliers, esquevin de Liege.

369. Do dit monssaingnor Ernut et de ses hoirs est faite expresse mention chi après, en capitle parlant des Surlés, dont madamme sa femme estoit estraite. Et assy do dit monssaingnor Aoust et de ses hoirs est ly generation escripte chi après, en capitle parlant des hoirs monssaingnor Makar delle Heys de Flemalle, dont madamme sa femme estoit parvenue.

370. Et delle seconde filhe do dit Watier, qui fut premiers femme à Lowy Gilhar, issit messires Gilhes Gilhars, chevaliers; et de son secon mariage. assavoir de monssaingnor Johan le Polen, furent Libiers d'Aleur, dont nus hoirs n'est demoreis, et ly grans Aoust ly Polens. Do dit Aoust le Polen est à present ly Polens de Retines et des atres, dont je n'ay cognissance nulle.

371. Item, est assavoir que, do viez Drughien, furent gran nombre d'enfans, assavoir Lowys Drughiens, Ernus Drughiens, Stasses Drughiens, Koiie, et plusseurs, dont y sont plusseurs enfans, qui prolongeroient trop nostre ystore, s'ilh estoient denoméement chi ens escripts. Et orent dois sereurs; ly une fut mariée à unk des enfaus de Mouhien, et ly atre à Wilhelme de Weys, dont y sont ly hoirs.

372. Item, ly quarte filhe monssaingnor Oury de Boubais fut mariée à Davypon, en la terre de Dolhehen; s'en issirent Ourys de Davypon et Johan, ses freires, qui out la filhe Warnier de Lavoit, dont y sont ly hoirs. Et tant que des atres quatre filhes do dit monssaingnor Oury, je ne suy nint bin

informeis atrement que pres tos ly chevaliers et escuwiers delle terre de Dolhehen et de Lembor en sont yssus.

373. Nos avons tot expressement. declareit cheaz qui sont issus des dois filhes monssaingnor Ameile al Oilhe de Lexhy; sy dirons delle tirche et dieraine sereur. Cheste fut mariée à monssaingnor Rigaut de Kenchewilre, en la dukeyt de Juley; s'en est issus grans nombre de bons chevaliers et escuwiers, demorans par dela Mouze; et avient, de mon temps, que chilh de Kenchewilre getoient gran serviche de cheaz de Liers, de Rocourt, et des atres qui astoient de ceste coistie en Hasbainge, quant ilh avoient à faire à leur marchissans.

374. Messires Rigauz de Beariwe, secon fis monssaingnor Otton de Lexhy et freires à monssaingnor Ameile alle Oelh, fut avoweis de Kemexhe et out trois fis et quatre filhes, et portat de VIII pieches d'argent et d'azure, à on lion de geules, mais ilh detient le cry de Domartien; et teilement le portont si hoirs.

375. Ly promirs fis monssaingnor Rigaut fut nomeis messires Ameiles, lyqueis fut peires de monssaingnor Johan de Kocroul, de ses freires et sereurs. Chis messires Johan prist à femme la filhe saingnor Radout Surllet, de laqueile ilh out dois fis et dois filhes, assavoir monssaingnor Ameile, avoweit de Kemexhe, et Rigaut, ses freires. Et, des dois sereurs, ly une fut mariée à monssaingnor Johan del Champ de Vellerouz, et ly atre à monssaingnor Gilhe de Meirs, chevaliers.

376. Chis dois freires, messires Ameyles de Kemexhe et Rigauz, morirent sains hoir.

377. Messires Johan del Champ out, de leure sereur, quatre fis et dois filhes, assavoir Johan, Colart, Ameile et Renier. Et, des filhes, fut ly une mariée à Thiry Rennewar, de Montengnéez, et secondement à Hustien de Chier, sy morit sains hoir; et ly atre, nomée damoyselle Adilhe, fut mariée à Lambier de Fexhe, le voweit, fil Wilhelme de Horrion, et at des hoirs.

378. Ly ainsneis fis monssaingnor Johan del Camp, assavoir Johan, et assy Ameiles, qui furent dois beaz escuwires et gratieuz, morirent sains hoir. Et Reniers est fantastiques et soy tint clergiamment.

379. Colars, secons fis monssaingnor Johan del Champ, est marieis à Liege, alle filhe d'on riche borgois., nomeit Hency Coing, et en at une filhe tant soilement, mariée en Braybant, à monssaingnor Jakeme del Bare de Chamont, manant à Joudongne; s'en at des hoirs, qui sont encors deseagiez.

380. Ly filhe monssaingnor Johan de Champ, nomée damoyselle Adielhe, qui fut mariée à Fexhe, at dois fis, Johan et Wilhelme, et dois filhes. Chis Wilhelmes est canones de Saint Pire à Lieg et de Nostre Damme de Namur; et Johans est nouvellement marieis à damoyselle Katerine, filhe Gossewien de Coir, citain de Liege, et en at des jovenes enfans. Et, des filhes, est ly une mariée à Ystasse, fil Wilhelme de Crescengnéez, escuwir.

381. Ly seconde sereur de monssaingnor Ameyle et de Rigaut de Kemexhe fut mariée à monssaingnor Gilhe de Meirs, chevalier, fil saingnor Gilchon Rygo; s'en fut dois fis et une filhe, assavoir messires Johan de Kemexhe, chevaliers, et Gilhes de Meirs; et ly filhe fut mariée à monssaingnor Johan de Lardier, chevalier.

382. Ly dis messires Johan soy mariat à damme Katerine, filhe monssaingnor Badewien de Flemale, chevalier; dont ilh est I fis tant soilement, nomeis Giles de Kemexhe, qui at à femme la filhe d'on bon escuwier, nomeit Watier de Walezien, mais ilh n'en at nul le hoir.

383. Ly dis Giles de Meirs, freires monssaingnor Johans de Kemexhe, at, en ses anchiens jours, espozeit sa soingante, dont ilh at pluseurs enfans. Et, do dit monssaingnor Henry, qui fut de tres petit regiment, est issus Jakemmes de Lardier et une sereur, mariée en Hasbaing. Et croy que messires Johan de Koucroul out des sereurs, mais je n'en suy nint bin informeis.

384. Ly secons fis monssaingnor Rigaut de Beariu fut nomeis messires Rigauz ly jovene, qui out une filhe mariée à Liege, à Watier le Blet, dont Lybiers de a Quartier, qui out la filhe saingnor Badewien de Holongne, esquevin de Liege, et sa sereur, qui at Gilhon de Wyhongne, sont issus. Et assy ly enfans de Beariu, qui ont encor la saingnorie de Bealriu, sont issus del unk de ces dois freires et, par tant, je dirayalconne choze de leurs hoirs, qui encors sont.

385. Lybiers de Quartier out une filhe, qui est mariée à Ernut de Weys, qui porte les armes de Preit sains comble toutes entirs, assavoir lozengiet d'argent et d'azure, et fut fis d'on vailhant escuwir, nomeit Wilhelme de Weys; mais ilh n'ont nul hoir.

386. Et delle sereur do jadis Libiert sont quatre freires, assavoir Libier, Wilhelme, Johan et Gerart; et croy que Johan aiiet des enfans.

387. Ly tirs fis monssaingnor Rigaut de Beariu fut nomeis sires Gilhes et fut doiiens et canonnes delle eglize Saint Pol en Liege.

388. Nos vos avons fait cognissanche des trois fis monssaingnor Rigaut de Beariu l'anneit; Sy dirons chi après de ses quatre filhes.

389. Ly promeraine filhe monssaingnor Rigaut de Beariu fut mariée à monssaingnor Renier de This, qui portoit les armes d'Opliews: d'ermine à une faxhe d'azure. Do dit monssaingnor Renier furent dois fis, assavoir Francois et Hesbengnons, qui morit sains hoir; et orent assy une sereur, mariée à unk riche borgois de Liege, nomeit saingnor Henry Cossen.

390. Item, do dit Francois issirent messires Rigauz de Thys et une filhe, mariée à Johan, saingnor del le Capelle en Condros. Do dit monssaingnor Rigaut issit Lowys de This et Johan, ses freires; lyqueis Lowys soy mariat alle filhe monssaingnor Wilhelme de Romershoven, chevalier, dont y sont Brunekin, Lowy, Rigauz et Johan, vivans à present.

391. Item, Johans, freires do dit Lowy de This. soy mariat alle filhe monssaingnor Ystasse de Cresengnée; s'en issit damoysselle Marie, qui, promierement, fut mariée à Thiry d'Akoche, s'en at pluseurs enfans. et, secondement, elle soy mariat à Johan, dit le Famelheuz de Verlaines, s'en at des hoirs.

392. Item, ly sereur do dit Francois, assavoir ly filhe monssaingnor Renier de This, fut mariée al dit saingnor Hency Cossen; s'en fut uns fis, nomeis Henris, qui fut murdris, et dois filhes, dont ly une fut mariée à saingnor Gilhe le Beal, esquevin de Liege, qui portoit les armes d'Ilhe, assavoir de geules à quatre griffes de lyon d'or, et ly atre fut mariée à Gerart de Tyhanche, qui le dit Henry. son seroge, murdris.

393. Item, do dit saingnor Gilhe le Beal et delle filhe saingnor Henry Cossen issirent trois fis et une filhe, assavoir: ly bons, ly larges et ly vailhans messires Johan le Beaz, canonnes de Saint Lambier et prevost delle engliese Saint Johan en Liege, messires Henrys le Beal, chevaliers, esquevin de Liege, et Gilhe le Beaz, canonnes de la dicte engliese Saint Johan; et orent chis enfans une sereur, mariée à monssaingnor Hombier de Biernamont, chevalier.

394. Chis enfans laissent les armes leur peire et prisent les armes d'Opliews, de part leur grandamme do costeit leur meire, qui fut filhe monssaingnor Renier de This.

395. Messires Johans ly Beaz deseurnomeis ne doit pais estre oblieis en ce compte, car, onkes d'eage d'omme vivant à son temps, ilh n'out en l'engliese Saint Lambier nul miez entachiet de ly, ne de plus frank ne de plus noble regiment: car je le veys, et hantay tant son hosteit que je en saray bin veriteit recorder. Ilh fut grans et hauz, et personables de ryches habis et stoffeis, semblans az habis dez bannerés; car ses vestemens de parement étoient hamoteis sor les espalles de bons yermiens, Ilh estoit foreis de costables pennes, et de samis et de cendal, selonc l'atemprement do temps, et avoit estat de chevaz et de mayniez alle avenant. Ilh avoit eut, en ses jovenes jours, fakenirs et brakenirs, chiens et oseaz, costablement. Et estoit ses regimens cotidiens, et ly escuwirs d'oneur, qu'il avoit escoleit, telement affaitiez que, sains parler à leur maistre, s'ilh veiioient aalcon vailhant homme estrangne, fuist prelaz, chevaliers ou escuwirs, ilh le prioient fuist al dyneir ou al sopeir; et, selonc ce, estoit tosjours ses hosteis porveüs, et, se alcons princes s'enbatoit en la citeit, ilh convenoit qu'il dynast deleys ly. Ilh portoit tout habit de chevalier de piïet et de corps, et del harnas de ses chevaz; et estoit costables de fermas et de botenires, de pierles et de vraies pires. Les cheveches de ses soplis estoient tous pres overéez de pierles. Et estoit sa table onie, et ly bankés do sopeir estoit commons à toz, et, az solempniteis, ons y siervoit en vassel d'argent. Ilh n'aloit onkes, les commons jours delle samaine, alle engliese qu'il n'awist XVI ou XX persones qui le conduyssoient, tant de ses proymes com de ses mayniez et de chez qui estoient à ses dras; et quant c'estoit az jours solempnés, chilh qui estoient à ses dras le venoient quere en son hosteit et le mynoient alle engliese: sy avoit sovent fois assy gran rotte après ly com après l'evesque de Liege, car ilh avoit bin L ou do moins quarante parsiwans, qui tos demeroient al dyneir deleys ly: sy qu'il estoit chief et souverains de son linages. Et, selonc ce, ly portoiient sy proismes et amis honeur et reverence, et ilh les hantoit et avanchissoit en tos estas. Ilh donoit quarante owyt paires de robes d'escuwirs et chink paires de robes à vayre, assavoir à trois canones et à dois chevaliers. Ilh parsiwit les armes en jovente et servit al tournoy, et fut delle hosteit monssaingnor Johan de Haynau, saingnor de Beamont et de Cymay. Ilh avoit bon sens natureit et bon regiment sor tos atres. Ilh astoit liiez, gays et jolis, et savoit faire chanchons et vierlais, et queroit tos desduys et tos ses solas. Et, en ce faisant, ilh acquist grandes pentions et grans hiretayges. Se ly fist Diez la grace qu'il viskat tot son temps en prospèriteit et en gran santeit; et fut anchiens de quatre viens ans ou plus, quant ilh trespasat, et, selonc son estat, furent reverenment et costablement faites ses exeques. Ilh out, en ses anchiens jours, une paire de fis germeaz d'unne poirture, nommeis Johan et Gilhes, qui furent d'une damoiselle de bonne estration, qui estoit do lynage del Preit, filhe delle sereur Stassien de Preit et Gilhon de Preit; azqueis dois germeaz ilh laissat grans possessions. Ly ainsneis est chevaliers et sires de Hemericourt, et Gilhes est chantes et canones de Saint Martien en Liege. Ly dis messires Johan, fis do vailhant canonne deseurnomeit, est hautement marieis à une damme de noble sanc de Dufle et de Marlines, et en at des beaz enfans, et at encargiet les armes d'Oppliews telement que ses bons peires les portat, et acquist par discange nouvellement la saingnorie de Hemericourt et de Lantremenges, et est en bon estat. Et ly dis Gilhes, ses freires, est bons et envoysiez compains.

396. Messires Henrys, freires al bon monssaingnor Johan le Beal, soy mariat à une noble damme et de genty sanc, nomée damme Juliane de Bealfort, qui estoit filhe do saingnor de Bealfort sor Mouze, qui maintenant est à monssaingnor Robiert de Namur, et estoit do sanc de Bealfort et de Lydekerk, en Flandres; et, de cest damme, ilh out dois filles.

397. Ly une de ces filles fut mariée à monssaingnor Henry, saingnor de Vivirs et delle Mearotte; s'en furent dois fis, assavoir messires Ernus et Henrys, qui morit en Grece sains hoir. Ly dis messires Ernus soy mariat à Tinelemont, et en at une belle filhe, qui tres hautement est astalée à

monssaingnor Thomas, saingnor de Dyeste, tres beal et tres gratieuz chevalier, de noble sanc et de grande poissance. La dicte damme est nouvellement trespassee, l'an M. CCC nonante noef; s'en est demoreis uns jovenes fis, dont ly proismes poront estre forment releveis.

398. Ly atre filhe monssaingnor Henry le Beal fut mariée à on beal gratieuz chevalier, monssaingnor Gilhe Surllet, fil monssaingnor Gerart Surllet; s'en furent dois fis, assavoir Henry, qui morit sains hoir, et messires Gilhes Surlés, viskans à present, debonaire chevalier et cortois, et assy une sereur, nomée damoyselle Julyane, qui fut femme à Johan de Bierna. Et, secondement, ly dis messires Gilhes soy remariat alle filhe monssaingnor Gerart de Bersés, chevaliers, qui avoit esteit femme à Johan de Liers, escuwiers; doqueile secon mariage sont uns fis et une filhe, assavoir Gerar Surlés, qui est marieis à Berghes sor le Zome, et Johanne, qui fut femme Thomassien de Jehaing, le cangeur, et maintenant elle est remariée à monssainanor Renart de Momale, saingnor d'Ennetines, chevalier.

399. Ly dis messires Gilhes ly jovenes est marieis à une damme de grant nation: de Juley, de Bolan, de Houffalize et de Beafor, qui est filhe Henry de Gayves, lyqueis Henrys fut fis à Everar de Bolan, noble escuwir et de grant sanc; et ly meire de ceste damme fut filhe do saingnor de Gounes, qui issit d'on des freires de Bealfort; mais, ja soice que ly jovenes messires Gilhes et madamme sa femme soient de dit linage de Bealfort, nequident se sont ilh tant enlongiez de proismeteit qu'il soy pooient bin avoir par mariage; mais ilh n'ont nulle hoir, dont c'est damages.

400. Damoyselle Julyane, femme Johan de Biernar, at dois fis, Gilhe et Johan, et out une belle filhe, mariée à monssainanor Thiry, saingnor de Momale, qui morit sains hoir.

401. Ly dis Gilhes n'est point marieis; mais Johan, ses freires, est marieis à damoyselle Aely de Sar, filhe d'on bon homme d'armes et de grant serviche, Johan del Sar en Condros, et en at plusieurs Jovenes enfans, qui puelent venir à gran prosperiteit.

402. Ly filhe saingnor Gilhe le Beal fut mariée à monssaingnor Hombier de Biernamont, doqueile et de ses hoirs mention sierat faite chi après, en la genealogie do viez saingnor d'Awans.

403 Ors est ilh temps de retourner alle sereur monssaingnor Rigaut de This, qui fut mariée à Johan delle Capelle. De ceste sereur et do dit Johan issit messires Godefrois delle Capelle, qui out dois fis et dois filles, assavoir Wynant et monssaingnor Godefroid le giovane.

404. Chis Winans prist à femme une des filles naturées le duk Johan de Braybant, dierain devieit, et morit sains hoir.

405. Et ly dis messires Godefrois fut sires delle Capelle, et fut promirement marieis à damoyselle Katerine, filhe naturée Johan de Braybant, esquevin de Liege, et n'orent nus enfans; et, secondement, ilh reprint à femme la filhe Gerart de Seraing, et puy morit sains hoir.

406. Item, ly une de ses sereurs fut mariée à Johan Floven, de Saint Servais; s'en sont ly hoirs.

407. Et ly atre fut mariée à Andrier de Bawegnéez; sen fut uns fis, que son dit peire murdrit, dont ilh fut publement justicies.

408. Nos avons remostreit cheaz qui sont issus delle promeraine filhe monssaingnor Rigaut de Beariwe, qui fut mariée à monssaingnor Renier de This. Chi après dirons delle seconde.

409. Ly seconde filhe monssaingnor Rigaut de Beariu le viez fut mariée à Lige, à Renier Chovalbay, et n'en ful nulle hoir.

410. Ly tirche filhe monssaingnor Rigaut de Beariwe fut nomée Katerine, et fut mariée à Liege, à saingnor Gerar des Cange; s'en out unk fil et dois filhes. Ly fis fut nomeis sires Johan des Canges; se fut doiiens et canones de Saint Lambier et fut appelleis le doiiens des Canges. Chest damme est ensevelie en l'engliese des Freires Meneures, à Liege, et morit l'an M trois cens et unk.

411. Ly ainsnée filhe saingnor Gerart des Canges fut nommée Katerine et fut mariée à monssaingnor Johan de Langdris, qui out dois fis, assavoir monssaingnor Johan et monssaingnor Libiert, qui fut canones de Saint Lambier. Do dit monssaingnor Johan trovereis tot la generation en capitle de cheaz de Langdris, chi devant, en la genealogie do saingnor de Warfezéez qui out les XX enfans; dont ly une de Warfezéez fut mariée al dit monssaingnor Johan de Langdris. Chest damme est ensevelie deleis sa meire, az Freires Meneures, al devant de crucefy, et morit l'an mil dois cens nonante et owyt.

412. Ly seconde filhe saingnor Gerart des Canges fut mariée à on vailhant escuwier, nommeit Wilhelme de Brus sor Geire; s'en fut uns fis et une filhe, qui fut prieuze de Milen. Ly dis Wilhelme portoit d'argent à trois machez de geules; et, de chis linage, appelleis ly linage des Machenieirs, donl ilh est pou de gens portans wardecorps d'arme, nequident ilh furent des hyerdans de Warous.

413. Do dit Wilhelme fut messires Johan de Brus, qui soy mariat alle filhe monssaingnor Jakeme de Leutes. qui portoit les armes de Tongres, assavoir vairriet d'argent et d'azure à une faxhe d'or; s'en fut une filhe, mariée à monssaingnor Rasse de Bierlouz. avoweit de Sclachins. Messires Rasses et ly damme ont unk fis et une filhe. Ly fis est nomeis Johan de Brus et est marieis a une des filhes monssaingnor Ernus de Corwaremme, jadis saingnor de Momale, et ly filhe est mariée à monssaingnor Johan de Nandren, saingnor de Vellerous. Ors revenrons alle quarte filhe monssaingnor Rigaut de Beariu.

414. Ly quarte filhe monssaingnor Rigaut de Beariwe fut mariée à on ryches borgois de Liege, nomeit saingnor Radout d'Ielhe, fil saingnor Radout alle Oelhe, qui fut fis saingnor Lowy az Roche Chaches; s'en furent dois fis et dois filhes, assavoir Radous et sires Gilhes, qui fut canones de Saint Piere. Do dit Radout, qui soy mariat à Barche, issit messires Radout de Barche, qui morit ultre meire; s'en demorat unk fis, nomeit Henry de Barche, qui fut delle sereur Johan d'Oborne. Et ly une des filhes saingnor Radout fut mariée à saingnor Everar d'Ielhe, esquevin de Liege; s'en furent VI fis et une filhe, assavoir sires Everars, canones reguleirs de Saint Gilhe, sires Reniers, canones de Saint Crois, Radelet, Otelés, Clarembal, Alixandre et damoysselle Ave, qui fut femme à Raddelés de Sclachiens, de tos lesqueis enfans ilh n'est hoir al jour d'uy dont on pouwist getteir nul gran serviche, excepteit Gerar de Seraing tant soilement.

415. Ly seconde filhe saingnor Radout fut mariée à Johan de Huy, escuwier, freire le senissal de Preit, doqueile issirent dois fis et une filhe, assavoir messires Johans de Colonster et messires Radout, et damoysselle Angnès.

416. Messires Johan de Colonster portoit les armes de Preit: lozengiet d'argent et d'azure à on comble de geules, et, en comble, on colon d'or. Chis out dois fis et dois filhes, assavoir: monssaingnor Radout de Colonster, qui, par l'espasse de vient siiez ans, demorat conestables en Lombardie, en grant honeur et en grant estat, puis revint al païs et soy mariat à une des filhes naturée le duk Johan de Braybant, et morit asseis tost après sains hoir.

417. Ly atre fis messire Johan de Colonster fut nomeis messires Lowys; se fut canones de Saint Lambier et sorviskat son freire, sy qu'il out la terre de Colonster.

418. Ly une des filles monssaingnor Johan de Colonster le viez fut mariée à Piron des Balanches, cangeur de Liege; s'en issit une filhe tant soilement, qui est nomée damme Katherine. Cheste filhe fut mariée à monssaingnor Gilhe Gilhar de Joupielhe, dont y sont Englebiers et damme Cycliche, et orent on freire, nomeit Lowy, qui fut canones de Saint Poul et morit jovene.

419. Englebier out à femme une des filhe monssaingnor Johan de Gheylenkerk, et damme Cicilhe, sa sereur, fut tirche femme à jadis monssaingnor Johan et n'en at nulle hoir.

420. Ly tirche filhe monssaingnor Johan de Colonster fut mariée à Johan Stassar de Harsta, qui out dois fis, qui morirent sains hoir, et pluseurs filles, asseis bassement astalée, dont y sont ly hoirs. Ors revenrons à monssaingnor Radout, freire à monssaingnor Johan de Colonster.

421. Messires Radout, freire al dit monssaingnor Johan de Colonster, fut peires de Herbier del Preit, esquevin de Liege, qui morit sains hoir; mais ilh out dois sereurs, dont ly une fut femme Makars de Pouseur, et ly atre fut mariée à Herves; s'en sont ly hoirs.

422. Damoysselle Angnès, sereur à monssainanor Johan et à monssaingnor Radout deseurnomeis, fut mariée à Johan de Vileir deleis Hodires, dont ilh issirent Johan, dis ly ainsneis, et Henrys et pluseurs atres, et orent dois sereurs, dont ly une fut femme de monssaingnor Godefroid delle Capelle, peire de monssaingnor Godefroid le jovene, qui mors est nouvellement; et ly atre fut mariée à Gerar Balar de Jupilhe, deleis Liege, de laqueile issit damme Yde, femme à Johan de Lardier, ly vinier, qui fut peires de Johan de Lardir le Jovene, qui soy mariat à Dynant, et de Gerar de Lardier, canone de Saint Denis, et de Badewien de Lardier, qui out la filhe Douchet, et d'alcunnes filles, dont y sont ly hoirs. Et chy define ly generation monssaingnor Rigalt de Beariu, secon fil de monssaingnor Otton de Lexhy; se dirons do tier fil, nommeit messire Ottes de Novilhe.

423. Messires Ottes de Noevevielhe, tirs fil monssaingnor Otton de Lexhy; out une filhe tant soilement, mariée à monssaingnor Fastreit de Ferme, dont ilh yssit messires Robier de Ferme.

424. Chis messires Robier soy mariat dois fois. Do premier mariage furent messires Fastreit, messires Johan Poulhés et Henrys. Et, secondement, ilh soy remariat alle filhe monssaingnor Phelippe d'Atriwe; s'en out dois fis, Johan et Wilhelmes.

425. Ors parlerons de monssaingnor Godefroid d'Awir, quatreme fil de monssaingnor Otton de Lexhy, qui out trois fis: messire Johan, messire Henry, qui fut canones de Saint Poul, et ly tir fut nomeis Rygaut, se morit sains hoir.

426. Messires Johan d'Awir out trois fis: Rassekin et Helliens, et le tir fut nomeis sires Johan, si fut doiiens et canones de Saint Servais de Treit; desqueis Rassekins et Helliens furent pluseurs enfans, dont ly hoirs sont à present.

427. Ilh vos puet chi devant apparoir que nos avons asseis ordinéement declareit la generation des quatre fis monssaingnor Otton de Lexhy, qui fut ainsneis fis de monssaingnor Houwe de Lexhy; si parlerons chi après des quatre filles do dit monssaingnor Otton et coment elles furent astalée par mariage, et puis retournerons az trois freires do dit monssaingnor Otton, assavoir à monssaingnor Breton le viez de Warous, monssaingnor Henry de Crescengnéez, et monssaingnor Badout de Warous, qui sierat la fien et conlesion de ce traitiet.

428. Ly ainsnée des filhes monssaingnor Otton de Lexhy fut mariée al conte de Hozemont, nomeit monssaingnor Gerart de Rulant, et ce fut ly dierains des saingnors de Hozemont qui fut nommeis conte; car ilh et tos sy predecesseurs avoient esteit nomeit conte de Hozemont, mais ses ainsneis fis et sy successeurs furent nomeis castelains de Hozeronnt, car, par grant multitude d'enfans, furent les terres teilement demembrées et departie que chis qui demorat sires de Hozemont, ne poioit tenir l'estat que d'on simple chevalier tant soilement. Chis messires Gerars, conte de Hozemont, portoit d'or à on satoir de geules et crioit Hozemont. Ilh out, de sa dicte femme, chink fis et dois filhes, assavoir: monssaingnor Wilhelmes, castelains de Hozemont, monssaingnor Wery de Fointaines, monssaingnor Anthone de Fointaines, chevaliers, Lambier, qui morit sains hoir et est ensevelis al Vaz Dieu, en la terre de Dolhehen, sor la sepulteur doqueile Lambier ilh at escript: « Chi gist Lambier, fis le conte Gerars de Hozemont, qui trespasat l'an mil dois cens et trente unk ». Et ly chinquemme fis do dit conte Gerar fut nomeis ly Polens de Hozemont; ilh morit ultre meire et, de ly, ne demorat nus hoir. Et, des dois filhes de dit conte Gerar, fut ly une mariée à monssaingnor Makaire delle Heys de Flemale, et ly atre à saingnor Lowy Surlés, qui fut à son temps ly plus poissans borgois delle citeit de Liege.

429. Item, messires Wilhelmes, ainsneis fis de monssaingnor Gerart de Rulant, conte de Hozemont, out on fil, nomeit monssainanor Wilhelme de Roveroit, qui fut castelains de Hozemont et le vendit à monssaingnor Oston de Fointaines, son cusien. Chis messires Wilhelme de Roveroit out trois filhes, dont les dois furent beghine et ly atre, qui astoit ly ainsnée fut mariée à on riche borgois de Liege, nomeit saingnor Henry le Veilhet, qui portoit d'azure à une faxhe d'ermine, mais je ne say queis armes che sont ne queiles cry elles ont, et ne cognoy homme en ce païs qu'il les porte; mais ly meire do dit saingnor Henry estoit do linage d'Ielhe, portans les jambes de lywon.

430. Item, do dit saingnor Henry le Veilhet et delle filhe monssaingnor Wilhelme de Roveroit, yssit messires Johan le viez de Roveroit, chevaliers, et dois sereurs. Chis messires Johan de Roveroit prist les armes de Hozemont de part sa meire et les brisat d'unne jambes de lywon d'or. Ilh out trois fis chevalier et une filhe, mariée à unk riche et suffisant borgoys de Huy, nomeit Johan le Cloquier, qui fut esquevins et pluseurs fois maistre del bonne vielhe de Huy, et portoit les armes d'Okiers: de geules à trois castelés d'argent.

431. Ly ainsneis fis monssaingnor Johan le viez de Roveroit fut nomeis messires Wilhelmes de Roveroit; ly secons, messires Gilhes de Roveroit, sires d'Engixh, qui morit sains hoir; et le tir fut nomeis messires Johans. Chis out la fortreche de Roveroit et soy mariat alle filhe monssaingnor Badewin de Flemale, chevalier; s'en out trois filhes, donl ly une est mariée à Watier, castelain de Stier, s'en sont ly hoirs; ly seconde, à Renar de Bertinhers, s'en sont assy ly hoirs; et li tirche, à Badry de Boins. Et messires Wilhelmes, ly ainsnés de ces freires, soy mariat al filhe Wilhelmes de Crescengnéez, escuwir; s'en est uns fis, manans à Kemexhe.

432. Item, delle filhe monssaingnor Johans le viez, qui fut mariée à Huy, issirent trois fis et une filhe, assavoir: messires Johans ly Cloquier, chevalier, maintenant vivant, qui est bailhier de Tuwin et esquevins de Liege et de Huy, et Lowys le Cloquier, qui fut canones de Huy, et Henrys ly Veilhés, qui est assy trespasseis; et leur sereur fut mariée à Ernus de Ramelo, avoweit de Huy; s'en est uns fis, nomeis Henrys, qui est avoweis de Huy et marieis al sereur Gerart de Fanchon, de Huy.

433. Ly dis messires Johan le Cloquier soy mariat à damoysele Ysabeal, filhe jadis Wilhelme Prost de Melins, esquevin de Liege, dont mention sierat faite chi après, en capitle parlant do saingnor d'Awans, et assy en est chi devant parleit, en capitle qui traitiet des filhes monssaingnor Ameile de Lexhy. Chis messires Johan at jus mis les armes de son peire asseis nouvellement, et at pris les arme

de Hozemont de part sa meire, assavoir d'or al satoir de geules. Et de Henry le Veilhet, son freire, sont ly. hoirs à present.

434. Nos avons declareit cheaz qui sont issus de monssaingnor Johan le viez de Roveroit; sy parlerons chi après de ses dois sereurs.

435. Ly une de ces dois sereurs fut mariée à Lambuche, dit le Beal Lambuche d'Ielhe, qui estoit do linage d'Ielhe et de Fraipont; doqueile mariage issit Henrys delle Solir et des sereurs, dont ilh n'est nus hoirs.

436. Ly dis Henrys soy mariat à damoysele Aely Quaremme; s'en out trois fis, Johans, Henrys et Lambuches; lyqueis Johan et Lambuche sont mors sens hoir, et ly dis Henry prist à femme damoysele Enghine, filhe jadis do jovene monssaingnor Johan Boyleawe de Mons, chevaliers, mais ilh soy sont petitement gouverneit et n'ont nulle hoir. Et quant le beal Lambuche fut veves, ilh soy remariat à Vynalmont; s'en issit Gerars de Vynalemont, dont y sont ly hoirs.

437. Item, ly atre sereur monssaingnor Johan le viez de Roveroit fut mariée à monssaingnor Watier delle Sase, chevalier, sornomeis des Temples, par tant qu'il demoroit az Temples desoir Viseit. Chis messires Watier portoit les armes de Mortirs: d'azure à une bende ondée d'argent. Ilh out unk fil et une filhe. Ly fis fut nomeis messires Watier le juvenes delle Sasse; se fut marieis à une tres bonne et vailhant damme, qui estoit filhe do bon monssaingnor Renart d'Argenteal qui weriat à cheaz de Liege. Chest bonne damme demorat asseis jovene veve, et onkes ne soy vout remarieir, por ses juvenes enfans qu'elle avoit à gouverneir; s'estoit apellée ly damme des Temples, par tant qu'elle y demorat tot son vivant. Elle out dois filhes, dont ly une fut mariée à monssaingnor Daneal de Palant, et ly atre est mariée à monssaingnor Adam de Kerkehem, chevalier.

438. Quant messires Daneaz fut trespasseis, sa dicte femme soy remariat à monssaingnor Robiert de Rinswalt, saingnor de Grayvenbrouk; s'en at planteit de beaz enfans, dont ly ainsneis est à present chevaliers; et do jadis monssaingnor Daneal, son promerain marit, ly estoit demorée une filhe, qui est mariée à monssaingnor Adam de Berghes, chevalier.

439. Item, de sa sereur et do dit monssaingnor Adam de Kerkehem, est une filhe, mariée à monssaingnor Wilhelme, saingnor de Hamale et de Monfor, chevalier.

440. Item, ly filhe do viez monssaingnor Watier delle Sasse, qui fut sereur al jovene monssaingnor Watier deseurnomeit, fut mariée à Goffien de Froidecour, en Ardenne, qui portoit les armes de Vileir deleis Joupprelle, assavoir d'or à une bende de geules. à un ourle de geules; s'en sont plusieurs enfans, assavoir Watier de Froidecour, Henrys Tailhefier, et une sereur, mariée à Henrys jadis le Soris, esquevien de Huy, clont y sont ly hoirs.

441. Ly dis Watier soy mariat alle filhe monssaingnor Anthone le Blavier, chevalier, engénrée en la sereur monssaingnor Rasson, saingnor de Lamynes, et en at planteit de beaz enfans, desqueis Tailhefier, ly ainsneis, est nouvellement marieis alle filhe d'on chevalier de Braibant, nommeit monssaingnor Johan delle Noeve Ruwe.

442. Puyque nos avons parleit de monssaingnor Wilhelme, ainsneit fil monssaingnor Gerart de Rulant, conte de Hozemont, nos parlerons chi après do secon, nomeit monssaingnor Wery de Fontaines.

443. Messires Werys de Fointaines, secons fis de monssaingnor Gerart de Rulant, conte de Hozemont, out trois fis chevaliers, assavoir le viez monssaingnor Barnage de Fointaines, monssaingnor Oston de Hozemont et le viez voweit de Horrion, qui out on fil qui fist la fortrece do Pas Saint Martien, deleis Hozemont.

444. Item, messires Barnage ly viez out trois fis, assavoir monssaingnor Barnage le jovene, monssaingnor Johan et maistre Godefroid de Fointaines, qui fut canones de Paris et de Saint Lambier à Liege et ly uns des plus grans docteurs en theologie qui fuist en nulle paiis.

445. Do dit monssaingnor Barnage le jovene fut une filhe, mariée à Johan de Chantemierle, escuwier, dont y sont ly hoirs. Et out ly dis messires Barnages on fil, qu'il tenoit az escolles à Paris; se revenoit une fois al paiis, por veior son peire et ses amis; sy le trovat messires Ernus de Hussinbur sor son chemien, en la terre de Warfezééz; se l'ochist, dont sa tour de Hussinbur, qu'on dist à present la Tapenne à Hussinbur, fut abatue, et je croy que ce fuist en temps des werres d'Awans et de Warous. Pluseurs atres enfans out ly dis messires Barnages, mais je n'en ozeroie rins meltre par escripte, par tant que je n'en suy nint bin certefiiez ne informeis; et assy ne suy je des hoirs monssaingnor Johan, qui fut freires do dit monssaingnor Barnage le jovene.

446. Item, messires Ostes, ly secons fis monssaingnor Wery de Fointaines, acquist la terre de Hozemont à monssaingnor Wilhelme de Roveroit son oncle, et out on fil, nommeit monssaingnor Johan le Castelain, dont ilh issirent dois fis, assavoir Johan et Gerars. Ly dis Johan fut sires de Hozemont et de Chokirs, et out dois filhes, dont ly ainsnée fut mariée à monssaingnor Johan Surllet, fil de monssaingnor Johan de Lardier, chevalier, esquevin de Liege, et ly atre à Cens, en Ardenne; doqueile monssaingnor Johan Surllet et de son dit peire vous trovreis tot la generation chi devant, en capitle parlant delle filhe le viez monssaingnor Rasson, sangnor de Warfezééz, qui fut mariée à monssaingnor Gerart, sangnor d Oxhen. Et delle atre filhe Johan, saingnor de Hozemont et de Chokiers, est issus Lambier de Cens, manans à Wallecourt, qui à present est sirres de Granchamp, en Ardenne, que ly jadis messires Johan Surlés soloit tenir.

447. Item, Gerars, freires al jadis Johan, saingnor de Hozemont et de Chokirs, out on fil, nomeit Johan, qui soy mariat alle sereur monssaingnor Badewin de Flemale; s'en furent dois fis, qui morirent jovenes, et une filhe, mariée à Franchois d'Aigremont; se sont petitement porveüs, solonc l'estat de leurs predecesseurs.

448. Item, do viez voweit de Horrion, qui fut ly tirs fis monssaingnor Wery de Fontaines, issit Johan, avoweit de Horrion, qui fist la fortrece do Pas Saint Martien et soy mariat alle filhe do saingnor de Cleiremout, et encors quatre sereur, dont chi après sierat faite mention. Do dit Johan et de sa femme trovreis vos chi après les hoirs, en capitle parlant de saingnor de Geneffe.

449. Item, ly une des sereurs de Johan, avoweit de Horrion, fut mariée à monssaingnor Lambier de Hautepenne, dont ilh issirent messires Watier et messires Ernus, desqueis et de leur, hoirs mention est faite en capitle parlant de chez de Harduemont.

450. Et ly atre sereur fut mariée à saingnor Nogir de Saint Servais, esquevin de Liege; s'en fut une filhe, mariée à monssaingnor Baduwin de Flemalle, chevalier, dont chi après sierat faite mention, en capitle parlant de monssainanor Makaire del Heys de Flemalle.

451. Item, ly tirche sereur Johan, le voweit de Horrion, fut mariée à messire Gilhe de Wyhonge; s'en fut uns fis, nomeis Gilons de Wyhonge, qui soy mariat alle sereur Libier de Quartier, et en sont

quatre fis, assavoir Libiers, Wilhelmes, Johans et Gerars, dont ly alcons ont des hoirs. Et ly quarte sereur Johan le voveit fut mariée à Rogerééz; Sy ne conoy les hoirs.

452. Ors retournerons al tir fil monssaingnor Gerart de Rulant, conte de Hozemont, qui fut nomeis messires Antones. Ilh out on fil, nomeit monssaingnor Johan Machar, qui out VI fis, dont ly chink furent chevaliers, et ly Vies fut cantres et canones de Saint Lambier, et fut nomeis ly Bon Chantres de Hozemont. Ly premiers des dis enfans fut nomeis messires Rogiers de Harsta; ly atre, messires Wilhelme le Royde; ly tirs, messires Johan Haneveaz; ly quars, messires Stassars; et ly chinquemes, messires Fastreis.

453. Do dit monssaingnor Rogier issit messires Henrys, qui est ensevelis en l'enclostre des Freires Escolirs en Liege; s'en trespasat l'an mil dois cens LXVI, et portoit d'or à on satoir de geules, à quatre mierlettes de geules. Chis messires Henrys fut peires de Hombier de Harsta et de Godar, son freire dont Hombers, Godars et sy hoirs, et ly Deavelos de Harsta sont issus, et ay oyut dire que ly Chaweaz de Vivengnis estoient de ceste coysté.

454. Item, do dit monssaingnor Wilhelme le Royde de Fointaines, tant que de son promerain mariage, issirent messires Antones de Fointaines ly juvenes et Wilhelmes, ses freires.

455. Item, soy mariat ly dis messires Wilhelmes, le seconde fois, alle filhe monssaingnor Otton de Novilhe; s'en issit Johan ly Beghes de Biersés, dont y sont ly hoirs. Chis messires Wilhelmes est ensevelis en l'engliede des Freires Meneurs à Liege, al devant delle porte qui tent vers l'enclostre, et trespasat l'an mil dois cens et LX.

456. Item, ly dis messires Antones ly juvenes soy mariat en la chachie del Preit à Liege, alle filhe monssaingnor Wery de Preit, qui fut sereur à Henroie le Cuzien, dont mention sierat faite chi après, en capitle parlant do viez monssaingnor Breton de Warous. De cesty mariage fut une filhe, nomée Angniete, qui fut mariée à on sage borgois, esquevin de Liege, nommeit Johan del Coir, qui estoit do lynage de Saint Martien, en Liege, portoit de geules à on labeal à trois pendans d'argent; mais si enfans, chi après nomeis, misent jus les armes deseurdictees et present les armes de Hozemont, de part leur meire, assavoir d'or al satoir de geules, à quatre mierlettes de geules.

457 Do dit Johan del Coir et de la dicte Angniete issit une belle conpaingnie d'enfans, assavoir Gilhes, Thonars, messires Wilhelme, Jakemars, messires Weris et messires Johans, abbés de Flones, et une sereur, nonain delle Vaz Benoite.

458. Gilhes, ly ainsneis, soy marial à Treit par dois fois. Do premier mariage, issirent Johan et Thonars, qui morit sains hoir; et do secon, assavoir delle filhe saingnor Lambiert de Rulinghe, issirent Gossewins, sires Wilhelmes et Lambekins. Sires Wilhelmes fut moynes de Flones, et Lambekins morit juvenes.

459. Ly dis Johan del Coir, ainsneis fis Gilhon de Coir, soy mariat à damoysselle Johanne, filhe d'on vinier de Liege, nomeit Hankin de Lemborg, qui maisenat une maison sor le marchiet a Liege et le nomal Sanson, sy que ly dis Johan del Coir fut sornomeis de Sanson por cely cas. Ilh out on fil, nommeit Gilhes, qui morit juvenes, four do paiis, sains hoir, et une filhe, nommée damoysselle Johanne, qui est mariée à Ernus de Bonbais, fil jadis Ernut de Bonbays, de Jouppilhe, et en sont dois filles, Johanne et Adilhe. La dicte Johanne est mariée à Robier de Ferme, dont mention est faite en capitle de monssaingnor Otton de Novilhe, fil monssaingnor Otton de Lexhy; et Adilhe est tout nouvellement mariée à Johan, fil jadis Henry Zutemine, assavoir l'an mil trois cens et nonante noef.

460. Ly dis Gossuwians, fil Gilhes de Coir de secon mariage, at à femme damoyselle Katerine, qui fut filhe Wilhelme de Mission, vinier de Liege, et qui devaintrainement avoit esteit femme à maistre Watier de Harsta, l'oirfevre; doquelle maistre Waltier elle avoit on fil nomeit Watier, canonne de Saint Pire en Liege et vestit d'Ophers, et une filhe, nomée Angnès, qui est femme à Warnier Joilliet de Biersés, le cangeur, qui at esteit maistre de Liege.

461. Do dit Gossewin et de la dicte damoyselle Katerine sont dois fis et une filhe, assavoir: Gilhe, canonne et chante de Saint Crois et de Nyvelle, Gossuwins, qui est mors sains hoir, et Katherine; laqueile Katerine est nouvellement mariée à Johan del Champ de Fexhe, le voweit, dont messires Johan de Champ de Wellerous, jadis chevalier, fut gransires.

462. Thonars del Coir, dis de Fointaines, secons fis de Johan del Coir le viez, out dois fis, assavoir saingnor Johan, qui est moynes de Fones et vestis d'Antey; et ly atre, qui fut gratieuz et bin servans ses amis, fut nomeis Thonars, et estoit siene le tour de Fontaines.

463. Chis Thonars ly juvenes prist à femme la filhe Lowy de Fanchon. manant à Engyhoule, dont y sont trois filhe;. Ly ainsnée soy mariat, malgreit ses amis, al fil d'on prestre nomeit saingnor Johan Beghien. Ly seconde est mariée, par le greit de ses amis, à on giovane homme delle terre de Mohaut; et ly tirce est nonne al Vaz Nostre Damme.

464. Messires Wilhelmes del Coir, chevaliers, tirs fis de Johan delle Coir le viez, soy mariat à damme Ysabeal, filhe monssaingnor Gilhe Maton, chevalier, esquevin de Liege. Ilh fut beaz et gratieux chevaliers et bien eloquens. et out trois fis et trois filhes, assavoir: Johan, qui fut ainsneis, Wilhelmes, qui morit juvenes, Gilet, damme Angniete, damoyselle Katerine et damme Yde, nonain de Robermont.

465. Ly dis Johan prist à femme damoyselle Marie, filhe Johan de Meirs del filhe monssaingnor Johan d'Oreilhe, jadis saingnor de Vellerous, chevalier; s'en out trois fis, assavoir Wilhelmes, Johan et Gilhes. Secondement, soy mariat ly dis Johan de Coir à damoyselle Marie, filhe monssaingnor Johan Buchar delle Boverie, chevalier, dont ilh sont dois juvenes enfans, Johan et Marie.

466. Item, des trois fis do promerain mariage le dit Johan delle Coir. est ly uns mors à Romme, qui estoit nomeis Johan; et ly dis Giles est marieis alle filhe Jakeme de Parfonriu; et Wilhelmes, ly ainsneis, n'est point astaleis.

467. Item, ly dis Gilhes, fis de monssaingnor Wilhelme del Coir, out à femme damoyselle Margritte, fiilhe do dit Johan de Meirs et sereur germaine delle promeraine femme de son dit freire; dont ilh est une giovane filhette, nomée Margritte, qui est mariée al giovane Favereal de Rychelles.

468. Ly ainsnée filhe monssaingnor Wilhelme de Coir, nomée damme Angniete, fut promirement mariée à Lowy, fil monssaingnor Fastreit de Kemexhe, qui morit sains hoir; et, secondement, elle soy remariat à monssaingnor Watier de Malpont, en Braibant, et morit sains hoir.

469. Ly atre filhe, nomée damoyselle Katerine, fut mariée à Gilet, fil monssaingnor Aoust de Charneur, et morit semblament sains hoir.

470. Item, Jakemars, fis Johan de Coir le viez, morit sains hoir. Et messires Werys del Coir, chevatiens, ses freires, qui fut sires de Ramelhouz, prist à femme la filhe monssaingnor Colart de Cressant, chevalier, dont Corbeaz d'Awans, fis do saingnor de Cleremont, out la pareilhe sereur; et en

sont on fis et dois filhes, assavoir Johan del Coir, sires de Ramelhouz et d'Ermevilhe, damoyselle Angniete et damoyselle Marie.

471. Johans de Coir, sires de Ramelhouz, prist à femme damoyselle Maroie, filhe Ystasse de Preit, dit de Rahirs, de laqueile ilh est on fis, nomeit Johans; et de cely damoyselle est plainne mention faite en capitle des filhes do promerain mariage do saingnor de Warfezéez qui out les XX enfans. Et quant la dicte damoyselle Maroie fut trespassee, ly dis Johan soy remariat à damoyselle Maroie, sereur à Johan d'Orgo, borgoys de Dynant, qui est nouvellement mort sains hoir.

472. La dicte damoyselle Angniete, filhe monssaingnor Wery de Coir, fut promierement mariée à Johan de Lavoir, fil jadis Warnier de Lavoir lyqueis Warniers portoit les armes de Barxhon: de synoble à une aygle d'argent; s'en out on fil, nomeit Warnier, qui est mors sains hoir, et une filhe, qui fut mult belle et gratieuz, nommée Angnès. Quanl ly dis Johan de Lavoir fut trespassee, je, Jaques de Hemericourt, ordinaire de ces Coronikes, qui estoie veves, repris à femme la dicte Angniete de Coir; et Gilhes, mes fis, qui assy veves estoit, reprist à femme la dicte Angnès, sa filhe, de laqueile y sont dois enfans, Johans et Franchoize, laqueile Franchoize est tout nouvellement mariée à Johan de Blehen, saingnor d'Abééz, escuwir. Et quant ly dis Gilhes fut veves secondement de la dicte Angnès, ilh soy remariat à Marie de Blehen, sereur do dit Johan, saingnor d'Abééz; s'en sont demoréez dois filhettes deseagez: ly une est nomée Ydelette, et ly atre Marie.

473. Item, damoyselle Marie, sereur de la dicte damoyselle Angniete de Coir, fut mariée à Johan, fil Johans Peveréal, le cangeur; Sy morit ly lis Johan sains hoir. Et nouvellement elle est remariée à Lowy, fil monssaingnor Johan de Saint Martien, chevalier, et n'en at nul hoir.

474. Nos avons recordeit les hoirs monssaingnor Anthone de Fontaines, ainsneit fil monssaingnor Wilhelme le Royde; sy ne ferons nulle mention de Wilhelme, freire do dit monssaingnor Anthone, car nous n'en sommes nint informés; anchois retournerons az trois atres fis monssaingnor Johan Machar, assavoir monssaingnor Johan Haneveal, monssaingnor Stassar et monssaingnor Fastreit, chevaliers. Chis messires Stassars morit sains hoir. Et do dit messire Johan Haneveal sont estrais chilh de Rolouz, qui portent le sornon d'Otrepe, et leurs hoirs, dont ilh en y at encors plusieurs.

475. Item, de monssainnor Fastreit issirent messires Rigauz de Loukes, de Tongres, et sa sereur, et chilhe de Rixhenges, et Stasses et Ernus de Crescengnéz, esquevins de Tongres. Et deveis savoir que ly dis messires Johan Machars at une filhe, mariée à Freires, deleis Tongres, dont, en deskendant, sont estrais cilhe delle Soxhe, deleis Seliens, et Lambier de Freires, ly scohirs, qui out la filhe monssaingnor Johan Boyleawe, et maistres Johan de Freires, qui aprenoit les champions, et pluseurs atres. Vos deveis assy savoir que tuit chille qui sont de la dicte coistie de Hozemont, portent, et ont porteit leurs predecesseurs, d'oïr al satoir de geules. Ors retournerons az dois filhes monssaingnor Gerart, conte de Hozemont.

476. Hozemont, delle coystie de Flemale, qui portent d'argent al satoir de geules. — Ly ainsnée des filhes monssaingnor Gerart fut mariée à on vailhant chevalier parsiwant les armes et les passages d'outre meire, nomeit monssaingnor Makaïre delle Heys de Flemalle, qui estoit chief des armes de Souwengnéz, delle coystie d'Asteneur, car ilh portoit de sable à trois rutures d'or. Chis chevaliers, par sa proece, fut retenus compas al conle de Louz adont vivant et alont ensemble ultre meire. Ilh servit si bien al conte que, pour ly honorer, ly contes ly donnat ses armes et ly fist partir encontre son blazon, sy que, de dont en avant, ilh portat on escut partit, dont ly une des parchons estoit de diiez pieces d'or et de geules, et ly atre estoit de sable à trois rutures d'or. Il out on fil et trois filhes.

477. Ly fis fut nomeis messires Wilhelmes de Flemale, qui enkargat promirement à porteur d'argent à on satoir de geules, sains differenche nulle, à caze de sa dicte meire; et tos ly atres estrais de Hozemont por toient d'or al satoir de geules, sy que ceste branches de Hozemont tant soilement, nomée le coystie de Flemale, et nul atre, port l'escut d'argent. Ors soy poroil on fort mervehier, à bonne caze, pourquoy messires Wilhelmes laissat le blazon d'on sy noble et sy vailhant homme que ses peires estoit, ly bons messires Makairs, et prist les armes de part sa meire; mais, selont l'information de mes devaintrains, je en feray solution, car je avoie une grandamme dont ly dis messires Makairs estoit gransires, sy qu'il apparat chi après, qui avoit cent et VI ans d'eage quant elle trespasat, qui m'en distalconne choze, adont que ly debas estoit delle terre de Flemale entre monssaingnor Wilhelme de Flemale, maintenant vivant, et monssaingnor Bureal de Boneiffe, qui encor vit.

478. Je entendis adont qu'il fut on temps que ly jadis monssaingnor Makairs, qui estoit sires delle Heys en Condros, et de ce portoit ilh le sornon, avoit des freires demorans à Vileir az Tours, deleis Hodirs, et à Assenoir, dont chilh d'Asteneur et de Vileir sont estrais. En mains desqueis ilh lassat ses enfans et ses bins, une fois qu'il alat avoek les saingnors à on general passage ultre meire. Et, por avoir argent, ilh enwagat sa terre delle Heys el cargat à ses freires de le rachateir do remanant qu'il feroiiont de ses biens ultre la nourechons de ses enfans. Après ce, ilh revint et trowat sa terre forwagie, par le negligence de ses freires, en queis ilh s'en estoit fyeis: dont, après ce, debas enmovyt entre ly et ses freires, teilement que ly dis messires Makaires, par caze de son sornon, fist faire à Flemale, sor la werizon qu'il avoit prise avoekes sa femme, on bellefroite environoit de fosseis et le nomat le Heys et encors y est ilh à present jour d'uy. Et, quant messires Makaires fut trespasseis, messires Wilhelmes, ses fis, à caze de cely debat et en despit de ses oncles, mist jus les armes de son peire et encargat toutes entiers les armes de Hozemont, alle champangne d'argent.

479. Messires Wilhelmes deseurnomeis, fis monssaingnor Makaire delle Heys, out chink fis et plusseurs filhes; assavoir, sont ly fis: messires Colars, messires Wilhelmes ly Hyer, messires Johan de Ramey, chevaliers, dans Lowis, qui fut abbeis de Florines, et Henry, dameheaz.

480. Messires Colars delle Heys, ainsneis fis monssaingnor Wilhelmes, fil monssaingnor Makaire delle Heys fut marissaz delle evesqueit de Liege et l'estoit al jour que chil de Liege wangnont malitieuzelement le casleal de Saint Walbeur. Ilh out on fil, nommeit Wilhelmes ly Champions, et out des filhes, que je ne saroy nommeir. Chis Wilhelmes soy mariat alle sereur Henrar d'Aleure, dont Henrys delle Heys et sa sereur issirent; doqueil Henry ilh n'est rins demoreit qui soit à metre en compte. Et, quant Wilhelmes fut veves, ilh soy rendit al Hospital à Flemale et prist le manteal delle ordenne Saint Johan. par tant qu'il ne s'estoit nint bin governeis.

481. Ly filhe Wilhelme ly Campion fut mariée à Wilhelme, dammeheal de Vellerous, dont ilh issirent pluseurs enfans, assavoir dammeheaz de Tilves, Wilhelmes, dameheaz de Lexhy, Lowys de Vellerous, et on atre qui morit juvenes; et y fut une sereur, nomée damoyse Oede, et croy qu'il awist des atres.

482. Dameheaz de Tilves soy mariat alle filhe Wilhelme de Pillechoules, qui estoit do linage d'Awans, de Joupilhe et de Chaynéez; et en sont dois fis, Lowys et Wilhelmes, lyqueis sont asseis nouvellement marieis, assavoir: ly dis Lowys, à damoyse Magriette, filhe Cloze delle Chivre, manant en Feronstréez à Liege; et Wilhelmes, alle sereur monssaingnor l'abeit de Saint Gilhe, filhe Warnier de Wartaing.

483. Wilhelmes, damheaz de Lexhy, fis Wilhelme, dammeheal de Vellerous, at on fil, nommeit. Wilhelme.

484. Lowy soy mariat alle filhe maistre Johan de Lamines, dont ilh est une filhe tant soilement, mariée à Joysse, fil jadis Herman de Herdin, esquevins de Tongres.

485. Et leur sereur, damoyselle Oude, fut mariée à Robiert Olivier de Rolous, le cangeur, et morit sains hoir.

486. Messires Wilhelmes le Hier, secon fis monssaingnor Wilhelme de Flemale, out une filhe tant soilement, qui fut nomée damoyselle Wilhmette et fut mariée à monssaingnor Coune de Lonchins, chevalier, esquevin de Liege; sy morit sains hoir, et messires Coune soy remariat al sereur monssaingnor Pinkar de Frehin, saingnor de Tongrenals; et puis morit monssaingnor Coune, et ceste seconde damme soy remariat à monssaingnor Bureal de Boneiffe, et morit assy sains hoir. Et, par tant, vout ly dis messires Bureal avoir la terre de Flemalle herylablement de sa succession; mais messires Wilhelmes de Flemale, chevalier, maintenant vivant, fis jadis monssaingnor Badewien de Flemale, chevalier, appellat en champ de batailhe, en la Pais de Liege, le dit monssaingnor Bureal, dont ly commons amys traitiiont une bonne pais entre eaz dois, par laqueile ly fortreche de Flemalle et ly plus gran partie des biens à ce appendans parvinrent à monssaingnor Wilhelme ly jovene, et ly sorplus demorat al dit monssaingnor Bureal.

487. Messires Johan de Ramey, tir fis monssaingnor Wilhelme de Flemale, qui fut fis monssaingnor Makaire delle Heys, chis out plusieurs enfans. Ilh fist fair le casteal de Ramey, et de sa droite lingnie, en deskendant, issirent Johan de Ramey, Thonar del Chandebur, Piron, et leurs atres freires et sereurs, desqueis ly dis chevaliers fut taiions.

488. Johans de Ramey soy mariat alle filhe Johan de Lonchins, qui avoit à femme la sereur Warnier de Lavoir, citain de Liege; dont ilh est une filhe tant soilement, qui est mariée à Wilhelme, fis jadis Wilhelme de Warous, fil do secon mariage do saingnor de Warfezeez qui out les XX enfans. Et quant ly dis Johan de Ramey fut trespasseis, sa dicte femme soy remariat à Wery Macoir, de Rocourt, dont y sont plusieurs enfans., assavoir Robiert, Johan et Baudet, et y at une filhe, qui est mariée à Jakemin de Liers, fil jadis Johan de Liers, escuwir; et tos chis enfans sont à present en bonne jovente pour servir leur amis et le font volentier.

489. Thonars delle Chandebur morit sains hoir, et Piron soy mariat à damoyselle Beatris de Villeir deleis Hanut, en Braibant, et en sont dois fis, Thiris et Johans. Chis Thirys at à femme damoyselle Maroie, filhe jadis maistre Wilhelme de Sains Jakeme, advocat en la court de Liege; mais ilh n'ont nulle enfans. Et Johan, ses freires, est marieis alle filhe Watier de Flemale, engenrée en la filhe Wilhelme de Warous, dont mention est faite en la genealogie do saingnor de Warfezeez qui out les XX enfans; et croy qu'il aiient hoirs. Et orent chis enfans de Ramey une sereur mariée à Lonchins, qui est meire de Pirotte Thoreal de Lonchins.

490. Item, est assavoir que, des dois filhes le dit monssaingnor Johan de Ramey, ly une fut mariée en Condros à monssaingnor Johan de Parfonriwe, chevalier; s'en furent dois fis et trois filhes, assavoir: Jakemin, qui morit sains hoirs, et Ameyle, qui soy mariat à damoyselle Desirée, filh monssaingnor Ameile de Warnant, chevalier. Ly deseurnomeis messires Johan de Parfonriwe portoit les armes de Comblen: faixhiet de siiiez piechez d'or et de sable. Et ly dis Ameile, ses fis, out de sa dicte femme quatre fis et quatre filhe, assavoir: Johan de Parfonriwe, Jakemar, qui demorat à Sains Sevrin, en Condros, Houwe, Ameyle, Ysabeal, Aely, Johanne et Juliane. Ly deseurnomeis Johan et Ameile morirent sains hoir.

491. Jakemars, leurs freires, soy mariat à Nandren et out VI fis et une filhe, assavoir: freire Ameile et freire Johan, qui sont freires chevaliers delle orde Saint Johan de Jherusalem, et est ly dis freire Ameile à present maistre de Chantraines, assavoir bailhiers d'Avalteres de la dicte religion. Ly tirs fis do jadis Jakemars de Parfonriwe est nomeis Watier; ly quars, Jakemin; ly Vé. Thirys; et ly VIe, Abiers; et leurs sereurs est mariée à Gilchon de Grimomont.

492. Item, Watier, fis do jadis Jakemars, at trois fis et quatre filhe, assavoir freire Ameyle, qui est chevalier de la dicte religion Saint Johan, freire Johan, qui est freires prestre de ceste meïsmes religion et vestit de Flemale, Angnés, Maroie, Deniset et Ydelette.

493. La dicte Angnés est mariée à Raskin de Sorines, doqueile Rassekin Watir de Moge, fis do jadis saingnor de Warfezéez az XX enfans, estoit gransirs; s'en sont trois juvenes enfans, Pirlouz, Waltelet et Johan. Et ly atre enfans seculiers do dit Watier de Parfonriwe ne sont encors marieis.

494. Item Jakemin, fis do jadis Jakemars de Parfourriwe, soy mariat à damoyselle Katerine, filhe jadis Libier de Fletengne, le halier; s'en at on fil, nommeit Jakemin, et une filhe, mariée à Gilhe de Coir, fil jadis Johan de Coir, escuwier.

495. Thiris, fis do jadis Jakemars, at chink juvenes enfans, assavoir Jakemin, Ysabeal, Johanne, Angnés et Clemenche. Et Abier, ses freires, en at quatre, assavoir Jakemin, Angnés, Ysabeal et Nycol, qui tos sont Jovenes.

496. Item, Houwes, freire al jadis Jakemars et fis al viez Ameile de Parforiu, out dois fis, Hanekin de Chamont et Houwet; lyqueis Hanekin morit sains hoir. Mais do dit Houwet est une filhe, nomée Angnés, qui at dois juvenes fis.

497 Item, damoyselle Ysabeal, promerain filhe al viez Houwet et sereur à Jakemars et à Houwet devant nomeis, fut mariée à Gerar d'Antines; s'en sont yssus Johan d'Antynes, manant à Chamont sor Mouze, Bertran d'Antynes, manant à Antynes, et Ameilot, et assy dois sereurs. Et ly dis Johan d'Antynes at trois fis, Johan, Ameilot et Gerar, et assy pluseurs filhes.

498. Item, Bertran, ses freires, at quatre fis, assavoir Biertolet, Johan, Gerart et ..., et assy dois filhes. Et semblament at Ameylot, ly tirs freires, pluseurs enfans, fis et filhes.

499. Item, damoyselle Aely, seconde filhe do viez Ameile de Parfonriu, fut mariée à Badewin d'Achou, citain de Liege; s'en issit Johan de Parfonriu, qui fut secretairs delle citeit de Liege et des XII appasenteur des lynages delle evesqueit de Liege tout ensemble par l'espouse de XL ans continueis, et morit sains hoir. Chis Johan out dois freires germains et une sereur, assavoir Ameile de Parfonriu, Badewins, le cangeur, qui morit sains hoir, et damoyselle Maroie.

500. Ly dis Ameyles soy mariat alle filhe Johan de Casteal, fil monssaingnor Anthone de Gemeppe, chevalier; s'en est uns fis, nomeit Johan Ameile de Parfonriu, et une filhe, mariée à Renechon le Foymen, de Montegnéez. Ly dis Johan Ameyle est nouvellement marieis à damoyselle Magriette, filhe jadis Gilhe Polarde, escuwier. Et ly dis Renechons ly Foymens at des hoirs.

501. Item, damoyselle Maroie, sereur à Johan Ameile et Badewien deseurnomeis, fut mariée à Wilhelme d'Abéez, manant à Vileir des Temps, en Condros; s'en issit Wilhelmes ly juvenes, maintenant vivant, et damoyselle Aely, qui fut mariée à Lowy des Sefawes, qui fut fis Libier de Moges, fil do saingnor de Warfezéez, lyqueis Lowy en at trois juvenes enfans.

502 Item, damoysele Johanne, tirche filhe do viez Ameiles de Parfonriu, fut mariée à Warnechon de Mohale; s'en at quatre enfans, assavoir Amelot, Badewien, Freris et Juliane, qui ont pluseurs enfans.

503. Item, damoysele Juliane, quarte et dieraine filhe do viez Ameile de Parfonriu, fut mariée à Rigault del Vaz, de Nandren; s'en furent dois sereurs, assavoir Sapoule et Johanne; laqueile Sapoule n'at nulle hoir, mais la dicte Johanne at dois fis, dont ly uns est nomeis Alar de Tilhece, et ly atre Johan.

504. Ilh vous at esteit chi devant declareit asseis ordinéement le genealogie Ameile, fis monssaingnor Johan de Parfonriu, engereit en la filhe monssaingnor Johan de Ramey; se dirons chi après de ses trois sereurs.

505. Ly ainsnée filhe do dit monssaingnor Johan de Parfonriu fut mariée al castelain de Mohaut adont vivant; s'en issirent ly castetain et Thirys de Mohaut, canonne de Huy, qui fut ly plus beaz canones et ly miez tailhiet et formeis de tos membres qui fust en la dyoceis de Liege; et orent chis dois freires dois sereurs, grandes et pussante de coir.

506. Chis secon castelain fut, à son temps, compteis por l'unk des plus apparies, hardis et entreprendans escuwier qui fuist en ce païs. Ilh out dois fis, assavoir ly castelain maintenant vivant, nomeit Adulphe, et ly atre est nommeis ly Ardenois, et y at pluseurs filhes dont lesalconnes sont petitement gouvernéz. Ly juvenes castelain deseurdit n'at nulle hoir legitime. Et do dit Ardenois sont demorée dois filhes, dont ly une fut mariée à Johan Colay, d'Amaing, et secondement est elle remariée à une homme de Latines; et ly atre filhe est mariée à jovene Wilhelme delle Crois, de Lexhy, et secondement à Wilhelme, fil jadis Johan del Coir, escuwier.

507. Item, ly une des sereurs des deseurnomeis castelain et Thiry de Mouhaut fut mariée à Famelet; s'en sont yssus planteit d'enfans, qui ne sont nint bin de ma cognissanche. Et, delle seconde sereurs, sont issus ly Vyrons de Huy.

508. Et ly tirche sereur fut mariée à monssaingnor Johan de Denvilhe, chevalier, manant à Havelange; s'en issirent Johans, Gerar, Thirys, Anseal, Houwes, Wilhelmes, Everart, et trois sereurs, dont ly une, nomée damoysele Oude, fut mariée à Chierbon d'Oing et morit sains hoir, et les atres dois sont nonains alle Vaz Nostre Damme.

509. Ly deseurnomeis Johans, ainsneis fis do dit monssaingnor Johans de Denvilhe, fut promirement marieis alle damoysele de Vivang, qui morit sains hoir, et secondement alle filhe monssaingnor Fastreit de Kemexhe, chevalier; s'en est uns fis, nomeis Johan, et une filhe. Ly dis Johan ly jovene est marieis alle filhe Badewin de Hermalle; et sa sereur, à Gilhe, saingnor de Netines, qui at pluseurs enfans; s'en est une des filhe mariée nouvellement al fil monssaingnor Daneal de Selhe, chevalier.

510. Item, Gerar, fis monssaingnor Johan de Denvilhe, soy mariat à Estable, en la conteit de Chigny; dont y sont pluseurs enfans, assavoir Johan, Thirys, Gerardin, et une filhe, mariée à Gerart de Chypey, manant à Seronchamp; s'en at des hoirs. Ly dis Johans est marieis alle filhe Ywotte d'Okyr; et ly dis Gerardins, à Huy; s'en sont ly hoirs. Et ly dis Thiris est moyne de Sains Hubier et prieuz de Boilhon, et ayme et honore grandement ses amis.

511. Item, Thiris, troizeme fis monssaingnor Johan de Denvilhe, est sornomeis Drumars de Denvilhe. Ilh prist à femme une des filhes Pirar Pilho, de Huy; s'en est uns fis tant soilement, nomeis Johan Drumars, qui est marieis alle filhe Johan de Leuz, le parmetir, et n'ont nus hoirs.

512. Item, Ansez, Houwars et Everart, enfans monssaingnor Johan de Denvilhe, morirent sains hoir. Et Wilhelmes soy mariat alle filhe de damoysselle de Roy sur l'Eawailhe; s'en out on fil et une filhe. Chis fis; morit jovene de XVI ans ou environ, et ly filhe est mariée à Franchois des Changes, de Dynant, qui à present demeure à Havelange.

513. Item, ly seconde filhe monssaingnor Johan de Parfonriu fut mariée à Joupilhe, en Ardenne; s'en sont pluseurs enfans, desqueis je n'ay nulle connissanche. Et ly lirce fut mariée à Helyen de Bois; s'en issirent Hapar de Bois, qui morit sains hoir, Johan de Bois, Jakemar, Clamence et Yde.

514. Do dit Johans de Bois, fil Helien de Bois, issirent Happelos de Bois, Aely et Ydoul. Ly dis Happelos at on fis nommeit Albiert et une filhe nomée ... Aely, sereur de dit Happelo, at on fil, nommeis Andrier de Taviere, qui at pluseurs enfans. Et Ydoul, sereur à Ely et à Happelos deseurnomeis, at sept enfans, assavoir trois filhes et qualre fis, nommeis Gerars, Kinet, Servot et Lowet, qui ont gran nombre d'enfans.

515. Item, Jakemars de Bois, freires al dit Johans de Bois, at on fil, nommeit Helien, qui at sept enfans. Et Clamence, sa sereur, at trois fis, nomeis Jakemars, Hellot et Badewien, qui ont des hoirs. Et ly atre sereur, nomée damoysselle Yde, at VI enfans.

516. Ors vos at esteit remonstreit tot la gieste et generation delle premiere filhe monssaingnor Johan de Ramey, mariée à monssaingnor Johan de Parfonriu; se retournerons à sa seconde filhe, qui fut mariée à Lowy del Sefawe.

517. De cesty Lowy issirent Lowys et Johans del Sefawe, canonne de Saint Poul. Ly dis Lowys soy mariat alle filhe de saingnor de Cleremont, qui avoit en devant esteit femme à viez voweit de Horron, et en out dois filhes, dont ly une, nommée damoysselle Aely, fut beghine à Sains Cristofore, et ly atre fut mariée à Renart Malquerant d'Abéez; s'en sont ly hoirs. Chis dois freires issirent, de part leur peire, del saingnor de Hermalles, delle coistie delle Noevevilhe; se portoient d'azure à flours de lys d'or et crioient Domartien. Ilh orent une sereur mariée al dameheaz de Davyster, dont i furent pluseurs fis mal governeis, qui orent une sereur mariée à Colar Grawele, le boskelhon d'Ougrée, dont y sont ly hoirs.

518. Par tant que, des enfans monssaingnor Wilhelmes de Flemale, fil monssaingnor Makairs delle Heys, nos n'avons encors traitiet que des trois tant soilement, assavoir de monssaingnor Colar le Marixhaz, monssaingnor Wilhelme le Hyer, et de monssaingnor Johan de Ramey, chevaliers, et de leurs hoirs, nos retournerons alle quarte fil, qui fut nomeis Henrys ly Dameheaz de Flemale.

519. Chis Henrys ly Dameheaz de Flemale soy mariat en linage de Preit, à Liege, et out des tres beaz enfans, assavoir quatre fis et trois filhes. Ly ainsneis de cest quatre fis fut nomeis Wilhelmes de Flemalle, esquevin de Liege; se morit sains hoirs al batailhe à Nyerbonne, deleis Huy. Et Johan, ses freires, morit assy alle dit batailhe de Nyerbonne, et fut esquevin de Liege; se soy mariat à damoysselle Angnès, filhe saingnor Goseal Paien de Warséez, esquevin de Liege, qui ly tionnat son eskevinage; et orent dois fis, Henry Dameheaz et Gossewien.

520. Chis secon Henry ly Dameheaz prist à femme damoysselle Ysabeal, filhe Warnier de Lavoit, qui fut mult belle et gratieuse. Ilh orent trois enfans, assavoir Henry li Dameheaz, Johans et Johanne. Chis jovene Henrys est marieis nouvellement alle filhe naturéez monssaingnor Henry d'Ourte, chevalier. Et Johans, ses freires, soy mariat alle filhe Colar de Grasce, ly cangeur, s'en est une filhe. Et Johanne, leur sereur, soy mariat à Gerart, fil Badewien Douchet, dit de Lardier; s'en est uns fis,

nommeis Badewien. Et par tant que nus hoirs marles n'est demoreis des atres enfans le jadis monssaingnor Wilhelme de Flemale le viez, at Henry Damheaz ly jovene, dierrains nommeis, encargiit de noveaz les armes entirs de cest coistie, assavoir d'argent al satoir de geules, qui crient Hozemont.

521. Item, ly dis Gossewien, fis Johan de Flemale, esquevins de Liege, soy mariat à damoyse Katerine, filhe monssaingnor Houwe de Hacourt, chevalier; s'en at dois fis, assavoir Johan, qui est canonne de Saint Lambiert, et messire Houwe, qui nouvellement at pris l'ordene de chevalerie.

522. Item, ly tirs fis do viez Dameheaz de Flemale fut nomeis Henris; se morit sains hoirs. Et ly quars fut nomeis messires Badewien de Flemale, chevalier, qui soy mariat alle filhe saingnor Nogir de Saint Servais, qui avoit à femme la sereur do viez voweit de Horrion. Chis messires Badewien out de la dicte damme trois fis et trois filhes, assavoir Henrys et Olivier, qui morirent sains hoirs, et ly atre fut nomeis messires Wilhelmes de Flemale, chevalier, qui semblament est trespasseis nouvellement sains hoirs.

523. Item, ly ainsnée filhe do dit monssaingnor Badewien de Flemale, fut mariée à Jakemin delle Roche, escuier, fil monssaingnor Franke delle Roche, avoweit de Fleron, chevalier; s'en est x enfans ou plus, vivant à present, assavoir: Franke, qui n'est point marieis, Badewien, qui at esteit maistre de Liege, Jakemin, Johan et Henrys, damoyse Lucie, femme Johan de Biertinhers, une qui est nonnes alle Vaz Benoit, une atre qui est nonne à Robiermon, et plusieurs atres dont je n'ay nint bin le conissance.

524. Ly dis Badewins delle Roche est marieis alle filhe Gerar Paster de Tongres, engénrée en damoyse Beatri, filhe do viez Radout Surlés de Tongres; s'en at dois fis, Johan et Wilhelles. Ly dis Johan n'est point marieis, et Wilhelmes est tot nouvellement canonne de Saint Lambiert, assavoir en mois de septembre, l'an mil trois cens quatreXX et XIX. Et tant que des atres freires et sereurs de dit Badewien, je nen say lyqueis sont astaleis ne lyqueys non.

625. Delle seconde filhe monssaingnor Badewien de Flemale, qui fut mariée à monssaingnor Johan, saingnor de Roveroit, le jovene, jadis chevalier, est faite plaine mention en la genealogie do castelain de Hozemont; et semblament est faite mention de monssaingnor Johan de Kemexhe, qui out l'atre sereur, en la genealogie monssaingnor Rigaut de Beariu; sy nos en tayrons, par caze de brieteit.

526. Et assy, par tant que Henrys, freires al dit monssaingnor Badewien de Flemale, morit sains hoirs, n'en sierat chi plus avant parleit.

627. Vos aveis entendut la genealogie des hoirs marles Henry Dammeheal de Flemale, ly viez, qui fut ly chinqueme fis monssainanor Wilhelme, fil monssaingnor Makaire delle Heys; sy dirons des trois filhes le dit Henry ly Dammeheal 20

528. Ly promeraine fut nomée damoyse Alixandre et fut mariée à Hombretoiiie del Pas de Wonke, freire le Bechut de Wonke, qui fut uns bons escuiers. Do dit Hombretoiiie et de damoyse Alixandre issit Johan Hombretoie, qui morit sains hoirs; et en sont dois filhes, damoyse Katerine et damoyse Wilhemette. La dicte damoyse Katerine fut mariée à Wilhelme de Mommesteghen, de Meliens, et en sont quatre fis et une filhe, qui est canonesse de Blize; Iyqueis fis sont nomeis Wilhelmes, Hombiers, Alixandre et Johans. Ly dis Wilhelmes est canonnes de Saint Servais de Treit. Ly dis Alixandres est canonnes de Fosses, et ly dis Johans canonnes de Nassonge. Et ly dis Hombiers est secretares des XII appaisenteurs des lynages delle evesqueit de Liege, et est marieis à damoyse Pentecoste de Fletenges, dont ilhe est une filhe tant soilement, nomée Katerine, qui est

mariée alle voweit de Crescengnéz, fil jadis Johan de Crescengnéz, escuwier. Item ly dis Hombiers, qui at esteit asseis nouvelleinent veves, est remariéis à damoyselle Maroie, filhe jadis Gerart de Houten.

529. Et ly atre filhe damoyselle Alixandre, qui fut nomée damoyselle Wilhemette, fut mariée à Payves, en Hesbaing, al fil Henry de Payves, et en sont pluseurs enfans.

530. Ly seconde filhe Henry Dammeheal de Flemale fut mariee à Johan, fil Gerart de Hozemont, dont cleir mention est faite chi devant, en capitle do castelain de Hozemont.

531. Item, ly atre filhe Henry le Dammeheal, nomée damoyselle Maron, fut mariée à Henry de Lavoir, freire à Warnier de Lavoir; sy orent on fil, nommeit Johan de Lavoir, de Sovereine Averoit, et assy dois filhes, dont ly une, nommée Maroie, fut mariée à monssaingnor Adulph de Carneur, chevalier, esquevin de Liege, et ly atre à Johan Cornet de Fleron. Ly dis Johan de Lavoir soy mariat dois fois; delle promeraine femme fut une filhe, mariée à Renechon de Wandres, qui estoit cuziens germains alle bon saingnor d'Argenteal; se n'en cognoy nus hoirs.

632. Item, ly dis Johans de Lavoir soy mariat la seconde fois alle sereur monssaingnor Pire de Chinvilhe, chevalier; s'en sont Henry de Lavoir, canonne de Saint Servais de Treit, Ernus et Renart, et assy une filhe, mariée à Rigaut de Mohin.

533. Item, de monssaingnor Aoust de Charneur et de damme Maroie de Lavoir, sa femme, sont quatre fis et une filhe, assavoir Gilhes, qui est de petit regiment, Henrys, qui est canonnes de Saint Servais de Treit, Ernus, qui est canonnes de Nostre Damme de Treit. Englebiert, qui est moyne à Stavelot, et damme Aely, qui at à marit monssaingnor Thiry de Moylant, chevalier, lyqueis messires Thiris at de la dicte damme unc fis, nomeis Thiry, marieit nouvellement alle filhe monssaingnor Johan de Gotehen, chevalier, et une filhe, qui est assy nouvellement mariée à Godefroid Chadelier, de Biersés, escuwier. Ét ly dis Johain Coirnés at eyut gran nombre d'enfans seculiers et en religion; mais ilh n'y at nulle dont ly amis pussent avoir nulle gran serviche.

539. Puisqu'il vos at esteit declareit queile generation est extraite des v fis monssaingnor Wilhelme de Flemalle, fil jadis monssaingnor Makaïre delle Heys, engenreit delle filhe monssaingnor Gerart de Rulant, conte de Hozemont, nos dirons chi après des filhes de jadis monssaingnor Wilhelme, sy avant que nos en arons connaissance, et, premiers, delle ainsnée.

535. Ly ainsnée filhe monssaingnor Wilhelme, fil monssaingnor Makaïre delle Heys, nomée damoyselle Aelys, fut mariée à on riche borgois de Liege, qui estoit nommeis sires Lambiers Cossens, dont ilhe furent pluseurs enfans, assavoir uns fis, nomeis messires Wilhelme Cossens, chevaliers, et grant nombre de filhes; s'en parleray d'unne partie car de tot je ne suy nint bin infourmeis. Chis messires Wilhelmes Cossens fut uns hardis et entreprendans chevaliers, et soy acquitat loïialment en mortel faite des lynages do pais et travelhat fors al vengier ses oncles, qui furent mors deleis le saingnor d'Awans, alle pongnyche à Lonchiens; mais ilh morit sains hoirs.

536. Et dois des sereurs furent mariées à dois freires, assavoir alle voweit de Chaiienéez et à Frongnut, son freire, qui portoïent les armes de Souwengnéz, assavoir de geules à trois rutures d'argent. Do dit voweit issit Weris, ly bailhiers de Chaiienéez, qui prist à femme la sereur Watier Ponée, de Jouppilhe, qui fut freires al viez Drughien et gransires à monssaingnor Ernut de Charneur et à ses freires.

537. Do dit Wery le bailhir furent quatre fis et dois filles, assavoir Johan, Lambuches, Gilhes, Ozilhe et Maroie, et dans Werys, qui est abbés de Florines.

538. Ly dis Johan, fis Wery le bailhir, prist à femme l'unne des filles Philepot de Meliens, et en furent dois fis et dois filles, assavoir Werot et Rennechon, qui morit juvenes ultre meire. Et, des dois filles, est ly une mariée à Rennechon, fil Renier de Lieriu; et ly atre fut promirement mariée à Symon de Colonster, dont ilh est une filhe, et secondement elle est remariée à Johan, fil Clouz delle Chivre, et en at des juvenes enfans. Et ly dis Werottes fut, premiers, marieis alle filhe Johan delle Tour de Fexhe, sy n'en est nulle hoir; et nouvellement est ilh remarieis alle femme do fil Johan Pirik d'Oire le Tiexhe, et est mors sains hoirs.

539. Lambuches, secons fis Weris le bailhier, soy mariat à Honirs, et en est uns fis tant soilement nomeis Johans de Honirs. Chis Johans at à femme damoyselle Angnés, filhe Goffien de Hemericourt, et en sont dois fis et quatre filles, assavoir Johan, Jakemiens, Helewys, Angnès, Ozilhe et Clamenche. Ly dis Johan est canones de Saint Johans à Liege. La dicte Helewys est nouvellement mariée à on escuwier delle terre de Falcomont, nomeit Franke de Stokeheis. La dicte Angnès est nonne à Saint Ghierlak, en la terre de Falcomont. Et ly atres sont encors juvenes.

540. Gilhes, ly tirs fis Wery le bailhier, soy mariat à damoyselle Adilhe, filhe Badewien le Coirnut, qui estoit de ceste meïsmes coistye de Flemale, sy qu'il apparat chi après; et en sont pluseurs enfans assavoir Wery, Giles, dis ly Moynes, damoyselle , qui fut femme Johan, le voweit de Sar, et damoyselle Margriete, femme Waltier Langhien de Huy; lyqueis enfans devant nomeis ont pluseurs hoirs marieis et à marieir, mais ly plus gran partie d'eaz sont ravaleis par faute de regiment.

541. Item, damoyselle Ozilhe, filhe Wery le bailhier, fut mariée à Johan Benjamien, le cangeur, qui morit sains hoir.

542. Et damoyselle Maroie, ly atre sereur, fut mariée à Colet de Houten, le cangeur, et en furent dois fis, Gerars et Colect, qui sont mors juvenes, et croy qu'il ont une sereur mariée à Pirart Colle de Namur. Ly dis Gerars soy mariat alle filhe Gile de Lavoit, manant Defour Casteal; sen est une jovene filhe, nomée Maroie, qui tot nouvellement est mariée à Hombier de Pas de Wonke. secretaire des XII.

543 Nos avons declareit cheaz qui sont issus de voweit de Chaiinée; sy vous dirons chi après do Frongnut, son freire.

544. Ly Frongnus out quatre fis et une filhe, assavoir monssaingnor Wery Frongnut, chevalier, Johan, Lambuche et Colet Frongneteal; et ly filhe fut mariée à Monar de Warous. Chis trois fis dierains morirent sains hoirs. Et messires Werys soy mariat alle filhe Gobiert de Dynant, qui, de part sa meire, estoit sereur à monssaingnor Lowy Martéal, chevalier; s'en issirent Johan et Gobiers, et une filhe, mariée à Wynekin de Wayme Ly dis Johan morit juvenes et, nequident, ilh en sont demoreis dois fis et une filhe. Et ly dis Gobiers n'at nulle hoir; mais sa dicte sereur at, do dit Wynekin, des juvenes enfans.

545. Item, delle filhe le viez Frongnut, mariée à Monar de Warous, est uns fis, ly plus chaitis de son linage, nomeis Johan de Gomesée, qui soy mariat à damoyselle Marie de Wyrde, dont ilh est une filhe, canonesse de Blize.

546. Et deveis savoir que Rogirs de Holongne as Pires, et Badewiens, et leurs atres freires, lyqueis Badewiens fut esquevins de Liege, issirent delle sereur do dit voweit de Chaiinée, qui fut mariée à

monssaingnor Rogier de Holongne; et Werys Gailhars, et Lambuches, ses freires, qui fut assy esquevins de Liege, issirent delle atre sereur; car messires Rogirs de Holongne, chevaliers, et Jouliens Gailhars de Stokis orent les dois filhes monssaingnor Johan, avoweit de Chaiienéez, chevalier, ja soice que ce n'affirt nint à nostre mateire.

547. Vos aveis oût la progene de dois des sereurs monssaingnor Wilhelme Cossen; sy vous dirons delle tirche, qui fut mariée à Amaing, à un suffissant homme qui estoit do linage de Hanut; s'en issit Johan d'Amaing, ly cangirs, qui prist à femme la filhe Colet de Mouton et en out pluseurs enfans, assavoir Wilhelme Cossen, costre de Saint Pire en Liege, et pluseurs filhes, dont ly une est mariée à Houwar de Borléez, et ly atre à Pireneal Drughien, dont y sont ly hoirs; et, des atres, je n'ay nulle information.

548. Nos avons chi devant traitiit delle ainsnée filhe monssaingnor Wilhelme de Flemale, fil monssaingnor Makaire delle Heys, qui fut mariée à saingnor Lambiert Cossen; et ay bin oyt dire qu'il en fut pluseurs sereures, dont ly une fut abbaisse delle Pais Dieu; mais, des atres, je n'ay point de juste information: sy vous en voelh à tant suffier, et retournerons az sereurs do dit monssaingnor Wilhelme de Flemale, qui furent filhes do dit monssaingnor Makaire, et, premiers, alle ainsnéez.

549. Ly ainsnée des filhes monssaingnor Makair delle Heys de Flemale fut marice à on riche et suffissant borgois de Liege, qui estoit do linage de Saint Martin et estoit nomeis sires Waltier le Coirnus de Saint Linart, esquevins de Liege; s'en furent dois fis et une filhe, assavoir Johans, Wilhelme et damoysselle Clamenche. Do dit Johan, morirent ly hoirs; et de Wilhelme, issirent Badewiens et Gerars, et freire Godefrois, freires meneurs et evesque suffragans à Mes, en Loheren. Ly deseurnomeis Badewiens et Gerars present en mariage les dois sereurs Johan Stassar, de Harsta, qui estoient do linage de Noefcasteal, et misent jus les armes de leurs peires et present les armes de Hozemont, delle coistie de Flemale, de part leur grandamme, assavoir d'argent à on satoir de geules.

550. Do dit Badewiens issit une filhe tant soilement, nomée damoysselle Adilhe, qui fut femme Gilhes le bailhier, dont mention est faite, de ly et de ses hoirs, en capitle chi devant parlant de saingnor Lambiert Cossen.

551. Do dit Gerart furent pluseurs enfans, assavoir Wilhelme, Godefroid, Gerart, Johans et damoysselle Adilhe.

552. Ly dis Wilhelmes soy mariat à damoysselle Peronne, filhe monssaingnor Howe de Hacourt, chevaliers; dont ilh est Raskin ly Coirnus, cangiers de Liege, et si freires, qui n'ont nulle hoir, et une sereur, mariée à Colars de Mes, ly vinir, dont ilh est uns fis, nomeis Werote

553. Ly dis Godefrois, secon fis Gerars le Coirnut, soy mariat à damoysselle Maroie, filhe Johan Alixandre de Fechires, qui, en devant, avoit esteit femme Lambuche de Weys et en avoit des hoirs. Do dit Godefrois et de la dicte damoysselle Maroie furent pluseurs beaz enfans, qui tos morirent en la fleur de leur eage, sains hoir, excepteit une filhe tant soilement, nomée , qui est mariée à Colar Boeleave, fis jadis Johan Boeleave de Tileur; sy sont riches et en la flour de leur jovente, et ont pluseurs jovenes enfans. Chis Godefrois fut beaz et gratieux, anchois que le maladie des gottes le presiste, et fut pluseurs fois maistre delle citeit, et est une merveilhez choze, dont ilh fut par ses especiaz amis durement repris, et specialment par mes oncles, qui en furent mult dolans: car, por complaire alle viez saingnor de Seraing, qui ly avoit doneit ses dras et alqueile, dis Godefrois estoit cuzien longens, delle coislie de Noefcasteal, ilh mist jus les armes de Hozemont, qu'il et sy freires et ses peires avoient porteit tot le temps qu'il avoient esteit armeis, et prist, de part sa meire, les

armes de Noefcasteal, en temps qu'il ne portat onkes puyes armes, car ilh estoit ja sy affoleis ce maladie que, onkes après ce, ne s'armat.

554. Gerars, tirs fis do dit Gerar le Coirnut, soy mariat alle filhe Thonar, garchon de Lonchiens, et n'en est nulle hoir.

555. Et Johans, ly plus juvenes, at à femme la filhe Abiert de Sawehy, et en sont ly hoirs.

556. Et damoyseile Adilhe, leur sereur, fut mariée à Colar le Puissans, le cangeur; s'en sont dois fis et une filhe, assavoir Godefrois, Johan le Puissans et damoyseile Katherine.

557. Ly dis Godefrois soy mariat alle filhe monssaingnor Waltier de Hautepeppe, qui, en devant, avoit esteit femme Johan de Fleron, escuwier; et en sont plusieurs enfans, qui n'ont nint terre solont l'estat de leur nation.

558. Ly dis Johan le Puissans, ses freires, out premier à femme la filhe Stassin Drughe, engénée en la meire Henry de Colongne, qui fut sereur monssaingnor Lowy Marteau, dont ilh est une filhe; et puis soy remariat à damoyseile Maroie, filhe Lambuche de Weys, qui avoit esteit femme à Henry Zuttemyne, et en at enfans.

559. Et la dicte damoyseile Katherine, leur sereur, at Gobiert Frongneteau, qui est de ces meisme coystie, et n'en sont nus hoirs

560. Vos aveis oüt ordinément reciteir cheaz qui sont issus des hoirs marles saingnor Waltier le Coirnut et delle damoyseile de Flemale, sa femme, ainsnée filhe monssaingnor Makaire delle Heys. Ors vous dirons cheaz qui sont issus de damoyseile Clamenche, leur sereur, filhe do dit saingnor Waltier.

561. Chest damoyseile fut mariée alle viez Thomas de Hemericourt, sentenchier delle cour de Liege, et en furent sept fis et dois filhes, assavoir freire Adan. moynes de Bealrepart et prieuz de Raydekemme, Thomas, ly vinir, Goffin, Outbon, Wilmar, Houwar, Gilheçon, Maroie et Aely. Chy Thomas de Hemericourt, ly vinier, fut uns durement puissans hons de coir, fors corageuz et de costable estat. Ilh out dois fis et une filhe, assavoir sires Johans Thomas, canonnes de Saint Denys, Thomas de Hemericourt ly juvenes, cangeur de Liege, et damoyseile Maroie.

562. Item, Thomas ly juvenes soy mariat à damoyseile Johanne, filhe Clouze de Harne, et en est uns fis tant soilement, nomeis sires Clouze de Hemericourt, qui est canonnes de Saint Lambier.

563. Et la dicte damoyseile Maroie fut mariée à Johan Peveréal de Houlgnoul, manant en Ilhe, dont mention sierat fait en la genealogie monssaingnor Libiert Crepon d'Otée. Do dit Johan fut uns fis, nomeit Johan Peveréal ly jovene, ly cangeur, qui soy mariat à damoyseile Katherine, filhe Thiry Clouze, et en out dois fis et une filhe, assavoir Johan Peveréal, Andrier, dit Hustien, et damoyseile Aely.

564. Ly dis Johans Peveréal, ly plus juvenes, prist à femme damoyseile Marie, filhe monssaingnor Wery de Coir, jadis saingnor de Ramelhou, chevalier, et morit sains hoirs sy que ly damoyseile soy remariat a Lowy de Saint Martin, escuwiers.

565. Ly dis Andrier Hustien at à femme la filhe Johan le Proydomme de Gemeppe; sy sont juvenes asseis pour avoir hoirs.

566. Et la dicte damoyselle Aely, leur sereur, fut mariée à Libiert Butoir, avoweit de Horrion, escuwiers, qui morit sains hoirs.

567. Item, quant Johan Peveriaz ly viez, manant en Ilhe, fut veve delle filhe Thomas de Hemericourt, ilh soy remariat à une des filhe Cloze de Harne; et en est une filhe, mariée à Henry de Chaiienéez, qui est mors sains hoirs.

568. Goffiens de Hemericourt, freires al dit Thomas ly vinir, fut unc gratieuz clerc, durement ameis et honoreis des saingnor, se fut secretaire delle citeit et ordinat et dytat ly pais des linages, et fut le promerains secretairs des XII linages. Ilh soy mariat à une damoyselle de bonne nation, filhe maistre Johan des Mares, advocaut en la court de Liege, delle sereur Wilhelme et Badewiens de Casteal de Seliens, dont mention sierat faite chi après, en capitle qui parlerat do jovene monssaingnor Breton de Warous, et en out trois fis et dois filhes, assavoir Goffien, Johan, Thomas, Clamenche et Maroie.

569. Goffien, ly ainsneis, soy mariat à damoyselle Angnès, filhe Wilhelme de Harsta, ly monoiiier, dont ilh est une filhe tant soilement, normmée Angnès, car ly atres enfans do dit Goffiens morirent juvenes et sains hoirs.

570. La dicte Angnès est mariée à Johan de Honirs, doqueile et de ses enfans plus expresse mention est faite en secon foilhet chi devant, capitle des hoirs Wery, ly bailhir de Chaiienéez.

571. Item, ly secons fis do viez Goffiens, nomeis Johan des Marés, fut canones de Saint Gielhe et doiiien do concilhe de Rochefort.

572. Et Thomas, ly plus juvenes, nomeis maistre Thomas de Hemericourt, fut canones et scolaste de Saint Lambier, ly miez eloquente, ly plus plaisans dyteurs, ly plus larghes et ly plus lyberauz et honorables hoistes qui foist à son temps, solonc ses possession, et alle queile ly engliese de Liege et tous sy amys perdèrent plus que à nulle homme singuleirs qui morist à Liege lonctemps devant son trespas. Chis out on bastairs, marieis à Machawe en Campagne, qui at plusieurs enfans.

573. Ottebons de Hemericourt, quars fis do viez Thomas de Hemericourt, soy mariat promierement à damme Maghien, femme jadis maistre Jake d'Abéez, qui fut sournomeis par sa bealteit le dieu d'amours, et estoit sentenchiers delle court de Liege; et ly enfans procreieis do dit Ottebons et de ceste damme morirent juvenes. La dicte damme morit, et Ottebons soy remariat alle filhe Johan le Robeur, esquevin et maistres de Liege; s'en out plusieurs enfans, qui morirent juvenes. Puis soy remariat, la tirche foys, à damoyselle Aely, filhe Johan de Biersés le viez, cangeur de Liege; et de cely est une filhe, nomée damoyselle Clamenche, laqueile Thirys de Rochefort prist par amours en mariage, sy qu'il est contenu chi devant, en capitle parlant des enfans do saingnor de Rochefort.

574. Item, Houwar et Wilhmar, freire alle dit Ottebon, morirent sains hoirs.

575. Et Gilheçon, ly VIIe fis do viez Thomas de Hemericourt, prist à femme damoyselle Yde d'Abéez, filhe de maistre Jake et de damme Maghien devant nomée, desqueis conjons je, ly composeirs de cest hystore, fui procreieis et engenreis. Je moy mariay à Franchoize, filhe d'unne honorable borgoys, nomeit Piron de Mission, drappir de Liege, et awymes on fis, nomeis Giles de Hemericourt, qui, promierement, prist à femme damoyselle Johanne, filhe jadis monssaingnor Johan Boeleau de Mons, chevalier, qui morit alle bataillhe à Bossewilre, laqueile damoyselle Johanne morit sains hoirs. Et adont, je astoie veves, sy qu'il et je nos remariames ensemble, assavoir: je, à damoyselle Angnete, filhe monssaingnor Wery de Coir, saingnor de Ramelhou, chevalier, qui

devantrinement avoit esteit femme à Johan, fil Warnier de Lavoit; et ly dis Giles, mes fis, à damoysselle Angnès, filhe des deseurnomeis Johan et damoysselle Angniete, sy que je et me fis awymes la meire et la filhe. Laquele damoysselle Angniete est trespassee sains avoir hoir de moy; et la dicte filhe est semblament trespasseez, mais, de lééz et do dit Giles, sont demorés dois beaz enfans, Johans et Franchoise. Lyqueys Gilhes fut tirchement remarieis à damoysselle Marie, filhe monssaingnor Godefroid de Blehen, saingnor d'Abééz, chevalier, et ont des jovenes enfans; de laqueile damoysselle Marie mention est chi devant faite, tant en la genenlogie do saingnor de Warfezééz qui out les XX enfans com en la genealogie de saingnor de Noefcasteal, dont chilhe d'Abééz sont deskendus, et assy en la genealogie delle bonne damme de Vellerous et do bon saingnor de Hemericourt.

576. Damoysselle Maroie, filhe do viez Thomas de Hemericourt, fut mariée à Lambier de Payves, fil Everar Burlure, demorant alle Tour, al defours delle porte de Vengnis; et orent dois fis et dois filhes, assavoir Everar, dit Burlureal, Thomas, damoysselle Maroie et damoysselle Contesse.

577. Ly dis Everars soy mariat à une des chamberirs delle filhe le conte de Namur qui fut mariée alle Roge duk de Beawire, laqueile chamberire estoit delle Yle, en Flandres, et est nomée Marie. De cely est uns fis, nommeis Lambiers, qui est marieis alle filhe Renir de Leri, esquevin del court de Joupilhe, et n'ont nulle hoir.

578. Et Thomas, freires alle dit Everart, soy mariat à damoysselle Katerine, filhe Johan de Mes, engenrée en damoysselle Oede de Warfezééz, filhe do dierain mariage al bon saingnor de Warfezééz qui out les XX enfans; s'en est faite expresse mention en la genealogie do dit saingnor de Warfezééz et, par tant, nos en deporterons en ceste partiie.

579. Damoysselle Maroie, leur sereur, fut mariée à Johan, fil jadis Henry Zutemyne, esquevin de Liege; s'en furent dois fis, Henrys et Rawesines, qui furent tweis. Mais ly dis Henrys estoit marieis à damoysselle Maroie, filhe jadis Lambuche de Weys; s'en demoront dois jovenes enfans, Johan et Maroie, laqueile Maroie est morte asseis jovenes, et Johans est tout nouvellement marieis à Adilhe, filhe Ernut de Bonbays, de Joupilhe. Et assy la dicte damoysselle Maroie, sa meire, est remariee à Johan le Puissant, dont chi devant est faite mention. Et damoysselle Contesse, filhe do jadis Lambiers de Payves, fut beghine de Saint Cristofore.

580. Item, damoysselle Aely, ly dierainne filhe do viez Thomas de Hemericourt, fut mariée à Badewien de Biersés, freires al viez Johan de Biersés, et en furent dois filhes, qui morirent sains boir.

581. Chi devant vos at esteit declarée ly progene delle ainsnée filhe monssaingnor Makair delle Heys de Flemale, qui fut mariée à saingnor Waltier le Coirnut. Chi après, vos dirons delle atre sereur et de chez qui de ly sont deskendus.

582. Ly seconde filhe monssaingnor Makaire delle Heys de Flemale fut mariée à Rigaut delle Vingne de Halenbay, fil monssaingnor Anthone de Halembay, chevalier; s'en furent uns fis, nommeis Rigauz, qui out chink filhes, dont ly ainsnée fut mariée à Alixandre, le voweit d'Oir le Remans.

583 Do dit Alixandre, avoweit d'Oire, et de ceste damoysselle furent siiez fis et dois filhes, assavoir maistre Wilhelmes d'Oire, canonnes delle eglise Saint Johan Ewangeliste et advocaz en la court de Liege, qui fut uns tres reverens clers, de grande eloquenche et de haute honour, Rigauz, Jakemiens, freires Lambiers, moynes des Freires Meneurs, Johans, dis de Bulhon, sires Gilhes d'Oire, canonnes de Saint Crois et vestis de Gedines, damoysselle Lize, et une atre qui fut abbeisse de Phelippeit.

584. Et ja soice que ly dis maistre Wilhelmes n'awist nulle hoir legitime, nequident on ne soy doit nint taire des enfans natureis qu'il out d'une saige et honeiste damoyselle de bonne nation, que je nomme honeiste par tant qu'elle soy gouvernoit assy sagement, honeistement et honorablement, que dont elle fuise espozée alle dit maistre Wilhelme. Et out ly hoirs esteit tant honorables que leurs linages en at eut et at encors grande honour et service; assavoir, sont: maistre Wilhelme d'Oire, chevaliers, sires Alixandres d'Oire, canones de Saint Martin et vestis de Saint Cristofore, Johans, canones de Fosses, Jakemiens d'Oire, damoyselle Magrite et damoyselle Maroie.

585. Messires Wilhelme d'Oire, chevaliers, soy mariat alle filhe monssaingnor Pire de Thynes, chevaliers, dont ilh at des enfans, assavoir Hustien et une filhe mariée à Goffien, fil jadis Johanien de Mons en Condros.

586. Jakemiens, ses freires, soy mariat alle, filhe maistre Johan de Gemblouz, advokaut en la court de Liege, dont ilhe est une filhe mal provée, qui at pluseurs enfans natureis de saingnor Johan de Chywongne, canonne de Saint Johan.

587. Damoyselle Magriete fut mariée à on bon escuwier, nomeit Johan de Bonbays d'Amerires, et orent dois fis et une filhe, assavoir Johan ly juvenes, qui fut beaz et bons et hardis, et Wilhelme, qui ne vaut nint granment moins, et assy une sereur, mariée à Waltier Domino, cangeur de Huy, dont y sont pluseurs enfans. Ly dis Johan morit sains hoir en la fleure de son eage, et Wilhelme n'est point marieis.

588. Item, damoyselle Maroie, filhe maistre Wilhelme d'Oire, est mariée à Badewien d'Aaz, et ont pluseurs enfans, assavoir Wilhelme, Waltier, Bodechon, et dois filles, dont ly une est mariée à Hellien de Bollezéez, manant à Hacourt, et ly atre fut mariée à Stassinnet de Mirmorte, fil delle sereur Stassien Chabot, esquevin de Liege.

589. Nos vos avons infourmeit de cheaz qui sont issus delle bone maistre Wilhelme d'Oire; sy vous dirons de Rigaut, son freire.

590. Rygauz fut avoweis d'Oire et out pluseurs enfans, assavoir Johan, Rigaut, Jakemien, Alixandre, dan Gilhe, moyne de Saint Loren, et Angnès.

591. Do dit Johan Rigaut sont pluseurs enfans natureis, mais ilh n'at nul hoir legitime. Mais Jakemien, ses freires, at dois filles; et Alixandre, ly atres freires, at dois fis et dois filles.

592. Et Angnès, leur sereur, fut mariée à Johan, le freire Badewien le Royde, de Hacourt, et en sont pluseurs enfans, assavoir Gerars, Johans, dans Alixandres, moynes de Saint Loren, Angnés et Clamenche, qui ont pluseurs hoirs, mais ilh sont juvenes. La dicte Angnès est mariée à Godefroit Bierte, manant al pont à Viseit; et Clamenche at le jovene Wilhelme de Harche, manant à Wonke.

593. Item, de Jakemien, freire maistre Wilhelme d'Oire, n'est demoreit nul hoir legitime; mais ilh en sont dois filles bastardes.

594. Et de Johan de Bulhon, l'atre freire, qui fut marieis à Builhon, sont dois filles, mariées en Ardenne, dont je n'ay nint cleir information. Mais damoyselle Lize, leure sereur, fut mariée en la terre de Falcomont, à Hankien Poulhemanne, dont ly hoirs demorent à Ays.

595. Puyque nos avons declareit chez qui sont deskondus delle promeraine filhe Rigaut delle Vingne de Halembay, qui fut fis delle damoyselle de Flemale, nos dirons des atres sereurs, assavoir de la seconde filhe du dit Rigaut, quy fut mariée à Melen; s'en issit messires Olivir de Melen, chevalier, quy se mariat à la sereur Henry Braibecon de Mirmor; s'en issit Olivier de Melen, qui print à femme damoiselle Isabeau, filhe monssaingnor Oger de Fexhe, de laquelle et de ses hoirs mention est faite cy devant, au capitle parlant des hoirs monsieur Hayneman d'Aix, et aussi au chapitre parlant de damoyselle Margritte Surlés, dame de Velroux.

596. L'autre sereur fut mariée à Haccourt, dont issit le bon Rigaut de Melen et sa sereure. Et, pour la grande admiration que j'ay du blason que le dit Rigaut portoit, que nul du lignage de Hozemont portoit le pareilh, je vous le remonstreray, affin que, s'il y a aulcun qui sache raison rendre, il l'adjouste au traité. Le dit Rigaut portoit de sable à on satoir d'argent et crioit Hozemont. Mais, en tout le lynage de Hozemont, vos ne trouverez homme quy le port de ces coleurs. Bien est vray qu'en linage de Haccourt y at alcons quy portent semblable blason à quatre merlettes; mais ceux de Hozemont et de Haccourt ne s'appartiennent en rien, ançois a chascun son blason et son cry à part soy.

597. Celuy bon escuier Rigault de Melen se mariat dois fois: promirement, à la sereur Amel Mylot de Velroux, dont fut Johan de Melen, dit d'Ardancourt; secondement, à la damoyselle de Waynée, filhe monssaingnor Jake de Leutes, dont en est Rigault delle Vigne, quy a moult des jovenes enfans, et Lambert, son freire, marié à la filhe monssaingnor Amele Milar de Kemexhe. Item, en après, le dit Johan d'Ardancourt se mariat à la filhe monssaingnor Johan Boyleave de Mons, chevalier, eskevin de Liege, dont en furent grant nombre d'enfans, dont plusieurs sont morts et alcons vivants.

598. Item ly sereur do bon Rigaut fut mariée à Rigaut de Graz de Hacourt, dont ilh fut plusieurs enfans, qui tos morirent sains hoir, excepteit une filhe tant soylement, dont ilh yssirent plusieurs enfans, assavoir dans Rigauz et dans Godefrois, andois moynes d'Ane, dans Johan, abbés delle Vaz Saint Lambier, dans Rasses, prieus de Biertréez, Ernot qui morit en Lombardie, damoyselle Aely de Hacourt, beghine de Saint Cristofore, et damoyselle Peronne, femme Johan delle Sar deleis Hodires.

599. Do dit Johan de Sar, qui fut uns vailhans escuwiers et bien entechies, sont pluseurs enfans, qui ont beal commenchement de venir en prosperiteit, car Wilhelmes, ly ainsneis, qui at la filhe Johan de Rossemelt, castelain de Franchimont, et damoyselle Aely, qui at Johan de Bernar ly giovane, engereit en damoyselle Juliane, sereur alle giovane monssaingnor Gilhe Surllet, dont mention est chi devant faite, en capitle parlant de monssaingnor Rigaut de Beariu, ont des beaz enfans, qui sont à present de petit eage.

600. Ors devons raleir az atres dois filhes Rigaut delle Vingne de Halembay, qui fut fis delle damoyselle de Flemale; sy en parlerons en general, car je ne saroye nint bin declareir les hoirs de greit en greit. Mais ilh en issit Collebars de Nyvelles sor Mouze, qui fut gransires à Waltelet de Nyvelles, maiieur delle Valée à present, et en issit Stassins de Thier de Hacourt, qui fut peires de Stasses de Mexhawe, et assy Haneaz, qui fut peires à Fraiiekin et à Lambier Fraiikin. Et en sont, de ces dois sereurs, pluseurs enfans.

601. Puyque nos avons reciteit la genealogie des dois filhes monssaingnor Makaire delle Heys, nos dirons delle tirche et dierainne filhe do dit monssaingnor Makaire. Elle fut mariée; s'en issit ly viez Robette de Saint Loren, qui prist les armes, de part sa dicte meire, delle coistie de Flemale. Ilh out chink fis, assavoir Wilhelme, Badewien, Robiert, Johan et Lynar, qui morit sains hoir. Do dit Wilhelme est uns fis tant soilement, nomeis Robiers, qui est canones de Saint Lambier et prevost de Saint Bertremeir, qui at plusieurs enfans natureis.

602. Item, do dit Badewien, sornomeit de Hurtebize, sont ly hoirs. Do dit Robier, son freire, sont uns fis et une filhe; ly fis est nomeis Henrys et at la filhe le Proidomme de Gemeppe, et ly filhe est mariée à Henry Botien, le cangeur, et ont cies hoirs.

603. Item, do dit Johan est uns fis, nomeis Robiers, qui at dois filhes qui sont juvenes et poront bin avoir planteit d'enfans.

604. Nos avons asseis cleirement denomeit cheaz qui sont deskendus delle ainsnée filhe le conte Gerart de Hozemont, qui fut mariée à monssaingnor Makaire delle Heys de Flemalle; sy dirons chi après delle atre filhe do dit conte, qui fut mariée à saingnor Lowy Surllet, borgoys de Liege, fil saingnor Lowy az Roges Chaches.

605. Ilh est veriteis, et je le vous certefie fermement par anchiennes escriptures que je ay eut et visenteit tres especialment, qu'il out jadis à Liege on vailhant homme, nomeit saingnor Lowy az Roges Chaches, qui estoit delle dukeit de Juley, do linage de Moylenake et de Mormany, qui soy trahit à demoreir à Liege por caze de werres estantes en son paiis; lyqueis soy mariat alle sereur saingnor Rogier alle Capeal d'Ilhe, qui portoit d'or à quatre griffes de liwon de geules, lesqueilles armes sont appelees les armes d'Ilhe. Et soiez veritablement infourmeis qu'il avoit, à cely temps, et encors at à present, VI vynaules à Liege, qui avoient, et encors ont al temps present, blazon et cry d'armes; lesqueiles armes ly riches borgois qui anchienement avoient demoreit en dis vynaules et qui le saingnor servoient en armes, avoient encargiez. Et tes gens, assavoir teis borgois, ons nommoit les Grans; et les gens laburans des commons mestiers, on nomoit les Petis; et encors faisoit on al temps que ly gens de lynage avoient le moitie do gouvernement delle citeit, alle queil ilhe renonchont l'an mil IIIc IIIxx et quatre, alle Saint Jake, que Badewiens de Saint Servais estoit maistre de Liege por les Grans, et Piron le Robeir pour les Petis. Et ja fuist choze que teis riches borgois fuissent nomeis ly Grans, sy n'avoit en la dicte citeit nus chevaliers, voir par decha Mouze, car ly vynaules delle chachie delle Preit at tosjours, do temps anchiens, esteit warnis de bonne chevalerie, et avoient bonne fermeteit de leur costeit et bon pont leviche, et assy bonne porte et forte par devers eaz, alencontre de cheaz de Liege; et encors y est ly fermeteit, al devant de Peixheuruwe; mais ilh at ja bin longtemps que tot at esteit remis à unk, et ly fermeteit abatue, qui estoit solonc Mouze, alle devant de Taneuruwe. Chis VI vynaules avoient, et encors ont, les armes qui s'ensiwent; mais elles sont avissiez, par tant que chascuns porte à present le blazon de sa melheur coystie, car tous ly riches hommes de Liege ont, puy cely temps, marieis leurs enfans et astaleis dedens les lynages delle evesqueit de Liege, de Braybant, delle conteit de Namur et des paiis marchissans, etc. Assavoir est que chilh do vynaule d'Ilhe portent les griffes de liwon; chilh do vynaule de Saint Servais, les foulhes de marés, assavoir d'or à trois foulhes de marés de geules; chilh do vynaule do Marchiet, les armes delle fondation de Liege, assavoir de geules à on labeal à trois pendans d'argent, sy qu'il brisent d'on labeal les droites armes de Liege, qui sont roges sains entresengnes, et ces armes crient Sains Martin et parvinrent delle chevalerie d'Ans, deleis Molins, là ilh avoit chevaliers pluseurs demorans à temps delle fundation delle citeit, et fructifiiat tant chis lynages de Saint Martien que ce fut ly plus fors et ly plus poissans linages del citeit de Liege, anchois que ly Surlés venissent en la forche et estat là ilh furent jadis; car je meïsmes ay tenu une ancienne letre et liiet, que ly capitle Saint Pire avoit exhibueit par devant les esquevins de Liege, saielée des XIII esquevins de Liege, dont ly diiez seaz estoient emprenteis des armes deseurdictees. Item, portoient chilh do vynaule de Noevis, c'on dist maintenant le vynaule de Soverainpont, d'azure à croysettes recroizetééz d'or; mais, ou temps jadis, ly alcons des plus riches hommes de ce vynaule de Noevis soy mariont alle chevalerie do Preit ultre Mouze, et present les armes de Preit à on chief de geules. Item, chilh do vynaule Saint-Johanstrée, d'or à trois tiestes de chat de geules coronééz mais, pour ensachier, ilh les noment tyestes de lupar. Et chilh do vynaule delle Preit portoient d'argent à une ayle à dois tyestes de sable, le bek et les

piez de geules; mais ly drois lynages delle chevalerie del Preit, qui est mult ancienne, est lozengiet d'argent et d'azure. Et quantea que les chozes soient fours de nostre mateire, nintmains elles sont asseis necessaires pour savoir plus cleirement queis fut chis sires Lowys Surlés., qui fut ly premiers qui oukes portat ce sournon en la citeit, et dont ly hoirs fructifiont si grandement qu'il vos porat chi après apparoir. Vos aveis chi devant oût que sires Lowys az Roges Chaches prist à femme la sereur saingnor Rogier al Chapeal d'Ilhe, de laqueil ilh out quatre fis et une filhe, assavoir le dit saingnor Lowy Surlés, saingnor Rogier, le jovene, saingnor Radout al Oelhe, et unk qui fut canonnes de Saint Lambier et costes de Saint Denis, nomeis sires Lambuche; et ly filhe fut nomée damme Oede, qui, premierement, fut mariée à Buevon de Skendremal et, secondement, à Daneal de Hamale; mais, de tos ches enfans, je moy tairay en ce traitiet, car c'est fours de nostre mateire, par tant qu'il ne furent nint do lynages de Warfezééz, excepteit do dit saingnor Lowy Surlés, qui prist à femme la filhe le conte Gerart de Hozemont, dont messires Makair delle Heys de Flemalle avoit eut la pareille sereur, si que deviseit est. Et, adont, tous les riches borgoys de Liege, et maiement les ainsneis, on lez nommoit saingnor, et en y avoit gran nombre qui portoient vers et gris et estoient hamotés de vayre, ensy que ly bannerés soloient estre d'antiquiteit. Chis sires Lowys Surlés out de la dicte damme de Hozemont, quatre fis et chink filhe, assavoir saingnor Gerars Surlés, saingnor Gilhe Surlés, sornommeit le Beir, qui est ensevelis en sa capelle az Freires Meneurs bin reverenment, Lowy Surlés, et saingnor Nycolle Surlés, rendut az Freires Meneurs à Liege, damme Maroie, damme Oede, damme Katerine, damoyselle Magriete et damoyselle Angnès, qui fut beghine. Chis sires Lowy Surlés fut tous maistre delle citeit de Liege, miez que ly evesque Houwe de Pirepont, qui adont vivoit. Ilh fist faer la halle des drapiers en Saint-Johanstréez, laqueile voient defendre à edifier chilh de Saint Servais, qui estoient halliers et mult fors à Liege, par tant que la dit halle leur tourneroit à gran damage; Sy envoient defier les overirs, qui, par dotanche d'eaz, lassont l'overage, on jour en l'osteile que les rosses astoient en saysons; sy que, quant ly dis sires Lowy vint à relevée veioir ses overirs et ilh les trovat ouheuz, luy informeit do fais, ilhe fist crier à Peron, de part ly, que tos cherpentirs venissent overeir al halle sor une grand mize, et y vinrent et nel oyzont refuseir. Et, eaz venus, ilh mist chascuns d'eaz on chapeal de rose sor sa tieste et leur dest qu'il overassent sengeuzement, car ilh les aseguroit. Et, de dont en avant, ilh ne trovont sy hardy que vilonie les fesist. Et, pou après, ly dis sires Lowy fut toweis à une bataille qui fut à Ammechiens, et fut ensevelis en cymiteir à Saint Jakeme à Liege, deleis le jardin, l'an mil IIc et XXXIII, ensy que ly date de sa pire contient.

606. Ly dis sires Gerars Surlés, ainsneis fis saingnor Lowy Surlés devant nommeis, prist à femme damme Katerine de Herke; s'en fut on fil, nomeis Gerars de Herke, qui out à femme damme Babaiche, filhe saingnor Everart del Lou, vinier de Liege, dont Lowy Surlés, ses oncles devant nomeis, out la pareille sereur. Do dit Gerars de Herke et de damme Babaiche furent dois filles, Angnès et Ysabeal. La dicte Angnès fut mariée à monssaingnor Godefroid Bielle de Treit, chevalier; et Ysabeal fut mariée à saingnor Jaquemon Chabot, freire à Servais Chabot et freire à damme Katerine, qui fut femme à Gerar de Noevis, le peire Gilhons Chabot, lyqueis Gilhons fut peires de monssaingnor Jakeme Chabot, jadis chevaliers, maiieur et esquevins de Liege, dont messires Gilhes Chabos, chevaliers. maintenant vivant, est issus; mais cest fours de nostre mateire.

607. De monssaingnor Godefroid Bielle de Treit furent dois filles, dont ly une fut damme de Gochoncour et ly atre damme de Meadrenge; mais d'elles n'est demoreis nus hoirs.

608. De saingnor Jakemon Chabot et de damme Ysabeal, filhe Gerars de Herke, fut dois filles; mais ly dis sires Jakes avoit en devant eut à femme la filhe monssaingnor Gerart d'Oxhen, chevalier, dont y fut tant soilement messires Gerar d'Oxhen, canonnes de Saint Lambier. De ces dois filles troveris tot ly generation en capitle faisant mention do viez saingnor de Warfezééz qui out les XX enfans, specialement en cel endroit où mention est faite de monssaingnor Waltier de Momale, et assy en

capitle faisant mention de chez de Harduémont, à caze de monssaingnor Watir de Hautepenne; et, par tant, je m'en tairay à present.

609 Nos avons parleit de saingnor Gerar Surlés, ainsneis fis do saingnor Lowy Surlés le viez; sy dirons chi après do secon fil, nomeit sires Gilhes Surlés, dis ly Beir en sornon. Chis sires Giles prist à femme damme Magriette, filhe saingnor Abiert d'Aaz, citain de Liege, engénree en la sereur monssaingnor Pirecheval le viez, de Vilhe en Hasbang, dont ly gran Badewiens de Saint Servais estoit issus delle pareilhe sereur; et, par tant, chis gran Badewiens mist jus les armes de Saint Servais, qu'il portoit, assavoir les foulhes des marés, de part son peire, et prist les armes de Vielhe: d'or à une faxhe germelles de geules, de part sa meire. Chis sires Giles Surlés out de ces damme owit fis et dois filhes, assavoir sires Lowys Surlés, maistre Gilhe Surlés, canonnes de Saint Lambiert, Wilhelme Surlés, canonne de Saint Poul, Coliens Kamars, canonne de Saint Bertremeir, messire Johans Surlés, chevaliers, sires Radout Surlés, dans Gerars, moynes de Saint Jake, Barnage, qui morit sains hoirs, et damme Magriette, damme de Vellerous. Chis proydomes, sires Giles ly Beir, morit l'an mil IIc IIIxx et quatre et giest en la capelle des anges, az Freires Meneurs, en Liege.

610. Sires Lowys Surlés, ainsneis fis de saingnor Gilhe le Beir, soy mariat alle filhe saingnor Johan Boveal, qui estoit on riches borgois et avoit une atre filhe mariée à monssaingnor Ernut de Skendremale, chevalier. Ly dis sires Lowys out on fil et dois filhes. Ly fis fut nomeis messires Gerars Surlés, chevaliers, qui soy mariat alle filhe saingnor Gilchon Rigo, cangeur de Liege. Et ly une des filhes fut mariée à on noble et wailhan chevalier, qui estoit ly fleure de Hesbaing, nomeit monssaingnor Wilhelme, saingnor de Geneffe et castelain de Waremme, dont chi après sierat faite mention, en capitle qui traitierat de monssaingnor Libiert de Geneffe, ainsneis fis monssaingnor Breton, ly viez saingnor de Warous. Mais, des hoirs do dit castelain, trovereis tout l'ourdinanche chi devant, en capitle qui traitie de chez de Haneffe. Et ly seconde filhe fut mariée à Gilhar delle Cange.

611. Chis proydome, Gilhar del Cange, portoit burleit d'argent et d'azure, et fut esquevins de Liege. Et, devantrament, avoit ilh esteit marieis alle filhe monssaingnor Gerar d'Oxhen, dont sires Jakes Chabos avoit eut la pareilhe sereur; s'en avoit eut ly dis Gilhars une filhe, mariée à monssaingnor Johan de Lardier. Et secondement, ilh reprist à femme la filhe saingnor Lowy Surlés, dont ly bon castelain de Waremme out la pareilhe sereur; et, de cest femme, ilh out quatre fis et trois filhes, assavoir maistre Johan Gilhar, qui fut ly plus beaz clers et ly miedres docteurs en drois et en loys qui faist en la dioceis de Liege; ilhe fut canonnes de Saint Lambiers et de Paris; ly seconde freire out à non Lowys; ly tirs, Wilhelme; et ly quars, Gilhes Draweaz., et les trois sereurs furent astallée ensy que chi après sierat escripte.

612. Lowys, fis Gilhar del Cange, portoit burleit com ses peires, à on quartier de part sa meire: d'or à on satoir de geules. Ilh out la filhe Watier Ponée de Joupilhe, dont iffut on fil et une filhe. Ly fis fut nomeis messires Gilhes Gilhar, chevalier, qui fut marieis alle filhe Piron de Balanche, le cangeur, qui oût à femme la filhe monssaingnor Johan de Colonster, chevalier, dont plus expresse mention est chi devant faite, en la genealogie des filhes monssaingnor Rigaut de Beariu, chevalier.

613. Et Wilhelme, freires do dit Lowy Gilhar, fondat l'ospital Saint Wilhelme, alle defours delle porte de Saint Walbeur, à Liege, et morit sains hoir; et assy fist Gilhes Draweaz, ses freires, sy que nos dirons des trois sereurs.

614. Ly promeraine, qui fut ainsnée filhe Gilhar delle Canges, fut mariée à Daneal de Hex, dit de Horpale, escuwier; s'en issit Lowy de Horpale, peire à Johan de Horpale, maintenant vivant et demorant à Liege, sor l'an mil trois cens nonante owit. Ly dis Johan soy mariat alle cuzine do

saingnor de Dypenbeke, filhe de monssaingnor Wilhelme de Rumershoven; s'en at on fil, nommeit Lowy, et dois filhes, qui sont mariée.

615. Ly seconde filhe Gilhars delle Canges fut mariée à on vailhant escuwier, nomeit Ernut d'Oborne, dont ilh fut une filhe tant soilement, mariée à monssaingnor Henry de Gudeghoven, qui fut por cheaz de Liege tuweis alle commencement des werres c'on dist de Votemme, qui furent entre cheaz de Liege et l'evesque Englebier delle Marche. De ces dois conjons sont messires Henry et Ernut, ses freires, maintenant vivant; desqueis mention est faite chi devant, en la genealogie de monssaingnor Waltier de Momale et assy en capitle parlant de Johan de Warfezéz, freires do dit monssaingnor Watier.

616. Et ly tirche filhe do dit Gilhar delle Canges fut mariée à on sages et on riches borgoys de Huy, nomeit Johain de Marbais, esquevins de la dit vilhe; dont ilh fut on fil tant soilement, nommeit Houbin de Marbais, qui morit sains hoirs.

617. Ors retournerons à monssaingnor Gerars Surlés, fil saingnor Lowys Surlés et seroge alle bon castelain de Waremme et à Gilhar delle Canges.

618. Ly dis messires Gerars Surlés soy mariat alle filhe saingnor Gilhon Rigo; s'en furent dois fis germeaz à une porture, assavoir Lowy, qui morit juvenes, et messires Gilhe Surlés, chevalier, et assy dois sereurs, dont ly une, nomée damme Beatry, fut mariée à monssaingnor Ernut de Charneur, chevaliers, castelain de Franchiemont et maieur et esquevins de Liege, et ly atre à monssaingnor Fastreit de Kemexhe, chevalier.

619. Ly dis messires Gilhes Surlés prist à femme, premierement, une des filhes monssaingnor Henry le Beal, chevalier, esquevin de Liege; et, secondement, il soy remariat alle filhe monssaingnor Gerart de Biersés, chevaliers; et, de ces dois femmes, sont ly hoirs, desqueis expresse mention est faite chi devant, en capitle qui traitiie des hoirs monssaingnor Rigaut de Beariu.

620. Do dit monssaingnor Ernut de Charneur et de damme Beatry issirent messires Gilhe de Charneur, chevalier, qui morit sains hoirs, et dois filhes, dont ly une fut mariée à monssaingnor Libier Butoir, avoweit de Horrion, chevalier, qui out on fil nommeit par ce meïsmes non, qui morit sains hoir.

621. Et ly atre sereur fut mariée à Symon delle Brouk deleis Ays, dont ilh est une filhe tant soilement, qui est mariée à on chevalier qui est senissaz delle dukeit de Juley et at plusieurs enfans; et c'est tos ly remanans do jadis monssaingnor Ernut de Charneur.

622. Item, do dit monssaingnor Fastreit et delle filhe monssaingnor Gerart Surlés fut uns fis, nomeis Lowys, qui soy mariat alle filhe monssaingnor Wilhelme de Coir, chevalier, et morit sains hoir; et y fut une filhe, sereur à dit Lowy, qui fut mariée à Johan de Denvilhe, escuwier, qui fut prevost de Boulhon; et, de eaz, sont demoreis on fil et une filhe, assavoir Johan de Denvilhe, qui est marieis alle filhe Badewiens de Hermalles et est de petit regiment et serviche, et ly filhe est belle damoyse et bonne, mariée à Gilhe, saingnor de Nettin, escuwiers, dont y sont pluseurs juvenes enfans.

623. Vos aveis oût la generation do saingnor Lowy Surlés, ainsneis fil saingnor Gilhçon le Beir; se dirons delle atre freires, nomeit monssaingnor Johan Surlés, qui fut ly premiers fis des borgoys qui onkes prist ordenne de chevalerie en la citeit de Liege.

624. Messires Johans Surlés, chevalier, secon fis saingnor Gilhon le Beir, soy mariat alle sereur saingnor Johan de Lardier le viez, qui astoit vinier et do lynages de Souwengnéz, delle coystie d'Eawailhe; dont ilh issirent Gilhes Surlés, qui morit sains hoirs l'an mil trois cens et sept,

625. et messires Johan de Lardier, chevalier, esquevin de Liege, et une damoyselle mariée à Ravessin Polarde, freires à saingnor Gilhçon Polarde.

626. Do dit monssaingnor Johan de Lardier et de tos ses enfans. trovereis le compte chi devant, en capitle faisant mention des filhes monssaingnor Rasson, saingnor de Warfezéz, promerain de che nom, par tant que ly femme do dit monssaingnor Johan en estoit estraite.

627. Item, delle sereur monesaingnor Johan de Lardier et do dit Rawessin Polarde issit Henry Polarde ly Ketrans, manans à Tileurs sor Mouze, dont y sont pluseurs enfans, assavoir Alixandre Polarde, Johan Surlés, et dois filhes, dont ly une fut mariée à Lambier de n Sawehy, jadis maieur et esquevin d'Averoit, et ly atre à Daneal, fil Vayron de Jehang, et en sont plusieurs juvenes enfans.

628. Puyque nos avons recordeit des dois fis seculiers de saingnor Gilhon Surlés, dit le Beir, nos dirons chi après do tir fis seculiers, nomeit saingnor Radou, car, de tos les diiez enfans do dit saingnor Gilhon, ilh n'en fut marieis que quatre, assavoir une filhe, qui fut damme de Vellerous, et les trois freires deseur escripte.

629. Chis sires Radout Surlés fut marieis dois fois. Ly premier de ses femmes fut une des Mateneresses, filh al viez Mathon de Four Chasteal, à Liege. De ce premier mariages issit ly peires Radout Surlés de Tongres, qui out la filhe Badewien de Liwon, ly venir, et en issit une filhe, mariée à monssaingnor Johan de Kocroul, avoweit de Kemexhe, chevalier, et une atre, mariée à Gilhebon de Vyvengnis. Do dit Radout de Tongres issirent Gilhes Surlés, sires de Bealsen, en Ardenne, qui morit sains hoirs, et sires Badewiens Surlés, prieuz delle engliese de Floynes sor Mouse; et orent une sereur, nomée damoyselle Beatry, mariée à Gerars Pauster de Tongres, dont ilh est une filh, mariée à Badewiens delle Roges, fil jadis Jakemien delle Roges, escuwiers, lyqueys Badewiens en at plusieurs enfans.

630. Item, do dit monssaingnor Johan de Kocroul, qui out la filhe saingnor Radout Surlés do promerain mariages, trovereis tout ly generation chi devant, en capitle parlant de monssaingnor Rigaut de Beariu.

631. Item, deveis savoir que ly dis sires Radout Surlés soy mariat, la seconde foys, alle serour saingnor Gilhe Polarde de Noevis, qui fut fis saingnor Henrotte de Noevis, lyqueis sires Gilhes portoit les armes del Preit alle comble, assavoir lossengiet d'argent et d'azure, à on chief de geules. De ce secon mariage fut Gilhon Surlés et trois filhes Do dit Gilhon issirent messires Radout Surlés, chevalier, Gilhes, Johan et Lowys, cangeur de Liege. Do dit monssaingnor Radout sont plusieurs enfans, assavoir Gilhes, Jakemien, Lowys et Maroie, et dois atre, dont ly uns est moyne à Floynes et ly atre à Saint Loren.

632. Item, ly dis Gilhes, fis do jadis Gilhon, Soy mariat al filhe Berto de Horrion, le cangeur, dont y sont des enfans qui sont sofrateuz de leur chevanche; s'en est petit conte. Et semblament sont ly enfans do dit Johan, dont c'est grant damaiges, car leur meire, qui fut filhe Wilhelme de Weys, vaillant et bonne escuwier, est une damoyselle de bonne nation. Et tant que do dit Lowy, ly quars freires, sont dois fis; ly uns, qui est seculiers, est nomeis Lowy et est cangiers; et ly atre est moyne de Saint Gilhe.

633. Item, ly une des trois filhes do secon mariage saingnor Radout Surlés fut mariée à Henry Henroie de Preit; s'en fut une filhe, mariée à monssaingnor Pire de Chinvilhe, chevaliers, dont ilh issit Johan de Chinvilhe, qui morit sains hoir, Item, ly seconde fut mariée à monssaingnor Houwe de Hacourt, chevalier; s'en issirent quatre fis et pluseurs filhes, dont les trois furent seculeirs, et les atres en religion; assavoir, sont ly seculeirs: messires Rasses de Hacourt, sires de Haversen et d'Osongne, chevalier, esquevin de Liege, Radous, Johans Noyhé, qui morit sains hoir; et freires Houwes, moynes de Bealrepart, damoyselle Perone, damoyselle Yde et damoyselle Katerine. Ly dis messires Rasses fut marieis dois fois, assavoir, le promiere, alle filhe Hochet, esquevin de Liege, dont ilh furent dois filhes seculeirs; ly une fut Mariée à Johan, saingnor d'Yergnéez, escuwier, s'en est planteit d'enfans; et ly atre fut to mariée à Herman de Colongne, esquevin de Liege, et n'en est nul hoir. Do secon mariage out à femme ly dis messires Rasses une bonne damme et gratieuz, nomée damme Maroie, filhe Daneal, saingnor d'Osongne et de Haversen; s'en sont pluseurs enfans. assavoir messires Englebier. sires de Hermalles et de Haversen, Johan, canone de Saint Lambier et prevost de Saint Johan, Rasses de Hacourt, et Daneaz, sires d'Osongne, et une filhe, mariée à Johan, saingnor et avoweit de Liers, une nonne alle Vaz Benoite et une à Vyvengnis, et une atre mariée à Bolle, saingnor de Rycle. Ly dis messires Englebier at une filhe et on jovene fil d'unne bin genty femme, filhe do saingnor de Waveres et del damme de Hermalles, et sont grandement ahyreteis.

634. Ly filhe do dit monssaingnor Englebier est mariée à monssaingnor Wilhelme de Warous, chevalier, fil Rasses de Warous, saingnor de Vorouz; s'en at pluseurs jovenes enfans. Item, Rasses, freires alle dit monssaingnor Englebier de Hacourt, prist à femme une damoyselle de grant et de noble sanc, filhe do saingnor de Reyveles, et est mors ly dis Rasses nouvellement, dont c'est damaiges, car ilh estoit beaz et bons et de bin jovenes eagez; s'en est demoreis uns fis, nomeis Rasses. Et Daneaz, ly atres freires, est mors sains hoirs. Et, do dit Johan de Liers et de leurs sereurs, sont dois filhes, dont ly une est mariée à Gilhes de Soroséez, saingnor d'Andrimont.

635. Item, Radout, secon fis monssaingnor Houwe de Hacourt, prist à femme Katerine, filhe damme Maron de Brahier, dont issont pluseurs enfans, dont ly uns des fis est marieis alle filhe Gilhet de Gohain, et ly atre alle filhe naturée saingnor Robiert de Saint Loren, canonne de Saint Lambier.

636. Item, damoyselle Perone, leur sereur, fut mariée à Wilhelme le Coirnut de Saint Lynart; s'en trovereis chi devant la genealogie, en capille parlant des filhes monssaingnor Makair delle Heys de Flemale.

637. Item, ly atre sereur fut mariée à Gilhes, fil jadis Gilhon de Lavoit; s'en est on fil, nomeit Johan, qui est nouvellement marieis, et une filhe, mariée à Gerar de Houten, et ont des hoirs. Et ly tieche sereur, nomée damoyselle Katherine, fut mariée à Gossewiens de Flemale, dont mention est chi devant faite, en capille parlant do dit monssaingnor Makair delle Heys. Do dit Gerar de Houten est yssue Maroie, qui est à present femme à Honbiert de Pas de Wonke.

638. Item, ly tirche filhe saingnor Radout Surlés fut mariée à Gilhes de Mes, le hallier; s'en yssirent ly plus beaz enfans de ce paiis, assavoir Johan, Gerart, Gilhes, Colar et Franchois, et trois sereurs, dont ly une fut mariée à Printe, avoweit de Nyvelle, s'en sont ly hoirs; et ly atre fut nonne, et ly tirche, nomée damoyselle Sayve, fut beghine. Ly dis Johan prist à femme damoysel Oede, filhe do saingnor de Warfezéez, dont la genealogie est chi devant escripte. Et ly dis Gilhes soy mariat alle filhe Gilhe de Noefchasteal, dit Begemoxhe, escuwier; s'en est une filhe, mariée à messire Gerars le Pannetire de Seraing, qui nouvellement at pris l'ordenne de chevalerie et at pluseurs enfans. Et tos ly atres hoirs do dit Gilhe de Mes l'ainsneit sont mors sains marieir, ja soice qu'il ne morissent nint jovenes.

639. Chi après deviserons coment damme Magriette, damme de Vellerous, filhe do jadis saingnor Gilhon Surlés, dit le Beir, fut mariée, et la bonne et honorable progene qui de ley est deskondue.

640. Chest damme fut promirement mariée à Johan d'Achou, qui fut de lynages del Preit, doqueil elle out quatre filhe, desqueilles ly premiers fut mariée à on borgois de Liege, nomeit Bertolet delle ruwe de Pont, qui morit sains hoirs. Sy soy remariat à monssaingnor Godefroid de Wyhongne, chevalier, dont mention sierat faite chi après, en la genealogie de monssaingnor Libiert Crepon d'Otééz, son peire; chis messires Godefrois morit assy sains hoirs. Et, tirschement, soy remariat elle à monssaingnor Ernut de Jehaing, jadis chevaliers, freires do bon et do preuz caslelain de Waremme, et n'en demorat nulle hoir. Chis messires Ernus morit alle batailhe à Domartien.

641. Item, ly seconde filhe de la dicte damme Magriette fut mariée à monssaingnor Warnier de Vellerous, freire de monssaingnor Reniers, saingnor de Vellerous, lyqueis messires Reniers fut, après ce, maris à la dicte damme Magriette, sy qu'il vos apparat chi après. Et do dit monssaingnor Warnir issit Ameyles Mylos et une filhe, mariée alle bonne Rigaut de Melen, doqueile mention est faite en foilhet chi devant, en capitle qui traitie des filhes monssaingnor Makair delle Heys de Flemale.

642. Item, ly tirche filhe de la dicte damme Magriette, de son promerain mariage, fut astaléez à on vaillant escuwier, nomeit Henry de Rolouz, et en furent dois filhes, dont ly une fut mariée à Houchon de Bassien, peire à Houwet de Bassien, qui fut bailhier de Condros, et ly atre à Johan le Berwier de Saint Lynar, doqueil Johan mention sierat faite chi après, en capitle qui parlerat do viez saingnor d'Awans. Ly dis Houwés de Bassien fut marieis à damoyselle Aely, sereur de bon monssaingnor Rasses de Gemppe, et n'en est demoreis nul hoirs. Mais ilh, ly dis Houwés, out dois sereurs, dont mention sierat chi après faite, en lieu où nos parlerons de monssaingnor Libiert de Gemppe et de ses enfans.

643. Item, ly quarte filhe do promerain mariage de la dicte damme Magriette fut nomée damoyselle Maghien d'Achou; sy fut promerain femme à Warnier Vachoit de Vellerous, et morit. sains hoirs.

644. Ors deveis savoir que, après le mors do dit Johan d'Achou, la dicte damme Magriette Surlés, sa femme, soy remariat à monssaingnor Renier, saingnor de Vellerous, et en out sept filhe, dont ly premier fut mariée à monssaingnor Johan d'Orelhe, saingnor de Vellerous de part sa dicte femme; s'en furent dois fis, assavoir messires Wilhelmes, sires de Romynnes, et Rennechon, et assy trois filhes, dont ly une fut mariée à Bertrans de Liers, freires à monssaingnor Johan, ly viez voweit de Liers, ly seconde à Johan de Meirs, fil sangnor Gilhon Rigo, esquevin de Liege, et ly tirche à Guys de Fexhe deleis Selins. Chis messires Johan d'Orelhe portoit les armes de Geneffe entiers, assavoir d'argent à on liwon de sable coroneit de geules.

645. Item, ly dis messires Wilhelmes, ainsneis fis de monssaingnor Johan d'Orelhe, fut en sa jovente escuwiers alle damme de Quakebeyke, filhe le conte Ernus de Louz; sy l'en amat la dicte damme, et le prist à mary contre la volenteit de ses amis, et orent on fil et une filhe. Ly fis fut nomeis messires Ernus, sires de Romynnes, et fut bannerés et de merveleuz estat et despens; sy morit sains hoirs, après ce qu'il out weriet, delle conteit de Louz encontre l'evesque et le paiis de Liege, qui ly abbatirent sa noble fortreche de Romynnes, qu'il avoit asseis nouvellement faite et tant costablement et richement edifiie que c'estoit mervele do veioir; et ly enforchont ly evesque Englebiert et ly evesque Johan d'Erkle ses successions, la dicte conteit de Louz; sy fist pais a mechiet et vient demoreir et morit à Liege.

646. Item, ly filhe do jadis monssaingnor Wilhelmes et sereur alle dit monssaingnor Ernut de Romynnes, fut mariée alle bon monssaingnor Johan, saingnor de Hamalles, qui tenus estoit por le plus loyal et proydomme chevalier qui fuist en ce pais; s'en furent on fis et dois filhes, assavoir messires Wilhelmes, qui fut tres beaz et tres gratieuz chevalier et morit sains hoirs alle bataillhe à Bossewylre. Et, des dois filhes, fut ly une mariée en la dukeit de Juley à marissaz d'Alfre, et ly atres à monssaingnor Englebiert delle Marche, chevalier bannerés et sainanor de Lovirwaz, qui estoit oncles delle evesque Englebiert.

647. Delle damme mariée à marissal d'Alfre, en sont trois fis. Ly uns tint la terre de parte son peir. Ly atres, nomeis messires Wilhelmes, est sires de Hamalles et de Monfort sour Ourte; ilh est marieis alle filhe monssaingnor Adan de Kerkehem, et ont des hoirs. Et ses atres freires est de petit regimen.

648. Delle atres damme, mariée à monssaingnor Englebiert, furent dois fis et une filhe, assavoir messires Englebiert, sires de Lovirvaaz, et Johan, qui astoit beaz escuwers et morit juvenes, sains hoirs; et ly filhe est mariée à monssaingnor Gerar de Bastongne, chevaliers. Et fut cest meïsmes damme, après ce, remariée dois fois, assavoir à monssaingnor Waltier de Binkehem et, dierainement, alle viez saingnor de Schoenevorste, et n'en demoront nus hoirs. Et maintenant elle est renduwe recluze à Colongne.

649. Ly dis messires Englebiert ly juvenes soy mariat alle filhe monssaingnor Thiry, saingnor de Seraing, dierain de ce nom, et prist la terre de Walehen avoek ley en mariage; mais ilh n'at nul hoir.

650. Item, ly secon fis monssaingnor Johan d'Oreille, saingnor de Vellerous, nomeis Renechon, morit alle bataillhe à Nyerbonne deleis Huy. Mais ilh estoit marieis alle filhe monssaingnor Thomas d'Asteneur; s'en demorat une filhe, qui fut mariée la premiers fois à monssaingnor Johan de Chierf, saingnor de Barveal, chevalier. qui morit sains hoirs. Et puys soy remariat ly damme à Ernut, fil Watier de Nandren, dit de Corwaremme, escuwer, et fut damme de Vellerous; s'en est uns fis, nomeis Johan, qui nouvellement at pris l'ordenne de chevalerie, et est sires de Vellerous; sy fut marieis alle filhe monssaingnor Rasses de Bierlo, avoweit de Sclachien, chevaliers, et en at on fil de jovene eage.

651. Nos avons parleit des fis monssaingnor Johan d'Oreille; se dirons chi après des filhes, dont ly premier fut mariée à Biertran de Liers, doqueiles tous ly hoirs sont chi devant denomeis, en capitle parlant do monssaingnor Ameyles de Lexhy, et, par tant, nos en deporterons, por nostre mateire abriveir.

652. Ly seconde filhe monssaingnor Johan d'Oreille fut mariée à Johan de Mers, citain de Liege, doqueile furent gran nombre d'enfans, assavoir messires Gilhes et Gossewiens, canones de Saint Johan, Wilhelme, qui morit ultre meire, Johan, qui morit jovene, freires Franchois, qui fut freires meneurs, et tos sont mors sains hoirs; et y at eut pluseurs nonains et dois atres filhes, mariées à dois freires, assavoir ly ainsnée, nomée damoyse Marie, à Johan delle Coir, esquevin de Liege, et ly atre, nommée Magriette, à Gilhe de Coir, son freire; et, de ces dois, est tout ly genealogie escripte chi devant, en capitle parlant de conte de Hozemont.

653. Et ly tirche filhe do dit monssaingnor Johan d'Oreille fut mariée à Guys delle Soxhe de Fexhe, dont y furent et sont encors pluseurs enfans, assavoir Warnier, Johan, Wilhelme de Bearuware, damoyse Angnès, damoyse Marie, et dois atres, dont ly une fut mariée à Watier Biert, de Seliens, et ly atres à Johan de Malle, de Joupprelle.

654. Ly dys Warniers soy mariat alle filhe Johan delle Tour de Fexhe, et en sont pluseurs juvenes enfans. Et Johans, ses freires, morit sains hoirs.

655. Item, Wilhelmes de Bearewar prist à femme la filhe Badewien de Bierleur; s'en est faite mention chi devant, en traitiet des filhes monssaingnor Oury de Bonbays, qui out une des filhes monssaingnor Ameyle de Lexhy.

656. Item, damoyselle Angnés, filhe Guys de Fexhe, soy mariat, promier, à Johan de Malles, dont ilh est uns fis, nomeit Renechon; et, après ce, soy remariat la dicte damoyselle à Olivier de Centefointaines, qui estoit veves; mais, de ce dierrain mariage, ne demorat nulle hoir.

657. Item, damoyselle Marie, ly atre sereur, soy mariat aile plus gratieuz fil de borgois qui, à son temps, fuist en la citeit de Liege, nomeit Colar Flokelés, ly halliers, qui partot parsiwoit les armes; et en sont demoreis pluseurs enfans, assavoir Colart, Tybaut, Guys, Marie, Magriette et Johanne, andois nonains de Vyvengnis. Ly dis Thybaut morit giovane, et ly atres dois ne sont encors marieis. Et la dicte Marie soy mariat à Johan Obiert, maistre de Huy, dont ilh est une giovane filhe; et, secondement, est elle remariée à Gerar de Seraing sor Mouze, qui veves estoit.

658. Item, delle atres sereurs, mariée à Watier Biert, est uns fis, nomeis Guys, qui, promierement, prist à femme une belle filhette, nomée Johanne, filh jadis Colar dit le Bergier, le drappier; s'en at des juvenes enfans. La dicte Johanne trespasat, et Guys, qui est uns gratieuz fis, soy remariat à Katerine, femme jadis Henkin Clouze, ly chasteur, manant sor le Pont d'Ilhe, qui est bonne damme et riches.

659. Item, delle atre sereure, mariée à Johan de Malles, est une filhe tant soilement, mariée à Stas, fil jadis Jonatas, esquevin de Tongres.

660. Nos avons chi devant mis en escripte les personnes estraites delle premier filhe monssaingnor Renier, saingnor de Vellerous, mariée à monssaingnor Johan d'Orelhe, chevalier; sy dirons del seconde.

661. Ly seconde filhe do dit monssaingnor Renier fut mariée à monssaingnor Wilhelme d'Odeurs, chevaliers, qui portoit les armes de Tongres; et en yssirent Goudegonoules, Johans, et une filhe, mariée à monssaingnor Ogiers de Fexhe, jadis chevalier.

662. Godengnoul, ainsneis fis à monssaingnor Wilhelme d'Odeur, out on fil, nomeit Hermand'Odour, dont ilh est ly giovane Godengnoul, qui at la filhe monssaingnor Johan de Jonkehoute, chevalier; et at Gotgnoul une sereur mariée à Art delle Zwane de Treit. Et chis Hermans out à femme la filhe delle sereur Wilhelme de Mombeyke, dont messires Gilhes Maton, chevalier, esquevin de Liege, fut oncles.

663. Item, Johan d'Odoir, fis do jadis monssaingnor Wilhelme, prist à femme damoyselle Ysabeal de Jardien, filhe do jadis Jakemien Festeal, le hallier de Liege; et en furent dois fis, assavoir Wilhelmes de Jardiens et Jakemot.

664. Do dit Wilhelme sont dois filhes, dont ly une est mariée à Wilhelme, fil jadis Wotre de Horpalle, et ly atres n'est point astalée.

665. Et ly dis Jakemiens soy mariat alle filhe Gerar de Colongne, dont ilh est une filhe tant soilement.

666. Item, ly filhe do jadis monssainnor Wilhelmes d'Odeur fut mariée à monssaingnor Ogier de Fexhe, le freires do vaillant monssaingnor Henry de Fexhe, chevalier, esquevin de Liege, dont ilh est faite expresse mention, d'eaz et de leurs hoirs, chi devant, en la genealogie de monssaingnor Heyneman d'Ays.

667. Puyque nos avons declareit la generation des dois filhes monssaingnor Reniers, saingnor de Vellerous, nos parlerons delle tieche, qui fut mariée à Badewiens de Holongne, esquevins de Liege.

668. De ceste tirche filhe et do jadis Badewiens furent trois filhes, dont ly une fut mariée alle voweit de Fleron, saingnor delle Roches, ly seconde à Wilhelme de Warous, fil do saingnor de Warfezéez qui out les xx enfans, et ly tirche à Libiert de Quartier.

669. Delle premiers filhes issit Frank delle Roche et une filhe, mariée à Renewar de Wayme. Chis Frankes out à femme la filhe Pirlot de Horrion, esquevin de Huy, qui astoit do lynages de Thynes, en Condros.

670. Frankes, sires delle Roches et avoweit de Fleron, out plusieurs enfans, assavoir monssaingnor Johan, saingnor delle Roche, avoweit de Fleron, chevalier, esquevin de Liege, qui est vaillant homme, sage et de gran corage, Pirelot, saingnor de Flosteur, qui est mors sains hoirs, et dois sereurs. dont ly une est mariée à monssaingnor Houbien de Fanchon, chevalier, et n'at nul hoir, et ly atre fut mariée à on tres beal escuwier, nomeit Renier, saingnor de Fraypont. Ly deseurnomeis messires Johan soy mariat alle filhe monssaingnor Henry de Bomale, chevalier, et en at planteit de juvenes enfans. Ly dis messires Houbins n'at nul hoir. Et, do dit saingnor de Fraypont, sont yssus messires Tristans, sires de Fraypont, chevaliers, et plusieurs filhes, tant seculier com en religion, les plus belles de ce paiis; dont ly une fut mariée à Biertran de Hanut, escuwier, s'en sont ly hoirs; et croy qu'il y aiet encors des atres astaléez par mariage, dont je n'ay nint bin le connissanche.

671. Item, delle sereur do dit Franke, qui out le dit Renewar, sont plusieurs enfans, fis et filhes, dont ly uns est nomeis Wynekin, ly atre Johan, et des sereurs plusieurs. Chis Wynekin at à femme la filhe monssaingnor Wery Frongnut, chevalier. Et Johan at à femme une des filhes Olivier de Melen. Et ont chis dois freires, Wynekin et Johan, une sereur mariée à Lowy Barbesaléez de Namur. Et, des atres enfans do dit Renewar, je n'ay nint bin connissanche.

672. Item, delle seconde filhe Badewiens de Holongne, mariée à Wilhelme de Warous, trovereis chi devant la declaration, en capitle parlant do saingnor de Warfezeez qui out les xx enfans.

673. Et, delle tirche filhe do dit Badewiens, mariée alle dit Libiert de Quartier, n'est que une damoyelle tant soilement, qui est femme à Ernus de Weys, et n'ont nulle hoir.

674. Item, deveis savoir que ly quatremme filhe monssaingnor Renier de Vellerous fut mariée à Pinchevalle de Wyhongne, et en fut trois filhes. Ly une fut mariée à Gilhekin de Ryanweis, castelain de Drubus; s'en fut une filhe tant soilement, mariée à monssaingnor Thiry de Rochefort, saingnor de Busin, qui morit sains hoir.

675. Ly seconde filhe Pirecheval fut mariee à monssaingnor Ernut de Hautepenne, saingnor de Villereal, dont y sont ly hoirs, desqueis mention est faite chi devant, en capitle parlant de ceaz de Harduémont.

676. Et ly tirche filhe do dit Pirecheval fut mariée en la terre de Fakomont, à on escuwier nomeit Herman de wallehorne.

677. Item, ly Ve filhe monssaingnor Renier de Vellerous fut mariée à monssaingnor Johan Moreal de Horriou; et en furent uns fis et trois filhes, assavoir messires Wilhelme, qui morit sains hoir, et, des filhes, fut ly une mariée alle preuz et gratieuz monssaingnor Rasses de Gemeppe, doqueile et de ses hoirs mention est chi devant faite, en capitle qui parolle delle saingnor de Warfezééz az xx enfans i.

678. Item, ly seconde filhe monssaingnor Johan Moreaz fut mariée à monssaingnor Johan d'Oborne, chevalier, et en furent dois filhes. Ly une fut mariée à Watier de Beythe deleis Tongres, dont y fut ly juvenes Watier de Beythe, qui soy mariat alle bastardes messire Badewien de Montengnis, chant et canones de Saint Lambier; s'en est une filhe.

679. Et ly atres fut mariée, promirement, à messire Libiert Butoir, avoweit de Horriou; s'en sont dois filhes. Ly une fut femme à monssaingnor Englebier delle Marche, manant à Saint Tron; Sy n'en est nulle hoir; et, quant messires Englebiert fut mors, elle reprist à mary le fil Wilhelme de Strate de Saint Tron, l'ostellier. Et ly atres filhe do dit voweit est à present femme à Ryssak de Nayvaing. Quant ly dis voweit fut trespasseis, cest damme, meire de ces filhes, soy remariat à monssaingnor Gobiert de Lowainge, chevalier, manant à Montegniz, lyqueis n'ont nulle hoir.

680. Item, ly tirche filhe monssaingnor Johan Moreaz de Horriou fut mariée à Bossez de Crennewy, dont y sont dois fis et une filhe, assavoir Bosseal et messires Wilhelme de Horriou, chevalier; et ly filhe fut dois fois mariée, assavoir al saingnor d'Ordenge et, apres, à monssaingnor Rasses de Lamynes, et morit sains hoirs; et, do dit Bossez, viskent ly hoirs.

681. Item, ly dis messires Wilhelmes soy mariat à Angnès, filhe Herman de Colongne, ly viez esquevin de Liege, et en at trois enfans, assavoir messire Wilhelme, Herman et Johanne. Chest Johanne est mariée à monssaingnor Joban, saingnor d'Argenteal; Sy sont juvenes et poront avoir planteit d'enfans. Et messires Wilhelmes ly juvenes est nouvellement marieis alle filhe monssaingnor Conrar de Schonenworste, saingnor d'Ellesto et d'Aweilhonriwe.

682 Et ly VIe filhe monssaingnor Renier de Vellerous fut abbeisse del Pais Dieuz. Et ly VVVe morit sains hoir. Ensy aveis d'or en oir tos cheaz et chelles qui sont estrais delle bonne damme Magriette Surlés, qui fut damme de Vellerous et filhe à saingnor Gilhon le Beir, dit Surlés, qui fut secon fis à saingnor Lowy Surlés, engenreis en la sereur le conte Gerar de Hozemont, qui out à femme l'ainsnée filhe monssaingnor Otton de Lexhy, dont ilh fut V filhe; sy retournerons à Lowy Surlés, tirs fis do dit saingnor Lowy Surlés et freires do dit saingnor Gilhon le Beir.

683. Chis Lowy Surlés out à femme l'unne des filhes saingnor Everars de Lowe, dont ses cuzins Gerars de Herkes avoyt eut la parelhe sereur; s'en yssirent Everars et Lowy de Lowe, damme Angnès, nonnes delle Vaz Nostre Damme, une beghine à Saint Albiert; lyqueis Lowys, peires de ces enfans, morit en Engleterre, et los sy enfans morirent sains hoir.

684. Puisque nos avons parleit des fis seculier sainanor Lowy Surlés le viez, nos parlerons chi après de ses filhes, dont ilhe fut chink. Ly premier fut nomée Maroie et soy mariat à monssaingnor Daneal de Hamalle; s'en furent dois fis et dois filhes, assavoir messires Lowys de Hamalles, Ystasses de Hamalles, Magriette, qui fut mariée à Ernekin de Seraing, et une atre, qui fut mariée alle voweit de Rewechon; et ly dis Ystasses morit sains hoir.

685. Ly dis messires Lowys out à femme la filhe monssaingnor Wilhelme Longe Espéez de Gottehem; s'en furent dois fis, assavoir Danealz de Hamale et dans Johan, moynes de Saint Jake, qui fut, après ce, prieuz de Saint Hubiert en Ardenne; lyqueis Daneal soy mariat à Tongres et out trois fis et une filhe, mariée à Johan Groit de Rewechon. De ces trois fis, fut ly ainsneis nomeis Lowys, mais, de ly ne de ses atres dois freires, je nen say qu'il en avient.

686. Item, de la dicte damme Magriette, filhe monssaingnor Daneal de Hamale, qui fut femme à Ernekin de Seraing, issirent messires Daneal ly Pannetirs, messires Gerars et Ernekins.

687. De monssaingnor Daneal ly Pannetirs issirent Vairons de Gehaing, qui soy mariat à Remouchamp, et Gerars de Lymey, en Condros, dont y sont ly hoirs.

688. Item, do dit monssaingnor Gerars le Pannetirs issit Colars ly Pannetirs de Seraing et dois sereurs, dont ly une fut mariée à Wilhelme d'Awelhichamp; s'en sont ly hoirs. Et ly atre at on des enfans saingnor Everars d'llhe; s'en issit Gerars de Seraing, maintenant vivant, qui soy mariat alle filhe Gielhe de Noefcasteal; s'en est une filhe, mariée à monssaingnor Godefroit de Jouplou, dont y sont ly hoirs; lyqueis Gerars est remarieis alle filhe Colar Floklés, citain de Liege, et en at des juvenes enfans.

689. Item, ly dis Colars ly Pannetirs soy mariat alle filhe monssaingnor Johan Obiert de Huy; s'en at on fil chevalier, nommeit monssaingnor Gerars le Pannetiers, et trois filhes, dont ly ainsnée est mariée à Johan le Proydomme de Gemepe, s'en sont pluseurs enfans; ly atres, à Thonars Lambier de Gemepe, et en sont ly hoirs; et ly tirce fut mariée à monssaingnor Johan de Ghelenkerk, se morit sains hoir.

690. Item, Ernekin ly Pannetiers, tirs fis monssaingnor Daneaz, soy mariat alle sereur Johan et Oulry delle Fointaines, de Sains Servais, et morit sains hoirs.

691. Item, ly seconde des chink filhes saingnor Lowy Surlés le viez fut nomée damme Oude et fut mariée à monssaingnor Nannekin de Gottehem, chevalier; s'en issirent sept fis et quatre filhes, assavoir Nannekins, Lowys de Cumetailhes, Lambrexht d'Ophers, canone de Sains Johan, Fastreit, canonnes de Saint Martin, Johan, qui morit sains hoir, dans Nycolle, moynes de Saint Jakeme, et uns atres, moynes de Saintron, damoyse Angnés, damoyse Katerine, damoyse Hauwy, toutes beghinnes, et une atres qui fut nonnes de Mylen.

692. Ly dis Nannekins soy mariat en la vilhe de Gottehem, dont ilh astoit; s'en issit messires Wilhelms de Gottehem, chevalier, et, de ly, en deskendans, est issus Printes de Gottehem, maintenant vivant.

693. Item, Lowys, freires do dit Nannekin, prist à femme une des chamberirs la royne d'Almaingne, qui estoit royne d'Engleterre et femme à roy Richar; et en fut une filhe, nomée Maroie, qui fut femme à monssaingnor Printe de Warencelles; s'en furent trois enfans, Gerars, Lowys et Maroie. Chis Gerars soy mariat en la terre de Facomont; sy ne say ce qu'il en avint. Lowys soy mariat alle filhe do saingnor de Nayvain, sor Mouze, dont Bronsten de Havelaing avoit la parelle sereur.

694. Item, ly tirche des chink filhes saingnor Lowy Surlé le viez fut mariée à monssaingnor Rigaut de Lymont et morit sains hoir.

695. Et ly quarte filhe, nomée damoyselle Angnés, fut beghine et morit sains hoir. Et ly chinqueme, nomée damoyselle Magriette, fut mariée à Johan de Modaulé, et en furent quatre fis et une filhe, assavoir Piron, Johan et Lowys, qui morit sains hoirs; et ly quars fut nomeis Gilhes, et ly filhe Katerine.

696. Chis Gilhes soy mariat à Maheal de Meiffe; s'en furent dois fis et une filhe, assavoir sires Henris, vestis de Flerus, et sires Wilhelmes, vestis de Cleiremont deleis Bealmon; et ly filhe fut nomée Magriette.

697. Ch'est tot che que nos savons des hoirs saingnor Lowy Surlé le viez, qui out la seconde filhe Gerars, le conte de Hozemont, engénrée en la premier a filhe monssaingnor Otton de Lexhy, dont ilh fut chink sereurs; sy retournerons mult arier, por nostre mateire parsiiwier ordinément, car nos revenrons az atres quatre filhes do dit monssaingnor Otton.

698. Ly atres filhes, assavoir ly seconde des quatre filhes monssaingnor Otton de Lexhy, fut mariée à monssaingnor Badewiens de Biersés; s'en furent dois filhes et dois fis. Ly ainsneis des fis fut nomeis messires Badewiens ly Amirans de Biersés et fut chevalier bannerés; et ly atre fut nomeis messires Reniers et fut sires de Vellerous. Ly une des filhes fut mariée à monssaingnor Heyneman de Hanut, ly castelain; et ly atres fut mariée à on borgois de Liege, nomeit saingnor Reniert de Marchiet.

699. Ly devans nomeis messires Badewiens l'Amirans out sept fis, dont ly siiez furent chevaliers, et ly atre canones et cante de Saint Lambiers, et fut nomeis Gerars Gresez.

700. Ly ainsneis des chevaliers deseurdis fut nomeis messires Rigaut; ly autre, messires Johan de Holongne à Pire; ly tir, messires Badewiens de Joupprel; ly quars, messires Jonatas; ly Ve, messires Ameyles; et ly siiesemme, messires Henrys.

701. Item, messires Rigaut, ainsneis fis monssaingnor Badewiens l'Amirans, out trois fis, assavoir Badewiens, Wilhelmes et Gerars. Ly dis Badewiens out une filhe tant soilement, mariée à monssaingnor Johan de Chierf de Huy, chevalier; s'en furent dois fis, messires Hustien de Chierf et messires Gilhes de Fiiez, desqueis chillh de Forchelhoules et de Barveal sont estrais.

702. Item, Wilhelme, secon fis monssaingnor Rigaut, out on fil, nomeit Wilhelme; sy n'en say plus avant. Et ly tirs fis monssaingnor Rigaut devant dit, qui fut nomeis Gerars, chis fut doiens de Saint Poul et l'apeloit on ly Doien Chantreal.

703. Item, messires Johan de Holongne. secon fis monssaingnor Badewien l'Amirans, soy mariat alle filhe saingnor Lambuche d'Ilhe, dont ly viez sires d'Awans avoit la parelle sereur; et elle out dois fis, assavoir monssaingnor Rogiers de Holongne, chevalier, et monssaingnor Johan, qui fut canones de Saint Lambiert. Chis messires Rogiers soy mariat alle filhe monssaingnor Johan, le voweit de Chaiienéz, et en out trois fis et dois filhes assavoir Badewiens le voweit, qui fut esquevin de Liege, Rogier, et Buchar. qui fut canones de Saint Martin; et, des dois sereurs, fut ly une mariée à Houweneaz delle ruwalles de Soverentpont, et ly atres à saingnor Werys do Palays.

704. Ly dis Badewiens soy mariat à une des filhes de Vellerous, assavoir do jovenes monssaingnor Reniers, dont ly viez messires Reniers chi devant nomeis estoit taiions, et en out trois filhes, desqueilles ilh est chi devant faite expresse mention, en capille de Surlés, en liu où ilh parole de jovenes monssaingnor Renier, saingnor de Vellerous, qui out à femme damme Magriette, filhe à saingnor Gilhon Surlés.

705. Item, Rogiers. freire do dit Badewiens, fut de son sains debiliteit. Nequident, ilh out on fil, nommeil Badewiens, qui soy mariat alle filhe do viez Roufar de Mons, et en sont dois fis et une filhe. Ly ainsneis est nomeis Badewiens, qui est marieis alle filhe Wilhelme Wilhkar d'Awans; ly atres, Johan ly Polens, qui est nouvellement marieis alle filhe Jakemien de Theuz ly juvenes, ly Halliers; et ly filhe est mariée à Wilhelme, fil jadis monssaingnor Bastien Boeleau de Grasse, chevalier, et en sont ly hoirs. Et deveis savoir que ly viez Roufar deseurdis out à femme la filhe monssaingnor Johan le Polen d'Aleur, chevalier.

706. Item. ly tir fis monssaingnor Badewiens l'Amirans fut nomeis messires Badewiens de Joupprel. Ilh out une filhe mariée à Thorynes, en Braybant, sy que ly hoirs sont enlongiez de nostre cognissance.

707. Ly quars fis monssaingnor Badewiens l'Amirans fut nomeis messires Jonatas et out on fil. nommeit monssaingnor Ghilhotien de Biersés, qui out dois fis, Johan et Jonatas. Chis Jonatas fut gransires de Jonatas delle Wege, esquevin de Tongres, dont y sont ly hoirs, et assy en sont pluseurs menuwes gens.

708. Et, des atres dois fis de monssaingnor Badewiens l'Amirans, qui furent nomeis messires Ameyles et messires Henry, je n'ay pris information sor laquile je moy powisse affiier.

709. Et quanteal que je ne saice d'oir en atre, par faute d'information, denomeir tos cheaz qui sont deskendus en avalant des hoirs monssaingnor Badewien l'Amirans, nequident, en generaliteit, je say bin, par l'aprise des anchiens, que sires Gilhes de Noevis, qui out à femme la sereur monssaingnor Herman de Charneur, et qui fut taiions à monssaingnor Ernus, monssainanor Watier et monssaingnor Aoust de Charneur, estoit d'une des filhes de Biersés, et, par tant, messires Ernus de Charneur, ses fis, qui fut ly uns des promerains fis de borgois qui oukes presist ordenne de chevalerie à Liege et fut fais chevaliers avoukes monssaingnor Johan Surlés, qui estoit assy fis de borgois. Ilh prist les armes de part sa meire: d'or à une crois dentéez de geules, et les brisat, de part son peire, d'on quartier de Biersés, assavoir bourleit d'argent et d'azure, à on lion de geules. Et ce poreis veioir az Precheuz à Liege, là ly escus do dit monssaingnor Ernut et de ses hoirs pendent. Assy sont do lynages de Biersés, et des plus proysmes, cilh qui sont issus de monssaingnor Gerar de Biersés dierainement devieis, car ilh yssit d'on des freires; et en furent Gerars et Johan de Biersés, bons escuwiers, dont ly femme Martéal de Mirmorte, saingnor delle Nouevilhe, issit do dit Gerars; et sont issus pluseurs suffissant personnes de ces dois freires. Sy en fut ly femme Henry, freires à monssaingnor Alixandre de Saint Servais, et damoyselle Maron de Cheval, damoyselle Oede de Biersés, ly beghine; et en fut Gilhar del Canges. Et assy sont yssus do dit lynages tos ly Panéez, et Gilhes d'Okirs, Amiras, ses freires, ly Mailhars delle Saveniers, Ottes d'Ilhe, et gran nombres d'atres que je ne say nomeir.

710. Puyque nos avons dit ce que nos savons de monssaingnor Badewiens l'Amirans de Biersés, nos dirons chi après de monssaingnor Renier, son freire, saingnor de Vellerous, et puy retournerons à leurs dois sereurs.

711. Messires Reniers, freire à monssaingnor Badewiens l'Amirans, fut sires de Vellerous et out diiez enfans, assavoir siiez chevalier, trois escuwiers, et une filhe; assavoir, sont messires Warnier le Chien, messires Hermans de Sclachins, messires Radout de Mons, messires Johan Boleau, messires Andrier, messires Thiry Pannéez, Badewien de Foreste, Bacheleir et Johans; et ly filhe fut mariée à monssaingnor Gerars de Heran, chevalier.

712. Item, ly dis messires Warniers le Chiens soy mariat al filhe monssaingnor Ameiles de Fologne, qui portoit d'azure à on chief d'argent, à on lion ranpan de geules, et crioit Fologne. Ilh en out noef fis et quatre filhes, assavoir monssaingnor Reniers, monssaingnor Warniers, Ameyles, dit Dammeheaz, Colar, dit Moreheaz, ly viez Bocho, Paniot, Clarin, Wilhomin, et ly atre fut abbeis de Saint Loren deleis Liege. Et vous fay assavoir que tous ly enfans do dit monssaingnor Warnier present les dit armes de Fologne, de part leur meire; mais ilh retinrent ly cry de Vellerous, à caze delle hateur, et ce meismes cry ont toz chez qui portent le lupar en ce paiis, assavoir tous ly Bareis et chilh de Graz.

713. Messires Reniers ly juvenes, qui fut ainsneis fis do dit monssaingnor Warnier le Chien, fut sires de Vellerous. Iih soy mariat à damme Magritte Surlète. Et messires Warnirs, ses freires, prist à femme l'une des filhes la dicte damme Magritte, qu'elle avoit eut de Johan d'Achou, son devantrain marit; desqueis et de tos leurs hoirs ly genealogie est chi devant contenue, en l'istore de chez de Hozemont, en capitle parlant des Surlés.

714. Item, Ameiles Dameheaz soy mariat à une femme qui estoit de chez de Goyhaing de Flemalle; s'en issirent Ameyles, dis ly Gros Mylos, et Wilhelmes Dameheaz, et une damoyselle, mariée alle viez Bareit de Strailes.

715. Ly dis Ameyles Mylos soy mariat à une des filhes le viez saingnor d'Awans, de son secon mariage; s'en issirent Ameiles Dameheaz. maintenant vivant, qui at à femme damoyselle Maroie, filhe jadis Warnier de Lavoir, et dois sereurs, dont ly une est morte sains hoir, et ly atre, est mariée à Marneffe, en la terre de Mouhaut; s'en sont ly hoirs.

716. Item, do dit Ameile Dameheal et delle filhe Warnier de Lavoir sont trois fis et dois filhes, desqueis mention sierat faite chi après, en capitle parlant do saingnor d'Awans.

717 Item, Wilhelmes Dameheaz, freires al Gros Mylot deseurnomeit, soy mariat alle sereure Henry delle Heys de Flemalle, si que, de ly et de ses hoirs, trovereis le conte chi devant, en l'ystore chez de Hozemont, en capitle parlant de monssaingnor Makair del Heys.

718. Item, delle sereur qui fut mariée alle viez Bareit de Strailes, issirent Bareis de Strailes, maistres Coirbeaz, qui fut cantes et canonnes de Saint Denys, et sires ... , qui fut prestres; et orent trois sereurs, dont ly une fut mariée alle viez Colar Flokelet, le hallier, se n'en est nus hoirs; ly atre, à Frankar de Momelette, s'en est uns fis et une filhe, mariée à Henry de Rolouz, qui en at des enfans; et ly tirce ne fut onkes mariée.

719. Ly deseurnomeis Bareis, fis do viez Bareit de Strailes, soy mariat à Geneffe; s'en est messires Ameyles Bareis de Strailes, sires d'Otééz, chevaliers, qui at à femme la filhe Ystasses de Hamalles, saingnor de Soie en Ardenne, lyqueys messires Ameyles at des sereurs qui ont des hoirs.

720. Item, Colars, dis Moreaz, fis monssaingnor Warnier le Chien, soy mariat alle filhe monssaingnor Warnier del Sar, en la terre de Dollehen, qui portoit les armes de Barxhon: de synople à une aygle d'argent; s'en issirent trois fis et trois filhes, assavoir messires Johan del Champ de Vellerous, chevaliers, et ly dois atres fis morirent sains hoir. Ly dis messires Johan soy mariat alle sereure monssaingnor Ameile, avoweit de Kemexhe, chevalier; doqueile et de ses hoirs vos trovereis chi devant la declaration, en la genealogie de monssaingnor Ameile de Lexhy, en capitle parlant de monssaingnor Rigaut de Beariu.

721. Item, ly une des sereurs do dit monssaingnor Johan delle Champ fut mariée alle viez Panééz de Biersés; s'en furent pluseurs enfans, qui morirent sains hoir, excepteit une filhe, qui fut mariée à Wilhelme Wilhekar d'Awans et nomée damoyselle Adilhe, dont y sont pluseurs enfans de bonne nateur et condition, qui ont planteit d'oirs.

722. Item, ly seconde sereur do dit monssaingnor Johan do Champ fut mariée à Renart, dit l'Ardenois, de Lexhy; s'en issit Colars Renars, qui soy mariat alle filhe monssaingnor Hombier de Bertinhers, chevalier, dont y sont ly hoirs à present; desqueis Renars est ly ainsneis, qui est marieis alle filhe monssaingnor Johan de Roveroit et en at des hoirs.

723. Et ly tirce sereur monssaingnor Johan delle Champ fut mariée à Bareit de Vellerous; s'en issirent Wilhelmes Bareis et Colars Moreaz. Ly dis Wilhelmes n'at nulle hoir. Et ly dis Colars soy mariat à Ysabeal, filhe Gerars de Vyle; s'en est uns fis tant soilement.

724. Item, Bocho, chinquemes fis monssaingnor Warnier le Chien, prist à femme damoyselle Ysabeal, filhe monssaingnor Warnier delle Sar, dont Moreaz, ses freires, avoit la parelhe sereur, sen issit Warnirs Bocho de Vellerous, qui soy mariat alle filhe monssaingnor Anthone de Gemeppe; sen issit Goffin Warnirs, qui fut marieis alle filhe Johan le Berwier de Rolouz, dont ilh est une filhe mariée à Badewien de Haley, fil Anseal de Blehen, et ont des hoirs. Et quant ly viez Bocho fut devieis, la dicte damoyselle Ysabeal del Sar, sa femme, soy remariat à Ameile de Holengnoul, dont ilh est Waltier, maintenant vivant, et une sereur, mariée à Gerar Giloteal de Goreu, dont y sont ly hoirs.

725. Et deveis savoir que ly atres quatre fis monssaingnor Warnier le Chien morirent sains hoir; sy retournerons à ses chinques filhes.

726. Ly promire filhe do dit monssaingnor Warnier fut mariée à monssaingnor Lambier de Vorous, chevalier; s'en issit Mylars et assy dois sereurs. Do dit Mylars issit Lambars. De Lambar issirent Johan Lambars et pluseurs atres.

727. Item, ly une des sereurs le dit Mylar fut mariée à on varleit, nomeit Skendremale, qui estoit de Serangne le Casteal; s'en issirent Johans et Ameiles de Skendremale, freires, et leurs sereurs. Des devant nomeis Johan et Ameile sont ly hoirs à present. Et, de leurs sereurs, fut ly une mariée alle bon bastar de Seraing, nomeit Thiry; s'en sont issus ly enfans de Rohelhééz, dont ilh est planteit. Et ly atre sereur fut mariée à Gerart Renart de Seraing; s'en sont ly hoirs.

728. Item, ly seconde sereur do dit Mylar fut mariée à Johan l'Anneit de Fexhe; s'en sont issus Pakeaz de Momelette et pluseurs atres.

729. Item, ly seconde filhe monssaingnor Warnier le Chien fut mariée à Johan le Varlet d'Aleure; s'en issit messires Libiers ly Polens, chevaliers; doqueile et de ses hoirs mention sierat chi après faite, en la genealogie de monssaingnor Breton le jovene de Warous. Ly tirce filhe monssaingnor Warnier fut mariée à Lexhy; mais, des hoirs, je n'ay nul information. Et ly quatemme fut mariée à Jouppilhe deleis Liege; s'en issit messires Gilhes del Aytre, chevalier, qui out pluseurs enfans, qui sont formors et dont on ne faite nul conte.

730. Item, messires Hermans de Sclachiens, freires à monssaingnor Warnir le Chien et secon fis al viez monssaingnor Renier de Vellerous, out une filhe tant soilement, nomée Geyle; sen issit messires Gerars de Bierlouz, et messires Gontirs Conrars, ses fis, et tous si hoirs dont ilh n'est gran nombre.

731. Item, messires Radouz de Mons, tirs fis monssaingnor Renier de Vellerous, out on fil, nomeit Radout, doqueil je ne suy nint bien infourmeis.

732. Item, messires Johan Boyleawe, quar fis monssaingnor Renier de Vellerous, encargat atre blazon que ses devaintrains n'awissent porteit, car ilh prist les armes d'Awans à on satoir de geules et cryat Domartien; et ces armes sont à present noméez les droites armes de Sclachiens. Ilh soy mariat alle filhe monssaingnor Ystasse, le viez frank homme de Houlgnoul; s'en furent dois fis et une filhe, assavoir Johan et Hermans, et Katherine. Chis Johans fut peire de monssaingnor Johan Boyleawe de Mons, chevaliers, esquevin de Liege et bailhier de Saint Lambier, et d'unne damoyselle qui fut mariée à Gerennevilhe sor Gayre; s'en issirent Johan Boyleawe, manans en Torens à Liege, et Badewiens, ses freires. Ly dis Johans ne fut onkes marieis. Et do dit Badewiens sont trois enfans, assavoir Robiers, qui point n'est marieis, et Johans de Gerenvilhe, qui at à femme la filhe Jakemien Motet, le cangeur; et leur sereur est mariée à Bareit de Vorous, escuwier; et d'eaz toz n'est nus hoirs.

733. Item, ly dis messires Johan Boyleawe, secon de ce nom, qui fut esquevins de Liege, prist à femme une des filhes maistre Johans des Marés, l'avokaut, engenrée en la sereur des enfans do casteal de Seliens; s'en furent gran nombre d'enfans, assavoir messires Johan Boyleawe, chevaliers, qui morit alle bataille à Bossewilre, messires Wilhelmes, canonnes de Saint Lambier et docteur en droit et en lois, messires Badewiens, canonnes de Saint Servais de Treit, on atre moynes de Flones et vestit de Hermalles, on atre nomeit Rasse de Mons, une filhe mariée à Johan de Meylen, dit d'Ardancourt, fil do bon Rigaut de Meylen, une atre mariée à Lambier de Freires, le vairainschohier, et quatre atres, dont les dois furent nonains à Vivengnis, et les atres dois nonains delle Ramée, et ly une d'elles en fut abbeisse.

734. Ly dis messires Johan Booleawe ly juvenes, qui morit à Bossewilre, soy mariat à damoyselle Johanne de Votemme, sereur alle bon Wilhelme de Fexhe, et en furent pluseurs enfans, assavoir Johans, Wilhelmes, Ernus, damoyselle Enghine, damoyselle Johanne et damoyselle Aely, et damme Magritte. nonne delle Ramée; et, de tous eaz, n'est nus hoirs.

735. De Rasse, l'atre freire, sont ly hoirs à present. Et do dit Johan de Meylen sont assy pluseurs enfans. Et do dit Lambier de Freres furent dois fis et dois filhes. Ly uns des fis morit juvenes. Et, des filhes, fut ly une mariée à Waltier de Houppain de Flemale, et ly atre à Werar de Vyerney; s'en sont des juvenes enfans. Et ly atres fis do dit Lambier, qui est nomeis Badewiens, est debonaires, paysiebles et cortois, et en habit de clerc, et n'at nulle entente de marieir.

736. Item, Hermans, qui fut fis alle plus viez monssaingnor Johan Boyleawe, si qu'il soy contint chi devant, soy mariat à Gemeppe sour Mouze et out dois fis. Del unk, sont issus ly Briffouz; et, delle atre, issirent Tailhefiers, et assy Boyleawe et Counars, lyqueis morirent alle bataille à Dommartien; et assy BoyloTtes, fil do dit Boyleawe, y morit; et orent assy ly dis Counars et Boyleawe une sereur, nomée damoyselle Ave, et assy des atres enfans, dont y sont deskendus tous ly Boyleawes de Gemeppe, Johan Boyleawe de Tyleur, ly avant parlirs, Lambiers le Roy, ses freires, ly Beliens de Gemeppe, ly Beghelos, ly Roiietez de Tyleure, et pluseurs atres.

737. Item, messires Andrier, ly chinquemes fis monssaingnor Renier, le viez saingnor de Vellerous, soy mariat alle filhe monssaingnor Johan Locreal, fil monssaingnor Hombier de Lexhy; s'en issirent, en deskendant, messires Johan de Parfonriu, messires Andries Brakes de Hodires, Ansez de Lexhy, Badewiens Panios, esquevin de Liege, et generalmente tuit chilh de Hodires et de Comblen. Et portoit chis messires Andrier atre blazon que ses freires, car ilh portat de siiez pieches d'or et de sable, et crioit Comblen; et ly alcons de ses hoirs misent en l'escut on lyon de geules.

738. Item, de monssaingnor Thiry Panée, qui fut ly siseme freires, furent ly hoirs, qui tousjours ont maintenu le soron des Panée;: mais ilh ne sont nint de ma cognissanche.

739. Item, Badewiens de Forest, septemme fis de viez monssaingnor Renier de Vellerous, out une tilhe mariée à Liege, à saingnor Piron delle Urs, dont ilh yssit Johan del Ours, peires à damme Angnès Pelage, qui prist à marit Lambuche Pelage, dont ly hoirs sont tous formors.

740. Item, ly VIIIe fis monssaingnor Renier, le viez saingnor de Vellerous, fut nomeis Bacheleirs; et, de cely, issit ly Amiras de Ramey, qui fut gransires à Gilet d'Okirs et à Amiran, son freire, qui demorat à Liege, dont ilh n'est nulle hoir.

741. Et ly IXe fis out nom Johan; sy n'ay, des hoirs, nulle cognissanche.

742. Mais ly filhe, assavoir ly sereur des IX freires deseurdis, fut mariée à monssaingnor Gerart de Heran, chevalier, qui en out on fil et dois filhes. Ly fis fut nomeis messires Gerars de Bierlouz. Et, des dois filhes, fut ly une mariée à monssaingnor Colart de Bossut deleis Covien; s'en issirent Houwars et Gerars de Bossut, dont y sont ly hoirs. Et ly atre sereur fut mariée alle Maleaise; s'en issit Johan delle Maleaise, dont y sont ly hoirs assy.

743 Par ce traittiet vos at esteit declareie la genealogie des dois fis monssaingnor Badewien de Biersés, assavoir de monssaingnor Badewien l'Amiran et de monssaingnor Renier, le viez saingnor de Vellerouz; s'y retournerons à leurs dois sereures, filhes do viez monssaingnor Badewien devant nomeis. Ly premiere fut mariée à monssaingnor Heyneman, castelain de Hanut; s'en fut uns fis, dont tuit chilh de casteal de Hanut sont estrais, et en fut dois filhes, dont ly année fut mariée à monssaingnor Jakeme, saingnor de Chaylles, chevalier bannerés; s'en furent quatre fis et une filhe. Ly ainsneis fut nomeis messires Rasses, ly secons messires Jakeme de Loieres, ly tirs Johans, et ly quars Gerars, sy morit sains hoir; et ly filhe fut mariée à monssaingnor Gerart delle Porcherie, en Franche; sy n'ay, des hoirs, nul connissanche.

744. Item, deveis savoir que ly dis messires Rasses, ainsneis fis do viez monssaingnor Jakeme, saingnor de Chayles, prist à femme la filhe do saingnor de Greis, en Braybant, et en out trois enfans. assavoir: monssaingnor Jakeme, saingnor de Chayles, dierainement trespasseis, qui fut tres beaz et eloquens chevaliers; Rasse de Forfouz; et une filhe, mariée à Vileir sor Leche, dont Johans, sires de Vileir à present, est issus, et une sereur, dont ly enfans de Noierfontaines, en Ardenne, sont issus. Messires Jakemes soy mariat alle filhe monssaingnor Lambier de Harduémont, saingnor de Hautepenne; s'en issirent messires Rasses, sires de Chayles, et Jakemars, ses freires ly dis messires Rasses fut petit, mais ce fut, tant qu'i out santeit, ly plus apiers et ly plus rades chevaliers en tous mestirs d'armes, selonc son corps, qui fuist en ce païs. Ilh prist à femme damme Magritte de Louz, filhe à noble homme monssaingnor Ernut d'Agymont, saingnor de Thynes, mais ilh morit sains hoir; et la dicte damme soy remariat à monssaingnor Wilhelme Prost de Meliens, dont elle at pluseurs enfans.

745. Item, ly dis Jakemars de Chayles soy mariat alle filhe monssaingnor Lowy de Harzéez et en at planteit d'enfans, mais ilh at esteit de tres petit gouvernement.

746. Item. ly dis Rasses de Forfouz out une filhe, mariée à Henry delle Monzéez, bailhier de Condros, dont y sont ly hoirs à present.

747. Item, messires Jakeme de Loieres, secon fis al viez monssaingnor Jakeme, saingnor de Chayles, bannerés, out une filhe tant soilement, mariée alle viez saingnor de Gounes, dont chilh de Gounes,

messires Jakemes, messires Lambier, ses freires, leur sereur, et leurs hoirs, sont deskendus. Et ja soice que chilh de Chayles et de Gounes soy mariassent ly uns alle atre, nequident ilh estoient issus d'on linage et d'on ventre, car, anchienement, ly sires de Beafor sor Mouze, ly sires de Falais et ly sires de Gounes furent freires germains, et ly viez messires Jakeme de Chayles fut leurs cuzins germains, et furent bin noble de sanc et durement poissans; et weriont alle evesque de Liepe, nomeit Johan d'Enghien, mult damageusement, et fut ly contes de Namur leurs aydans, dont tres griez et irrecuperables domaiges avinrent, ensy que par les coronykes de Saint Lambier vos porat apparoir, laqueille werre commenchat tantost après ce que ly evesques Henris de Guelres fut deposeis, assavoir l'an mil dois cens LXXV. Sy portoit ly sires de Beafor d'or a une bende à dois germelles de geules; ly sires de Falais et chilh de Gounes, d'argent alle bende germelles de geules; et chilh de Chayles, d'yerminne alle bende germelle et vermeilhe. Et chilh de Spontins sont assy de ce meïsmes linages; et crient tos Beafor.

748. Item, ly seconde filhe monssaingnor Heynemant, castelain de Hanut. fut mariée à monssaingnor Wilhelme de Leutes; s'en issit messires Jakemes de Leutes et ses sereurs, et leurs hoirs; lyqueis messires Jakeme portoit les armes de Tongres, et ly dis messires Heynemans portoit les armes de Hanut: d'or à trois faxhes de sable.

749. Item, ly seconde filhe do viez monssaingnor Badewiens de Biersés fut mariée à Liege, à saingnor Renier de Marchiet, dont ilh fut uns fis, nomeis messires Hermans de Frangééz, chevaliers.

750. Chis chevaliers out on fil, nomeit Renier, qui soy mariat à une damoysele de Blalouz, qui astoit do linage de Warous, sereur à Gerar le Germeal; s'en issirent dois fis et plusieurs filhes, assavoir Abrahans de Warous, cangeur de Liege, et Hermans de Blalouz, manans à Tongres; doqueile Abraham sont demorééz dois filhes, et croy que, do dit Herman, ne soit nus hoirs.

751. Nos avons chi desoir traitiet des dois filhes monssaingnor Otton de Lexhy; sy dirons chi après des atres dois.

752. Item, ly tirce filhe monssaingnor Otton de Lexhy fut mariée à monssaingnor Wilhelme de Sassenbrouke, en la conteit de Louz, qui out noef fis à chevaliers el planleit de filhe, dont toute ly chevalerie delle conteit de Louz est estraitte; et furent jadis sy poissans qu'il weriont al conte de Louz et demandont, à ly, journée de balailhe, ensi que par les anchiens at esteit recordeit d'oir en atre. Chis sires de Sassebrouk portoit d'or à on chief de sable et cryoit Sassebrouk.

753. Item, ly quart et dieraine filhe monssaingnor Otton de Lexhy fut mariée à monssaingnor Wilhelmes Ronchiens de Hacourt, qui portoit les armes de Hacourt; s'en y at alcons qui les portent de geules à on satoir d'argent, à quatre myerlettes d'argent, et alcons qui les portent de sables à on satoir d'argent, à quatre myerlettes d'argent. Chis messires Wilhelmes out trois fis à chevalier, et on atres qui fut abbés de Saint Loren, qui fut nomeis Henry, et une filhe mariée à Liege.

754. Ly ainsneis de ces trois chevaliers fut nomeis messire Ameile de Wonke. Ilh out on fil, nomeit Henrys le Polen, dont ilh issit Ameyles de Wonke, borgois de Liege, qui fut durement ryches et morit sains hoirs legitime; mais ilh out pluseurs enfans natureis, marles et femelles, qui ont des hoirs à planteit. Chis messires Ameyles portat de sable à on satoir d'argent, à quatre mierlettes d'argent.

755. Item, ly socon de ces trois chevaliers fut nomeis messires Rigaut, qui out dois fis et plusieurs filhes. Ly uns fut nomeis Rygaut ly Sayves, canonnes de Saint Denys à Liege; et ly atres, dans Wilhelmes, qui fut moynes de Saint Loren. Et, des sereurs, issit, en deskendans, Lambier

Grangilhon, borgoys de Liege, qui out plusieurs filhes; et, des atres, sont issus plusieurs gens demorans à Hacourt et là entour, portans de geules à on satoir d'argent, à quatre mierlettes d'argent.

756. Item, ly tirs de ces trois freires chevaliers fut nomeis messires Rasses. Et, par tant que sy freires morirent sains hoir marles, si hoirs encargont les armes tout entieres, ensy que leurs gransires les avoit portéiez. Chis messires Rasses out dois fis et une filhe. Ly ainsneis fut nomeis Houwars, sires de Baronvilhe, par tant qu'il soy mariat à Baronvilhe en Famenne; et, de ly, sont dyskendus ly enfans de Baronvilhe, Houwar et Pynkar, qui ors sont, et pluseurs atres.

757. Do secon freires sont issus chilh de Brouk de Hacourt. Et ly sereur fut mariée à saingnor Johans Noyhé, borgois de Liege, freires à saingnor Gilhon le Beal del Cange; s'en furent trois fis, assavoir Rassekins delle Canges, messires Houve de Hacourt, chevalier, et freire Henry, abbés de Bealrepart. Chis enfans laissent les armes d'Ilhe, que leur peires portoit, et prisent les armes de Hacourt, de part leur meire; et orent une sereur, mariée à Abrahans de Warous, manant à Warous, dont y sont ly hoirs.

758. Ly dis Rassekins delle Cange out une filhe, qui, promierement, fut mariée à Johan Maton, freire de monssaingnor Gilhe Maton, chevalier, esquevin de Liege; s'en fut dois filhes. Ly une fut mariée à Henry de Bokeho, escuwier, dont y sont ly hoirs. Et ly atre fut mariée à Servais, fil Henry Houweneali; sen issirent Henris, Johans Matons, et une filhe, mariée en la conteit de Louz, et une atre, qui est nonne à Herkenrode. Ly dis Henrys Houweneal ly juvenes prist à femme la filhe Henry Polarde de Saint Johanstrée, qui estoit nonne à Herkenrode; s'en sont ly hoirs. Et ly dis Johans Matons est enlongiez de sa femme et n'at nul hoir. Et, quant le filhe Rassekin fut veve do dit Johan Maton le viez, elle soy remariat à monssaingnor Thibaut de Langdris, chevalier, esquevin de Liege, qui veves estoit delle filhe Everar de Cheval; et en fut on fis, nomeis Johans Sains Terre, qui fut chevaliers et, après ce, sires de Landris, beaz et gratieus et plaisans; sy morit sains hoirs, bin juvenes d'eage, ja soice qu'il fuist dois fois marieis, car ilh out promirement la filhe monssaingnor Johan delle Grange, chevalier, et secondement la filhe do saingnor de Bierlouz. Et, par le mort de cesty saingnor de Langdris, furent perdues les armes et ly sournons de Langdris.

759. Item, do dit monssaingnor Houwe de Hacourt, freire al dit Rassekin delle Cange, trovereis toule l'estration en la genealogie des Surlés, chi devant, en capitle qui faite mention de saingnor Radout Surllet, dont ly femme do dit monssaingnor Houwe estoite estraitte.

760. Vos aveis chi devant la genealogie des trois fis monssaingnor Wilhelme Ronchin de Hacourt; se dyrons chi après de sa filhe, qui fut mariée à Liege, à on halier qui demoroit alle maison c'on dist do Jardin, seante devant les Freires Meneurs. De ces dois conjoins issit Johan Festeaz, ly halirs, qui soy mariat alle filhe do viez Mailhewair de Saint Servais, dont ilh out dois fis et trois filhes. Ly ainsneis fut nomeis Jakemiens Festeaz de Jardin, et ly atre fut chantre et canones de Louz.

761. Ly dis Jakemiens Festeaz laissat les armes de son peire et prist les armes de Hacourt, de part sa grandamme, assavoir de sable à on satoir d'argent, à quatre mierlettes d'argent, et y mist teile différenche qu'il y afferoit. Ilh soy mariat à Adioule, filhe à saingnor Jakemon de Coir, dit al Gros Neis, esquevin de Liege, dont messires Ystasses, frans hons de Holengnoul, chevaliers, et Johan Henroie del Preit, escuwiers, orent les atres dois sereurs.

762 Do dit Jakeme Festeal issirent quatre fis et dois filhes seculiers. Ly uns de ces fis fut canones à Louz, et là meïsmes fut ilh tuweis. Et dois des atres morirent alle bataille al tyer de Nyerbonne, deleis Huy. Et ly quars ne fut point astaleis, si que tous quatre morirent sains hoir. Et, des dois filhes, fut ly une nomée Magritte, et ly atre Ysabeal. La dicte Magritte fut promirement mariée à

Lowy delle Wege, escuwier, qui morit sains hoir, et, secondement, à monssaingnor Lowy d'Uffey, chevalier, maieur et esquevin de Liege; doqueile demorat une filhe tant soilement, nomée Marie, qui clochoit des dois costeis, mais tres belle estoit de viaire; se fut mariée à monssaingnor Johan de Ghoilenkerke le jovene, dont y sont à present quatre filhez, mais les trois annéez ont petitement useit do conseilhe de leurs amis, et ly plus jovene fut mariée à Englebier de Joupilhe, escuwier; s'en est demorée une jovene filhette tant soilement.

763. Item, Ysabeal, seconde filhe Jakemien Festeal, fut mariée à Johan, fil jadis monssaingnor Wilhelme d'Oudeur, chevalier, doqueile mention est faite chi devant, en la genealogie des Surlés, en capitle parlant delle bonne damme de Vellerous; sy m'en deporteray à tant.

764. Item, ly une des sereurs Jakemien Festeal fut mariée à Alixandre de Biersés, dit le Vilain de Sains Servais, le hallier; s'en issit Johan de Jardin, qui amat les armes et parsiwit jostes et behours. Ilh fut mult acceptables, si que je ay oüt recorder, et soy mariat à Beatri, filhe Floven de Saint Servais. Chis Flovens portoient les armes de Saint Martin, assavoir d'erminez à on labeal à trois pendans de geules. Et ly dis Johans de Jardin prist, de part sa meire, les armes de Hacourt: de sable à on satoir d'argent, à quatre mierlettes d'argent, et les brisat d'on skouchet enemy le satoir, qui estoit de geules à on lion d'argent, de part son peire. Et ay oüt dire le viez Waltier de Hautepenne, qui demoroit à Skendremale, que c'estoient les droites armes de Skendremale, ja soice que je n'en veys ouques granment en nostre paiis; lyqueis Waltier out pres de cent ans anchois qu'il trespassat.

765. De Johan de Jardien et de Beatty deseurnomeis issit Alixandre de Jardin de Seraing et une filhe, mariée à Symon de Goyhainge, dont y sont ly hoirs. Et, quant ly dis Johans de Jardin fut trespasseis, la dit Beatty soy remariat à monssaingnor Johan Polarde, chevaliers et esquevins de Liege, qui estoit veves. Et ly dis Alixandre prist à femme l'unne des filhe monssaingnor Johan, qu'il avoit de son promerain mariage, si que ly peires et ly filhe orent le meire et le fil. De cesty mariage out ly dis Alixandres une filhe, nomée Ysabeal, qui est mariée à Johan de Casteal, de Gemeppe sor Mouze; s'en sont plusieurs enfans. Et, quant ly dis Alixandres fut veves, ilh soy remariat à damoyselle Maroie, sereur germaine do dit Johan de Casteal; s'en out dois enfans, assavoir monssaingnor Johan de Seraing, chevaliers, saingnor de Houten et d'Onche, maintenant vivant en gran prosperiteit, et damoyselle Beatty, qui fut mariée à Henry de Fexhe, escuwiers, et morit sains hoirs.

766. Ly dis messires Johans de Seraing soy mariat à damme Ysabeal de Gochincourt, filhe de Gilhebiert de Gochincourt, escuwier. Elle fut tres belle damme, frank et de grant maniere. De ces dois conjons sont chink mult beaz juvenes enfans, assavoir Alixandre, Gilhebiert, Johan, Johanne et Maroie, qui leur lynages poront grandement regenerer. Et, quant la dicte damme fut trespasseez, ly dis messires Johan soy remariat à Ysabeal, filhe Pirar de Suriche, borgois de Namur, engenrée en la sereur do saingnor de Warous et de Hautepenne, laqueile damme est nouvellement trespassee sains hoirs.

767. Item, ly seconde sereur Jakemien Festeal soy mariat à Henry de Foseit et morit sains hoir. Et ly tirche usat sa vie en beghinage. Encors est assavoir que ly dis Jakemien Festeal out une onke, de part le dit Johan Festeal, son peire, qui fut peire de Henryt le Rat de Noevis, dont ilh issit Maroie, qui fut femme à monssaingnor Jake Chabot, chevalier, maieur et esquevin de Liege, et Johans de Ratiier, ly cangiier, qui morit sains hoir.

768. Je avoy recorder chi devant que damme Beatty le Flovenresse reprint secondement par mariage monssaingnor Johan Polarde, après le trespasse de Johan delle Jardin; sy vous diray queis hoirs ilh en issirent. De cesty mariage fut Henry Polarde, esquevins de Huy, et Maroie, sa sereur germaine.

Ly dis Henrys soy mariat alle filhe Johan Obiert, borgois de Huy; s'en est messires Henrys Polarde, chevalier, et une filhe, mariée à Ernut delle Malaxhe, doqueile sont ly hoirs. Ly dis messires Henrys est mariés alle filhe de Barsinalles, saingnor d'Oiiion, esquevin de Liege, qui en devant avoit esteit femme à Daneal, fil jadis monssaingnor Rasson de Haccourt, saingnor de Haversen, chevalier, esquevin de Liege; et sont asseis juvenes ly dis messires Henrys et sa dicte femme por avoir plusieurs enfans.

769. Item, damoyselle Maroie, filhe de monssaingnor Johan Polarde et de damme Beatry deseurnomeis, fut promirement mariée à Renier de Biertrey, escuwier, dont ilh sont ly hoirs, et secondement à on vailhant escuwier, Hombier Corbeaz de Houlgnoule, jadis esquevin de Liege, doqueile et de ses hoirs mention sierat faite chi après, en la genealogie de chez d'Awans.

770. Nos avons chi devant ordinément mis en escripte la genealogie des quatre fis et quatre filhes monssaingnor Otton de Lexhy, qui fut ainsneis fis de monssaingnor Houwe de Lexhy; sy devons retourner à trois freires do dit monssaingnor Otton, assavoir à monssaingnor Bruton le viez de Warous, monssaingnor Henry de Crescengnéez, et à monssaingnor Badout de Vorous; et, premiers, al dit monssaingnor Breton.

771. Chis messires Brutons fut mervillement riches et poissans. Ilh fut sires de Warous et avoweis d'Awans; et, pour la caze delle avowerie et do chasteal que siens astoit, ilh et sy successeurs soy nomont saingnor d'Awans; et fut assy sires de Geneffe et de pluseurs atres vilhes; et, de ly, sont issus tuit chilhe qui sont do linages d'Awans et de Warous, car ilh en fut chief et fondement, ensy qu'il vos porat chi après apparoir. Ilh ne prist nint les armes de ses predecesseurs, anchois encargat à porteur de geules à on lion d'or, et criat Warous, à caze de sa saingnorie; et si hoirs present assy divers blazons, ensy que demostreit vous sierat. Ilh out siies fis, tos chevaliers, et dois filhes chevaleresse, et on bon escuwier, qui fut nomeis ly viez Renier de Viseit, peire de monssaingnor Renier de Viseit, marissal del evesqueit de Liege, que messires Ameyle de Houlgnoul tuwat.

772. Ly ainsneis fut nomeis messires Libier, sires de Geneffe. Ihl tenoit bin à Geneffe IIIIc boniers de terre et estoit sires de Geneffe, de Lymon, de Gehaing, et castelains de Waremme, sains les atres hiretaiges qu'il tenoit. Ly secons fis do viez monssaingnor Breton fut nomeis messires Hombier de Lexhy. Ilh out grans hiretages à Lexhy et fut sires d'Awans. Ly tirs fis monssaingnor Breton fut nomeis messires Ystasses Frongnus de Vileir l'Evesque; ly quars, messires Fastreit Penilh; ly cinqueme, messires Bastin de Holgnoul; et ly siiesemme, messires Bretons ly juvenes, qui fut sires de Warous, et chis touz seulz detinve les armes et le cry de son peire. Ly devant nomeis messires Libiert, sires de Geneffe, encargat à porteur d'argent à on lywon de sable et criat Geneffe. Ilh prist la filhe monssaingnor Wilhelme le Ryche de Hamale et en out trois chevaliers à enfans et une filhe, mariée à Rozut. Ly trois fis furent nomeis messires Badewiens de Geneffe, messires Robier de Lymont et messires Ernut d'Orelhe, chevaliers.

773. Ly ainsneis des enfans monssaingnor Libier, saingnor de Geneffe, nomeis messires Badewiens, fut sires de Geneffe et castelains de Waremme, et out chink fis delle filhe monssainanor Ywen de Monferan, assavoir monssaingnor Libier Butoir, monssaingnor Gerars Tatart, monssaingnor Wilhelme, monssaingnor Rigaut de Geneffe, doien de Sains Johans à Liege, et messire Ernut, canones là meïsmes. Chis messires Badewiens, ainsneis fis monssaingnor Libiert, saingnor de Geneffe, tenoit delle evesque de Liege, en fief, la castelerie et la deyme de Waremme; se vendit ale capitle Saint Lambier la dyme; et, par tant qu'il amainrissoit les fief del castellerie, ilh l'amendat et reconpensat des VIxx et X boniers de terre gisans en la paroche de Geneffe, qui furent rajoins alle dit castellirie; et C et V de ces VIxx et X boniers, ilh en tenoit de trois saingnors en fief, se raquest à eaz l'omages: assavoir qu'il en tenoit trent chink boniers de saingnor de Jaces, et XXXV de saingnor de

Lintres, et XXXV de monssaingnor Johan de Geneffe, ensy que je ay veüt et proveit en livre de chatre de Saint Lambier.

774. Ly dis messires Libier Butoir, ainsneis fis do dit monssaingnor Badewiens, saingnor de Geneffe, out une filhe tant soilement, mariée à monssaingnor Jakeme, saingnor de Cleremont et d'Esteneur, dont ilh issirent messires Libier Butoir, sires de Cleremont, messires Symon, ses freires, qui morit sains hoir, et une filhe, mariée à monssaingnor Franke delle Roches, avoweit de Fleron.

775. Ly sires de Cleremont deseurnomeis soy mariat alle filhe do saingnor d'Awans, qui morit alle pongniche à Lonchiens; s'en furent unk fis et trois filhes. Ly fis fut nomeis Corbeaz; se fut sires de Cleremont, d'Awans et d'Esteneur, et soy mariat à damoyselle Maroie, filhe monssaingnor Colar Bakenheme, chevaliers, qui fut sornomeis delle Grexhan, par tant qu'il demoroit en le maison c'on dit le Crexhan, à Liege, en laqueile ilh avoit lonctemps vendut vin, car ilh estoit viniers anchois qu'il presist l'ordenne de chevalerie, avoek laqueile femme ly dis Corbeal prist tres grande somme d'argent et possessions pluseurs; et orent une filhe tant soilement, nomée Agnés, qui est à present abbeisse de Milen, deleis Saintron; car ly dis Corbeaz soy governat sy petitement et tant indiscretement qu'il morit povres et que, alle jour de son trespas, ilh n'avoit roy d'iretage ne chevanche nulle; et avoit le nom qu'il estoit ly plus sages so l'atry conseilhe et qui miese savoit parler et conselhier delle loys que nus atres de ce païs.

776. Item, ly ainsnée sereur do dit Corbeal fut mariée à monssaingnor Johan, avoweit de Liers, qui portoit d'argent à une crois d'azure; et en furent pluseurs enfans, assavoir Biertran, Butoir, Johan, Rigaut, et damoyselle Aely, et des nonnains pluseurs. Ly deseurnomeis Biertran et Rigaut, qui furent beaz et bons escuwiers, ilh morirent sains marieir. Et ly dit Butoir, qui riens ne valoit, soy mariat à Hacourt, dont i sont pluseurs enfans; et, d'eaz, trovereis tot la genealogie chi devant, en capitle parlans de monssaingnor Ameyle de Lexhy.

777. Item, ly seconde filhe do saingnor de Cleremont fut mariée à monssaingnor Ernus de Houssinbur, chevalier, doqueil vos trovereis l'ystore chi devant, en capitle faisant mention de monssaingnor Ernus, freires à monssaingnor Otton, saingnor de Warfezéez, doqueile monssaingnor Ernus vos trovereis la gyeste tantoist après le capitle faisant mention des diiez enfans do secon mariages le saingnor de Warfezéez.

778. Item, ly tirche filhe do saingnor de Cleremont fut mariée à monssaingnor Johan, le viez voweit de Horriion, saingnor do Pas Saint Martien, qui portoit les armes de Hozemont: d'or à on satoir de geules, et estoit de droit stokage de Hozemont. Ilh out on fil beal et bon, et une filhe, mariée à Adan delle Byste de Saintron, dont ilh est Crystian delle Byste, maintenant vivant, qui at des hoirs. Ly beaz voveis deseuroomeis morit alle bataille à Thorynes, en serviche cheaz de Liege, qui furent desconfis par leur saingnor, l'evesque Englebiert delle Marche, et fut marieis alle filhe monssaingnor de Mokynes, deleis Tongres; s'en fut uns fis, nomeis messires Libiers Butoirs, avoweit de Horriion, chevaliers, qui prist à femme la filhe monssaingnor Ernut de Charneur, chevalier, esquevin de Liege, dont mention est chi devant faite, en capitle parlant des Surllet; s'en fut uns fis, marieis alle filhe Johan Peveréal, le cangeur, qui morit sains hoir. Et ly dis messires Libiers soy remariat, la seconde fois, alle filhe monssaingnor Johan d Osborne; s'en sont dois filhes, dont ly une est mariée à monssaingnor Rysake de Nayvaing, et ly atre alle fil Wilhelmes de Stroït, l'ostelhier de Saintron.

779. Item, do dit Adan del Byste est uns fis, nomeis Crystian, qui est avoweit de Horion et sires do Pas Saint Martin et at des hoirs.

780. Item, la dit voveresse de Horrion, filhe do saingnor de Cleremont soy remariat à Lowy de Sefawe; s'en furent dois filhes, dont ly une fut mariée à Renart Malquerant d'Abééz, s'en sont ly hoirs; et ly atres, nomée damoyselle Aely, fut beghine. Encors soy remariat la dit voveresse, la tirce fois, à Radout, fil monssaingnor Thiry le Bron de Flemale, qui estoit do linages de Hamale; s'en est une filhe, mariée alle voweit de Streel, qui fut uns appiers escuwiers, et en sont plusieurs enfans.

781. Item, deveis savoir que, delle filhe monssaingnor Jakeme, saingnor de Cleiremout, mariée à monssaingnor Franke delle Roche, avoweit de Fleron, issirent dois fis et une filhe, assavoir: Johans, ly voweis, qui soy mariat alle filhe Badewien de Holongne, doqueile vous trovereis tout la generation chi devant, en capitle des Surlés, parlant delle damme de Vellerous; et ly atres fis fut nomeis Jakemiens, qui soy mariat alle filhe monssaingnor Badewien de Flemale, chevalier, doqueile ly declaration est escripte en capitle de chez de Hozemont, qui fait mention de monssaingnor Makaire delle Heys de Flemale; et ly sereur fut mariée à Johan, l'anneit, de Vileir en Condros, deleis Hodires; s'en est issus Johan de Vileir, castelains de ban de Sprimont, qui at plusieurs enfans delle filhe Wilhelme de Graz, cangeur de Liege.

782. Vos aveis chi devant entendut chez qui sont issus de monssaingnor Libier Butoir, ainsneit fil monssaingnor Badewien, saingnor de Geneffe; sy deveriens ordinément recorder de monssaingnor Gerart Tatart, secon fil do jadis monssaingnor Badewien. mais nos n'en sumes nint bin informeis; sy nos en deporterons juxes à tant que nos en aiiens plainne information, et retournerons à monssaingnor Wilhelme, qui fut sires de Jehaing et tirs fil do jadis monssaingnor Badewien le viez.

783. Chis messires Wilhelmes out dois fis. Ly uns fut nomeis messires Badewiens, et ly atres messires Ameyles de Mouhien, et ne portont nint les armes de leur taion, anchois encargont à porteur les armes d'Awans, assavoir vairriet d'argent et d'azure, et y adjostont, par difference, I lion rampant de geules. et cryont Domartin, ensy que leurs bons predecesseurs avoient faite, car ly saingnorie de Geneffe ne leur estoit point demorée, anchois appartenoit à monssaingnor Libiert Butoir, leur oncle, et, après, à chez de Cleiremout; mais, après ce, revint ly saingnorie de Geneffe al bon castelain chi après nomeit, par acqueste faite à chez de Cleiremout deseurnomeis.

784. Ly devant nomeis messires Badewiens fut castelains de Waremme et out trois fis. Ly ainsneis fut nomeis messires Wilhelmes, ly beaz et ly bons castelains, qui fut, à son temps, ly plus poissans chevaliers de corps, ly plus vailhans, ly plus beaz et ly plus fors chevaliers qui fuist en l'evesqueit de Liege et qui plus poissamment servoit ses saingnors en armes. Che fut chil qui, après le mort do saingnor d'Awans, entreprist le *fait* et fut ly souveraine capitaine de chez d'Awans, et qui perseverat tout son vivant. Ilh acquist la saingnorie de Geneffe à chez de Cleiremout et soy mariat à Liege, alle sereur monssaingnor Gerart Surlet, chevalier, de laqueile ilh out dois fis, assavoir monssainanor Badewien et Wilhelme, qui morirent alle bataille à Nyerbonne, deleis Huy, en service chez de Liege, alle encontre del evesque Aoust delle Marche. Ly dis Wilhelmes ne fut nint marieis. Et, do dit monssaingnor Badewien, trovereis les hoirs chi devant, en la genealogie de chez de Haneffe.

785. Ly dois freires do vailhant castelain deseurnomeit furent nomeis messires Ernus de Jehaing, et ly atres Butoir, qui furent andois mors alle bataille à Domartien; et d'eaz ne demorat nulle hoir. Ly dis messires Ernus fut petis, mais ilh estoit tenus pour le plus apier et le plus hardy chevalier qui fuist en la partiie de chez d'Awans.

786. Item, est assavoir que messires Ameiles de Mouhiens, freires à monssainanor Badewien, le viez castelains de Waremme, out pluseurs enfans, fis et filhes. Ilh out trois fis vailhans et hardis, demorans ensemble en la tour de Mouhien, pour les morteile faites do paiis; se furent si pres

despiiez et waities, entre le tour et le stavele de leurs chevaz, qu'il furent tuweis, et Rasses de Waremme avoekes eaz, par le saingnor de Momale, monssaingnor Conrar de Bierlouz, et plusieurs atres delle partiie cheaz de Warous. Nequident, ly hoirs en sont à present, et orent une sereur, mariée à Johan de Vaz, cangeur de Liege, dont Rigauz de Mouhien et Watier sont estrais, qui ne puelent faer nulle grant serviche à leurs amis.

787. Puyque nos avons à nostre melheur avis deviseit cheaz et celles qui sont issus de monssaingnor Badewien, ainsneit fil monssaingnor Libier, saingnor de Geneffe, nos dirons chi après do secon fil, nomeit monssaingnor Robiert, saingnor de Lymont. Chis sires de Lymont fut banerés et gist az Freires Meneurs à Liege; Sy fut ly uns des plus preuz des Hesbangnons à son temps, et prist on tot noveal blazon par ly, car ilh encargat à porteur d'argent à on Iywon de geules, à on ourle semechiet de kachalles d'azure, et criat Geneffe. Ilh out dois fis à chevaliers. Ly ainsneis fut nomeis messires Bades, et ly atres messires Rigaz, qui out à femme damme Katerine, filhe saingnor Lowy Surllet le viez. Chis messires Rigaz morit sains hoir. Et ly dis messires Bades out on fil, nomeit monssainanor Symon de Herbais, et out plusieurs filhes, dont plusieurs persones sont estrais.

788. Ly dis messires Symon out trois fis, assavoir monssaingnor Wery de Lymont, qui clochoit, monssaingnor Symon de Herbais, et on atres dont je ne suy nint infourmeis.

789. Do dit monssaingnor Wery trovereis la declaration chi devant, en capitle parlant des filhes monssaingnor Rasson, ainsneit saingnor de Warfezéez, là ilh faite mention de monssaingnor Johan de Lardier, dont ly dis messires Werys out la filhe.

790. Item, do dit monssaingnor Symon de Herbais fut messires Symon, messires Johans, ses freires, qui morit sains hoir, et Pietres, et Badewien, qui morit assy sains hoir. Ly dis messires Symon ly juvenes out dois fis, Symon et messire Johan. Ly dis Symon est mors sains hoirs. Et ly dis messires Johan est marieis; sy porat bin avoer des hoirs à planteit. Et orent une sereur, mariée à monssaingnor Waltier, saingnor de Gochoncourt, dont i fut messires Watiers, qui out la damme de Mokynes, filhe Wilhelme Prost; se morit sains hoir.

791. Item, ly dis Pietres, freires à monssaingnor Symon de Herbais ly juvenes, at quatre fis, demorans à Wynes desoir Landres, en Braybant, et une filhe chevaleresse. Ly uns des fis, nomeit Waltier, at de noveale pris à femme damoyselle Johanne, filhe monssaingnor Godefroit de Blehen, saingnor d'Abéez, chevalier. Ly atres trois freires ne sont nint marieis. Et ly damme fut mariée alle saingnor de Dongbiert; s'en at des beaz enfans plusieurs Et de ceste meïsmes estration sont Butoyr de Lymont et sy enfans, Weris Macoir de Rocour, ses freires, et leurs hoirs, ja soice que je ne sace de greit en greit declareir les proïsmes. Et vos dis veritablement que, d'antiquiteit, fut une des sereurs de Lymont mariée à Liege, dont ly hoirs saingnor Johan de Holongne, ly vinier, dit delle Roze, issirent, assavoir ly bon chantres de Saint Denis, nomeit messires Wilhelmes delle Roze, qui, de honorable et riches abbit et estat, passat tos les canonnes des secondaires engliese de Liege, et out on freires canonnes là meïsmes, nomeit Jakemars de Holongne, et une sereur, mariée à monssaingnor Alixandre de Saint Servais, chevalier, esquevin de Liege, dont ly hoirs sont à present.

792. Ors dirons do tirs fil monssaingnor Libier, saingnor de Geneffe, qui fut nomeis messires Ernus, sires d'Orelhe. Ilh out une filhe tant soilement, qui fut mariée à monssaingnor Adan, fil à monssaingnor Ywen de Monferan, qui out les onze filhe hautement mariée, ensy que chi après vos sierat declareit. Ly dis messires Adans out siiez fis, assavoir monssaingnor Wilhelme d'Oreille, monssaingnor Johan d'Orelhe, Badewien Butoir, Adan et Gerar. Et tous chis freires morirent sains hoirs, excepteit messires Wilhelme, qui out dois fis et une filhe, assavoir monssaingnor Ernus,

saingnor d'Orelhe, et monssaingnor Johan d'Orelhe, saingnor de Rumynes, qui, de part sa femme, fut sires de Vellerous.

793. Ly dis messires Ernus out on fil, nomeit messire Wilhelme, qui fut sires d'Orelhe; et en sont dois fis, assavoir monssaingnor Ernut, saingnor d'Orelhe, et monssaingnor Wilhelme, qui soy mariat en Haynau, alle sereur monssaingnor Gerart de Jeumont, dont y sont ly hoirs à present.

794. Item, do dit monssaingnor Johan d'Orelhe, saingnor de Rumynnes et de Vellerous, trovereis tout la generation chi devant, en capitle des Surlés, parlant delle damme de Vellerous qui out les onze filles.

795. Item, ly filhe monssainanor Wilhelme, saingnor d'Orelhe, l'ainsneit, fut mariée à Godefroit de Blanmon, escuwiers; s'en fut dois filles, dont ly ainsnée fut mariée à monssaingnor Prommekien de Wotrenges, dont y sont ly hoirs. Et ly atres sereur morit sains hoir.

796. Nos avons faite declaration des trois fis monssainanor Libiert de Geneffe; si dirons de sa filhe, mariée à Rozut. De ces filhe issit messires Robekien, sires de Rozut, chevalier, et une filhe, mariée à Ernar de Rolouz.

797. Do dit messire Robekin issit messires Johan, sires de Rozut, dont cilh de Rozut qui sont à present, sont tous estrais.

798. Item, ly filhe fut mariée à Ernar de Rolouz, qui fut freires à nonssaingnor Lambier de Vorous, chevalier, et out dois fis, assavoir messire Henry de Rolouz, chevalier, et Mylars de Vorous. Ly dis messires Henrys portat d'argent à on lion de sable, à on baston de geules, et crioit Geneffe. Ilh est ensevelis az Freires Meneurs à Liege, à desos do crucefy. Ilh out chink fis de son premier mariages, assavoir Henriet de Rolouz, qui fut vailhans escuwiers et de haute honeur, Lybiert, dit Libran, Badry, Wilhelme le Clerc, et Ernar de Taieniers. Et, quant messires Henry fut veves, ilh soy remariat à une damme qui estoit cuzine al conte de Sames, et out on fil, nomeit Gerart de Ramelo, de ce secon mariage.

799. Ly dis Henriés de Rolouz soy mariat à une des filles damme Magriette Surlés, damme de Vellerous, assavoir l'unne des quatres filles que ceste damme avoit eut de Johan d'Achou, anchois qu'elle soy remariast alle saingnor de Vellerous, dont elle out encors sept filles, ensy que chi devant soy contint, en capitle des Surlés. De cest damoysele out ly dis Henriés dois filles. Ly une fut mariée à Johan le Berviers de Saint Lynar. Et ly atres, nomée damoysele Ozilhe, fut mariée à Houwechon de Bassynes, dont y furent uns fis et dois filles, assavoir Houwe de Bassynes, qui fut fors et rades escuwier, et lonctemps fut bailhiers de Condros, et prist à femme damoysele Aely, sereur alle bon monssaingnor Rasses de Gemepe, et n'en sont nus hoirs. Et, de ses dois sereurs, fut ly une mariée à Lambiert, saingnor d'Abééz, doqueile vos trovereis toute la genealogie chi devant, en capitle parlant de sa meire, qui fut filles do premiers mariages delle saingnor de Warfezéez qui out les xx enfans; sy nos en tairons à cesty fois. Et ly seconde sereur Houwet de Bassynes fut mariée à Gerardin de Vervoy, dont y sont ly hoirs

800. Item, delle atre filhe Henriés de Rolouz, mariée à Johan le Berwiers, trovereis chi après la generation, en capitle parlant do saingnor d'Awans.

801. Item, Librans, freires à Henriet de Rolouz, do premier mariages, fut marieis à Holongne sour Gayres, et en sont ly hoirs. Et, des atres freires, morirent ly alcons sen hoirs; et, des atres, je n'ay nulle information.

802. Item, Gerars de Ramelo, fis do secon mariage do dit monssaingnor Henry de Rolouz, soy mariat alle sereur monssaingnor Watier, le voweit de Huy, qui estoit do sanc de Beafor et de Pitresen; s'en furent messires Henrys de Ramelo, avoweit de Huy, chevalier, Ernut et Johan de Ramelo, et une sereur, mariée à Johan de Biernar, citain de Liege, et une atres, mariée à Johans de Roseur l'Eawailhe.

803. Ly dis messires Henrys, qui fut beaz chevaliers et fors, encargat les armes de Bealfort de part sa meire, quant ly avowerie de Huy ly eskeyt et ly atre terres, de part monssainnor Watier, son oncle; et morit sans hoir; sy que ses freires, Ernut de Ramelo, saingnor de Viersey, fut avoweit de Huy. Ilh prist à femme la sereur messire Johan le Clokier de Huy, chevalier, a present bailhir de Tuwiens, doze de païis, esquevin de Liege et de Huy; s'en est uns fis, nomeis Henrys de Ramelot, qui est avoweis de Huy, marieis alle sereur Gerart Hellien, dit de Fanchons, borgois de Huy; doqueis Henrys, avoweit de Huy, et delle sereure Gerart de Fanchons est issue une filhe, nomée Johanne, qui est mariée à Conrar de Bonbays, dit d'Andrimont, avoweis de Liers, doqueilz Conrars et delle dit damoysele Johanne sont yssus dois fis et une filhe, qui sont à present.

804. Et ly dis Johans, ly tirs fis Gerars de Ramelo, fut sires de Ramelo, en Condros, et soy mariat à damoysele Katherine de Modauls, filhe jadis Anseal de Modaweles; s'en issit dois fis et quatre filhe, assavoir Pirelos, qui fut sires de Ramelo, qui fut marieis à damoysele Johanne de Haley, filhe jadis Robiert de Haley, dont ilh est uns fis à present, appelleis Johan, saingnor de Ramelo, qui at à femme Ysabeal, le filhe messire Johan del Roches, avoweit de Fleron, chevalier, doze de païis et esquevin de Liege; s'en est dois fis à present vivant, de jovenes eage, nomeis Johan de Ramelo et Pirelos, son freires.

805. Ly secons fis Johan de Ramelot, qui fut nomeis Henris de Ramelot, fut marieis en la conteit de Namur, à damoysele Magritte, filhe Wilhelme de Lybynes, jadis bailhier de Bovinge et castelain de Montegrez, escuwiers; mais, de cesty mariage, n'est nulle hoir.

806. Ly premier filhe Johan de Ramelot fut nonnes de Solier. Ly seconde, nomée damoysele Angnés, fut mariée à on homme d'oneur, nomeit Rigaut de Jamaing, dont y sont ly hoirs à present. Ly tirche filhe, nomée Magrit, fut mariée dois fois: ly premier fois, à Johan de Riwe d'Acochez, dont ilh n'est demoreis nul hoir; ly seconde fois, à Gilhekin de Chierdenoir, en Condros; s'en est uns fis, nomeis Thiry de Chierdenoir, qui at à present à femme le filhe Colet Bryfo de Feron, et en sont des hoirs de jovenes eage.

807. Ly quarte filhe Johans, sires de Ramelot, est nomée damoysele Elys de Ramelot, et est mariée à on borgoyt de Huy, nomeit Alixandres Vavrealz fil jadis Jakemien Vavereal, maiieur jadis et maistres de Huy pluseurs fois; mais, d'eaz, n'est nul hoir vivant demoreis en vie.

808. Item, do dit Johan de Biernar, qui out une des filhe Gerart de Ramelot, sereur à messire Henris, Ernus et Johan, fut uns fis tant soilement, nomeit Johan de Biernar, qui soy mariat à damoysele Juliane, filhe monssaingnor Gilhe Surllet, chevalier; sy trovereis leur lingnie describe chi devant, en capitle parlant de monssaingnor Rigaut de Beariu. Mais, après le decès do viez Johan de Biernar, soy remariat ly damoysele sa femme à Johan Languzien de Huy, dont ilh est Watelés Languziens, maintenant vivans, qui at à femme damoysele Magriete, filhe jadis Gilet, le bailhier de Chaiienéez, dont mention est faite chi devant, en capitle parlant des hoirs monssaingnor Makair delle Heys de Flemalle.

809. Item, delle atre filhe Gerart de Ramelo, mariée à Royseur l'Ayvailles, n'en est nul hoir demoreis.

810. Et est assavoir que, quant ly dis Gerars de Ramelot fut trespasseis, sa dicte femme, madamme de Barche, soy remariat à monssaingnor Gilhe de Stréez, saingnor de Barche de part sa femme, et en furent dois filhes. Ly une fut mariée à Wilhelme, saingnor d'Orgo et de Harwemont, dont y fut messires Johan, sires d'Orgo, qui soy mariat à damme Maha, filhe monssaingnor Johan d'Argenteal, dont ilh est ly jovenez messires Johan d'Orgo. Et ly atre filhe monssaingnor Gilhe de Stréez fut mariée à monssaingnor Wilhelme de Flemale, chevalier, et n'en est nul hoir.

811. Je avoy chi devant doneit à entendre que je deviseroie coment les onze filhes monssaingnor Ywen de Monferan furent mariées, ja soice fours de nostre mateire; mais ilh est asseis necessaires de savoir, affin que on sache plus parfaitement, qu'il at gran nombre de chevaliers et escuwers en atre paiis, qui sont des linages do paiis delle evesqueit de Liege et delle correxion des XII jugans les linages deseurdis. Ly promeraine fut mariée alle saingnor de Wezemale, en Braybant; ly seconde, à castelain de Montengnis; ly tirche, à monssaingnor Badewien, saingnor de Geneffe, castelain de Waremme, taiion do bon castelain dont chi devant est faite mention; ly quarte fut mariée à monssaingnor Wilhelme, le viez saingnor d'Awans; ly Ve, à monssaingnor Ystasse, le viez frank homme de Holengnoul; ly VIe, alle saingnor de Coyterebe, deleis Bruxelles; ly VII, alle saingnor de Meadrenge; ly VIIIe, alle saingnor de Gochoncourt, deleis Tinlemont; ly IXe, alle saingnor de Haleybeke. Delle Xe, sont issus chez de Glennes et de Rycle, en la conteit de Louz, qui portent d'or à lyon de sable; et, delle XIe, chilh de Wynes et de Berghines en Braibant, qui portent d'argent à lion d'azure et cryent Wynes, et sont teilement regenereis et to poupleis que c'est sains nombre delle bonne chevalerie et des vailhans proydomes qui en sont estrais.

812. Et ly saingnors des linages deseurdis, qui vivoient quant ly pais fut faite entre chez d'Awans et de Warous, paiiont alle promeraine tailhe de la dicte pais, car je les ay tos en escripte, assavoir: ly sires de Wezemale, messires Ernus de Vivirs, messires Johan de Halebeyke, messires Ywen de Meadrenge, messires Gilhes et messires Symons de Coyterebe, et grant nombres d'atres. Et, par tant que ly hoirs des filhes monssaingnor Ywen de Monferan mariées en l'evesqueit de Liege entreprenent le faix del werre pour le partié chez d'Awans, ly enfans des atres sereurs mariées en Braibant, qui estoient leurs cuziens germains, entront ens à leur requeste et servirent le bon castelain de Waremme; dont ly bastars de Wezemale et ly castelains de Montengnis adont vivant furent mors, avoek pluseurs atres en son service, alle bataille à Waremme. A chely temps, soy conissoient ly parens ly uns l'autre, par tant que cascons avoit besonge de ses proismes pour ly enforchier; et plus grant besonge en avoient ly riches que ly povres, car ilh les covenoit stoffeir et warnier leur fortrees; sy atraoient et blandisoient leurs povres cuzien, et n'astoint nint honteuz de demostreir et recorder à eaz leur proismeteit et lynages; et ce abelissoit et estoit gran plaisanche à bons, se servoient volentiers et entreprenoient les grans fais pour le volenteit de leur corages. Mais, à mon temps, assavoir puis l'an mil trois cens et trente chink, que pais fut faite des linages deseurdis, sont tous chis lynages oblieis, et tout amour, charnaliteit et serviche refroidie, car chevalier et escuwers des lynages deseurdis n'ont besongne de nul serviche, par tant qu'il ne soy puelent werier, pour le loien del pais des XII; se n'ont cure de savoir qui sont leur cuziens et n'acontent rins à leurs povres proismes ne ly uns al atres. Anchois, par mescognissanche, soy marient, pluseurs en y at, en quars ou en tir degreit de proismeteit: dont je en nomeroy pluseurs, sy n'astoit pour les hoirs à ablameir. Mais, quant ce vient que ly alcons enchient en dangier de leur honeur ou de prison, ou qu'il ont werre à alcons estrangiers, adont enquerent ilh qui sont leurs parens, et demandent leurs serviches, et les voelent travelhier, et soy voelent d'euz aydier, qui onk en devant ne les avoient faite honeur, connaissance ne serviche: dont je vous mosteroie sains nombre d'exemples, se n'astoit pour le prolongement de nostre mateire; nintmains, je vous en diray alcons avenues de mon temps et qui ont

parfaitement chi leur liwe. Veriteis est que ly conte Thiry de Louz, qui fut uns poissans et redobtés princes à son temps, prist, par caze de jalousie delle abbesse de Blize et nint par atre caze, monssaingnor Wilhelme de Bilrevelt, castelains de Montegnys, qui estoit ly plus riches et ly plus redobteis chevalier qui fuist en la conteit de Louz, et ly voloit, de chaleur, copeir la tieste. Ly dis castelains envoiiat à ses grans parens et az plus poissans de son linages; mais ilh en fut petitement aydies. Ilh ly sovint de che linages de Monferan, qui est ly drois linages de cry et de blazon de Geneffe; s'envoiiat en Hesbaing à dois povres escuwiers alle regart de ses atres gran parens: che fut à Honbier Corbeal de Houlgnoul et à Johan de Skendremale, qui après ce fut chevalier, et leur fist remonstreir ly dangier et perilh là ilh gisoit, et, s'ilh n'astoit tendant sorcorus, qu'il sieroit decoleis. Chis dois escuwiers, qui estoient cuziens asseis prochains ensemble et ja enlongies de proismeteit alle dit castelain, entreprenent en eaz ce faixh, sy que chis qui estoient de grant honeur et de grant porkache, et trayrent vers monssaingnor de Liege et vers sa citeit, et traveilhont tant, et si fort et sy tendant, qu'il jettont ly castelain de ce dangier; se vient, por le dobtance do conte, demoreir à Liege residenment en noble estat, là ilh fut, après ce, pitieusement murdris.

813. Encors fisent chis dois escuwiers, et specialment et principalement ly dis Corbeal, qui de tot le fait fut capitaine, on atre serviche notable, par caze de lynage, à monssaingnor Watier de Binkehem, qui estoit do linage d'Awans. Car, quant ly dis messires Waltier out prize et skakée le damme de Lovirvaz, qui avoit esteit femme à monssaingnor Englebiert delle Marche et qui estoit filhe de monssaingnor Johan, le bon saingnor de Hamale. engenrée en la sereur do saingnor de Rumynes, à laqueile damme ly dis messires Waltier n'estoit nint à compareir d'estat ne de lynages, anchois estoit ses escuwiers et de son hosteit, ly dis sires de Hamale fist plaint sor l'oneur do dit monssaingnor Waltier par devant l'evesque de Liege et ses hommes, et mandat tot son lynage et tres grande nombre de saingnors, chevaliers et escuwiers, com chis qui nobles hons estoit et bin ameis et bin servis de son linages. Et ly freires do dit monssaingnor Waltier, qui ne poioit adont venir en paiis, trayrent vers le dit Coirbeal, qui onkes ne laissat, por le poissance do dit saingnor de Hamale ne de tos ses proismes, qu'il n'entepresist le faix, osy que capitaine do fait et delle defense do dit monssaingnor Waltier, qui todis estoit de la dicte damme saysis. Et assy ly freires do dit monssaingnor Waltier uzoiiient delle tot do conseilhe le dit Coirbeal, qui fist, par son singuleir porkache, assembleir tot le linage d'Awans, excepteit alcons qui, por l'amour et dotance do dit saingnor de Hamale, n'y osoiient comparoir; et en out, sour pluseurs des journée, si grant quantiteit, tant par devant monssaingnor de Liege comme par devant tot la universiteit delle citeit de Liege, al encontre do dit saingnor de Hamale, qui, par forche d'amys, voloit le dit monssaingnor Waltier fair fourjugier, que je croy fermement que onkes, puy le pais fait des linages, ilh n'en fut sor la moytiie tant asembleis ensemble: et ce puy je bin tesmognier, car je y fuy pluseurs jours avoek les proismes do dit monssaingnor Waltier, sor ce proiies avoekes les atres par le dit Corbeal et monssaingnor Johan de Skendremale; sy que, après pluseurs et costables journéez, traveilhe et parsiites. quant ly sires de Hamalle, qui n'avoit nint la loy pour ly — car sa filhe, qui estoit sa frank femme, ne se voloit nint plaindre — veit qu'il nel aroit nint par forche, ilh s'accordat; et fut ly honeur do dit monssaingnor Waltier, par le bon serviche de ses proismes, warandie; et ly bonne damme ly demorat à femme mais ilh ne viskat nint longement après, car ilh morit sor le voiage d'outre meire, qu'il avoit entrepris pour acquiere l'amour do dit saingnor de Hamale. Et, par ces exemples et pluseurs atres, poiies concivoir que, al temps present, nus ne retrait vers ses proismes, se angoise et perilhe de corps ne les sormont. Or est ilh temps de retourner à nostre principal mateire.

814. Vos saveis que, chi devant, est faite mention que messires Henry de Rolouz et Mylars de Vorous furent freires, et, do dit monssaingnor Henry et de ses hoirs, at esteit faite declaration. Or dirons de dit Mylars. Ilh soy mariat alle filhe do viez monssaingnor Ystasses Frank Homme de Hollengoul; s'en issirent

815. Chi devant, vous at esteit ordinéement declareit ly lingnie de monssaingnor Libiert, saingnor de Geneffe, ainsneit fil monssaingnor Breton le viez de Warous; sy dirons, chi après, de monssaingnor Hombier de Lexhy, secon fil do dit monssaingnor Breton. Chis portoit vairiet d'argent et d'azure à on ourle de geules. Ilh fut ly chief et ly fleure de Hasbainge, et teilement est ilh intituleis sor sa pire, en l'enclostre des Freires Escolirs à Liege; se morit l'an mil dois cens et xx, sy que là meïsmes vos porat apparoir.

816. Ly dis messires Hombiers prist â femme damme Juwette alle Courte Coxhe, sereur al conte Gerar de Hozemont; s'en furent siiez fis chevaliers, et un atre qui fut abbés de Saint Loren, et quatre filles chevalleresses, assavoir: messires Hombiers Coirbeaz, sires d'Awans, promerain de ce sornom, messires Libiers Crepon d'Othééz, messires Ystasses, ly viez Frans Hons de Houllengnoul, messires Anthones de Lexhy, dys le Moynes, messires Johan Locreaz et messires Gerars Petelhons de Votemme; et, des sereurs, fut ly une mariée à monssaingnor Thomas de Puchey, ly atre à Elnoit, ly tirche à Wonke, et ly quarte à Maruele deleis Saintron. Et chis siiez freires furent appeleis ly siiez freires d'Awans viskans longtemps en grant poissance. Mais ilh furent traveilhies al temps Houwe de Pirepont, evesque de Liege; car, à cely temps, assavoir l'an mil dois cens et XXIII, ly dis sires d'Awans et sy freires et leurs aydans avoient ars, anchois le commenchement des werres d'Awans et de Warous, le cour de Lantins, appartenante az malades de Cornelhon, dont ly evesques deseurdis et ly citeit de Liege furent mal contens; sy assefont le casteal d'Awans; dont ly capitles de Saint Lambiert traitiat une pais teile que ly sires d'Awans et cent chevaliers de son linage, en lieu d'amende, alont à piet et deskaus delle porte Sainte Walbeure juxes en l'engliese de Cornelhon releveir le crucefy, qui avoit esteit dependus pour ceste injure et koukiez enemy la dicte engliese juxes à tant que ly forfais sieroit amendeit; et afrankyt les hyretages de Coirneilhon gisans desouz ly, et rendit partie des damages, et, avoek ce, donat, à respondans pour ly de ceste pays inviolablement tenir XII chevaliers de son linage, assavoir, sont: messires Badewiens de Geneffe, messires Robiert de Lymont, ses freires, messires Bastiens de Houlgnoul, messires Wilhelmes, castelains de Hozemont, messires Werys de Fontaines et messires Anthones de Fontaines, andois freires al dit messire Wilhelme, monssaingnor Godefroid de Hambrouk, monssaingnor Libiert Crepon, freire à luy, le dit saingnor d'Awans, monssaingnor Wery de Rocourt, monssaingnor Johan, son freire, monssaingnor Renier de Vileir et monssaingnor Bastien, son freire, ensy qu'il appert en lettres sor ce saiielééz qui sont avoekes les chatres des frankizes de la dicte citeit; car, en temps que je fuy maistre de la dicte citeit, je les veys et lisis, et en pris le copie. Et ces chozes que je ay reciteit, *ce at esté* por mon traitiet à proveir et assy affien que vous n'aiiez nulle admiration de ce qu'il avoit tant de chevaliers en ce paais, car, al jour delle daute deseurdicte, ilh avoit bin en l'evesqueit de Liege demorans chink cens chevaliers, et teile nombre en fut bin armeit avoek le dit evesque et son paais alle warde de Steppes, encontre les Braybechons et le conte de Mouhaut, por vengier la violence que ly dus de Braibant avoit faite à Liege. Ors retournerons à nostre mateire.

817. Ly dis messires Coirbeaz, sires d'Awans, soy mariat alle filhe saingnor Rogier al Chapeal d'Ilhe; s'en furent dois fis, assavoir messires Wilhelmes, sires d'Awans, et messires Hombier Wane de Bernamont. Chis messires Wilhelmes porlat les armes son peire; et ly dis messires Hombier portat vairiet d'argent et d'azure, à on quartier de geules, et ceste vairure est nomee ly blazons d'Awans, car ja soice que les vairures n'ayent nul cris que de Domartin, nintmoins on les nomme les armes d'Awans.

818. Messire Wilhelmes, sire d'Awans, out à femme une des onze filles monssaingnor Iwen de Monferant, et en furent deux filhs et une filhe, assavoir messires Hombier Corbea, sire d'Awans, quy prist les armes d'Awans au temps que les werres commenchant entre les linaiges d'Awans et de Waroux, *et en fut premierement mort* alle pougliche à Lonchin; et l'autre freire fut nommé messires Ernut d'Awans, quy fut un grand clerc et cannone de Saint Lambert en Liege. Le dit messires Corbea,

sire d'Awans, morut l'an 1298. Et leur sereure fut mariée à messire Simon delle Neufvilhe en Condros, dont il y a eu des hoirs. Le dit messires Wilhelme eut encor un autre fis, nommé Johan, dit le Page, pour ce qu'il montoit volontiers à cheval.

819. Le dit messires Corbea, sire d'Awans, fis du dit messire Wilhelme, fut marié dois fois. Sa promire dame fut filhe au vieux Persan de Hanneffe, et d'elle ilh out trois filhes tant soilement: la promire fut mariée à saingnor de Clermont, dont mention est faite ci devant, au capitle parlant du saingnor de Geneffe; et la seconde fut la dame de Mokine, quy fut mere de Johan de Fymal; et la troisieme epousa monssaingnor Johan ly Polen de Waroux. Et secondement soy remaria le saingnor d'Awans à une dame de Saint Servais, quy estoit des Flovenes, et en out on fis, nommé monssieur Wilhelme d'Awans, autrement de Bierséz, quy out dois filhes, dont l'une fut mariée au Gros Mylot de Velroux et l'autre à Bertran de Thilice, freire de monssaingnor Henry de Rocour, chevalier.

820. Et pour ce que la generation des hoirs du saingnor de Cleirmont est devant escrete, nos vous dirons de la dame de Mokyne, seconde filhe du saingnor d'Awans mort à Lonchin. Elle out un fis et une filhe. Le fis fut nommé Johan de Fymal auprès de Hex l'Abbye, et, à case du sornom, madame sa meire fit bastir sa maison à Fymal, nommée la Cour de Mokyne, et elle est encor à present.

821. Le dit Johan de Fymal soy mariat à une damoysele du village de Fexhe auprès de Slins, quy estoit de la filhe monssieur Gerar Petilhon de Voteme. Elle estoit parente à dit Johan au troisieme degréz delle coistie d'Awans, et le dit Johan ly estoit elongiez de cink degréz. De ces dois conjoins issirent Wilhelme de Fexhe, vailhant escuier et de grand estat, et damoysele Johenne, sa sereure.

822. Le dit Wilhelme se mariat à damoysele Isabea, filhe de messire Johan du Lardier, chevalier et eskevin de Liege, dont vous trouveré ci devant l'histoire, au capitle des filhes monsieur Raes, saingnor de Warfesée, promirain de ce nom. Et la dite Johane, sa sereure, epousa monssaingnor Johan Boyleave de Mons, chevalier, fil de monsieur Jean Boyleau, chevalier, esquevin de Liege; et en sont les hoirs contenus ci devant, au capitle quy traite du vieux monssaingnor Renier de Velroux, freire du bon monssieur Badevin l'Amirant de Bierséz.

823. Item, la troisieme filhe du premir mariage monssaingnor Corbea, saingnor d'Awans, fut mariée à messire Johan ly Polen, fis de monssaingnor Libiert ly Polen de Waroux. Cely messire Johan portoit les armes de Warous entirs, car, après la mort de messire Wilhelme, saingnor de Warous, sans hoirs masles, messires Libier, pere de dit Johan, quy estoit l'aisneit freire, pris les armes entirs.

824. Icelluy saingnor Johan fut marié quatre fois. La promire, il epousa la sereure monssaingnor Henry de Hermalle, dont il n'y out pas d'hoirs. La deuxieme fois, il epousa la fille du saingnor d'Awans; la troisieme fois, la dame del Malaxhe; la quatrieme fois, dame Damion, filhe de Wathy Paniot de Juppilhe, laquelle auparavant avoit eü à marit Louys Gilhar. De la filhe du saingnor d'Awans furent trois fis et dois filhes, assavoir messires Wilhelme ly Polen d'Aleur, dit Longue Espée, Libier et Johan ly Polen; et, des dois filhes, l'une fut mariée à vieux Roufar de Mons et l'autre à Thonnar.

825. Le dit messires Wilhelme d'Aleur epousa une des filhes monssieur Gontier Conrar de Bierlo, avoué de Sclessin; s'en furent, et encor sont, plusieurs enfans de petit regiment. Ce messire Wilhelme, après la paix faite des werres d'Awans et de Warous, commença à porter, estant à un tournoy à Liege, les armes d'Awans et de Waroux, comme plus proche auz dois familles. Mais ses enfans portent à present les armes de Waroux soilement, ainsy que leurs predecesseurs.

826. Et le dit Johan ly Polen, freire du dit monssieur Wilhelme, epousa la filhe Henry Huvenea, bourgeois de Liege, quy estoit riche homme et de bonne nation; s'en sont plusieurs enfans, assavoir: messires Johan ly Polen d'Aleur, chevalier, Corbea, cannone de Saint Denis, dans Balduin, prieu de Saint Hubier en Ardenne, Henry le Polen, manant à Pousseur, Libier ly Polen, demorant à Mellin, et une sereure, mariée à Thonar Garçon de Lonchin.

827. Ly dis messires Johans ly Polens ly juvenes porte les armes de Warous entires et at, delle filhe monssaingnor Lowy Martéal, saingnor delle Noeevilhe, pluseurs enfans; dont Johan ly Polens, ses ainsneis fis, est marieis alle filhe Wilhelme de Bearewart, de Fexhe, et ly atres enfans sont juvenes.

828. Item, Henrys ly Polens, li atres freires, est marieis alle filhe d'on bon chevalier, nomeit monssaingnor Johan do Many sor Ourte, doqueil mention sierat chi après faite, quant nos parlerons do viez Frank Homme de Holengnoul, freire al viez saingnor d'Awans devant nomeit.

829. Et Libiers, ly atres freires, at pluseurs enfans delle filhe Wilhelme de Mers.

830. Item, leur sereur, filhe do dit Johan le Polen, mariée al dit Thonart, at on fil, nomeit Thonars, qui, delle filhe Johan d'Oha de Rocourt, at des juvenes enfans.

831. Item, delle filhe monssaingnor Johan le Polen le viez, mariée al viez Rouffar de Mons, issit Badewiens Rouffar de Mons et ly Polens, ses freires, dont y sont ly hoirs, et une sereur, mariée à Badewien, saingnor de Holongne az Pires, dont y sont Badewiens, Johan ly Polens et une sereur, mariée à Wilhelme, freire do saingnor de Graz.

832 Ly dis Badewiens at une des filles Wilhelmes Wilhekars d'Awans. Et ses freires, ly Polens, at la filhe Jakemien de Theux, le halier. Et sont chis enfans asseis juvenes; sy poront avoir des hoirs à planteit.

833. Item, delle atre filhe monssaingnor Johan le Polen, mariée

834. Item, est raisons que nos recordons chiaz qui sont issus do secon mariage le saingnor d'Awans, mort à Lonchiens car sy hoirs do promerain mariage sont chi devant declarés. Ilh out on fil, nomeit monssaingnor Wilhelme, sy que chi devant soy contint, qui soy mariat alle damme de Beasen en Ardenne, filhe saingnor Badewien de Liwon. vinier de Liege, de laqueile ilh out dois filles. Ly promire fut mariée al Gros Mylo de Vellerous; s'en issit Damheaz de Vellerous, qui at à femme damoyse Maroie, filhe Warnier de Lavoit, citain de Liege, dont y sont Ameiles, Dammeheaz de Hermééz et Warniers, qui ont pluseurs enfans, et Wilhelmes, qui n'at nul hoir, et ont dois sereurs, qui ont des enfans.

835. Item, ly atre filhe monssaingnor Wilhelme d'Awans fut mariée à Biertran de Tylichiche, freire à monssaingnor Henry de Rocourt, et morit sains hoir.

836. Item, est assavoir que, de Johan le Page, qui fut freires alle saingnor d'Awans qui morit à Lonchiens, issit ly viez Vilhekars d'Awans, qui fut peires de Wilhelme Wilhekar, maintenant vivant, qui est uns suffisans varlés et qui at planteit de beaz et de bons enfans, qui sont en bonne honeur et prosperiteit, et dont leurs lynages est bin servis et honoreis. Item, messires Johan Ruzemuze de Harsta, jadis chevaliers, et Hombiers Wavereis issirent de bastardie do saingnor d'Awans, et gran planteit d'atres gens suffisans.

837. Ilh vos at, chi devant, esteit declareit la progeyne de monssaingnor Wilhelme, saingnor d'Awans, fil monssaingnor Hombier, saingnor d'Awans, promerain de ce sornom; sy dirons de monssaingnor Hombier Wane de Bernamont, freire do dit monssaingnor Wilhelme, sy avant que nos en summes informeis.

838. Messires Hombier Wane de Bernalmont soy mariat alle sereur sangnor Henrotte de Noevis, lyqueis sires Henrottes fructefiat merveleusement d'enfans, qui furent riches et poissans en la citeit et dehors. Car chil de Dypenbeyke, d'Ouppey, de Bernalmont, tos ly Polardes, ly enfans de Mes, ly hoirs monssaingnoor Houwe de Hacourt, ly Chabos, chilh de Charneur, ly hoirs Gilhon Surllet, et gran nombre d'atres en sont estrais, car ly nombre de ses enfans fut grans et des enfans de ses enfans. Je ay oût dire monssaingnor Johan Polarde, jadis chevalier, esquevin de Liege, dont ilh fut taiions, que sires Gilhes Polarde, fis do fil saingnor Henrote et peires do dit monssaingnor Johan, out, sor on jour de gran quaresme, XXII enfans legitimes d'une seule femme seans à sa table. Et, quanteal que ce soit fours de nostre mateire, nintmains ilh ne desplirait nint az oiians ly prolongemens de cest ystore. Vos saveis que d'antiquiteit ons at parleit sovent fois, et parlerat on encors LX ans chi après, do lynage damme Segraz; et ne trovereis persone nulle en ce païs qui sace à dire qui fut damme Segraz ne ses maris. Mais je vos en diray ce que je en ay oût dire et raconteir le bon saingnor de Dypenbeyke, seneskal de Braybant, peire de cely saingnor qui vit à present, et assy Johan de Braibant, le ryche borgois qui fut esquevins de Liege, solonc ce que par les anciens l'unk avant l'atre leur avoit esteit recordeit. Ilh out jadis on ryche borgoys à Liege, nomeis sires Henris de Noevis, qui fut gransires à saingnor Henrotte deseurnomeit, à saingnor Gilhe de Noevis, peire do viez monssaingnor Ernut de Charneur, et fut gransires assy à saingnor Henry Polarde, peire de saingnor Gilhon Polarde, à saingnor Jakemon Chabot, à Servais Chabot, et à grant nombre d'atres ryches hommes et femmes rychement marieis. Chis ryches borgoys prist à femme une riche boirgoise de Saintron, nommée damme Segraz. S'estoient marchan de laynes d'Engleterre et de toute denréez. Et par especiaz, la dicte damme Segraz gouvernoit tot, et estoit tant aveire et askarse, tant ryoteuze et tant stredante, dedens son hosteit et dehors, que nus ne soy pooit de ly departir sains damage. Et, par tant, at ilh esteit, puy son trepas, tosjours reproveit à ses hoirs d'elle, dont elle out planteit, et à chez qui en sont estrais, qu'il estoient do linage damme Segraz. Et n'esioit nul nouvelle de son marit. Et encours al jour d'uy, par reveal, quant on voit I homme avaritieux et ryouteuz, on dist qu'il est do lynage damme Segraz. Et ly grans saingnors et riche hommes qui en sont estrais, s'en rigolent ly I l'atre sovent fois. De cely saingnor Henrys de Noevis et de damme Segraz, sa femme, issit ly dis sires Henrotte de Noevis, dont messires Hombier Wane de Bernalmont out la filhe. Chis messires Hombier Wane out on fil et dois filhes.

839. Ly fis monssaingnor Hombier Wane fut nomeis messires Hombiers de Bernalmont le viez. Ilh fut marieis dois fois: promirement, à une damme delle Wege, dont y furent ly hoirs, azqueis ly dis messires Hombier raquist la proprieteit de tous les hyretages de Bernalmont; et soy remariat alle filhe d'une riche damme de Namur, qui estoit meire de Boynan de Preit, doqueile secon mariage ilh out dois fis, assavoir monssaingnor Hombier de Bernalmont ly juvenes et freires Ansez, moynes des Precheurs à Liege.

840. Ly dis messires Hombier ly juvenes encargat à porter les armes d'Awans entirs, quant ly juvenes messires Wilhelmes d'Awans, dis de Biersés, fut mors sains hoir marles, et prist à femme la filhe saingnor Gilhon le Beaz del Cange, qui fut peires al vailhant canonne monssaingnor Johan le Beaz et à monssaingnor Henry le Beaz, chevalier. Et orent ly dis messires Hombier et sa femme pluseurs enfans, assavoir Honblet, Gilet, monssainanor Johan de Bernalmont, chevalier, et Corbeaz, et trois filhes, mariées ly une à Thiry le Bron de Flemalle, et ly atre al saingnor de Moudaules, se morit sains hoir, et ly tirche à Henry Spiroul de Namur: tous lyqueis enfans sont trespasseis sains hoirs legitimes, excepteit le dis monssaingnor Johan et les dois sereurs.

841. Ly dis messires Johan soy mariat ly promirs fois alle filhe monssaingnor Nycolle Fraypont, chevalier; sen sont dois fis et dois filles. Ly ainsneis des fis est nomeis Homblés, qui est uns chaytis; nequident, ilh est marieis à une bonne damoysele delle terre de Dolhehen, et n'ont nulle hoir.

342 Ly atre est nomeis Johan Coirbeaz et, ja soice qu'il aiet volentir chevachiet et servit, nintmains ilh soy gouverne petitement, al encontre do conseilhe de son peire et de ses amis. Ilh fut marieis alle filhe Piron de Fakon, vinir de Liege, qui est trespassee sains hoir, et at pris on chatief estat en ses veveis.

843. Item, ly une des filles monssaingnor Johan de Bernalmont est mariee à monssaingnor Johan, saingnor de Graz, et en sont pluseurs enfans.

844. Ly atre fut mariée à Gilhebier de Gochincourt, escuwier; s'en est une nonne et une belle damme et bonne, mariée à on bon chevalier et plain d'oneur, monssaingnor Johan de Seraing sour Mouze, saingnor de Houten, qui en at pluseurs enfans, qui encors sont d'eage et qui puelent avenir en bonne estat, assavoir Alixandre, Gilhebiert, Johans, Johanne et Maroie.

845. Item, avint que, quant ly premiers femme monssaingnor Johan de Bernalmont fut trespasseez, qu'il, ly dis chevaliers, qui estoit juvenes, s'acostat d'une femmes de Votemme et en out pluseurs enfans natureis, dont ilh en y at dois qui sont canones de Saint Bertremeir. Et dierainement, en ses viez jours, en temps qu'il avoit environ de LXX ans d'eage, ilh s'acostat d'une strangne femme, qui estoit delle Boys le Duk ou là entours, de petit estat et de petit honeur, une povre ameresse pour amours, et le mist deleis ly. Et, de cely, at ilh pluseurs juvenes enfans, qui tant ly ont plaisut que, pour l'amour d'eaz, ilh at, en ses anchiens jours, la meire esposéez, à son grain blame et al encontre do conseilh de tos ses amis; et le tint assy gran chireteit qu'il fist onkes sa bonne damme promerair;e. S'en est durement ravaleis; mais ly rycheche de ly et ly chaitiveteit de ses dois fis de promeraine mariage ferat tot forcompteir. Et par tant qu'il est bin apparans que ly dois fis do promerain mariage n'aront nulle hoir, on porat encors veioir que ly ainsneis de ses fis de ce deshoneste mariage sierat chief do lynages d'Awans et en porterat les armes entirs; car, al présent, n'est nus hoyr marles vivans estrais des hoirs marles do casteal d'Awans, fours que ly dis messires Johan et ses hoirs, sy que chi devant vous puet apparoir, puy le viez nionssaingnor Coirbeal d'Awans, qui fut peirs de monssaingnor Wilhelmes, saingnor d'Awans, et de monssaingnor Hombier Wane de Biernalmont, deseurnomeis.

846. Puisque nos avons declareit ce que nos savons do dit monssaingnor Johan de Bernalmont, nos parlerons chi après de ses trois sereurs.

847. Ly premier fut nomée damoysele Ysabeal et fut mariee à Thiry le Bron de Flemale; s'en est une filhe tant soilement, mariée à monssaingnor Henry Martéal, saingnor del Noevevilhe, chevalier, dout y sont ly hoirs.

848. Item, ly atre, mariée al saingnor de Modauls, morit sains hoir. Et ly tirce, mariée à Henry Spiroul, at une filhe, qui at à mary Johan à Lovengnis de Namur, riche homme et beal et gratieuz, dont ilh est une filhe, mariée à Daneal, fis Henrys de Gayves, sangnor de Gounes, escuwier.

849. Nos avons, chi devant, declareit la genealogie do fil monssaingnor Hombier Wane de Bernalmont; sy retournerons as dois filles do dit monssaingnor Hombier. Ly ainsnée fut mariée à on gentilhe homme, nomeit Jakemien, saingnor de Dypenbeyke, escuwier; s'en furent dois fis et une

filhe, assavoir ly sages et ly gratieuz messires Lowys, sires de Dypenbeyke, qui fut senissaz de Braibant, Gilhebiers de Dypenbeyke, qui morit sains hoir, et une damme, mariée a monssaingnor Wilhelme de Rommersove, qui en out trois filhes.

850. Chis messires Lowys, sires de Dypenbeyke, fut, à son temps, reputeis ly plus sages chevaliers de Braibant. Ilh portoit lozengiet d'or et de geules, et crioyt Stoyne. Ilh estoit forment ameis de chez de son linage, car ilh servoit stofféement, et, par especiaz, ilh amoit et adrechoit souverainement ses proismes delle evesqueit de Liege. Ilh prist à femme la sereur do bon et do vailhant saingnor de Sombreffe, qui estoit bin nobles hons et de gran poissance, et en out on fil, nommeis messire Henrys, à present vivant, et une filhe, mariée alle saingnor de Steyne, qui morit sains hoir.

851. Ly dis messires Henrys soy mariat premirement alle filhe do saingnor de Trasengniez, qui morit sains hoir; secondement, alle filhe monssaingnor Henry de Coyterebe, chevalier, mais ilh n'en at nulle hoir.

852. Item, ly sereur do bon monssaingnor Lowy deseurnomeit out trois filhes do dit monssaingnor Wilhelme de Romershoven, dont ly une fut mariée à Johan de Horpale, ly seconde à Waltier de Horpale, et ly atre à Lowy, saingnor de This.

853 Do dit Johan de Horpale sont I fis et dois filhes. Ly fis, nomeis Lowys, n'est nint marieis. Mais ly une des sereurs est mariée al viez Botar de Riwechon; s'en est uns fis juvenes, nomeis Botars. Et ly atre est mariée à Lowy, Pulink, d'Alst deleis Brusteme.

854. Item, delle atre filhe, mariée à Waltier de Horpale, est on fis, nomeis Wilhelme, qui est nouvellement marieis alle filhe Wilhelme de Jardin, citain de Liege. Et ly atre, mariée à Lowy de This, at pluseurs enfans, assavoir Brunnekin, Riga, Lowy, Johan.

855. Item, deveis savoir que ly atre filhe monssaingnor Hombier Wane fut mariée à Frankon Braibechon de Mirmorte, et en furent dois fis, assavoir Werys Braibechons et Henris Braibechons; et croy qu'il y awist des sereurs.

856. Ly dis Werys out on fil, nomeit Lowy, qui encors vit. Chis Lowis out mult beal comenchement, et fut lontemps bin monteis, et servit honorablement ses amis. Mais ilh soy fordespendit et, al dierrain, ilh fut enchoulpeis del mort Radout de Mirmorte; s'en fut forjugiez. Ilh soy mariat alle filhe del Coir, et en sont uns fis, nomeis Weris, et dois filhes, dont ly une est mariée à Ernut, saingnor de Rocourt, s'en sont ly hoirs, et ly altre à Wilhelme, fil Dammeheal de Vellerous.

857. Item, de Henry Braibechon de Mirmorte issit Frankes de Mangnéez, qui fut bailhirs del court de Joupilhe; dont ilhe est une filhe, mariée à Rigaut, fil jadis Johan d'Aiineur, dit de Fleron, escuwier.

858. Encors est assavoir, et point ne doit on oblieir, que ly dis messires Hombier Wane out pluseurs bastars et bastardes. Mais ilh out unk qui est à recorder devant tos les atres: che fut Hombles, ly bons bastars de Bernalmont. Ilh soy mariat à Hacourt et en out dois fis. Ly uns fut nomeis maistre Johan de Saint Martin, delle ordenne Nostre Damme des Carmes. Ilh fut maistre en theologie, evesque de Jaffé et suffragans pour l'evesque Englebiert delle Marche en ceste dioceze. Sy fut tres eloquens et gratieuz en tos ses fais. Et ly atre fut nomeis Henris d'Awans. Ilh fut officieus al noble saingnor d'Agymont et de Walhehen, et soy mariat alle filhe do riche archidyakenne de Molant, canonne de Saint Lambiert. Et, de cely, est une filhe, qui fut, en ses juvenes jours, ly plus

belle femme delle citeit de Liege et qui avoit plus de requerans par mariage. Finalement, elle fut mariée à Waleran, fil monssaingnor Johan Buchair delle Boverie, chevalier, dont mention sierat chi après faite, en capitle parlant de monssaingnor Libier Crepon d'Othééz, freires do viez et do promerain monssaingnor Hombier Coirbeal d'Awans.

859. Ors at esteit, chi devant, declareit queile generation est parvenue de monssaingnor Hombier Coirbeal d'Awans, promerain de ce sornon, fil do vaillant monssaingnor Hombier de Lexhy, secon fil monssaingnor Breton le viez de Warous; se dirons, chi après, de monssaingnor Libier Crepon d'Otééz, secon freire do dit monssaingnor Hombier Coirbeal, promerain de ce sornon.

860. Ly dis messires Libier Crepon soy mariat dois fois: promirement, alle filhe Gayvres, qui estoit canonesse d'Andenne; secondement, alle filhe do saingnor de Leutes. Do premier mariage issirent messires Wilhelme, le Moulnirs, messires Godefroid de Wyhongne et messires Daneal, chevalier, Henrys de Wihongne, canonne de Saint Denys, et freire Johan, qui fut freires meneurs. Chis messires Libier Crepon ne portat nint teile blazon comme ses freires, ly sires d'Awans, car ilh portat vairiet d'argent et d'azure à une bende de geules.

861. Messires Wilhelmes le Moulnirs, ainsneis fis monssaingnor Libier Crepon, out une filhe tant soilement, qui fut nomée ly damme de Payves, par tant qu'elle fut mariée à on chevalier de Hamale demorant à Payves. qui portoit d'or à on faisse coingnelééz de geules. Ilh en fut on fil, nomeit Henris, et dois filhes; ly une fut mariée à Everar Burluré de Liege; et ly atre, alle peire monssaingnor Johan de Lybines, en la conteit de Namur, dont chilh de Libynes sont issus.

862. Do dit Everart Burluré issirent Lambier de Payves et Henris de Payves, qui fut gratieuz et plaisans escuwiers, et morit sains hoirs; et orent une sereur, nomée damoysselle Contesse.

863. Ly dis Lambiers prist à femme damoysselle Maroie, filhe le viez Thomas de Hemericourt; s'en trovereis tot la generation en capitle chi devant parlant de chez de Flemale issus de monssaingnor Makaire delle Heys. Et damoysselle Contesse, filhe do dit Everar Burluré, fut mariée à Johan le Rian de Latines; s'en sont ly hoirs à present.

864. Item, delle atre filhe le damme de Payves sont issus chez de Lybines. Et, do dit Henrys, leur freires, furent plusieurs enfans, clont y sont ly hoirs. Et ay oüt dire que messires Daneal, freires do dit monssaingnor Wilhelme le moulnir, out des hoirs, qui ne m'ont nint esteit denomeis. Mais messires Godefroid de Wyhongne morit sains hoir.

865. Item, do secon mariage monssaingnor Libier Crepon issirent messires Ernus d'Othééz, Olivier de Jouprelle, Libiers de Wyhongne, Hanoy et Rondeaz, et ly damme de Hemmetines.

866. Ly dis messires Ernus soy mariat alle filhe d'on venerables borgoys de Liege, de grande honeur et de grant estat, nomeit saingnor Johan Boveal, dont sires Lowy Surllet ly juvenes avoit la pareilhe filhe, et portoit Souwengnééz delle coistie d'Eawailhe, assavoir d'or à une faixh de geules, à trois rutures d'azure. Ilh out, de ces damme, dois fis, assavoir Wilhelme de Skendremale, qui morit alle bataillhe à Nyerbonne, et saingnor Libier de Skendremale, canones de Saint Bertremeir en Liege.

867. Ly dis Wilhelmes prist à femme la sereur Johan, saingnor de Lamynes; s'en furent on fil et dois filhes, assavoir messires Johan de Skendremale, chevalier, esquevin de Liege et castelains de Montengnis, damoysselle Katerine, femme Johan de Jardien de Warnant, qui morit sains hoir, et damoysselle Françoisse, qui encors vit et onkes ne soy vout marieir.

868. Do dit monssaingnor Johan et de madamme Conygon de Jouplou, sa femme, est ilh uns fis, juvenes d'eage, nomeis Wilhelmes de Skendremale, qui nouvellement at pris l'ordenne de chevalerie, et est marieis alle filhe do saingnor de Jauce et de Hyerghes.

869. Puysque nos avons parleit de monssaingnor Ernut d'Othééz, ainseit fil monssaingnor Libier Crepon do secon mariage, nos dirons de Olivier de Jouppele, freire do dit monssaingnor Ernut. Ilh prist contraire blazon de son freire et de son gransaingnor, car ilh prist une escut de geules à une bende vairie d'argent et d'azure; et soy mariat do lynages de Preit, à une damoyselle qui estoyt de chez de Lovengnéz, et en out dois fis et une filhe, assavoir Olivier, qui morit sains hoir al pongnyche à Lonchiens, deleis le saingnor d Awans, et Waleran de Jouppele, qui fut ly miedres escuwers de Hasbainge à son temps. Et leur sereur fut mariée à monssaingnor Johan Buchair delle Boverie, chevalier.

870. Ly dis Walerans fut preuz et sages, bin servans ses saingnors et son linage; se fut marieis et out on fil, nomeit Olivier d'Ohay, saingnor de Centfontaines, bon escuwer et riche, et une filhe nomée damoyselle Humaine de Masbor, dont y sont ly hoirs.

871. Ly dis Oliviers soy mariat alle filhe monssaingnor Johan Botir d'Aaz, chevalier, dont ly bons messires Henrys de Fexhe out la parelhe sereur. De ceste damoyselle out ilh trois fis, assavoir Waleran, qui morit sains hoir, Johan Botir, saingnor de Hour et de Centfontaines, et Olivier, manant à Ohay, qui à present est chevaliers.

872. Ly dis Johan Botirs at une filhe tant soilement, mariée à messire Semale, fil monssaingnor Thibaut Semale de Bonneville, chevalier. Et ly dis messires Oliviers, ly freires Botirs, at des hoirs, qui sont encors juvenes.

873. Item, ly sereur do bon Waleran de Jouppele fut mariée al dit monssaingnor Johan Buchair, et en furent plusieurs enfans, assavoir Olivirs, Walerans, Buchelés, Thirys, et une filhe mariée à Gotehen; lyqueis Olivirs, Buchelés et Thirys morirent sains hoir.

874. Et ly dis Walerans soy mariat alle plus belle damoyselle qui fuist en ce païs, qui estoit filhe Henry d'Awans, le fil de Homblet, le bon bastar de Bernalmont, qui avoit esteit fis de monssaingnor Hombier Wane, freire al viez saingnor d'Awans, dont chi devant est faite mention. De ceste damoyselle et do dit Waleran delle Boverie est uns fis, nommeis messires Johan Buchairs delle Boverie, chevaliers, qui at à femme damme Blanche, filhe do secon mariage monssaingnor Male Assireit delle Monzée, chevalier, dont mention est faite chi devant, en capitle parlant de monssaingnor Ameyle al Oelh de Lexhy et de chez de Liers et de Rocourt.

875. Nos avons, chi devant, parleit de monssaingnor Ernut d'Othééz et de Olivier, son freire, enfans monssaingnor Libier Crepon; sy dirons, chi après, des atres freires et, devantrainement, de Libier de Wyhongne. Ilh en fut dois fis, assavoir Percheval de Wyhongne et freires Johan Aygrés, moynes des Precheures à Liege; doqueil Percheval vos trovereis toute la generation chi devant, en capitle parlant des hoirs damme Margriete Surlette, qui fut damme de Vellerous.

876. Item, Hanoïie, ly tirs fis monssaingnor Libier Crepon de socon mariage, soy mariat à une damoyselle de Brukehem; s'en fut on fis, nomeis Johan Peveriaz d'Otééz, qui tuwat Gerar de Bierlouz. Chis Peveriaz soy mariat à damoyselle, filhe Johan Houweneal, citain de Liege, qui estoit engentré en la filhe saingnor Jakemme del Coir, esquevin de Liege, qui, après ce, reprist à mary monssaingnor Ystasse, le Frank Homme de Holengnoul. Et, do dit Peveréal et de sa femme,

issirent Johans Pevereal de Holengnole, manans en Ilhe, et ses sereurs. Chis Hanoye portat les armes son peire, assavoir vairiet d'argent et d'azure, à une bende de guele.

877. Do dit Johan Pevereal trovereis les hoirs chi devant, en capitle parlant de monssaingnor Makaire delle Heys de Flemale. Et, de ses sereurs, fut ly une mariée à Petit Montengnéez; s'en sont dois filles. Ly une at Renekin de Petit Montengnéez, dont y sont grant nombre d'enfans. Et ly atre est mariée à Mons deleis Crotoir, et en sont assy planteit d'enfans.

378. Item, Rondeaz, ly quars et dierains fis monssaingnor Libier Crepon, soy mariat en la conteit de Louz et portat teile blazon comme Oliviers, ses freires; et, de ly, sont issus chilh de Jamines, qui encors portent teile blazon. Et deveis savoir que tuit ly hoirs marles deskendus des hoirs do jadis monssaingnor Libier Crepon crient Domartien, nonobstant la contradiction de leurs blazons.

879. Item, est assavoir que ly filhe do dit monssaingnor Libier Crepon fut mariée à Hemmetines, en la conteit de Namur; s'en issirent messires Libier de Hemmetines, messires Ernus de Pontilhache et Stassins de Hemmetines, et dois sereures.

880. Puyque nos avons recordeit la generation des trois fis la bonne damme de Hemmetines, nos dirons de ses dois filles. Ly promire fut mariée à Wilhelme, avoweit de Crescengnéez; s'en issit messires Ystasses de Crescengnéez, lyqueis portat les armes d'Awans à une crois de geules. Ilh soy mariat à Liege, alle sereur Johan Mostarde, qui fondat l'ospital en le ruwe do Pont, et en out des tres beaz enfans, mais onkes ne soy portont pais, honour et serviche, assavoir Wilhelme, Henris, dis le Moynes, Ystasse, Johan et Ernus.

881. Ly dis Wilhelmes soy mariat alle filhe do voweit de Fologne; s'en sont ly hoirs. Et ly Moynes soy mariat alle filhe Petit Wilhelme de Tylves; s'en sont ly hoirs. Ly dis Johan soy mariat à damoyelle Englentines de Scharpebergh, deleis Tonges, dont ilh est uns fis, nouvellement marieis à Katerine, filhe Hombier del Pas de Wonke, secretares des XII de lynages.

882. Item, ly atre filhe la damme de Hemmetines fut mariée à monssaingnor Heyneman de Bawengnéez, deleis Meffe, dont y sont ly hoirs.

883. Nos avons parleit, chi devant, de monssaingnor Coirbeal, le viez saingnor d'Awans, et de monssaingnor Libier Crepon, son freires, qui furent enfans de monssaingnor Hombier de Lexhy, secon fil monssaingnor Breton le viez de Warous; sy dirons, chi après, de monssaingnor Ystasse, le viez Frank Homme de Holengnol, tir fil do dit monssaingnor Hombier de Lexhy.

884. Chis messires Ystasse fut sornomeis Frans Hons, par tant que ly noble damme de Haneffe, nomée ly Frank Damme, fut sa marine. Ilh soy mariat à une des filles monssaingnor Ywen de Monferan; s'en furent trois fis et pluseurs filles, assavoir messires Ameiles de Holengnoles, qui tuwat monssaingnor Renier de Viseit, et messires Ystasse do Many sour Ourte, chevalier, et Ernus de Holengnoul; et, des filles, fut ly une mariée à Graz, s'en issit ly peires monssaingnor Johan Boyleave, chevalier, esquevin de Liege; delle seconde filhe issit messires Ystasse, ly Frans Hons de Holengnoul; et ly tirche fut mariée à Mylar de Vorouz.

885. Item, do dit monssaingnor Ameyle issit ly peires Ameyles Mylot de Holengnoul, qui fut freires de remariage à Warnier Bocho de Vellerous; doqueile Ameile ly hoirs sont à present.

886. Item, do dit monssaingnor Ystasse do Many, secon fil monssaingnor Ystasse, le viez Frank Homme de Holengnoul, issirent Stassin, Giles et Vachos de Rennes, et quatre filles.

887. Do dit Stassin do Many issirent Stassars et Makairs de Pousseur, ses freires.

888. Item. do dit Stassar issirent messires Ystasses de Pousseur, chevaliers, et Counars, ses freires; lyqueis chevaliers soy governat petitement et morit sains hoir; et Counars, ses freires, qui est sires de Pousseur, at des hoirs; et en sont plusieurs sereurs.

889. Item, Makars, freires al dit Stassar, soy mariat alle sereur Helbier de Preit, esquevin de Liege, fil monssaingnor Radut de Preit, dont y sont ly hoirs à present. Et out ly dis Herbiers une atre sereur, mariée à Herves, dont y sont plusieurs enfans.

890. Item, Gilhes do Many, secons fis monssaingnor Ystasse del Many, fut ly miedres escuwirs qui fuist par dela Mouze à son temps. Ilh et ly bons Waltier de Corwaremme, qui demorat à Nandren, et messires Wery de Harzéez furent chambrelains et secretaires cubiculaire al bon empereur Henry de Lussemborch. Chis vailhans escuwirs, Gilhes del Many, ilh out on fil et une filhe. Ly fis fut nomeis messires Johan del Many. Ilh fut compains al saingnor de Faingnoules en Haynau et regentist bin son bon peire. Chis sires de Faingnoules le mariat à une veve damme, qui avoit esteit femme al saingnor de Buziez, deleis Moncoirnet, en Tyrasse; et en est une filhe, mariée à Henry le Polen d'Aleure, freire à monssaingnor Johan le Polen, maintenant vivant, desqueis mention est chi devant faite, en la genealogie do saingnor d'Awans, qui fut leur taiions. Et, de ceste damoyse, at ly dis Henris des jovenes enfans. Et, par tant que ly dis Gilhes fut preuz, et amat les armes et traveilhal le corps tant qu'il soy pout armer, on dist commonement en ce païs, par solas, en ramembrant son louz et son pris, quant on voit une vielhe nonnain, ou une vilhe damme ou damoyse, qui at, en sa jovente, ameit volentier par amours: « A bien soit Gilhes do Many, chis bons viez escuwiers ! » Item, ly filhe do dit Gilhes de Many fut mariée à Thonar de Fouz, dont chi après sierat faite mention, en capitle parlant de monssaingnor Bastin Lawet de Fouz.

891. Item, Vachos de Rennes, ly tirs fis monssaingnor Ystasse do Many, demorat à Rennes sor Ourte; s'en issirent Henris de Rennes, Vachos de Rennes et Stassars de Rennes, qui sont tous formors.

892. Item, est assavoir que Ernus, tirs fis monssaingnor Ystasse, le viez Frank Homme de Holengnoul, fut peires de Renart de Holengnoul, qui out à femme la sereur Oury delle Fontaines, dont y furent ly hoirs.

893. Item, des quatre filhes monssaingnor Ystasse do Many, furent les dois beghines; et ly atre fut mariée à Gilhe Bechemoxhe, dit de Noefcasteal, dont y sont dois filhes: ly une est mariée à Gilhe de Mes, manant Defour Casteal à Liege, et ly altre à Gerart de Seraing, fil delle sereur Colar le Pannetier. Do dit Gilhe de Mes est une filhe, mariée à monssaingnor Gerart le Pannetier, fil do dit Colart; s'en sont plusieurs enfans. Et, do dit Gerart cle Seraing, est assy une filhe, mariée premierement à monssaingnor Godefrois delle Capelle, qui morit sains hoir, et de noveal at elle repris à mary monssaingnor Robiert de Jouplou, chevalier; s'en at des jovenes enfans.

894. Item, ly quatreme filhe monssaingnor Ystasse do Many fut mariée à Liege, à maistres Watier de Hanut, advokaut en la court de Liege; s'en issit messires Johan de Hanut, chevaliers, et dois sereurs, dont ly une fut meire de monssaingnor Waltier delle Claveche, et ly atre fut meire de monssaingnor Johan Germeal de Hanut. Do dit monssaingnor Johan de Hanut est issus messires Gilhes de Hanut, maintenant vivant, doqueile et de ses hoirs est faite mention chi devant, en la genealogie de saingnor de Warfezéez qui out les XX enfans, par tant que ly dis messires Gilhes soy mariat alle filhe monssaingnor Wilhelme de Pepenges, tir fil do dit saingnor de Warfezéez do promir mariage.

895. Item, do dit monssaingnor Waltier delle Claveche sont messires Ernus delle Claveche, Stasses, ses freires, qui est sires de Truwengnéez, et une sereur, qui est meire des enfans de Binkehemme, assavoir de monssaingnor Waltier. de monssaingnor Olivier, d'Andrier et de pluseurs atres.

896. Item, do dit monssaingnor Johan le Germeal trovereis les hoirs en capitle parlant de monssaingnor Ameile de Lexhy et de chez de Liers et de Rocourt. Et tos ly Vairons et ly Hongreaz, chis delle Fontaine, de Waremmes, et pluseurs atres, sont estrais delle coystie de Holengnoul, quanteal que je ne sache nint bin d'oir en hoir nommeir leurs predecesseurs.

897. Nos avons, chi devant, declareit la gèneration des trois fis monssaingnor Ystasse, le viez Frank Homme de Hollengnoul; sy dirons, chi après, de ses trois filhes. Ly une, si que dit avons, fut mariée à Graz; s'en issit ly peires monssaingnor Johan Boyleawe, qui fut chevaliers, esquevins de Liege, dont ly generation soy contint chi devant, en capitle parlant do viez monssaingnor Renier de Vellerous. Ly seconde fut mariée en la vilhe de Holengnoul; s'en issit messires Ystasse, Frans Hons de Holengnoul, chevaliers, qui prist les armes de part sa meire, assavoir les armes d'Awans: vairiet d'argent et d'azure, à on labeal à chink pendans d'or. Chis messires Ystasses fut uns rades chevaliers et durement doteis de ses annemis en morteil faite do paiis; se fut par hayme decoleis à Mouhaut, par le jugement de ses annemis, en mortele faites do paiis, al temps delle evesque Adulph delle Marche. Ilh out à femme la filhe saingnor Jakemme de Coir, esquevin de Liege, et en out xv enfans, fis et filhes: s'en diray ce que j'en say. Ilh fut ly Frans Hons de Manshoven, Gilhons de Fouz, Hombier Coirbeaz, esquevin de Liege, tres gratieuz escuwiers, Johan ly Oncles de Vileir, damoyselle Crestine, femme Johan Pyvo de Huy, damoyselle Johanne, qui morit sains hoir, et une atre, mariée à Henry de Bollezéez, dont y sont pluseurs enfans; et y out pluseurs atres. Mais soiez certains que tous ly freires furent, en leur jovente, ly plus apiers de Hasbaing.

898. Item, ly Frans Hons soy mariat à Manshoven, en la conteit de Louz, dont y sont ly hoirs, assavoir Frans Hons de Palihoul et Johan de Manshoven, etc.; et vengat, tout enemy la vilhe de Louz, le fil Jakemien Festeal, son cuzien, et ochist le faituele, et soy partit sains damage.

899. Item, do dit Gilhon fut Wilhelme de Fouz, qui soy mariat alle filhe Gilet Mailhar, dont ilh est une filhe, mariée à Johan, fil monssaingnor Badewien de Saint Servais, chevaliers, esquevin de Liege; et at ly dis Wilhelmes une sereur, mariée al jovene Wilhelme Wilhekair d'Awans, qui sont bin en point d'avoir planteit d'enfans.

900. Item, ly dis Coirbeaz, qui fut ly melheurs et ly miez entechiez de tous ses freires, sages, debonaires et cortois, et leur chief, ilh fut marieis dois fois: promirement, alle filhe monssaingnor Badewien Xherveal, chevalier, dont ilh out des beaz enfans, durement apiers et qui en grant estat fuissent parvenus, s'ilh awissent viskeit leur eage, mais ilh morirent sains hoir. Ly uns fut nomeis Frans Hons, qui soy mariat al damme d'Engixh; et ly atres, Coirbeaz, qui fut canones de Saint Lambier. Secondement, soy mariat ly dis Coirbeaz à damoyselle Marie, filhe monssaingnor Johan Polarde, chevalier, esquevin de Liege, qui estoit veve de Renier de Biertréez, escuwier, dont ilh ly estoient demoreis uns fis et une filhe. De ceste damoyselle out ly dis Coirbeaz pluseurs enfans. assavoir monssaingnor Johan, abbeit de Heylenchines, Ystasses Frans Hons, manant à Holengnoul, Hombier Coirbeal, canonne de Saint Martien, Giles Coirbeal, canonne de Saint Crois; et ly atres est nomeis Badewins; et ont une sereur canonesse à Blize et des nonains.

901. Item, ly dis Ystasses Frans Hons est marieis alle filhe Huwar Houwenel, et ont une filhe asseis jovene d'eage.

902. Item, Johan, dis ly Oncles, soy mariat, en ses anchiens jours, alle filhe Ferri de Vileir l'Evesque, dont y sont ly hoirs à present.

903 Et, de damoysele Crestine et de Johan Pyvo, son promir marit, issirent Johan Pyvotiaz et une filhe, mariée à Waltier de Hauteperne de Skendremale, qui morit sains hoir. Et, secondement, soy remariat damoysele Crestine à Johan Askaro; s'en furent dois filhes, assavoir damoysele Katerrine, qui, de sa volenteit, soy mariat à Colart le Boieigne, et ly atre, nomée damoysele Johanne, fut mariée à Andrier, fil monssaingnor Pire de Thyne, chevalier.

904. Et ly dis Johans Pyvotiaz prist à femme damoysele Johanne, filhe monssaingnor Lowy d'Ouffey, chevalier, esquevin de Liege, dont y sont ly hoirs.

905. Item, ly tirche filhe monssaingnor Ystasse, le viez Frans Hons de Holengnoles, fut mariée à Mylart de Vorouz, dont mention est chi devant faite, en capitle parlant de monssaingnor Henry de Rolouz, son freire. Et est assavoir que, de ceste meismes coisté de Holengnoles, sont issus Johan et Ameiles de Skendremale, manans à Seraing le Casteal; item, ly Brons de Flemale, ly enfans, ly Chantre de Flemale, tos ly Hongreaz et ly Vayrons, et pluseurs atres. Ors retournerons à monssaingnor Anthone de Lexhy, dit le Moyne, quatreme fil monssaingnor Hombier de Lexhy.

906. Do dit monssaingnor Anthone ne saroye je proprement nomeir les hoirs, comptant d'oir en altre; mais tos ly Mailhars de Montegnéez et chilh d'Odoumont, en Hasbaing, en sont issus.

907. Item, ly cinquemes fis monssaingnor Hombier de Lexhy fut nomeis messires Johan Lokreaz. Ilh out une filhe mariee à monssaingnor Andrier, fil do viez monssaingnor Renier de Vellerouz. Ilh encargat à porteur de VI pieches d'or et de sable, et tenoit grant terre à Hodires et à Comblen, et cryoit Comblen. Et, de ly, sont issus chilh de Hodire et de Comblen, dont ilh at esteit gran generation, car ilh en issit, en deskendant, monssaingnor Johan de Parfonriu, messires Andrier Brakés de Hodires, ly Panios, dont y sont ly hoirs, Ansez de Lexhy, dis de Hodires, chilh de Fanchon, et pluseurs atres.

908. Item, ly VIe et dierains fis monssaingnor Hombier de Lexhy fut nomeis messires Gerars Petelhons de Votemme. Ilh out quatre fis et pluseurs filhes, et cangat le blazon son peire, car ilh ne prist nint les armes d'Awans, anchois prist on escut d'argent à on chief de geules, et criat Domartien. Ly ainsneis de ses fis fut nomeis Berewirs; ly secons, Thirys; ly tirs, Mailhefiers; et ly quars, Wilhelmes, se fut canones de Saint Martien.

909. Do dit Berewier. ainsneit fil monssaingnor Gerart Pettelhon, issit Johan ly Berewirs de Saint Lynar, dis de Rolouz, qui soy mariat alle filhe Henriet de Rolouz, le bon escuwier, dont ly hoirs sont chi devant declareis, en capitle parlant de monssaingnor Libier, saingnor de Geneffe.

910. Item, de Thirys, secon fil monssaingnor Gerar Petelihon, issirent, en deskendant, sires Anthonnes ly Berwirs, canones de Saint Croys, Gerars, ses freires, Adilhe, leure sereure, et pluseurs pouvres gens manans à Cronmouze et là entours.

911. Item, de Mailhefier fut une filhe, mariée à Wilhelme Favereal de Rychelles, dont mention est chi devant faite, en capitle parlant de monssaingnor Ameile de Lexhy alle Oelhe et des XI filhes monssaingnor Oury de Bonbais.

912. Item, ly une des filhes monssaingnor Gerart Petelhon fut mariée à on escuwier de Fexhe deleis Seliens; s'en issit une filhe, mariée à Johan de Fymale, qui fut fis la damme de Mokines, dont plus expresse mention est faite chi devant, en capitle parlant do saingnor d'Awans.

913. Item, d'unne des atres filhes issirent Johan de Rychelles, qui demorat à Joupilhe, et Coletes delle Cour de Votemme. Ly dis Johan prist a femme la sereur Johan de Foron; s'en sont dois fis, assavoir Renechon, dis Werpesteyne, et Graf; laqueile damoyse soy mariat à Gerar de Weys, dont ilh est uns fis, nomeis Jacop; et, tircement, reprist elle à marit Gerar le Germeal d'Aleure, qui est mors sains hoirs.

914. Item, Colecles delle Court de Votemme at des enfans gens laburans à Votemme et là entours.

915. Et deveis savoir que chis messires Gerars Petelhons out à femme la sereur Lowy Loylhe de Joupilhe, qui fut peires à Waltier Panée et al viez Drughien; et estoit genty femme ly meire do dit Lowy et filhe le conte de Vyane adont vivant. Et vos diray dont ly acointance vint, ensy que je ay oût a recorder les anchiens. Veriteis est que, adont et longtemps après, le court de Joupilhe, con dist à present le bailherie de Pont, apartenoit de droit hyretage al evesque de Verdon et à son engliese. Et, par tant que c'estoit loing de son paiis, ilh le miste en la warde do conte de Vyane, qui y metoit officieus par sa main. Et le governat ly peire do dit Lowy, com officieus, longtemps car ilh estoit durement poissans à lieu; lequeile gouvernement pendant. ilh s'acoutat de damoyse Enghyne de Vyane, filhe do dit conte, et le prist à femme; s'en issirent Lowy Loelh, deseurnomeis, et sa sereur, mariée al dit monssaingnor Gerar Petelhon. Et, de dont en avant et encors juxes al temps présent, ont chilh de Joupilhe et de Votemme clameit proismeteit à chez de Viane. Et veys de mon temps que, quant ly contes Wilhelmes de Namur dierain mors fist tuweir Lowy de Vyane, que messires Johan de Vyane, canones de Saint Lambier adont vivans et freires do jadis Lowy, retrahit vers le lynage de Joupilhe et vers chez que do dit monssaingnor Gerart Petelhon estoient deskendus, com à ses proismes; et furent tosjours sor son conseilhe et sor lez journéez. Et, quant les damoyseles de Votemme alont morir, qui furent beghines et filhes do dit monssaingnor Gerart, elles, par caze de ceste amisteit et proismeteit, fisent le dit monssaingnor Johan de Vyane executeur et foymen de leurs bin.

916. Ors vous puet, chi devant, apparoir la genealogie des vi fis monssaingnor Hombier de Lexhy, secon fis monssaingnor Breton, le viez saingnor de Warous; sy dirons, chi après, des h quatre filhes do dit monssaingnor Hombier de Lexhy.

917. Ly promire filhe do dit monssaingnor Hombier fut mariée à monssaingnor Thomas de Puchey; s'en fut uns fis, nomeis Hermans, qui out on fil, nomeit Clerchon de Puchey, dont y sont ly hoirs. Ceste damme fut veve; sy soy remariat à monssaingnor Thomas d'Antynes; s'en issit messires Coirbeaz d'Antynes, qui portoit vairriet d'argent et d'azure, à on bar de geules, et cryoit Domartien; et chis bars estoit delle coyslie de Marchines desoir Barche, de laqueile coysté chilh de Pexheurive de Huy sont estrais; doqueile monssaingnor Coirbeal chilh d'Antynes, qui ont esteit et encors sont vailhans gens, sont issus.

918. Ly seconde filhe monssaingnor Hombier de Lexhy fut mariée à Hombier d'Elnoyt; sy ne say dont ilh estoit ne queile generation en est parvenue.

919. Item, ly tieche filh do dit monssaingnor Hombier de Lexhy fut mariée à monssaingnor Sauwien do Pas de Wonke, qui portoit d'argent à on chief de geules, ensy que messires Gerars Petelhons de Votemme; et en issirent dois chevaliers, assavoir messires Waltier et messires Johan del Pas. Chis messires Waltier portat les armes de son peire, et messires Johan, ses freires, portat l'escut d'iermine

al chief de geules, car leurs escus pendent encors à present en l'engliese de Wonke; et, sor le pire del sepulture do dit monssaingnor Waltier, est escript qu'il trespasat l'an mil dois cens LXIII, en aoust. Et ly dis messirés Sauwiens, ses peires, avoit esteit tuweis en devant par monssaingnor Waltier, dit le Vilain, qui demorat en la court de Chanarainnes, à Wonk; si que, après pluseurs homecides qui en avinrent, pais fut faite del mort le dit monssaingnor Sauwien, parmy ce que ly dis messires Waltier del Pas prist la filhe do dit monssaingnor Waltier le Vilain en mariage, qui estoit riche durement, car ses peires n'avoit plus d'enfans, et portoit keferteleit, teilement que messires Renars de Berghes; et, de ly, est issus ly linage c'on dist des Greveces de Wonke, ensy que ly anciens ont tesmogriet.

920. De ces dois conjoins issit Colay del Pas de Wonk et pluseurs atres fis, qui sont mors sains hoirs legitimes; mais pluseurs bastars et bastardes en sont encors à present. Mais ilh y out pluseurs filhes, sereurs al dit Colay do Pas, assavoir ly meire monssaingnor Johan Botir d'Az, ly meire Hombier et Wotre de Mierlant, qui furent wailhans escuwiers en morteiles faite do pais.

921. Item, do dit Colay del Pas issirent Johan, dis ly Bechus de Wonke, et Hombretoie, ses freires, et pluseurs atres freires, qui sont tos mors sains hoirs legitimes, excepteit le dit Hombretoie, et une sereur, qui fut mariée à Badout, saingnor de Houten.

922. Chis Hombretoie soy mariat à damoysele Alixandre, filhe Henry Dameheal de Flemale, qui morit al pongnyche à Lonchiens; s'en issirent pluseurs enfans, dont mention est chi devant faite, en capitle parlant des hoirs monssaingnor Makaire delle Heys de Flemale.

923. Item, do dit Badout et delle filhe Colay do Pas issirent Colar del Tour, Lambier, Badous et pluseurs atres, dont ly hoirs sont petitement proveis, car ilh y at pou des Badous qui aient poissance de servir ses amis, car leurs peires vendit sa terre à monssaingnor Henry de Fexhe, saingnor d'Az et de Herméez, et ly hoirs ont esteit labureurs.

924. Item, messires Johan do Pas, freires do dit monssaingnor Waltier et fis de monssaingnor Sauwien, out on fil, nomeit Wilhelme del Pas, qui fut peires de Johan del Pas, qui fut uns bons escuwiers et hardis, et qui morit sains hoirs legitimes. Mais, de ces gens del Pas, est tant de bastars et bastardes que c'este mervelhes.

925. Item, ly quarte et dierainne filhe monssaingnor Hombier de Lexhy, fut mariée à Maruele deleis Saint Tron; s'en sont pluseurs honorables persones estraites, desqueiles Ameiles de Lexhy, esquevins de Saint Tron, et pluseurs atres sont deskendus.

926. Declareit avons chez et chelles qui sont issus de monssaingnor Hombier de Lexhy, dit d'Awans, secon fil monssaingnor Breton le viez de Warous; sy parlerons, chi après, de monssaingnor Ystasse Frongnet, tir fil do dit monssaingnor Breton.

927. Messires Ystasses Frongnés, de Vileir l'Evesque, tir fil de monssaingnor Breton le viez de Warous, fut peires de monssaingnor Libier, dit l'Ardenois, de Vileir, et de monssaingnor Oston, doien de Saint Pire, et encargat à porter vairiet d'argent et d'azure à on coir de geules. Chis messires Libiers out dois fis, assavoir monssaingnor Ystasse, dit le Gran Varlet, et Lybier l'Abalestier. Do dit monssaingnor Ystasse yssirent messires Libiers Liborés, et Gerars de Strayles, et Ystasse, qui morit sains hoir, et pluseurs filhes.

928. Item, ly dis messires Libiers Liborés soy mariat alle filhe Johan de Borne; s'en issirent Ystasses, qui morit sains hoir, Johan de Dois Vileir, sires d'Odoir deleis Vileir l'Evesque, et Ernus, qui assy morit sains hoir. Do dit Johan est une filhe, mariée à Gilhe Polarde, escuwier; s'en sont dois

fis et dois filles, assavoir messires Libiers Polarde, esquevins de Liege, qui nouvellement at pris l'ordenne de chevalerie, et Giles Polarde, et, des filles, fut ly une mariée à Lambier de Gounes, escuwier, s'en sont ly hoirs, et ly atre, nomée Magritte, est nouvellement măriée à Johan de Parfonriu, manant à Flemale. Et out ly dis messires Libiers Liborés plusieurs filles. Et, tant que do dit Libier l'Abalestrier, sont issus ly Joielés de Vileir et plusieurs menuez gens laburans.

929. Item, do dit Gerars de Strayles issit Hermans de Strailes, dont y sont ly hoirs. Et, tant que des femelles de ceste coysté, je ne suy nint informeis.

930. Item, deveis savoir que ly quars fis monssaingnor Breton le viez de Warous fut nomeis messires Fastreit Penylh et out pluseurs enfans. Ly uns fut nomeis messires Hombier, dont ilh issirent Johan d'Akoche et Giles, ses freires, dont y sont ly hoirs. Del atre, issirent Lowys de Wotrenge et Fastreit de Horpale. Delle atre, issit messires Lowy de Kemexhe, qui fut peires de monssaingnor Fastreit de Kemexhe, et en issit ly Vowereaz de Houten.

931. Item, ly chinquemes fis do dit monssaingnor Breton le viez fut nomeis messires Bastien de Holengnoul et out pluseurs enfans, assavoir monssaingnor Anthone Mailhet, monssaingnor Renier de Fiiez, monssaingnor Crochon de Vyerney, monssaingnor Bastin Lawet de Fouz, et un atre, dont ilh issirent ly Brikons de Holengnoul et Renars delle Haye de Hermey, et leurs hoirs.

932. Messires Anthones Mailhés, ainsneis fis monssaingnor Bastien de Holengnoul, prist à femme la filhe monssaingnor Thyry Hustien de Serainge sor Mouze, qui fut peires de monssaingnor Hustien et à Wilhelme de Seraing, qui sont ensevelis al devant delle chancheal delle engliese de Serainge, et portent d'argent à on satoir de geules, à quatre liwecheaz de sable; et ja soice que ces armes soïent semblant az armes de Hozemont delle coysté de Flemale nintmains ce n'est nint de celle coisté, anchois sont ces armes les armes de Serainge, et crient Serainge. Chis messires Anthones fut sornomeis Mailhés, par tant qu'il brisat ses armes d'one ourle de mailhés, car ilh prist les armes de Warouz, qui ses gransires, ly viez messires Breton portoit, et les brisat d'one ourle semenchiet de mailhés d'argent. Ilh out on fil et une filhe. Ly fis fut nomeis messires Anthones de Gemeppe, qui fist ly casteal al devant do molien de Gemeppe.

933. Chis secons messires Anthones out dois femme. Ly promir fut nommée damme Ysabeal delle Preit; se fut del coystie de ces del Preit qui portent les armes entires: lozengiet d'argent et d'azure. Et ly seconde fut nommée damme Angnès del Arbe Espine, si qu'il appert sor leure sepulture, en l'engliese de Gemeppe sor Mouze; mais ne say de queile lynage elle estoit. Chis secon monssaingnor Anthone out, de sa promire femme, trois fis et une filhe, nommée Angnès. Ly promerains des fis fut nomeis Tonars; ly secons, Johan; et ly tirs, Colletars. Do dit Thonar sont issus ly enfans c'on dist de Flemale, manans à Hailhou, dont y sont ly hoirs.

934. Et ly dis Johans, secon fis do secon monssaingnor Anthone, prist à femme la sereur monssaingnor Johan Mavesien d'Abééz; s'en furent trois fis et trois filles, assavoir Thonons, qui morit sains hoir, Renars, Johans, damoyselle Maroie, et damoyselle . . .

935. Ly dis Renars soy mariat à damoyselle Angnès, filhe monssaingnor Bastien Boyleawe de Graz; s'en issirent Johans, qui morit sains hoir, et Anthones, et une filhe, mariée al saingnor de Modaveles, lyqueis Anthones n'est point astaleis.

936. Item, ly dis Johan, freire al dit Renar, est marieis à damoyselle Ysabeal, filhe jadis Alixandres de Jardin de Seraing, engénrée en la filhe monssaingnor Johan Polarde, chevalier, et en sont plusieurs enfans.

937. Item, la dicte damoyselle Maroie, leur sereur, fut mariée alle dit Alixandres de Jardin, après ce qu'il out perdu sa promire femme; s'en est uns fis tant soilement, gratieuz chevaliers et sages, nomeis messires Johan de Seraing, sires de Houten, marieis à une tres belle damme et bonne, damme Ysabeal de Gochincourt; desqueis dois conjoins y sont plusieurs beaz jovenes enfans, assavoir Alixandres, Gilhebier, Johans, Johanne et Maroie; lyqueis messires Johan est remarieis nouvellement, après le decès de sa dicte femme, à Ysabeal, filhe Pirar de Surice, borgoys de Namur, engenrée en la filhe de monssaingnor Rasson de Warfezéez, jadis saingnor de Warous, qui fut ainsneis fis do secon mariage le saingnor de Warfezéez az XX enfans, et ceste dieraine damme est trespasée sains hoir.

938. Item, ly atre sereur de la dicte damoyselle Maroie fut mariée à Ameyle de Parfonriwe; s'en est issus Johan de Parfonriwe, manans alle Petite Flemale, et une filhe, mariée à Rennechon le Foyment de Montengnéz.

939. Et ly tirce fut mariée à Momelette; s'en sont plusieurs enfans.

940. Item, Colletars, tirs fis do secon monssaingnor Anthone de Gemeppe, fut peire de Thonon Colletar, qui morit sains hoir, et d'une damoyselle, mariée à Kepongne en Ardenne, dont ilh est uns fis, nomeis Johan de Kepongne, marieis alle filhe Johan de Warous, manant à Holongne az Pires, doqueile ilh est faite mention en la genealogie do saingnor de Warfexéez qui out les XX enfans.

941. Item, li filhe monssaingnor Anthone de Gemeppe fut mariée à Warnier Bocho de Vellerous; s'en issit Goffins Warnirs, dont mention est chi devant faite, en la genealogie de monssaingnor Warnier le Chien de Vellerous.

942. En parsiwant nostre mateire, puyque nos avons parleit de monssaingnor Anthone, fil monssaingnor Anthone Mailhet, nos parlerons de sa sereur. De cely issirent dois filhes. Ly une fut meire do viez Tonar de Bierleur, et ly atre fut mariée à Saint Servais, à Liege; s'en issirent Thonars Colons, dis li Grans Thonars, et Lambuches Colon, Coletes Colons et plusieurs atres, de tos lesqueis ilh n'est à present nulle hoir demoreis en vie.

943. Do dit Thonars de Bierleur issit Badewiens de Bierleur. Do dit Badewiens issirent Thonars de Bierleur, ly jovenes, maintenant vivans, et sa sereur, mariée à Wilhelme de Bearewar de Fexhe, desqueis expresse mention est faile chi devant, à caze de leur meire, en capitle parlant des onze filhe monssaingnor Oury de Bonbays.

944. Item, de monssaingnor Renier de Fiiez, freire à monssaingnor, Anthone Mailhet et secon fil monssaingnor Bastien de Hollengnoul, issirent plusieurs enfans, fis et filhes, dont messires Johan Wilhenbrenke, jadis canonne de Saint Lambier, fut ly uns; et plusieurs atres menuiez gens en issirent, desqueis, en deskendant, furent messires Johan de Fiiez et maistres Anthonnes de Fiiez, canonne de Saint Lambier, maistre Gilhe, leur freire, canonne de Saint Denys, et leur sereur, et plusieurs atres.

945. Item, de monssaingnor Crochon de Viernay, tir fil monssaingnor Bastien de Hollengnoul, issit uns escuwiers, nomeis ly Maistres d'osteit de Viernay, et plusieurs gens laburans.

946. Item, de monssaingnor Bastien Lawet de Fouz, quatremme fil monssaingnor Bastien de Hollengnoul, issirent trois fis et plusieurs filhes. Ilh soy desguysat merveilheusement de son blazon, car ilh ne portat ensengne nulle que ses predecesseurs awissent porteit, anchois prist de sable à on chiveron d'argent et cryat Domartien. Ses ainsneis fis fut nomeis Thonars de Fouz; s'en fut uns fis, nomeis ly viez Lawars, mais Bastien estoit ses drois nons. De cesty Lawars issit Thonars de Fouz,

qui fut beaz et bons escuwers et poissanche de corps. Ilh soy mariat alle filhe Gilhes do Many, le vailhant escuwier; s'en furent trois fis, assavoir Bastien Lawos, Tonar, qui morit sains hoir, et Johan; lyqueis Lawos et Johan sont à present vivans, mais ly dis Johan n'est nint marieis.

947. Item, ly secon fis monssaingnor Bastien Lawet fut marieis à Mellieus, à une damoysele qui estoit de cheaz de Mommesteghen; sy portat chis fis d'argent à on chiveron de sable; s'en sont issus chilh de Mommesteghen et pluseurs atres. Ilh en issit Wilhelme Prost de Melieus, qui prist à femme la filhe monssaingnor Johan, le viez voweit de Liers, dont mention est chi devant faite, en la genealogie monssaingnor Ameile de Lexhy. Chis Wilhelmes fut uns riches escuwirs; et, tout le temps qu'il servit le linage d'Awans en morteile faite do paiis, ilh portat le chiveron; n~ais, de mon temps, après les werres de Thorines, quant il devint maistre delle hosteit l'evesque Englebiert, ilh, considerans que chilh de Mommesteghen estoient amainris de leurs chevanches et qu'il en astoit pluseurs menuez gens, mist jus ces armes et encargat les armes de Hamale: d'argent à une faxhe coingnelée de geules, à chink kachalles d'or. Assy issit de cest coysté Wilhelme de Mommesteghen, qui out la filhe Hombretoie de Wonke, et Robin de Melins, et pluseurs atres, car ly dis Wilhelmes Prost et Wilhelmes de Mommesteghen furent enfans de freires et de sereurs.

948. Item, ly tir fis monssaingnor Bastien Lawet fut marieis à Bollezéez; s'en issirent dois fis. Ly uns encargat à porter vairiet d'argent et d'azure, à on chiveron de geules; et, de cely, issit Johan, ly viez maires de Lonchiens, et sy hoirs, dont ly uns, nomeis Johan, fut bailhir de Saint Lambiert et morit sains hoir. Et ly atres, qui fut tres beaz clers, fut doiens et canones de Saint Lambier et fut nomeis Henry. De cest dois promerains freires, demorat ly uns à Lonchiens, s'en sont chilh de Lonchiens estrais; et ly atres demorat à Bollezéez et encargat à porter d'argent à on chiveron de geules. Chis de Bollezéez fructifiat plus que tos ly atres freires, ja soice qu'il y awist planteit de gens laburans, car gran nombre de marles et femelles en issirent, dont les vilhes de Bollezéez, de Graz, de Bierleur et de Montengnéez sont poupléez; et, par tant, on nomme plus communement ce blazon de chiveron les armes de Bollezéez que de Fouz; et tos chis cheverons crient Domartien.

949. Item, est assavoir que ly une des filhes monssaingnor Bastin Lawet de Fouz fut mariée à on borgois de Liege, qui estoit sornomeis Pykars; sy present ly hoirs les armes de part leur meire, assavoir d'argent al chiveron de geules; s'en sont tos ly Pikars et ly Benjamynes issus et pluseurs atres. Et, tant que des atres filhes do dit monssaingnor Bastien, je n'en ay nulle information.

950. Chis messires Bretons ly juvenes et tous ly hoirs marles de ly procedains portent les armes de Warouz, et crient Warous; et sont tos demoreis alle encontre de cheaz d'Awans en mortel faites do paiis.

951. Vos aveis, chi devant, en escripte la genealogie des V fis monssaingnor Breton le viez de Warous; sy vos dirons, chi après, do siiezemme fil do dit monssaingnor Breton. Ilh fut nomeis messires Bretons ly juvenes et fut sires de Warouz, et out VIII fis et chink filhes, assavoir monssaingnor Wilhelme de Warouz, le viez, qui porlat les armes de Warous entires; ly secon fut nomeis Johan ly Varlés; ly tirs, messires Abrahans; ly quars, messires Anthones de Bernalmont; ly cinquemes fut nomeis ly Vylains de Warouz; ly VIe, Counoie; ly VIIe, Granjoie de Daryon; et ly VIIIe, Pagnons de Rywal; et tos chis freires et leurs hoirs marles ont porteit les armes et le cry de Warous; lyqueis Johan ly Varlés et Pagnons morirent alle pongnyche à Lonchiens.

952. Messires Wilhelmes, sires de Warouz, ly viez, ainsneis fis monssaingnor Breton ly juvenes, prist à femme damme Oude, filhe saingnor Rogiers az Roges Chaches, qui fut freires al promeraine saingnor Lowy Surlés, lyqueys sires Lowys fut ly promire qui onkes portat le sornon des Surlés, et, de ly, sont tos ly Surlés estrais, ensy qu'il vous puet chi devant apparoir, en capitle des Surlés. Chis

sires Rogirs soy mariat alle filhe d'one riche bolengier, qui estoit Pystres de Saint Johan en Ilhe; s'en furent plusieurs enfans, avoek la dicte damme Oede, qui n'ont nint chy leur liu, par tant qu'il n'estoient nint de linage do paiis. De monssaingnor Wilhelme, le viez saingnor de Warous, et de la dicte damme Oede de Pyestrin, furent quatre fis et quatre filhes, assavoir, sont: messires Wilhelmes de Warous Iy juvenes, freires Lowys, chevaliers des Joins, delle ordenne de Prus, freire Rogiers, qui fut freires meneurs, et Abrahans, qui morit sains hoir; et les filhes sieront chi après escripte. Et deveis savoir que les werres d'Awans et de Warous commenchont al temps do dit monssaingnor Wilhelme.

953. Ly dis messires Wilhelmes de Warous, ly juvenes, demorat, en sa jovente, por apprende honeur et tiexhe, deleis le saingnor de Hers adont vivant, qui estoit uns poissans chevaliers et avoit à femme une bin gentil damme, filhe d'one poissans bannerés, qui estoit sires de Wassebergh et portoit de geules à on lion à kowe forchue d'argent, et chis sires de Hers portoit d'or à on lion de geules et cryoit Liews. Ilh avint que chis sires de Hers, qui avoit de cely damme plusieurs juvenes enfans, morit en temps que ly dis messires Wilhelmes, qui point n'astoit chevaliers, demoroit deleis ly. Ilh servoit la dicte damme et teilhoit devant ly. S'estoit beaz en sens et gratieuz. Ilh plaisit bin à la dicte damme, et ly uns d'eaz al autre, tant qu'il soy present en mariage, et orent une belle filhe. Quant elle fut en estat de marier, ilh le donont à monssaingnor Rasson, saingnor de Warfezéez, qui veves estoit et qui avoit X enfans de sa promire femme, et en out assy X de ceste atre damme: doqueile et de ses enfans plainne declaration est faite asseis pres do commencement de ce livre; sy vos en suffie à tant. Ensy aveis les hoirs marles demoreis de monssaingnor Wilhelme le viez, ainsneit fil monssaingnor Breton le jovene de Warous; sy dirons de ses quatre filhes.

954. Ly ainsnée filhe monssainonor Wilhelme le viez, saingnor de Warouz, fut mariée à monssaingnor Bareit d'Aleure, saingnor de Beafroipont, dont Wilhelmes de Beafroipont et Baroteaz, ses fis, et leurs hoirs, sont issus, et une filhe, mariée à on bon escuwier nomeis Henrys de Rahirs, qui fut maistres de Liege, dont ilh yssit une filhe, mariée à monssaingnor Thibaut de Lardier, doqueile mention est chi devant faite, en capitle des Surlés, Et, ja soice que messires Bareis delle Canges, qui fist la maison de Lupaire à Liege, fuist, apres ce, sires de Beafroipont, ce fut par acquest, car ilh ne fut nint estrais do viez monssaingnor Bareit d'Aleure, mais c'estoit ses cusins, et astoient dou linage de Vellerouz, delle coystieg des Almans; sy portoit d'argent à lupar de geules.

955. Ly seconde filhe monssaingnor Wilhelme le viez fut mariée à monssaingnor Hustien de Seraing sor Mouze, fil monssaingnor Thiry Hustin et seroge à monssaingnor Anthone de Gemeppe; s'en sont plusieurs persones estraites, demorant à Seraing et là entour.

956. Item, ly tiece filhe monssaingnor Wilhelme fut mariée en la terre de Falcomont, en linage de Scherwirs.

957. Et ly quarte fut mariée à on vailhant escuwier, nomeit Johan d'Oborne; s'en furent dois fis et une filhe, assavoir Wilhelme et Ernus, et une sereur, mariée à monssaingnor Libier Lyboret, de Vileir l'Evesque, dont mention est chi devant faite, en capitle parlant de monssaingnor Ystasse Frongnet, tir fis monssaingnor Bretons le viez de Warouz. Chis Johan d'Oborne et sy hoir marles ont portoit les armes de Vileir deleis Jouprelle, assavoir une escut d'or à on bende de geules, à on ourlet de geules.

958 Do dit Wilhelme fut uns fis, nomeis messires Johan d'Oborne, chevalier, qui soy mariat à une des filhe monssaingnor Johan Moreal de Horriou, dont plus expresse mention est chi devant faite, en capitle des Surlés, parlant de la bonne damme de Vellerous.

959. Item, Ernus d'Oborne, freire al dit Wilhelme, soy mariat alle filhe Gilhar del Cange; et, d'eaz, est faite declaration chi devant, en capitle parlant des Surlés, et encor devant, en capitle parlant de monssaingnor Waltier de Momale, fil do saingnor de Warfezéez az XX enfans.

960 Item, do secon fil monssaingnor Breton le jovene, nomeit Johan ly Varlés, issit messires Libier ly Polen, qui soy mariat promirement alle sereur monssaingnor Lambier de Fexhe, qui morit sains hoirs. Et ly dis messires Libier, en sa jovente, despendit le plus gran partie do sien en la compaignie de monssaingnor Anthone de Gemeppe, sy qu'il s'abaxat tant qu'il prist à femme secondement la filhe d'on feran mult riche, qui demoroit en Feronstréez, à Liege, et estoit nomeis sires Thiry Dabeton; se prist grant avoer avoek, et raquist plus qu'il n'awist vendut. De cely issit monssaingnor Johan ly Polens, doqueile et de sa generation est chi devant faite mention, en capitle parlant do saingnor d'Awans. Et chis messires Libier out on freire, nomeit Warnir, qui fut canones de Saint Pire à Liege. Et, quant messires Wilhelmes ly juvenes fut mors sains hoirs marles, ly dis messires Libier encargat les armes de Warouz entires. Chis Johan ly Varlés, ses peires, fut mors alle pongnyche à Lonchiens.

961. Item, ly tir fis monssaingnor Breton ly juvenes fut nomeis messires Abrahans, dont plusieurs fis et filles issirent, assavoir ly peires Abrahans de Warous, manant à Warous, qui soy mariat à Liege, alle filhe saingnor Johan Noyhé, borgois de Liege, dont Abrahans, maintenant vivant, et ly vestis de Saint Nycolay à Liege, et leurs freires et sereurs, sont ysus. Et out ly dis messires Abrahans une filhe mariée à Liege, à saingnor Renier de Marchiet, dont Abrahans, ly cangier, et Hermans de Blalouz, ses freires, manant à Tongres, et leurs sereurs, sont issus, et plusieurs atres.

962. Item, do quar fil monssaingnor Breton ly jovene, nomeit messire Anthone de Bernalmont, furent plusieurs enfans. Et, del unk, sont issus ly Gros Tonet d'Aleure, ses freires et sereurs, et plusieurs hoirs.

963. Item, do Vilain de Warouz, Ve fil monssaingnor Breton ly jovene, issit messires Godefroid ly Vylains de Hambrouz, qui fut gransires de Godefrin le Vilain de Hambrouz, qui soy mariat alle filhe Houwar Houweal, dont y sont ly hoirs.

964. Item, de Counoie, VIe fis monssaingnor Breton ly jovene de Warous, suy je petitement informeis.

965. Item, do VIIe, nomeit Granjoie de Darion, issit Johan Granjoie et sy enfans.

966. Item, del VIIIe, nomeis Pangnons de Riwale, qui morit alle pongnyche à Lonchiens, issirent Henrars d'Aleure et Bastien, ses freires, et planteit de filles, dont Wilhelme, dis ly Champions de Flemale, en out une, sy qu'il appert chi devant, en capitle parlant des hoirs monssaingnor Makaire delle Heis de Flemalle; et en sont issus ly enfans Petit Wilhelme de Choke, ly enfans do casteal de Ramey, Gilhes de Hambrouz, Henrys, ses freires, et gran nombre de gens demorans à Aleure, à Hambrouz, à Liege et atre part.

967. Item, do VIIe et dierain fis monssaingnor Breton le viez de Warous, nomeit le viez Renier de Viseit, issit messires Renirs, qui fut marixhaz del evesqueit de Liege, qui portoit les armes de Warous bilhetéez d'argent; doqueile et de sa generation vos trovereis l'ystore en foilhet chi devant, en capitle de Lexhy et de Bonbays.

968. Puisque nos avons parleit de monssaingnor Breton ly jovene de Warous, nos parlerons de ses V filles. Ly promire et ly ainsnee fut mariée à monssaingnor Conrar de Ryvage de Viseit, qui portoit

d'azure à une bende d'argent, qui out pluseurs enfans. Se fut une de ses filles mariée à monssaingnor Wilhelme de Joupilhe, dont ly Wotoules sont issus; et une atre, mariée à saingnor Houbien de Huy, on tres riches borgois, doqueil tuit chilh de Fanchons de Huy et tos ly Houbins sont estrais, qui al jour d'uy sont durement germeis. Et ja soice que ce soit fours de nostre mateire, nos en parlerons on petit. Sachies que, des filles saingnor Houbin, sont issus chilh de Harduémont, chilh de Hautepenne, chilh de Chailes, chilh de Harséez, et tous leurs hoirs, dont ilh sont gran nombre; et encors issirent trois atres filles do dit saingnor Houbin, qui furent mariées à Liege, ly une à Gilhon Chabot, et ly atre à monssaingnor Bareit del Cange, et ly tirce à Rauwesien de Tier, de Saint Servais.

969. Do dit Gilhon Chabot, qui portoit les armes de Preit à on chief de geules, issirent messires Jakeme Chabos, qui morit chevalier, maires et esquevin de Liege, Houbins Chabos, damoyselle Ysabeal, damoyselle Margriete, et damoyselle Katerine, qui fut beghine, et une mariee à Lambuche Gailhar, esquevin de Liege, et une nonne del Vaz Nostre Damme.

970. Item, ly dis messires Jakes soy mariat alle sereure Johan de Ratier, le cangeur, nommée Maroie, et en furent messires Gilhes Chabos, maintenant vivans, damoyselle Maroie et damoyselle Ysabeal.

971. Ly dis messires Gilhes est sires de Semeriez et de Saint Martin, en Haynau, car ilh soy mariat à une genty damme de Haynau, filhe monssaingnor Albier Turke, qui avoit à femme la sereur do saingnor de Floon; s'en sont pluseurs enfans, assavoir messires Jakes, chevaliers, Gilhes et Albiers, andois canones de Saint Lambier, Houbins, Ernus, damme Marie, qui at on chevalier de Haynau, et Magritte, qui est canonesse de Maboge.

972. Item, damoyselle Maroie, sereur do dit monssaingnor Gilhe, fut mariée à Rasse de Warous, saingnor de Warous; s'en fut uns fis, nomeis Jakemiens, qui morit sains hoir en la fleure de son eage.

973. Item, ly atre sereur, nomée damoyselle Ysabeal, fut mariée à Johan delle Tour de Fexhe, fil do bon Wilhelme de Fexhe, dont mention est chi devant faite, en capitle parlant des filles le saingnor d'Awans; s'en sont ly hoirs.

974. Item, de Houbin Chabot, freire do dit monssaingnor Jakeme, qui out à femme la filhe Yernon de Preit, qui morit alle batailhe à Nyerbonne, deleis Huy, issirent trois filles, dont ly ainsnée est mariée à Lambekin delle Malayse td'Annevoy; s'en est Houbins de Creu.

975. Ly atre sereur, nomée damoyselle Maroie, fut mariée à on riche borgoys, nommeit Herman de Colongne, qui fut esquevins de Liege; s'en furent dois belles filles et bonnes, Angnès et Maroie. La dicte Angnès, qui est une vailhant damme, est mariée à monssaingnor Wilhelme de Horriion, chevalier, doqueile et de ses hoirs mention est chi devant faite, en capitle parlant delle bonne damme Magriete Surlet, qui fut damme de Vellerous.

976. Et ly atre sereur, nomée damoyselle Maroie, fut mariée à Rassekin de Hacourt, escuwier, et morit sains hoir. Et assy ly tirce filhe Houbin Chabot, nomée damoyselle Angnès, est beghine et demeure deleis l'engliese des Freires Preceurs à Liege.

977. Item, damoyselle Ysabeal, filhe Gilhon Chabot, fut mariée à Stassar de Bennes et out pluseurs enfans, assavoir Stassin Cbabot, esquevin de Liege, et trois sereurs. Ly dis Stassien soy mariat à damoyselle Maroie, filhe Andrier de Brahier; s'en sont dois fis et dois filles, assavoir Andrier, à present esquevin de Liège; Johan, damoyselle Katerine et damoyselle Maroie. Ly dis Andrier est marieis alle filhe Jakemin de Puchey, le potir des Treistes. Et damoyselle Katherine est mariée à

Gilhes, fil Wery de Lavoir; et la dicte damoyselle Maroie, à Johan, saingnor de Chokir; s'en sont ly hoirs asseis juvenes. Et Johan Chabol est marieis alle filhe Butoir de Liers, escuwers.

978. Item, ly une des sereur le dit Stassin Chabot fut mariée à Pirar de Marchiet, esquevin de Florines; s'en est uns fis, nomeis Stassar. Et ly seconde fut mariée à Bennes; s'en est Stassinés de Bennes. Et ly tirce fut mariée à Masset de Mirmort; s'en sont ly hoirs.

979. Item, damoyselle Margriete, tirce filhe de Gilhon Chabot, fut mariée à Wery Jakemar, saingnor de Rocourt, qui fut ly uns des plus beaz escuwers et des miez facheneis que on powist en ce paiis trover. Ilh en fut uns fis, nomeis Gilhes, qui morit sains hoir sour le chemien to d'oultre meire; et en fut une tres belle filhe mariée a Johan Marchis d'Oha, dont y furent dois beaz enfans, assavoir Johan d'Oha et Jakemot d'Oha. Ly dis Johans prist à femme la sereur Rasse de Warous; s'en est une filhe, nomée Johanne, mariée à Thonar de Lonchiens, dont y sont ly hoirs aseis juvenes. Et ly dis Jakemot d'Oha est à present dechachies do paiis.

980 Item; ly atre filhe Gilhon Chabot fut mariée à Lambuche Gailhar de Chaienéez, esquevins de Liege; s'en issit Johans Gailhars, qui morit sains hoir, et damoyselle Katherine, qui fut mariée dois fois: promierement, à Renar de Levaz, et, secondement, à Renart Toreal de Biernau, et morit sains hoir.

981. Item, delle seconde filhe saingnor Houbin mariée à monssaingnor Fastreit Bareit delle Cange, qui fut sires de Vorouz et de Beafroipont, issit tres belle compaignie d'enfans, dont ly hoirs sont à present presque tos fondus et annichilleis, assavoir messires Houbin Bareit, chevalier, esquevin de Liege, tres fors chevaliers, messires Biertouz Bareis, sires de Vorouz, Fastreit Bareit, canonnes de Saint Poul, bonne homme d'armes, maistre Gerar Bareis, canonnes de Saint Denys, une damme mariée à monssaingnor Waltier Carpeal de Haley, chevaliers, et une damoyselle mariée à Jakemar de Lardier.

982. Messires Houbien Bareis fut marieis alle filhe monssaingnor Rasse de Chantemierle; s'en fut uns fis moweaz, qui morit sains hoir.

983. Item, messires Biertoz, ses freires, soy mariat alle sereur monssaingnor Anthone le Blavier; s'en sont trois fis, assavoir Thonars Bareis, canonnes de Saint Lambier, Fastreit Bareis, qui fut sires de Vorous et le vendit à Rasse de Warouz; lyqueis Bareis soy mariat à damoyselle Maroie, filhe monssaingnor Gilhe de Meirs, qui est trespasée sains hoir; et le tir fis est nomeis Houbins, se demeure à Beafroipont; ilh at à femme la filhe Lambier Lardeur de Gemeppe, mais ilh n'ont nulle hoir. Et sont ly dis Bareis et Houbin durement amainris de leurs patrimone, dont ch'est damage.

984. Item, delle filhe monssaingnor Bareis del Cange, qui fut mariée à monssaingnor Waltier Carpeal, n'est ilh rins demoreit.

985. Et, delle atre sereur, mariée à Jakemar de Lardier, fut uns fis, nomeis messires Henris de Lardir, chevalier, et une tres vailhant damoyselle, mariée à Heyneman des Commognes, en la conteit de Namur.

986. Item, ly dis messires Henrys soy mariat alle filhe monssaingnor Gilhe de Meirs, et en est uns fis, nomeis Jakemiens, qui at mal wardeit son patrimone, et une filhe, dont je ne say l'estat.

987. Item, delle sereur do dit monssaingnor Henry et do dit Heyneman est une belle et honorable compaignie d'enfans, qui sont en bonne estat, parmy la promotion de monssaingnor le conte de Namur maintenant vivant.

988. Et, de tos les Bareis deseurnomeis, n'y at persones seculiers qui aiet poissanche de servir ses amys, fours que ly enfans Heyneman devant escripte.

989. Item, delle tirche filhe saingnor Houbin de Huy, mariée à Rawessien de Tier, fut plusieurs enfans; mais ilh ne out que dois filles qui awissent hoirs.

990. Ly une des filhe Rawesin de Tier fut dois fois mariée: la promire, à Henry Zutemine, esquevin de Liege, et, secondement, à monssaingnor Lowy de Brustem, chevalier. Do dit Henry fut uns fis tant soilement, nomeis Johan Zutemine, qui prist à femme damoyselle Maroie, filhe Lambier de Payves, engenrée en damoyselle Maroie, filhe le viez Thomas de Hemericourt, dont mention est chi devant faite, tant en capitle parlant de monssaingnor Makaire delle Heys de Flemalle com en capitle parlant de monssaingnor Libier Crepon d'Otéez et de ses hoirs. Item, do secon mariage, faite à monssaingnor Lowy de Brustemme, sont plusieurs enfans en bonne estat à present.

991. Item, ly atre filles do dit Rawesin, nomée Brie, fut mariée à Robier, fil monssaingnor Wery de Lymont, la promir fois, et croy qu'il en soit des hoirs; et, secondement, elle soy mariat à Johan Haweaz de Bovengnistirs, qui estoit veves; et, tircement, à monssaingnor Johan Hanozet de Moxhe, qui avoit plus de IIIxx ans à cely jour, et n'en est nul hoir; mais ly dis messires Johan Hanozet avoit esteit en devans marieis et avoit eut tant d'enfans et des enfans de ses enfans que tos ly ryvage de Mehans en estoit encombreis.

992. Nos avons chi devant parleit delle premiere filhe monssaingnor Breton ly jovene, qui fut mariée à monssaingnor Conrar de Viset; sy retournerons alle seconde filhe monssaingnor Breton deseuroomeit.

993. Cheste seconde filhe fut mariée à Badewien do casteal de Seliens; s'en furent trois fis et dois filles, assavoir Wilhelme, le bailhir de Saint Lambier, Badewien et Johan de Pondrelouz. Et ly une de leurs sereurs fut mariée à maistre Johan des Marés, advokaut en la court de Liege; et ly atre, à monssaingnor Lambier de Chantemierle, qui fut oncles do bon monssaingnor Henry, saingnor de Hermales, qui morit al bataille à Domartien. De cesty monssaingnor Lambier et de ses hoirs est faite expresse mention chi devant, en capitle parlant des hoirs de Hermalles; Sy n'en parlerons plus avant.

994. Et, do dit maistres Johan des Marés, furent plusieurs enfans, dont ly alcons furent marieis en Braibant; s'en sont ly hoirs demorans à Orpe, à Marés et là entours, dont Johan Cla d'Orpe out une des filles. Mais denoméement ilh en fut dois sereurs, dont ly une fut mariée à monssaingnor Johan Boyleawe de Mons, bailhir de Saint Lambier, chevalier, esquevin de Liege, et ly atre à Goffien de Hemericourt; doqueil monssaingnor Johan et de ses hoirs ilh est chi devant faite mention, en capitle parlant de monssaingnor Renier le viez de Vellerous, qui fut freire à monssaingnor Badewien l'Amiran de Biersés; et assy do dit Goffin et de ses hoirs est chi devant faite mention, en capitle parlant des hoirs monssaingnor Makaire delle Heys de Flemalle; se nos en deporterons à present.

995. Item, de Wilhelme, le bailhier, et de Badewien, son freire, sont ly enfans do casteal de Seliens, Wilhelmes et Badewiens, maintenant vivans, et ly enfans de Commenoilhes, qui sont de leur sereur, et plusieurs atres à Seliens, à Fexhe, à Jouprelle et là entours. Et, de Johan de Pondrelouz, furent Johan d'Akoche et dois germeaz, qui sont tos mors sains hoirs, et une sereur, nomée damoyselle Aely, qui est beghine; mais, d'eaz tos, n'est nulle hoir demoreis; et en furent les damoyselles de

Pondrelouz, qui demoront beghines à Saint Albier, et orent une sereur mariée en la conteit de Louz, à Berlinghe, dont y sont ly hoirs.

996. Item, ly tirce filhe monssaingnor Breton ly jovene de Warouz fut à Liege, mariée à saingnor Everuwien; s'en fut Henrys ly Parens et une filhe, qui fut meire à Johan et à Gilhe de Biernar, freires. Do dit Henry le Paren sont ly hoirs formors. Et ly dis Gilhes de Biernar soy mariat à damoyselle Maroie de Xhoriche et morit durement riches, sains hoir. Et, do dit Johan de Biernar, son freire, trovereis les hoirs chi devant, en capitle parlant de monssaingnor Libier de Geneffe, en liu où ilh faite mention des hoirs monssaingnor Henry de Rolouz, chevalier. Chis dois freires, Johan et Gilhes de Biernar, furent belles persones et riches, et prisent les armes de Warouz de part leur meire, assavoir de geules à on lion d'or, à on ourle endenteit d'argent.

997. Item, delle quatreme filhe monssaingnor Breton ly jovene issit sires Gilhes ly Proidons, esquevins de Liege; s'en out des enfans, dont ly une de ses filles fut mariée al Grain Badewien de Saint Servais. qui estoit do linage de Saint Servais à Liege, mais ilh prist, de part sa meire, filhe monssaingnor Percheval de Vilhe, les armes de Vilhe. Ilh fut peires à monssaingnor Alixandres de Saint Servais, chevalier, esquevin de Liege, et à Henry de Saint Servais; et orent une sereur, mariée à monssaingnor Gilhe Maton, chevalier, esquevin de Liege. Quant ly Grans Badewiens fut trespasseis, la damoyselle soy remariat à Racourt, deleis Wynes, en Braybant; s'en issit Johan ly Proidons de Racourt et sy hoirs.

998. Item, ly dis messires Alixandres soy mariat alle filhe saingnor Johan de Saint Martin, dit delle Roze, borgois de Liege; s'en out dois fis et dois filles, assavoir monssaingnor Badewien et monssaingnor Johan de Saint Martien, chevaliers, le damme de Fraipont, et damme Ysabeal, qui fut nonne delle Vaz Benoitte. Ly dis messires Badewiens fut esquevins de Liege; se portat le blazon son peir: d'or à une faixhe germelle de geules, à trois foilhes de marés d'azure en comble delle escut. Ilh soy mariat, promiers, alle filhe Johan delle Monzéez; s'en furent uns fis. nomeis Badewiens, et une filhe, nomée Ysabeal; et puyz soy remariat ilhe alle filhe monssaingnor Johan Hanar dc Chaiienéez, nomée Markote; s'en fut une filhe, nomée Marie.

999. Ly dis Badewiens, fis do dit monssaingnor Badewiens de Saint Servais, soy mariat alle filhe Johan de Mes, fil Gilh de Mes, le hallier; s'en trovereis tote la generation en capitle parlant do saingnor de Warfezéez qui out les xx enfans, par tant que ly femme do dit Johan de Mes fut sa filhe do secon mariage.

1000. Item, Ysabeal, sereur do dit Badewien, fut mariée à monssaingnor Waltier de Haley, manant à Heurs deleis Fymale, dont y sont ly hoirs à present. Et Marie, ly atre sereur, fut promirement mariée à Johan de Haley, freire do dit messire Watier; se morit ly dit Johan sains hoir, et puyz soy remariat elle à Jakemien, fil monssaingnor Henry de Lardier, et morit sains hoir.

1001. Item, messires Johan de Saint Martin, freire al dit monssaingnor Badewien, prist à femme damme Jouwete, filhe monssaingnor Lowy d'Uffey, chevalier, esquevin de Liege, qui estoit veve de Radout le Blavier, esquevin de Liege. Et ly meire la dicte damme Jowete avoit esteit sereur à monssaingnor Gilhe delle Charneur, chevalier.

1002. Do dit monssaingnor Johan et de sa dicte femme issirent Alixandres, canonnes de Saint Martien, Lowys, Ernus, canonnes de Saint Pire, damoyselle Katerine, mariée à Renier de Fexhe, et plusieurs nonnains, dont ly une est abbaisse de Vyvengnis.

1003. Item, ly dis Lowys est marieis à damoyselle Marie, filhe jadis monssaingnor Wery de Coir, saingnor de Ramelhouz, chevalier, et n'ont encors nul hoir. Et la dicte damoyselle Katerine at, do dit Renier de Fexhe, des beaz enfans, qui sont encors juvenes. Chis messires Johan de Saint Martien brisat les armes de Vilhe d'on quartier de Warous, dont ly escus est bilheteis d'argent, et est uns proidsos chevaliers, et estoit raides, hardis et de bonne volenteit, anchois qu'il awist les gottes d'article, dont ilh est forment traveilhiez et alieneis, et at à present bin IIIxx ans d'eage, assavoir sor l'an mil trois cens et nonante owit.

1004. Item, de Henry de Saint Servais, freire do dit monssaingnor Alixandres, issirent Badewiens, Gerars et une damoyselle mariée à Ernut de Bonbas, manant à Joupilhe, dont ly hoirs sont chi devant nomeis, en capitle parlant de monssaingnor Ulry de Bonbais, chevalier, et une atre mariée alle freire messire Johan Hanar de Chaiienéz. Et ja soice que ly dis Badewiens et Gerars fuissent marieis, nequident ilh n'est, d'eaz, demoreis nus hoirs.

1005. Item, delle filhe monssaingnor Alixandres de Saint Servais, mariée à monssaingnor Renier, saingnor de Fraipont, trovereis chi devant les hoirs, en capitle parlant do dit monssaingnor Oulry de Bonbays ; sy revenrons alle sereur do jadis monssaingnor Alixandres, qui fut mariée al dit monssaingnor Gilhe Maton. De ceste damme fut Badewins Matons, qui morit sains hoir, et en furent trois sereurs, dont ly promire, nomée Aelis, fut mariée à monssaingnor Ernut Polarde, qui morit alle bataillhe à Votemme, et puys soy remariat la damme à Gerar de Fraipont, s'en fut une filhe tant soilement, mariée à monssaingnor Thiry de Berghes, le jovene, qui en at des enfans, dont ly ainsneis est chevaliers et nomeis messires Renars de Berghes ly juvenes, car ly viez monssaingnor Renar de Berghes, ses gransires, est encors en vie.

1006. Item, damme Ysabeal, ly seconde filhe monssaingnor Gilhe Maton, fut mariée à monssaingnor Wilhelme de Coir, chevalier, dont ly hoirs sont denomeis chi devant, en capitle parlant del conte et castelain de Hozemont.

1007. Item, ly lirche filhe fut mariée à Houwar Houweneal d'Ilhe; s'en sont issus I fis et dois filles. Ly fis, nomeis Johan Howar, est marieis alle filhe Pirelot de Vynalmont, qui at esteit uns bons hons d'armes; s'en at des enfans juvenes. Et ly ainsnée de ses sereurs fut mariée à Godefrin le Vilain de Hambrou, et croy qu'il en aiet des hoirs; et, secondement, est elle remariée à Ywen de Monferan, fil jadis Wilhelme Honoreal d'Aleure, et en at des hoirs.

1008. Et ly atre filhe Houwar Houweneal est mariée à Ystasses, fil jadis Coirbeaz de Hollengnoul; s'en est une filhe.

1008. Et ly atre filhe Houwar Houweneal est mariée à Ystasses, fil jadis Coirbeaz de Hollengnoul; s'en est une filhe.

1009. Encors out ly dis sires Gilhes le Proidomme dois fis, dont ly ainsneis fut nomeis Johans ly Proidons, qui morit al pongnyche à Lonchiens, assavoir alle promire bataillhe qui fut des werres d'Awans et de Warous; et ly atre fut nomeis Alixandres. Chis Johan ly Proidons out dois fis et une filhe, assavoir Johan le Proidomme de Gemepe, Houweneal d'Aleur, et damoyselle Angnès d'Aleur. Do dit secon Johan le Proidomme issit Johan ly Proidons de Gemepe, maintenans vivans, qui at, delle filhe Colart le Pannetir de Seraing, Jadis escuwier, dois fis, Colar et Gerart, et assy trois filles, dont ly une fut promirement mariée à Henry, fil jadis Robier de Saint Nycolay, s'en est uns fis, et secondement à Wilhemot, fil Wilhelme de Warous, manant à Ramey; ly seconde filhe est mariée à Hustin Peveréal, et ly tirce . . . Et Colars, leurs ainsneis freires, est marieis alle filhe Wilhelme d'Atyen, esquevin de Liege. Et Gerars, ses freires, n'est encors marieis.

1010. Item, ly jadis Houweneaz d'Aleur morit sains hoir. Et la dicte damoyselle Angnès d'Aleure fut mariée alle freire Johan Gilhman, le hallier; s'en issirent Gilhes d'Aleur, qui morit sains hoir legitime, et Henrys, ses freires, et assy damoyselle Maroie, qui fut femme à Johan Noyhé de Hacourt et morit assy sains hoir.

1011. Item, Alixandres, secons fis saingnor Gilhe le Proidomme, out dois fis, assavoir saingnor Gilhe le Proidomme, qui fut vestis delle engliese Saint Johan Baptiste en Liege, et Alixandre le Proidomme, qui fut vinirs, et beaz et reverens, et de costable habit. Chis Alixandres out, de sa premier femme, on fil mult gratieuz, nomeit Alixandres, qui soy mariat alle filhe Henry Bareit de Peroize, mais ilh morit durement jovenes; s'en demorat uns fis, maintenant vivans, nomeis Alixandre ly Proidons, qui est sages et subtis, et bons constumirs del loy. Et quant ses jadis peres fut mors, sa meire soy remariat à Rennekin de Kemexhe, qui tint l'osteit do Barbeal, devant Saint Hubier, à Liege; sen at plusieurs enfans. Et assy ly deseurnomeis Alixandre ly Proidons, qui fut vinirs, soy remariat, après l'obit de sa promire femme, à damoyselle Angnès, filhe jadis Colletar de Vaz; s'en est uns fis, nomeis Wilhelmes de Vaz. Mais je ay oyut dire que, del une de ses filles, issirent Lambier de Warous, dis Mailhe à Mailhe, qui fut peires de Gobier de Warous et de Wery Mailhe à Mailhe, cangeurs de Liege, et assy Johan Assons de Warous et Everneaz, ses freires, qui morirent sains hoir; et y at gran nombre de bonne gens qui sont do dit linage de Warous deskendus, teis que Monars de Warous, delle chachie del Preit, ly gerrneaz d'Aleur, ly Moulhés, ly Coirlawe, ly Bydelos, Wilhelmes de Harsta d'Aleur, et plusieurs atres, que je ne say d'oir en hoir recorder leurs predecesseurs, et, nintmains, sy ne doiient ilh nint, por ce, estre elongiez de leur lynage, car ilh en sont estrais, et suy dolans que je n'en puy fair veritable relation en leure droit lieu.

1012. Par la description chi devant contenue, vos puet apparoir ly declaration des VI fis monssaingnor Breton le viez de Warous et de leurs hoirs; sy dirons, chi après, de ses dois filles.

1013. Ly promire filhe monssaingnor Breton le viez fut mariée à monssaingnor Wilhelme de Langdris; s'en fut une fis, nomeis messires Libiers de Langdris, doqueile issit messires Johan, sires de Langdris, qui soy mariat à Liege, alle filhe saingnor Gerar des Canges; s'en furent dois fis, assavoir messires Johan, sires de Langdris, qui morit alle bataille à Domartien, et monssaingnor Libier de Langdris, qui fut canonnes de Saint Lambier. Ly dis monssaingnor Johan ly secons prist à femme damoyselle Ysabeal, ainsnée filhe do saingnor de Warfezéez qui out les xx enfans, dont toute la generation est asseis pres do commencement de ce livre escripte, en capitle parlant do dit saingnor de Warfezéez. Et, des atres enfans do dit saingnor Gerart des Canges, est faite mention chi devant, en capitle parlant des filles monssaingnor Rigaut de Beariu.

1014. Item, ly seconde filhe monssaingnor Breton le viez de Warous fut mariée à monssaingnor Wery de Hambrouk, qui estoit do linnage de Preit al comble, car ilh estoit chief do linage et portoit lozengiet d'argent et d'azure, à on comble de geules. Ilh out dois fis et dois filles. Ly ainsneis fut nomeis messires Watier, et ly atres, messires Werys. Chis messires Watier fut nomeis ly senissaz de Preit, par tant qu'il estoit senissaz des eawes monssaingnor de Liege, tant à Liege com al Pont d'Ameircourt, et, por cely cas, ilh avoit tres belles droitures en l'osteit monssaingnor de Liege, qui, par faute des hoirs mal proveis, sont alienciez à present. Nequident, ilh fut fors et poissans d'avoir et d'amis; et, par tant, ilh entreprist une rigeure encontre Saint Engliese, qui fut asseis merveilheuze; car, en tos liez où ilh avoit vingnes, preis, terres et jardins, qui devoient deyme, ilh cessat de ses deymes à paier et dest az deymeurs qu'il ne voloit plus estre leurs bovirs ne leurs wangnirs, car, puyque ly XIe part de ses bins estoit à eaz, ilh presissent l'onzeme part à juste parchon al encontre de ly, et bin le wangnassent et fesissent leur profit, car jamais deyme ne leur paieroit; dont ilh avint que longtemps après cely XIe part demorat en trixhe. Nintmains, alle fin, tuit chilh là ilh devoit

deyme, furent bin lieez qu'il prisent leur part des hyretages, sy que tos les sorplus des bins hyretables que ly dis senissaz tenoit à son temps demoront frans et liges, sains nulle deymage, et sont encors frans al jour d'uy, en queilkonkes mains qu'il soient parvenus; et n'aligent atre choze ly hyretirs, quant on leur demande deyme, que ce qu'il dient: « Che sont des hyretages le senissal, ilh ne doiient point de deyme. » De ces frans hyretages trovereis gran nombre à Weys, à Joupilhe, en Droighe, à Brechouz, à Londos, à Havelanges, en Condros, et atre part.

1015. Chis messires Watier, senissaz de Preit soy mariat alle filhe saingnor Lambuche d'Ilhe, qui fut fis saingnor Rogir alle Chapeal d'Ilhe et freires alle vilhe damme d'Awans et sangnor Henry de Solier, car chis III, assavoir sires Lambuches, sires Henry de Solier et ly damme d'Awans, et assy ly femme monssaingnor Johan de Holongne az Pires, chevaliers, et ly femme Houbailhe de Huy, furent freires et sereurs; doqueil Houbailhe issit ly femme monssaingnor Gerart de Bierlouz le viez.

1016. De ceste damme, filhe saingnor Lambuche, et do dit senissal furent trois fis. Ly ainsneis fut peires de monssaingnor Johan, le senissal de Preit qui demoroit à Havelanges. Chis senissalz fut riches et de grant estat, ensy que je ay appris à cheaz qui le hantont. Ilh n'out nulle hoir marle, mais ilh out pluseurs filhez mariéez, dont ly hoirs sont tous povres. Je les veys toutes et ay connut leurs hoirs; mais, al jour d'uy, ilh n'y al persone qui aiet poissance de servir ses amis. Je croy que ce faist por le pechiet que ses grandsires fist alle Engliese. Veriteis est que Ottars de Pailhe en out une, dont ly hoirs sont encors, qui avoient droit en la dicte skenyxhachie; mais, pour leure pouvreté, et ce et atre choze ilh ont perdu.

1017. Item, ly atre fis monssaingnor Watier, le senissal de Preit, fut nomeis messires Werys de Preit. Ilh out trois fis et trois filhes. Ly ainsneis fut nomeis Gilhe de Preit; ly secon, Johan; et ly tir, Henroie ly Cuziens.

1018. Do dit Gilhe de Preit n'est ensy que rins demoreit, car sy enfans, Stassin de Preit, Gilhon de Preit et tos ly atres de ceste coystie, ilh sont mors sains hoirs, excepteit Johan le Hardy de Saint Servais, qui out leure sereur. Chis out dois fis: Johan, qui fut canones de Saint Denys, Stassinet le Hardy, qui morit sains hoir, damoysselle Marie, qui est meire de monssaingnor Johan le Beal, chevalier, et de Gilhe le Bealz, canones de Saint Martien, maintenant vivans, et une atre, nomée damoysselle Johanne, femme à maistre Henris des Viergnes, le notaire.

1019. Item, de Johan de Tilves, secon fil monssaingnor Watier, le senissal de Preit, furent alcons hoirs marles, dont je ne suy nint informeis. Mais ilh out trois filhes, dont, del une, issit ly femme Henry le Rat de Noevis, delle atre, ly femme Jakemars de Pousseur; et, delle tirce, ly meire Johan le Deable et ly grandamme Biertho de Horrion, le cangeure.

1020. Do dit Henry le Rat issirent Johan delle Ratier, cangirs de Liege, qui morit sains hoir, et damoysselle Maroie, qui fut femme à monssaingnor Jakeme Chabot, chevalier, maiieur et esquevin de Liege, dont y sont ly hoirs, desqueis mention est chi devant faite, en capitle parlant des filhes monssaingnor Breton ly jovene de Warous, en liu où ly genealogie monssaingnor Conrar de Viseit est escripte. Et, tant que des atre dois sereurs, filhes do dit Johan de Tilves, n'est rins demoret dont besongne soit de nostre mateire à prolongier. Et croy que Quarteaz, qui fut uns honorable borgoys, dont sires Nycol Quarteaz, canones de Saint Crois, et messires Gerars Quarteaz, chevaliers, ses cuziens, issirent en deskendant, fuist fis do dit Johan de Tilves, qui portoit lozengiet d'argent et d'azure, à on comble de geules, et en comble on lupar d'argent passant.

1021. Item, de Henroye le Cuzien, issirent Johan Henroie et Henrys, ses freires; doqueil Henry ilh n'est rins demoreit, ja soice qu'il awiste une filhe mariée à monssaingnor Pire de Chinvilhe, chevalier.

Mais ly dis Johan, prist à femme damoyselle Angnès de Coir, filhe saingnor Jake de Coir, esquevin de Liege, dont messires Ystasse Frans Hons out l'atre, qui avoit esteit femme à Johan Houweneal, et Jakemiens Festeaz out la tirce. Do dit Henroie issirent Jakemars de Coir et Johan, ses freires, qui soy mariat az dois filhes Olebrek, le venir, et sy petitement soy sont gouverneis que leurs hoirs en sont deshyreteis. Ors retournerons az trois filhes do dit monssaingnor Wery delle Preit, qui furent sereurs à Henroie le Cuzien.

1022. Ly ainsnée des filhes monssaingnor Wery de Preit fut meire de monssaingnor Wery de Graz, chevalier, qui prist les armes de part sa dicte meire, assavoir lozen: get d'argent et d'azure, à on comble de geules, à on lupar d'or passant en comble; et de ce lupar ilh brisat de part son peire, qui estoit do linage de Graz, deleis Montengnéz, assavoir de Vellerous del coystie des Allemans. Ilh soy mariat à Flemale, à une damoyselle qui estoit do linage de Hamale et de Hozemont; s'en fut Wilhelmes de Graz, qui out pluseurs enfans, assavoir Wery, Wilhelme, Colart et un moyne de Hastirs.

1023. Do dit Wery n'est demoreis nulle hoir legitime; se fist son hoir de Johan son fil natureit, et le mariat alle filhe Jakemien Nykar de Huy, engénrée en la filhe monssaingnor Hustien d'Oiion, chevalier, dont ilh est une filhe, mariée à Jamoton d'Eyke.

1024. Item, ly dis Wilhelmes, freires do dit Wery, soy mariat à Huy, à damoyselle Yde, filhe do bon homme d'armes nomeit Johan d'Ehyen; s'en sont pluseurs enfans, assavoir Johan d'Ehiens, canones de Huy, Johan de Graz et Ernus, qui point nu sont marieis, et trois filhes seculieires, dont ly une est mariée à Johan de Vileir az Tours, castelain de Sprimont, ly atre à Ameile de Vellerous, et ly tirce à Johan de Verboy, et toutes ont planteit d'enfans. Encors y at dois sereurs, qui sont nonne à Myle.

1025. Item, Colars, ly atre freires, soy mariat alle filhe Hombier de Chodron; s'en est une filhe tant soilement, mariée à Johan, fil Henry le Dameheal de Flemale. Et, quant Colars fut veves, ilh s'acointat d'une costire et l'espozat; s'en sont pluseurs enfans.

1026. Item, ly seconde filhe monssaingnor Wery de Preit fut mariée à monssaingnor Anthone de Fointaines, chevalier; s'en fut une filhe, nomée Angniete, qui fut mariée à saingnor Johan de Coir, esquevin de Liege, de laqueil ly generation est escripte chi devant, en capitle parlant des hoirs le conte Gerar de Hozemont.

1027. Item, ly tirce filhe monssaingnor Wery de Preit fut assy mariée à Fointaines; s'en issit uns suffisans borgois, nommeis Werys de Fontaines, qui morit sains hoir et est ensevelis en l'engliese des Freires Precheurs à Liege. Ors retournerons al atre freire do dit monssaingnor Wery, qui fut ly tir fil monssaingnor Watier, le senissal de Preit.

1028. Chis fis fut nomeis Johan de Huy, dont chilh de Colonster issirent; s'en trovereis la genealogie chi devant, en capitle parlant des filhes monssaingnor Rigaut de Beariu.

1029. Puyque nos avons declareit les hoirs marles de monssaingnor Wery de Hambrouk, engenreis en la filhe monssaingnor Breton le viez de Warous, nos retournerons à ses dois filhes.

1030. Ly ainsnée des filhes monssaingnor Wery de Hambrouk fut mariée al saingnor de Wytenhemme, qui estoit des Schavedriez et portoit d'or à une crois dentée de geules, et cryoit Julemont; s'en furent dois fis, assavoir messires Ernus, sires de Wytehemme, et Gilhes. Do cesty Gilhe ne de ses hoirs, je ne suy nint informeis.

1031. Mais ly dis Ernus out quatre fis chevaliers et une filhe, nomée Magriete, qui fut mariée à saingnor Gilhe de Noevis. Ly fis furent nomeis messires Ernus de Wytenheme, messires Hermans de Charneur, messires Symon de Julemont, et messires Gerars; doqueile monssaingnor Gerart je ne cognoy les hoirs.

1032. Do dit monssaingnor Ernut issirent chilhe de Wytenhemme et une filhe, dont messires Johan Fraypont issit, qui morit sires de Wytenhemme. Et, par tant qu'il n'out nul hoir et ly terre alat fours do linage par acqueste, assavoir al freire bastart le duk Johan de Braibant dierain trespasseit, est cheste branche perdue entirement.

1033. Item, de monssaingnor Herman de Charnoir issirent chilh d'Asse deleis Julemont, car ilh fut gransires de monssaingnor Johan d'Asse, chevalier, de Symon d'Asse, de leurs freires et sereurs, dont y sont ly hoirs.

1034. Item, ly tirs, qui fut nomeis messires Symons, fut peires de monssaingnor Symon le Polen de Julemont, qui soy mariat alle sereur monssaingnor Lowy d'Uffey, chevalier, esquevin de Liege; s'en fut uns fis et plusieurs filhes. Ly fis fut nomeis messires Symons de Julemont. Ilh soy mariat à Liege, alle meire monssaingnor Johan de Kemexhe et morit sains hoir.

1035. Ly une de ses sereurs fut mariée à monssaingnor Wery, saingnor de Harezéez; s'en fut plusieurs enfans, assavoir messires Lowys, sires de Harezéez, maintenant vivans, et sires Rollans, canonnes de Saint Poul à Liege, et trois sereurs, dont ly une fut mariée al saingnor de Bearen, s'en est ly bons sires de Bearen, maintenant vivans; ly atre fut mariée à Henry de Bastongne, s'en est messires Gerars de Bastongne; et ly tirce fut mariée à Ysier, s'en est Philepars d'Ysier, qui n'at nul hoir et mal ressemble ses bons devantrains.

1036. Item, ly sires de Bearen soy mariat, promirement, à une des filhes de Hermalles, sy n'en remeist nul hoir; et, secondement, est ilh remarieis alle sereur do saingnor de Rayvels, dont ilh at on fil, nomeit Michier, et une filhe, nommée Johanne. Ly fis at à femme damoysselle Johanne, filhe jadis monssaingnor Wilhelme Prost de Melins, saingnor de Thines; et la filhe est mariée à monssaingnor Wilhelmes de Thines, freire de la dicte damoysselle Johanne, sy que ly dois enfans de Bearen ont cest dois enfans de Thynes. Et, de noveal, est ly dis Michiez mors sains hoir.

1037. Item, ly dis messires Gerars de Bastongne est marieis al sereure monssaingnor Englebiert delle Marche, saingnor de Lovirvaz et de Walehen; s'en at des beaz enfans.

1038. Item, ly dis messires Symons de Julemont, ly juvenes, out plusieurs sereurs, dont lesalcones orent hoirs et les atres non.

1039. Item, de damoysselle Magriete, filh monssaingnor Ernut, saingnor de Wytenheme, qui fut mariée à saingnor Gilhe de Noevis, furent dois fis, assavoir messires Ernus de Charneur et Hermans de Charneurs. Chis dois freires prisent les armes de Juleymont de part leur meire; mais, do dit Herman, je n'ay nulle connaissance.

1040. Do dit monssaingnor Ernut issirent monssaingnor Gilhes de Charneurs, qui fut mors alle siege de Bovinge, et messires Guys de Charneur, canonnes et chantres de Saint Lambier, et damoysselle Mabilhe, qui fut mariée à Skendremale et morit sains hoir.

1041. Ly dis messires Gilhes soy mariat alle filhe Watier Ponée de Jopilhe; s'en furent plusieurs enfans, desqueis mention est faite en capitle parlant chi devant de monssaingnor Ameyle de Lexhy et des onze filhe monssaingnor Ulry de Bonbais. Ors retournerons alle seconde filhe monssaingnor Wery de Hambrouk, qui fut sereur alle damme de Wytenheme. Elle fut mariée à Fleron; s'en issit messires Rennewars de Fleron, ly et ses sereurs, et messires Thirys de Fleron, qui prist à femme la sereur monssaingnor Johan, le viez voweit de Liers, et si freires et sereurs, dont ilh at esteit et est encor gran generation.

1042. Nos avons, chi devant, recordeit, selonc nostre aprise, ordinément la generation de monssaingnor Breton le viez de Warous, qui fut secon fis de monssaingnor Houwe de Lexhy, et assy des siies fis et dois filhes do dit monssaingnor Breton; sy nos covint durement recoleir, por entendre az dois atres fis do dit monssaingnor Houwe, qui furent freires do dit monssaingnor Breton, assavoir à monssaingnor Henry de Crescengnéez et à monssaingnor Badout de Vorouz.

1043. Chis messires Henrys de Crescengnéez out trois fis chevalier. Ly uns fut nomeis messires Ystasse, qui fut peire de Wilhelme de Crescengnéez, qui soy mariat alle filhe le damme de Hemmetines, dont ilh issit ly secons messires Ystasse, esquevins de Liege; doqueile vos trovereis les hoirs chi devant, en capitle parlant de monssaingnor Libier Crepon d'Othéez.

1044. Item, delle atre freire issirent, en deskendant, Stasse de Crescengnéez et Ernus, ses freires, esquevins de Tongres. Et, do tir fil do dit monssaingnor Henry, je n'ay point de connaissance.

1045. Item, messires Badouz, freire al dit monssaingnor Henry de Crescengnéez, qui fut quars et dierains fis de monssaingnor Houwe de Lexhy, out on fil, nomeit messire Ameile, doqueile je ne truwe rins en escripte. Et c'est ly fien et conclusion de chez et celles dont je ay eüt connaissance, qui sont deskendus do bon prestre de Warfezéez et do Riches Moulmier d'Awir, puy l'espasse de trois cens ans ou environ, assavoir puy l'an de grasce mil cent et dois ans juxes al an mil trois cens quatre vins et diiez owit ans, que chis traitiez fut delle tot conclus.

Jacques de Hemricourt